

वेष्णवधर्मके सब तरेबके पुस्तक हमारे यहांसे मिलेंगे.



॥ श्रीद्वारिकेशोजयति ॥ ग्रन्थाङ्क ३७



श्रीमद्गोस्वामी श्रीषालकृष्णलालजी महाराजनां श्रीबहुजी
महाराज श्रीगोस्वामिनी श्रीसौन्दर्यवती बहुजी
महाराजभ्रीनी खासा आझायी

श्रीकांकरोलीस्थ, श्रीमद्गोस्वामी

श्रीगिरिधरलालजी महाराजके

॥ १२० वचनामृत ॥

द्वितियावृत्ति सं. १९९९ प्रत. १२५०

या प्राचिन हस्तलोखीत ग्रन्थने बीजा ग्रन्थो साये
मेळवी, शुब करी, संशोधन करी,

छपावी प्रसिद्ध करनार

लल्लुभाई छगनलाल देसाई.

ध्यवस्थापक:- " श्रीमक्तिग्रन्थमाला " कार्यालय.

कालपुर, टेमलापोल, नं ३३६, —अमवावाद.

घो 'नवप्रभात' प्रिन्टींग प्रेसमं शा. मणीलाल छगनलाले छाप्युं.

ठे. घीकांटा रोड—अमवावाद.



न्यो. रु. ५-०-०



240 / 14
36

अथ आराधनासूची प्रथम अध्यायः

१ विविध धोण तथा पद अत्रेक आ. १	१०॥	२१॥	४२ पुष्टिप्रवेक ०) ॥	४३ क-नासिद्धिषु आ. ३	७
२ विविध धोण पद अत्रेक आ. २	१०॥	११॥	४४ मन्त्राण्यु अञ्जराती टीका आ. १		५)
३ श्री गुरुदेवकृष्णा धोण तथा पद	१)	४५			४)
४ श्री नित्य नियमना पाठ तथा धोण	०१॥	४६	२ सेकश्रीकृष्णु " अरित्र "	आ. २	२)
५ श्रीगोपूजनासूचनां २४ वचनाश्रुत (अञ्जराती)	०१॥	४७	वसन तथा धमरानां हीर्तन		२)
६ प्रारम्भकाले धोण	०१	४८	श्रीवक्ष्य अरित्र		३)
७ अञ्जरा आठसु तो वाच्ये	०) ॥	४९	श्रीपुरोत्तम सकलनाम स्तोत्र अ. टीका		२)
८ कालित पोषण	०१	५०	श्री परानाशानसर्ग हीर्तना तथा श्रीगोपूजधीकृष्णनां २५ वचनाश्रुत		०१॥
९ श्रीगोवर्धनासूचनु आठसु	०१॥	५१	सरद पुनम-अरमा अत्रेक		३)
१० श्री पोषण अ-श्री अञ्जराती टीका	२	५२	ना- श्री मोठी साधकनां विना इरेकना		०१॥
११ श्रीगुरुदेवकृत विवर्गि	०१-	५३	तन्वाय-दीप नियम आचार्य प्रकरणु		०१
१२ श्रीगोपूजनासूचनां २४ वचनाश्रुत (मन्त्राणां)	०१॥	५४	क-नासिद्धिषु वि-दीर्मा		०१
१३ श्री अष्टशुभकाराण कृत ३२ वचनाश्रुत	०१	५५	श्रीनाथश्रुते अ-पूज्यं प्रतिदास		०१॥
१४ नित्यनियमना ३८ पाठ मूण मोठा अञ्जरा	११	५६	श्रीगुरुदेवकृत पाणवीणा, सरस गीता, सुवाच्यान् पाठवपद		०१
१५ ८४ अक्षयणी वार्ता अञ्जराती	३१॥	५७	श्रीकृष्णु हीर्तनमाला		०
१६ श्रीमधुना स्तोत्र रत्नाकर	१)	५८	महापुरुषाव रसभानश्रुता-आश्रीन हीर्तना		०१॥
१७ श्री स्वयंभूवर्णन (२४० श्लोकाणां)	५)	५९	कनकासिंघेने प्रतिदास		०१
१८ हीर्तनसंकेत आ. १ श्लो वर्षोत्सवो हीर्तन ३००० हीर्तनने भवान् संकेत	५	६०	राक्षस-आभ्यापो इकप्रकरणु श्री सुशोधिनी अञ्जराती टीका		५)
१९ श्रीवक्ष्यभाष्यान अणुपुरेण मन्त्राणां	०१	६१	श्रीशोपीगीत-सुशोधिनी अञ्जराती		०१॥
२० श्री यमुनाश्रुतां ४० पद (मन्त्राणां वनवाचा, नित्यशीला साधे	०१	६२	श्रीवक्ष्यना-शोराशी केशपरिक्रमा		२)
२१ वनवाचा	०) ॥	६३	श्रीमन्मन्त्र कथनाकार भावना		०१
२२ श्रीगिरिशाल अणु अ-श्री सटीक	०१॥	६४	श्रीनाम-निवेदनमंत्र निरूपण		२१॥
२३ श्रीगोपूजकृतनु कृतनअरित्र (श्री भाजनां भाजा प्रसंग साधे	४)	६५	श्रीदीनता आश्रयनां पद. ३०० हीर्तन.		०१॥
२४ श्रीगिरिशाल कृत पडे सिद्धापत्र अ. टीका	३	६६	श्रीमधुदेवकृत(श्रीटी)नी आठसु वार्ता छपाम छे.		०१
२५ तीर्थयात्रोने हेवाव (आभा दिङ्कृतानम्य आदेवां जेष्णवसुप्रदायनातीर्थीनीसु-पूज्यं साधिति	५)	६७	कुडा नित्य नियम		०१
२६ कृतवसिष्ठु मन्त्राणां (आश्रुत २७)	२)	६८	कालिपोषण अ. टीका		०१॥
२७ नित्यवार्ता. धरवाता. ८४ जेहक अरित्र	५)	६९	पुष्टिदर्शणु श्री. जे. आ. साध कृत		१)
२८ श्रीसर्वोत्तमस्तोत्र सटीक	०१	७०	श्रीनदरबाहल आठ रंजी वित्र		०१॥
२९ श्रीपुरोत्तम सकलनाम स्तोत्र	०१	७१	" ना छपनलोअनु वरुन		०१॥
३० श्रीवक्ष्यश्रुत, अञ्जराती भाषान्तर	०१॥	७२	श्रीपुष्टिमाजगीय सेवा प्रकाश		२१॥
३१ श्रीमन्मन्त्र अञ्जराती भाषान्तर	०१॥	७३	श्रीमन्मन्त्रा इहेन		२)
३२ पञ्चाश्रुत ०१, ३३ राक्षस-आभ्यापो	०१	७४	श्लो आठसु		३)
३३ दीनता आश्रयनां पद	०१	७५	नित्य नियमना ३८ पाठ राक्षसादी आश्रुति		११
३४ श्रीगिरिशालकृत मकाराण अशरीलो वाणानां १२० वचनाश्रुत	५)	७६	हीर्तनसंकेत आ. ३ नित्य हीर्तन		५)
३५ भक्त्याभावन वैष्णवनी वार्ता अनेक दीपण्यु, साधे अञ्जराती टीका-आश्रुति ४ धी	४)	७७	२४ वचनाश्रुत, नामावली स्तोत्र		०१॥
३६ नित्य नियम ५१ अ-श्री मूण मोठा अञ्जरा	११	७८	श्रीसर्वोत्तम स्तोत्र अन्वयार्थ टीका		०१
३७ श्रीकान्नासकृत मकाराणानां ५२ वचनाश्रुत	१)	७९	" ४० पद, कृष्णायम		०१
३८ श्रीकारुणानासूचनां आठसुनी वार्ता	१)	८०	श्रीवक्ष्यभाष्यान विचारधारा		०१॥
३९ श्रीसुरदासकृतनु कृतन अरित्र	१)	८१	अरित्रावली (श्रीनाथकृत श्रीवक्षुनाकृत)		०१॥
४० श्रीगोवर्धनासूचनां २४ वचनाश्रुत	१)	८२	अशरी पूर्ण प्रदेकनी यात्रा		०१॥
४१ श्रीगोवर्धनासूचनां २४ वचनाश्रुत	१)	८३	नित्यशीला		०) ॥
४२ श्रीगोवर्धनासूचनां २४ वचनाश्रुत	१)	८४	श्रीवक्षुनाकृतना ४१ पदनी अ. टीका		११

123258

રાજકીની આજ્ઞાથી ઉત્તેજિત થઈ આ કાર્ય મેં શરૂ કર્યું. ત્યારબાદ પોષ કૃષ્ણ ૬ આપમી
 ગુજરાતમાં જાણુસર સુકામે બિરાજતા, તે વખતે સુદિત થયેલાં અસુક પૃષ્ઠ આપમીને
 આપ્યાં, જે સહર્ષ વાંચતા ગયા. તે પછી માઘ કૃષ્ણ ૧૧ આપમી પેટલાઈ સુકામે બિરાજતા
 હતાં તે વખતે આપે સતત ઉત્કંઠા ઘર્ષાવી પુસ્તકની માગણી કરો આજ્ઞા કરી કે “પુસ્તક કવચતયાર
 હોવંગો ?” મેં વિનંતીકરી કે રાજ. “મક મહિલા મરકી વેર છે.” તે વખતે પણ બીજાં સુદિત
 થયેલાં પૃષ્ઠ આપ્યાં, જેને પુસ્તક તૈયાર થતાં સુધી આ પૃષ્ઠ બરાબર સાચવી રાખવા
 ખવડાને આજ્ઞા કરી. આ બધું જો સૂચવે છે કે, આપમીને પુસ્તક પ્રકટ કરવાની ઉત્કંઠ
 ઘણા છે આ વખતે બીજા કેટલાક અન્ય છપાવવા મેં આપમીને વિનંતીકરી તો પોતે
 સહર્ષ તેનો સ્વીકાર કર્યો છે, તેથી આજ્ઞા છે કે સમયાન્તરે જો આજ્ઞાના વૃક્ષને જળ
 સિંચન થશે

આ અન્ય પ્રગટ કરવામાં મારા તરફની લેશમાત્ર કૃતિ નથી, તેમ કંઈ નવિનપણું
 પણ નથી, પરંતુ ખાસ શ્રીમાન ઓવહુલ મહારાજશ્રીની કૃપાથીજ આ અન્ય સુદિત થયો
 છે તેથી વેષ્ણવ વાચકવૃદ્ધે આપમીની અતુલ કૃપા માનવી જોઈએ જોમ વિનંતી છે.

મુખ્ય માત્ર બહુને પાત્ર છે. તેથી આ અન્યમાં રહેલી અશુદ્ધિ કે ઉણપ તરફ લક્ષ
 નહિ આપવા વિનંતી છે, પણ આ અન્ય જેટલો ઉપયોગી નિવડશે તેટલો મારા મનની
 ચાર્ચકતા માત્ર હું અને વેષ્ણવોને વિનંતી કરું છું. કે આ અન્યના વાંચન સમયે ઘાસને
 સંભારી શુધ કરશે એવી આજ્ઞા છે.

દોષોત્કેષ,
 શાસ્ત્રન કૃષ્ણ ?
 સં. ૧૯૫૮
 રીન્વીરામ, અમદાવાદ.

શ્રી. આપનો કૃપાકારી
 શાસ્ત્રાનુક્રમ વેષ્ણવ
 લલ્લુભાઇ છમનલાલ દેસાઈના
 જયશ્રીકૃષ્ણ.

બીજી આવૃત્તિ વિષે

જો પુસ્તકની બીજી આવૃત્તિ વીસ વર્ષના લાંબા ગાળે પ્રગટ થાય છે ઘણાં વર્ષથી વે. સમાજ
 તરફથી રહ્યો હતો પણ કુરોપીય મહાભિષેષ્યુ યુદ્ધમાં ઝાગળા, શાહી, પ્રો-ટીંગ, બાર્મ-ડીંગ, બધું
 સખત મોધુ તેથી નવી આવૃત્તિ કરવાની લેશ માત્ર હજી નહોતી પણ અમારી શ્રુષ્ટીના
 બનેક વે ની સતત માગણી હતી. તેથી પ્રેરાને આ નવી આવૃત્તિ છપાવી છે.

દુનવી દોહત કરતાં આવાં બંધિતજ્ઞાનેનાં પુસ્તકોના સંમહ એક કીંમતી દોહત છે.
 જોને માની આવાં પુસ્તકોના સંમહ પ્રતિ આપનો ઉદ્ધાર હાથ લાંબાવવા વિનતી છે. તો આપ
 બને તેટલાં વધારે પુ. ખરીદી, આકંઠ કર્ષ, વધુ બાહકો મેળવી મદદ કરશે. એજ પ્રાર્થના.

શ્રી:—લલ્લુભાઇ છમનલાલ દેસાઈના.

જયશ્રીકૃષ્ણ.

॥ श्रीकृष्णाय नमः ॥

॥ श्रीद्वारिकेशो जयति ॥

॥ श्रीभक्तिपथपर्वतकाय नमः ॥

॥ श्रीभक्तिपथमहाकाय नमः ॥

॥ अथ श्रीमद्गोस्वामी श्रीगिरिधरलालजी महाराजके ॥

॥ १२० वचनामृत लिख्यते ॥

[वचनामृत १ लो.]

एक समय श्रीमद्गोस्वामी श्रीपुरुषोत्तमात्मज श्रीगिरिधरलालजी महाराज आप प्रसन्न होयके मिति संवत् १९३३ के पोष शुक्ला १० भोमवार श्रीसंखेडावारे दासानुदास अनुचर अमथा खुशालदासको बेटा पास बैठयो हतो आपने कृपा अनुग्रह करिके पास राख्यो हतो तासों आपने परमकृपाकरिके वचनामृत लिखवेकी योग्यता देके आज्ञा करी सो याने लिखे ॥

सो वचनामृत प्रथम लिख्यते ॥ पहेले दिन रात्रिको आप पोढे जा बिरियां आप अर्यंत प्रसन्नता समय आज्ञा करी जो श्रीरामचंद्रजीने चार कार्य पुष्टिके करे हें ॥ तब दासने बिनती करीके कृपानाथ कोन कोनसे सो कृपा करिके कहिये ॥ तब आपने आज्ञा करी जो प्रथम तो समुद्रपें पाज बांधी ॥ सो पेहेले तो आज्ञातें सब लोक पाषाण धरिवे लगे सो तोहु डुबी गये तब आप अपनो प्रमेयबलसों प्रेरणा करीके एक पाषाणपें “रा” शब्द एक पाषाणपें “म” शब्द लिखायके जलके भीतर आज्ञा करिके डराये सो ठेरि गये ॥ या भांतिसो अनेक पाषाण राम नाम शब्द जोडिके डारे सो ठेठ ताइ स्वेत बांधी ॥ एसो प्रभुनें अपने नामको प्रताप देखायो ॥१॥



ओर दुसरो कार्य ॥ जो सवरी भीलडी जातिकी हती ताके जुठे बेर आप आरोगे सो ए कार्यहु मर्यादाको नांही हे ॥ जो आप पुरुषोत्तम तथापि क्षत्रिकुलमें प्रागट्य ओर ए जातकी भीलडी ताके जुठे बेर अरोगवेको कैसे संभवे ॥ तांहां स्नेहवात्सल्यता निरुपण मानिके स्नेहके वश

होगये सो पवित्रताको विचार न कर्यो ॥ जा बिरियां ए बेर बीनती सा चाखी देखती जो खट्टो लगे सो तो खाय जाय ॥ ओर मीठो लगे तब चोंकी उठे अरे! ए तो मेरे प्रभुजी लायक हे ॥ सो बोहोत दिना तांइ श्रम करिके भेले करि राखे हुते सो इनके स्नेहके वश एक समय पायके श्रीरामचंद्रजी ईनके घर पधारे सो ॥ ईनके घरमें ओरतो पदार्थकलुहतो नाही ॥ ओर वे बेर एक तुंबीमें भेले करि राखे हुते सो केवल दैन्य करिके लाइ सो आप अंतर्यामी, ईनके स्नेहके वश बोहात रुचि करिके आरोगे ॥ ओर बोहोत सराहना करी सो ए कार्यहु पुष्टिको कर्यो हे ॥ २ ॥

अब तिसरो कार्य लिख्यते ॥ जो गौतम ऋषिकी स्त्री अहल्या ॥ सो शिला होयके पडि हुती अपने पतिके श्रापते ॥ सो श्रीरामचंद्रजीके चरणारविंदके स्पर्श मात्रतें दिव्य देहधरिके सुंदर स्त्री होयगई सो ॥ ए चरणारविंदको प्रताप जताये तासों ए हु पुष्ट कार्य हे ॥ ३ ॥

ओर चोथा कार्य ॥ जो समस्त अयोध्याकुं वैकुण्ठमें पहोंचाइ ॥ जो एक संग सब जीव वैकुण्ठप्राप्ति योग्य सो न होइंगे परंतु यह पुष्टकार्य कियो ॥ ताको यह प्रकार ॥ जो जीव तो दोषवन्त केसोहु होय परंतु प्रभु दयाल एसेइ हे जो अपने प्रमेयबलको प्रताप जतायो ॥ जो जा भूमि विषे आपके चरणारविंद धरे हे ता भूमिके जीव विमुख केसे रहे ॥ ये चरणारविंदको माहात्म्य जतायो ॥ तासुं एहु पुष्टिको कार्यहे ॥ सो ए चार कार्य पुष्टिके करे हे ॥ तासों जीवको सदा सर्वदा श्रीप्रभुजीको भरोसो द्रढ करिके राखनो श्रीप्रभुजीकुं कलु अजान नही हे ॥ ओर ॥ भुवकी रेनु तरैया नभकी घनकी बुंदेपरत लखाय ॥ वृक्ष पात मात्र छोटे बडे जीवकी व्यथावेदनाकी खबर हे, जो खबर नहोती तो आपको नाम अंतर्यामी काहे ते केहेते तासों साचे अंतर्यामी हे ॥ सो जीवको हितहो करेगे यह निश्चय करि श्रीप्रभुजीके भरोसे निरंतर रहेनो ॥ तासों सकल कार्य सिद्ध होइंगे ॥ यामें एक पूर्वपक्ष हे ॥ जो सब अयोध्याके जीवजंतु मात्रकुं तो

वैकुण्ठ प्राप्ति भइ ओर अपने पिता राजा दशरथजीकुं स्वर्गवास दीनो सो कर्यो ॥ ताको प्रकार कृष्णदास मेघनकी वार्त्तामें प्रसिद्ध लिख्यो हे ॥ ओर ए कार्य मर्यादा लायक हते ॥ सो मर्यादा ही राखे एसे आज्ञा करिके आप पोढे ॥ इति श्रीगिरिधरलालजी महाराजके वचनामृत प्रथम संपूर्ण ॥ १ ॥



 [वचनामृत २ रो] 

अब दुसरो वचनामृत आप आज्ञा करत हे. जो फेरि रात्रिकुं द्वारजी भंडारी तथा रामकुंवारजी आदि आपके पास बेठे हते तब प्रसंग चल्यो जो सेवा कोनसी उत्तम हे ? तब कोउ कहें जो श्रृंगार ओर भोग धरेइ बिराजे रहे तासों समय भये श्रृंगार हु विजय करनो ओर भोग हुं सरावनो सो उत्तम हे ॥ तब आपने आज्ञा करि जो श्रद्धापूर्वक प्रीतसों जो सेवा करे सो सबही उत्तम हे ॥ जामें श्री प्रभुजीको सुख विचारिकें स्नेह सों सेवा करे सोइ सेवा मुख्य हे ॥ इति वचनामृत आज्ञा करिके आप पोढे ॥ इति श्रीगिरिधरलालजी महाराजके द्वितीय वचनामृत संपूर्ण ॥२॥

 [वचनामृत ३ रो] 



अब तीसरो वचनामृत आप आज्ञा करतहे जो आप उत्थापन भोग धरिके तिबारिमें बिराजे हुते तासमय आज्ञा करी जो श्री दाउजी महाराजने सात स्वरूप पधरायके मनोरथ करी अन्नकुट आरोगाये तब एक महिनामें साठ साजनये अंगीकार भये ॥ तब दासने विनति करि जो नित्य दोय साज सांझ सबेरे पलटके बांधते होइंगे ? तब आपने आज्ञा करि ॥ जो दोउ साज भेले बांधते ॥ ताको कारण जो श्रीगोस्वामी बालक सब न्यारे न्यारे मनोरथ करे तब दिन बोहोत लगे ॥ जासों एसे ठेराइ जो नित्य दोय साज तरा उपरी बांधे ओर वस्त्राभरणादिक हुं या रीतिसों कोउको कलु वस्त्र, कोउको कलु आभरण, एसैं करिके सबनके मनोरथ श्रीद्वारिकाधीशने अंगीकार कीये ॥ ओर श्रीद्वारिकाधीशके चर्णस्पर्शके लिये

श्रीदाउजी महाराजने श्रीदादाजी महाराज सों विनति करी जो एते बालकको समूह फेरि कबध्री भगवद् इच्छा सो भेलो होयगो ॥ तासों हमारी यह विनति इतनी मानी चइये ॥ जो सब स्वरूपनकुं श्रीद्वारिकाधीशके चर्णस्पर्श भये चाहीये ॥ सो वा समय आपनें कही जो बिचारिके कहेंगे ॥ फेरि ध्रोजीद्वार शृंगार करवेंकू आप पधारे, तबहु विनति करी ॥ दस पांच बालकनकी संमतिसों तब आपनें आज्ञा करो जो आपको मनोरथ श्रीप्रभुजी सिद्ध करेगें ॥ ए बात फेरि एसे ठेरी जो एक दिवस उत्थापनतें लगाय सेनभोग आवे तहां तौइ सबनकुं व्यवहारवारेकुं तथा बिना व्यवहारवारेकुं चर्णस्पर्श होइंगे ॥ सो कार्तिक शुक्ल पंचमीको समग्र बालकनको लेके श्रीदाउजी महाराज श्री कांकरोली पधारे ॥ सो वा दिन ग्वाल मंडलीके श्रीठाकुरजीको अन्नकूटके दर्शन करे ॥ फेरि कोइ तलावमें न्हाये, कोइ बैठकमें न्हाये, कोइ श्रीकाकाजीके कोठामें न्हाये, कोइ हवा मेहेलमें न्हाये, कोइ गादीजी आगे चोकमें न्हाये, ओर अस्पर्शमें होय उत्थापनतें लगाय सेनभोग आवत पर्यंत सब श्रीगोस्वामी बालकनने चर्णस्पर्श करे, भोग धरे, फेरि सांझकुं खाइ, यहांइ अरोगे, खाइ अरोगीके श्रीदाउजी महाराज सबनकुं लेके श्रीजी द्वार पधारे ॥ फेरि दुसरे दिन श्रीवहु बेटी पधारे सो सबनकु याही रीतिसों चरणस्पर्श भयो ॥ दुसरी ठोर तो विना व्यवहारवारे बालक तथा बहुबेटीको चर्णस्पर्श न भये ॥ ए वार्त्ता भीतरिया बालकृष्णजी बाबा हमारे घरके भितरीआके मुख तें सुनी, सो वे वा समय हते वाकुं खबर हतो । सो वे ओरहु प्राचीन वार्त्ता कहेंत, श्रीजीके आभरणकी सेवा वाके माथे हती, ओर काकाजी श्रीव्रजभूषण महाराजके आगेवे सेवामें न्हाते, सो हम देखे हें सो इतने वर्ष श्रीद्वारिकाधीशकी सेवा करी एसे सेवक मोलने कठीन हे ॥ एसी सराहना सेवावारेकी श्रीमुखसों आप करते ॥ जो सेवा करे ताके भाग्यको पार नहीं ॥ इति श्रीगिरिधरलालजी महाराजके वचनामृत तृतीय संपूर्ण ॥

 [वचनामृत ४ थो.] 

अब चोथो वचनामृत आप आज्ञा करतहे जो श्रीगिरिधरलालजी महाराज भवाइवारे जाको जन्म दिन कार्तिक वदि ५ को आवे हे ॥ जिनकी दिनचर्या आपने आज्ञा करि सो लिख्यते ॥ श्रीद्वारिकाधिप आसोटिया बिराजते सो जलको उपद्रव भयो, तासों श्रीकांकरोली पधराये ॥ सो आसोटियासों श्रीप्रभुजी पधारे सो जलके उपद्रवसो मार्ग न पायो तासों आसोटियाके पास देवल मगरी हे तापें तीन दिन बिराजे ॥ तापीछे जल उतर्यो तब जुनी कांकरोलीमें श्रीचतुर्भुजजीके मंदिर पास दो कोठा हे तहां बिराजे ॥ ओर हालये मंदिर हे जहां ता पाल तथा मगरी तथा झाडो बहोत हती सो जलको सुख तथा जगे सुंदर देखी सोइहां मंदिर सिद्ध करायो ॥ आपकी वेठक तलाव आडी राखी तामें आजकाल सोनी काम करे हे ॥ शुभ मुहूर्त्त देखिके पधराये सो मंदिर में आज तांइ परम आनंद सों बिराजे हे ॥ ओर नइ वस्ती भइ ताको नाम गिरिधर गढ धर्यो हे ॥ सो ए श्रीगिरिधरलालजी कुं भवैया नचायवेको शोख बडो भारी हतो सो ताको कारण ये हे श्रीमहाप्रभुजीके बालक जो बात करे सो सब श्रीप्रभुजीको सुहावेहे ॥ सो कीर्त्तनमें गाये हे “ जो इनको कियो सबे कलु भावे ” । सो एसे वचन प्रमाण करे हे ॥ तासों श्रीद्वारिकाधीश आप श्री गिरिधरलालजीकी गोदमें बिराजीके भवाइ देखते ॥ सो बात तो आप जीनकुं कृपा करे सो जाने ॥ ओर द्रव्य बहुत देते सो कामेतीनकुं न सुहातो ॥ करज बहोत भयो जासुं ॥ सो श्रीजी द्वारमें बडे बालक वृद्ध बिराजते जिनको नाम याद नही हे परंतु इनके पास जायके कामेतीने विनती करीके आप वृद्ध हो तासों आप कलु कहे सके ओर हमत्थे चाकर लोक तथा दास ठेरे सो हमारो केहेवो बने नाही तासों आप पधारो तो ठीक सो जाइ दिना नाच होवेको हतो सो ए लोगनने कहेवाइ सो वे श्रीगोस्वामी श्रीजीद्वारसों पधारे ओर इहांतो भवाइको ठाठ जुरी रख्यो हे ॥ सो



देखिके साष्टांग दंडवत् करिकें कश्यो जो भलेइ ए बात सुखेन सों करिवो करो ॥ ताको कारण जो ए श्रीजीद्वारसों पधारे जिनकुं श्रीगिरिधरलालजीकी गोदमें श्रीद्वारिकाधीशके दर्शन भये सो देखिके कलु केहेवेकुं आये हते परंतु एसी लीला देखिके शिक्षा रूपी केहेवो तो भुली गये परंतु दंडवत करके पधारे ॥ आप जगावे तें लगाय पोढायवेकी सेवा कबहु चुकते नही ॥ ओर दुपेरीके सावकाश में ग्रंथसुबोधिन्यादि तथा भाषादि विचारते ॥ ओर रात्रिकुं कथा कहेते ॥ तामे बडो आनंदको दान भक्तनको करते ॥ तथा आपने किर्त्तन, हिंडोरा, वधाइ, धमार इत्यादिक करे हे ॥ जामेंकी वधाइ ॥ “श्रीलक्ष्मणवर ब्रह्मधाम काममूरत पुरुषोत्तम प्रगट भये श्रीवल्लभ प्रभु लीला अवतारी” ॥ ए वधाइ सब जगे प्रसिद्ध हे ॥ ओर हु होइगी ॥ ओर धमार ॥ “हरि खेलत ब्रजमें फाग अति रस रंग बढयो” ॥ ओर हिंडोरा “झूलत तेरेनेन हिंडोरे” ॥ दुसरो यमुना तट नव सघन वन कुंजमें हिंडोरना झूलत पिय प्यारी” ॥ ओर रासको पद “रास रच्यो श्रीहरि श्रीवृन्दावन कालिंद्रि तट” ॥ एसे कीर्त्तन कितनेक भिन्नत्व करे हे ॥ भिन्नत्व जो जामें अपनी छापनही धरीहे ॥ तासों काहुको खबर नही हैं ॥ सो ए श्रीगिरिधरलालजी महाराज एसे उग्र प्रतापी भये सो जिनके तेज प्रतापको पार नही ॥ सो कहां तांइ लिखे ॥ इति श्रीगिरिधरलालजी महाराजके वचनामृत चतुर्थ समाप्त ॥

 [वचनामृत ५ मो.] 



अब पांचमो वचनामृत आप आज्ञा करतहे जो ॥ धंधुका आपनें शरण लीनो ॥ तब दासनें विनति करी जो कृपानाथ कोन रीतिसों ॥ सो कृपा करिके कश्यो चाहिये ॥ तब आपनें आज्ञा करि जो एक समे आप (भवैइवाला श्रीगिरिधरलालजी) काठियाडके परदेशको पधारते सो मारग धंधुकारपें निकस्यो ॥ सो गामके बहार कुवा निपट खारो हतो सो तापें जायके म्याना बोल्यो और खवाससों आज्ञा करी जो जल लावो ॥ तब

गामके बाहर बनियाके छोरा खेली रहे हते इनसों पुछि जो कुवाको जल पीवे लायक हे ? ॥ तब वे छोरानने हांसि करिके कह्यो जे बोहोत मीठों हे ! जरूर पीयो ॥ तब खवास करवा भरिके लायो सो लोटी आपके श्रीहरतमें दीनी सो खारो निकस्यो ॥ तब आपनें आज्ञा करि जो कुवाकुं हम देखेंगे सो आप मेंनामेंतें उतरिके पधारे ॥ सो कुवाकु दृष्ट पथ करिके खवासको आज्ञा करि जो अब फेरी जल काढो ॥ तब फेरि काढयो सो जल मीठो निकस्यो ॥ सो वा कुवाको नाम हवाडेको कुवा कहते सो जल आप अरोगे ॥ सब संगके सेवक देहेलुवाननें पीयो ॥ सो अमृत तुल्य जल बोहोत मीठो स्वाद लाग्यो ॥ सो कुवा अद्यापीताँइ मीठो हे ॥ फेरि आपनें तो कुच करि दियो ॥ फेरि वे छोरा देखीके गाममें अपनें घर गयो ॥ सो सब घरके लोगनसुं ये बात कही ॥ सो बात सब गाममें फेलि गइ ओर सब लोक ए बात सुनके भेले होय के निश्चय करिके बडे आश्चर्यको प्राप्त भये ॥ वे सब लोक जैनमार्गी बनिया बीसा मोढ हते ॥ सो अब तो इनकुं बडी आसक्ति लगी ॥ सो आपकी तलास करिके पीछे पधराय लाये ॥ वे बनिया एक जातके सब साढेतीनसें घर हते ॥ सो सब वैष्णव भये ॥ सो उहां गाममें पधराये तांहां आपकी बैठक हे ॥ ओर श्राठाकुरजी श्रीश्यामसुंदरजी युगलस्वरूप बिराजे ॥ सो आपने सेव्य करिके पधराये हे ॥ सो स्वरूप अगाडी बल्लामें बिराजते सो बोहोत सुंदर प्राचीन स्वरूप हैं ॥ सो वे वैष्णव अद्यापी ताँइ हमारे घरके अनन्य वैष्णव हे ॥ तासों ऐ श्रीगिरिधरलालजी महाराजने स्वकिये ॥ जा दिनासों अद्यापताँइ धंधुकाके वैष्णव सब कलु कार्य यहांकी (हमारी) आज्ञा बिना करे नही ॥ ओर आपकुं भवाइको शोख हतो सो यहांहु जब भवैया आवते तब तमासो करे बिना पाछें न जाते ॥ तेसें धंधुकामें हु वे वैष्णव लोक आपकी बैठक आगे अद्यापिताँइ भवाइ करावे हे ॥ भवैया आवे हे सो बिना भवाइ करे बिना जावे न दे ॥ एसे टेकी वैष्णव हे ॥ सो

आप श्रीगिरिधरलालजी महाराजकी एसी अनेक वार्त्ता अनिर्वचनीय हे ॥
तामें संक्षेपसों कल्लु लिखी हे ॥ इति श्रीगिरिधरलालजी महाराजके वचनामृत
पंचम संपूर्ण ॥ ५ ॥

 [वचनामृत ६ तुं] 



अब छट्टो वचनामृत आप आज्ञा करत हे ॥ जो वैष्णवकुं श्रीगुरुदेव
तथा श्रीठाकुरजी उपर पुरो भाव राखनो ओर अन्याश्रय सर्वथा न करनो ॥
जो अन्याश्रय बडे बडे बालकनकुं भयो हे तो जीवसों तो होइ ही होय ॥
परंतु क्षण क्षणमें सावधान रहे तो बचे ॥ जो बालकनने अन्याश्रय हुं
क्यों ओर भगवद् अपराध हुं क्यों ताकों फल प्रसिद्ध भयो ॥ जो सिंहाडवारे
श्रीगोस्वामी श्रीगिरिधरजीने अन्याश्रय कीयो तथा भगवद् अपराधहुं कीयो
ताको फल भयो सो सब जगत्के लोकनने देख्यो ॥ एसो हे ॥ जो बडेनकुं
सताये तो जीवको कहा भार हे ॥ तासों अपराधतें तथा अन्याश्रयतें
क्षणक्षण प्रति सावधान रहेनो ॥ यह मुख्य शिक्षा हे ॥ इति श्रीगिरिधर-
लालजी महाराजके वचनामृत षष्ठ संपूर्ण ॥

 [वचनामृत ७ मो.] 



अब सातमो वचनामृत आप आज्ञा करत हे ॥ जो एक अवलचंडीकी
वार्त्ताकी आपने आज्ञा करी ॥ सो एक वैष्णवकी बेटी श्रावकको व्याही ॥
सो इनके घरमें गये पिछे तीन चार दिन तौ खायो नही ओर अपने
श्रीठाकुरजीको मिथ्री भोग धरती ॥ सो फोंउ न जाने एसे करती ॥ ओर
सांसु, ननंद कहे सो न करे ॥ ओर उलटो कार्य करें ॥ एसो चार पांच
दिन वाके घरकेनने दुःख भुक्त्यो ॥ पिछे वाको नाम अवलचंडि धरी के
एक न्यारी कोटडी करि दीनी वामें राखी ओर खानपानके विचारमें कोरो
अनाज करी दीनो ॥ सो वे बहोत प्रसन्न भइ ओर दूनी अवलचंडाइ करवे
लगी ॥ तासों वे अन्यमार्गीयसों इनको धर्म सध्यो ॥ ओर आखे गाममें
वैष्णव कोइ नही हतो ॥ सब लोक श्रावक ही हते ॥ सो आखे गाममें

याको नाम अवलचंडी धर्यो ॥ सो एक बिरिया कुवापें एक वैष्णव आये
ओर ए बाइ जल भरवे गइ हती ॥ सो तिलक देखिके वे अवलचंडी
बाइने वैष्णवकुं जेश्रीकृष्ण करे ॥ तब वा वैष्णवने हुं जेश्रीकृष्ण करे ॥
फेरि वा वैष्णवसों कही जो घर चलो तब वा वैष्णव वा बाइके पीछे पीछे
जावे लगे ॥ तब सबजने कहवे लगेजो अरे ए अवलचंडीके घर कोन
जाय हे ॥ एसे कहवे लगे ॥ ओर ए बाइ घर जायके तुरत न्हाइ श्राठाकुरजीकुं
जगाय मंगलभोग धर्यो ॥ शृंगार करिके राजभोग धर्यो ओर वा वैष्णवकुं
कही जो अब में श्रीयमुनाजल की गागरी भरलाउं ॥ तब वा वैष्णवने
मनमें विचारी जो इहांसो दोसो कोस तो श्रीमहाराणीजी दूर हे सो केसे
भरी लावेगी ॥ जो एइ बातनसुं सब कोइ इनकुं अबलचंडी कहे हे सो
बात साची हे ॥ एसे विचारीके वा वैष्णवने वा बाइसों कही जो तुं अब
जाय हे सो कब आवेगी ॥ तब वा बाइने कही जो राजभोग सरवे के
समयपें आउंगी ॥ तांहां तांइ तुम अपनो नित्य नियम जप पाठ करो ॥
तब वा वैष्णवने कही जो अमुके वैष्णवके घर श्रीगोकुलमें मेरी कामली
ओर लोटा रहे गयो हे सो लेती आइयो ॥ तब वानें कही ठीक लेती
आउंगी ॥ फेरि श्रीयमुनाजल भरिके वा वैष्णवके घर गइ ॥ ओर कही जो
अमुके वैष्णव तुम्हारे घर लोटो, कामली भूली गयो हे सो माग्यो हे सो
लाउ ॥ तब वा वैष्णवने लोटा और कामली दीनी ॥ सो लेके श्रीयमुना-
जलकी गागरि भरि लेके आइ ॥ इतने राजभोग सरायवेको समय भयो
॥ अब घर आयके श्रीयमुनाजी घरमें पधराय ओर लोटा ओर कामली
वा वैष्णवकुं दिये ॥ जो वैष्णवने अपनी लोटा कामली पहचानीके लीनी
॥ तब बडे आश्चर्यको प्राप्त भये ओर कही जो बाइ तोकों धन्य हे जो
तोपें श्रीमहाप्रभुजी बडे प्रसन्न हे ॥ जो नित्य श्रीगोकुलके आदि सब
पदार्थको अनुभव करे हे ॥ जो फेरि भोग सराय श्रीठाकुरजीकुं अनोसर
करीके वैष्णवकुं महाप्रसादकी पातल धरी ॥ आपने महाप्रसाद लीषो ॥

फेरि वैष्णव प्रसाद लेके अपने मार्ग चलते भये ॥ ओर ए बाइ अपनी सेवा संबंधी कार्य करवे लगी ॥ सो ए बाइ एसी प्रभुनकी कृपापात्र जो धर्मके लीये अपनो नाम अवलचंडी धरायो ॥ परंतु धर्मसुं डगी नही ॥ ओर अपनो धर्म काहुको जतायो नही ॥ तासों धर्म हे सो एसो पदार्थ हे ॥ जो इतने श्रावकनसुं बचके अपनों धर्म राख्यो ॥ तासों श्रीमहाप्रभु-जीको आश्रय दृढ राखीके धर्मको यत्न करे ताको कोइ काल काहुको डर नही ॥ जेसें ध्रुव प्रह्लादादि आगे भये तेसें ए बाइको जाननी ॥ ए बाइ श्रीबालकृष्णलालजी महाराजकी सेवा करती ॥ इति श्रीगिरिधरलालजी महाराजके वचनामृतसप्तम संपूर्ण ॥ ७ ॥

 [वचनामृत ८ मो.] 



अब अष्टमो वचनामृत आप आज्ञा करतहे जो मन चंगा तो कठो-टीमें गंगा ॥ सो एक सास ओर बहु हता ॥ सो सास तो नित्य गंगास्नानकुं जाती ॥ ओर बहु घेर रहती ॥ सो बहु घर स्नान करती बखत कठो-टीमें जल भरीके घरहु गंगा स्नान करती ॥ सो एक दिन गंगाजीमें स्नान करते सासकी नथ गिरि गइ ॥ सो बहोत दुंडी परी पाइ नहीं ॥ सो सोच करत करत घर आइ सो उदास होयके घरमें बेठी ॥ तब बहु रसोइ करी चुकी ॥ तब साससों कही जो उठो जेंवो ॥ तब सासको उदास देखीके बहुने पूछी के आज उदास बहोत हो ॥ तब सासने कही जो मेरी तो नथ श्रीगंगाजीमें जाती रही ॥ तब बहुने कही जो या बातमें उदासी मती रहो ॥ नथ लाइके सासके हाथमें दीनी ॥ तब सास अपनी नथ पहेचानी के बडो आश्चर्य भइ ओर कही जो तुं गंगास्नान कबहु जात नही ओर तोको नथ कहाँसे पाइ ? तब बहुने अपनो प्रकार कणो ॥ सो सुनीके सास बहोत राजी भइ ॥ तासों जो अपने मनसों दृढ करी रहे ताको धर्म साचो जाननो ॥ तासों भाव साचो हतो तो श्रीगंगाजी इनके घर पधारते ॥ तासों पुष्टिमा-र्गमें भाव हे सोइ मुख्य हे ॥ इति श्रीगिरिधरलालजी महाराजके वचनामृत अष्टम संपूर्ण ॥ ८ ॥

 [वचनामृत ९ मो] 

अब नवमो वचनामृत आप आज्ञा करेहे जो वैष्णव तिलक करेहे ताको कहा भाव हे एसे आज्ञा भइ ॥ तब दासने विनति करि जो महाराज या बात तो आप कृपा करीके जीबकुं समजायो चाहीये ॥ तब आपनें आज्ञा करी जो तिलक हे सो भगवत्पदाकृति हे ॥ तब दासनें विनति करी जो भगवत्पदाकृति से तो आप तथा दासकुं धारण करवेकी योग्यतादीनी हें ॥ परंतु श्रीठाकुरजीकुं हु पदाकृति तिलक होय हे ताको भाव कृपा करी कहीये ॥ तब आपनें आज्ञा करी याको भाव एसे हे ॥ जो श्रीलाडिलीजी के चरणारविंद आप धारण करे हे ॥ ताके भाव को पद हे ॥ जो “ भज-मन राधिका के चरण ” ए कीर्त्तनके अंतमें एसे हे ॥ जो विवस परमानंद छिन छिन श्यामजाके शरण ॥ ए भावसों आपको चित्त सदा श्रीप्राण-प्यारीसों अष्टो प्रहर आसक्त हे ॥ सो सदा तिलकरूप बिराजे हे ॥ ता समय ए वचनामृतके प्रसंगकी बिरियां ब्रजमें करेहलागामहे तहांके ब्रज-वासी रासधरो जोवणभाइ पास बेटे हते ॥ तानें आपकी आज्ञा पीछे एक कवित कइयो ॥ सो आपकी आज्ञातें लिखे हे ॥ सो कवित.

ब्रह्ममें दुंडयो पुराणन वेदन भेद सुन्यो चित्त चोगुणे चायन ॥ देख्यो सुन्यो न कहुं कीतहुं वह केसो स्वरूप अरु केसो सुभावन ॥ १ ॥ हेरत हेरत हार फिर्यो रसखान बतायो न लोग लुगायन ॥ देख्यो कहाँ यह कुंजकुटीतर बैठयो पलोटत राधिकाके पायन ॥ २ ॥



फेरी आपनें आज्ञा करी जो ॥ अपने नंददासजीनेहु गायो हे ॥ जो “ चांपत चरण मोहनलाल ” एसे अनेक वचन हे ॥ तामें मुख्य एइ निश्चैइ जाननो जो आप तिलक धरे हे सो श्रीलाडिलीजीके भावको हे ॥ इति श्रीगिरिधरलालजी महाराजके वचनामृत नवमो संपूर्ण ॥ ९ ॥

 [वचनामृत १० मो.] 

अब दसमो वचनामृत आप आज्ञा करेहे जो ॥ एक लडोकरी बाइ

हती ॥ जो आखे गामसों लडती ॥ तासों ताको नाम लडोकरो धर्यो हतो ॥ तासों वाको नित्यनेम जो लडे विना खानपान न करे ॥ जो तासों दिनमें वीसपचीस लडाइ लडे तब भोजन करे ॥ सो लोक गभरायके राजाके पास फिरियाद करी ॥ तब राजाने वाको बंदोबस्त कर्यो ॥ सो ता प्रमाण नित्य एक घर लडे तब भोजन करे ॥ सो वा गाममें एक सासवहु बैष्णव रहेसी ॥ सो वा बहुने साससुं कही जो अपने गाममें वे लडोकरो बाइ सबसों लडेहें ॥ सो न लडे ओर सबके ओसरा मिटाय देहु ओर सबके पलटे ए लडोकरीसों में लडोंगी ॥ तब सासने जाय के राजमें पुकारी जो राजासाहेब ए लडोकरी बाइ सब गांमनमें ओसरासों लडे हे ॥ सो सबके ओसरा मिटाय देहु ओर सबनके पलटे मेरी बहु लडेगी ॥ तब राजको आसामी वा लडोकरीसों कही आयो जो आज सों अमुकी बाइ सासवहुहे ताके घर तुं लडवेकुं जैयो ॥ सो आज पोछे नित्य वाकेइ घर लडवे जैयो, सो सबेरो होतेइ वे लडोकरी वाके घर लडवे गइ, जायके बेटी इतने वा बहु आइ ॥ सो आवतेइ अंगुठा देखायो ॥ अंगुठा देखायके घरमें चली गइ ॥ सो वे गाली देवे लगी ॥ सो ए गाली देवोइ करे ॥ वे इनसों कलु बोलेई नही ॥ सो इनके मनसुं माली देते थके ओर रेह जाय तब वे बहु फेरी बाहोर आयके अंगुठा देखाय जाय ॥ कलु बोले नहीं ॥ घरमें जायके आपनो कार्य जो कलु होय सो करवो करे ॥ एसे जब तांइ वे गाली देती हारीके रहे जाय तब फेरी आयके फक्त अंगुठा देखाय जाय ॥ तब फेरी वे गाली देवे ॥ सो एसे वे लडोकरो गाली देती देती हार गइ ॥ रात्रि प्रहर एक गइ तब अपने घर चली गइ ॥ तब फेरी दुसरे दिनसो इहांहु लडवे न आइ ओर गाममें हुं काहूके घर लडवे न गइ ॥ तब वा बहुकी सासने दुसरे दिन राजमें जाय कही जो वे तो अब लडवे नहीं आवे सो वाको लडवे पठावो ॥ हमारी बहु लडवेकुं तैयार हे ॥ तब राजको आसामी वा लडोकरो के घर गयो के अबलडवे क्यो न जाय ? ॥



जा राजाको हुकम हे ॥ तब लडोकरीने कह्यो जो अब तो हुं हारी ॥ सो अब न तो याके घर लडवे जाउं ओर न ओर काहुके घर जाउंगी ॥ तब राजा बडो आश्चर्यको पाये जो देखो या लडोकरी एसी लडाइ करी जाके हल्लासों आरखो गाम हारी गयो ओर फिरियाद आवते सो एसे दुःखसों नित्य एक घर लडे एसे वारे बांधे एसी लडायक सो इनतें हार मानिके लडवो समूल छोड दियो सो ए बडो आश्चर्यकी बात भइ ॥ तब वा सासवहु वैष्णवकु बुलायके पूछी जो तुम कोन रीतसों इनकुं हराइ ? ॥ तब इन सासवहुने कही जो हमारे गुरुदेवके प्रतापबल सों हराइ हे ॥ हमारो तो कलु सामर्थ्य हे नहीं ॥ परंतु इन लडोकरीसुं पूछी चाहीए जो यासों हमने कलु संभापण कयों हे ? तब राजाने पूछीके एसे तुम्हारे गुरु सामर्थ्यवान हे ! सो कहां हे ? तब इननें कही जो श्रीगोकुलमें बिराजत हे ॥ सो बात सुनीके राजाको चित्त प्रभुनके विषे बहोत आसक्त भयो ॥ सो राजा सब गामके लोग जो दैवी होइंगे सी सबनकुं लेके श्रीगोकुल गये ॥ सो ए बाइ वैष्णवके संग सो सब गाम वैष्णव वे लडोकरी समेत भये ॥ तासों वैष्णवको सत्संग एसो हे सो जाके संगतें दुःख तथा अविद्या अनेक तरेहको होय सो सब दूरी होय जाय ॥ तासों सत्संग वैष्णवको जरूर करनो ॥ इति श्रीगिरिधरलालजीके वचनामृत दशमोसंपूर्ण ॥ १० ॥

 [वचनामृत ११ मो] 

अबदासने विनति करी जो आगे बडे भगवदी सुरदास प्रभृति जीननें श्रीभगवद् गुणारविंद गाये हैं ओर अबके कालमें कोइ गावे, सुने, नये गुणारविंद वर्णन करे तामें कहा तारतम्यहे ? तब आपनें आज्ञा करी जो ॥ श्रीगुसांइजी तथा श्रीहरिराघजो आदि गोस्वामी बालक तथा श्री-महाप्रभुजी तथा श्रीगुसांइजीके सेवक इत्यादिकनके कीये जो कीर्त्तन हे सोतो मनोक नही हे ॥ वे तो जेसी लीलाके अनुभव नेत्रनसुं देखते तेसेही गावते ॥ तासों ए पदकीर्त्तन श्रीठाकुरजीके आगे गावेहें ॥ ओर इचकुं



वेद रूपत्व कहे हे ॥ ओर वृंदावनमें भगवदीय हरिदासजी तथा हरिवंसजी तथा व्यासजी तथा माधुरीदासजी ए हुं श्रीस्वामिनीजीके मुख्य भक्त हते इनकुं युगल स्वरूपके प्रत्यक्ष दर्शन भये हे ॥ तासों इनके हु कीये पद गावे हैं ॥ ओर तुलसीदासजीहु श्रीरामचंद्रजीके परमभक्त हे तासों तुलसीदासजीके हु पद गावे हैं ॥ ओर अबके वैष्णवके पद नही गावे हे ॥ ताकोयह विचार जो इनकुं कलु अनुभव नही हे ॥ सो तो बडेनके भाव लेके कीये हे ॥ तासों ओर जगे भलेइ गावे सानिध्यमें नही ॥ ओर अष्ट-छाप जो हे ॥ सो तो अर्जुन, भोज, सुबल, सुबाहू, तोक, श्रीदामादि लीलाके अनुभवी हते तासों इनके पदमें कोउ अक्षर उलटो होय तोउ आप सुधो मानी लीयो हे ॥ क्यों जो विनको सख्य भक्तिको दान हे जो सखा हांसी करे सोउ सुहाय ॥ ताकी रीस नही हे ॥ तासों इनको देखीके दूसरो कोइ इनकी नाइ लीलाको वर्णन करेगो तो अपराधी होयगो ॥ तासों बुद्धिबल होय तो भलेइ यशवर्णन करो तामें चिंता नही ॥ परंतु लीला संबंधीको बात न करनी ॥ तब दासने विनति करी जो बडेके कीये लीला संबंधी कीर्त्तन गावने के न गावने ? ॥ तब आपने आज्ञा करी जो बडेनके कीये हे सो भलेइ भइ लीला गाइ हे सो फेर गायवेकी चिंता नही ॥ तासों अपनी बुद्धिकी चतुराइ करीके नयो न गावनो ॥ ओर अबके भगवदीमें डभोइके साठोदरा नागर दयारामजी भये हे सोउ अनुभवीसे भये हे ॥ अब एतो होनो दुर्लभ हे ॥ तथा कांकरोलीमें दुर्लभदासजी पानगरिया भये ॥ सोउ बडे अनुभवी हते ॥ कृपापात्र हते सो जब सों इहां आये तबसों लगाइ अवसान समें तांइ पानगरकी सेवा करो ओर अनासरमें अपनी कोटडीमें खाली न बेठे रहते ॥ भगवन्नाम, वार्त्ता, कीर्त्तन इत्यादिक अष्टोप्रहर भगवद्‌रसमें छकेल रहते ॥ ओर हमारे बडेनके कीर्त्तन, धवल इत्यादिक अनेक तरेहके ग्रन्थ कवित, दोहा, रसिककविता इननें करि हे ॥ तेसे इनके बेटा वेणीलालहुं हते ॥ तथा बेगमराजजी

सवाइ माहासिंधजी खांप चडावत वेहु परम भगवदी भये ॥ श्रीदादाजी महाराज उपर बडी आसक्ति हती ॥ सो राज छोडीके अपने श्रीठाकुरजीको संग पधरायके वीस वर्ष पर्यन्त कांकरोलीमें वास कीयो ॥ श्रीठाकुरजीके स्थूल स्वरूपको बहोत अच्छी रीतसों विवेचन कीयो हे ॥ श्रीभागवतके अनुसार ॥ सो वे एसे भगवदी हते ॥ श्रीदादाजी महाराज आज्ञा करते जो जैसे राजा अंबरिष भये तेसेइ ए राजा माहासिंधजी हे ॥ एसे आप श्रीमुखते सराहना करते ॥ जाको श्रीगुरुदेव तथा वैष्णव उपर अत्यंत ममत्व हतो ॥ इति श्रीगिरिधरलालजी महाराजके एकादशमो वचनामृत समाप्त ॥ ११ ॥

 [वचनामृत १२ मो.] 

अब द्वादशमो वचनामृत आप आज्ञा करतहे ॥ जो जीवकुं बडेनके पास कलु मागनों नही ॥ श्रीप्रभुजी अंतर्दामी हे सो आपकु कलु अजान नही हे ॥ वे सबके अंतःकरणकी जाने हे परंतु सबको अधिकार परत्व दान करेंगे ॥ तापर प्रसंग चलयो ॥ एक समय श्रीदादाजी महाराज बडोदाके परदेश पधारे हते सो आप बैठकमें बिराजे संध्यावंदन करते हते ॥ ता समय लल्लुभाइ मंगलजीके छोरा बापुभाइने आयके विनति करी ॥ बापु भाइ आपसों काकाजी कहेके बोलते ॥ क्यों जो लल्लुभाइ शेठको आपने सख्य भक्तिको दान दीयो हतो ॥ तासों विनति करी जो मेरे संतति नही हे सो कृपाकरीके दीजीये ॥ तब आप हसीके एक अलौकिक आज्ञा करी जो सारे में मेरा बेटा न करी शकुंहुं तो तोको देउंगो कहांसों ॥ एसी हसीके आज्ञा करी फेरि वे चूप होइ गयो ॥ कलु बोल्यो नहीं ॥ ओर हरि-भक्तिवारे शेठ बेचरभाइ सो इनने घर पधरायवेको मनोरथ कर्यो ॥ सो पंदर दिन तांड अपने घर पधराये ॥ सो एक दिन आप शैयापर पोढे हतं ॥ ओर जमनादासमम्मा खवास मुक्की चरणारविंदकी सेवा करत हते ॥ सो कहांनीमें बडे चतुर हते ॥ सो कहांनी कहे रहे हते ॥ सो वा बिरियां

वासों आपने आज्ञा करी जो शेटजीको बुलाय लाउ ॥ सो वा बिरियां शेटजी रात्रिकुं जुठन महाप्रसाद ले रहे हते ॥ सो इनने हेला पाडयो जो शेटजी कहाँ हो तब शेटजी बोले जो हों जुठन ले रह्यो हुं ॥ सो जुठन-प्रसाद लेके तुम्हें हाथ मोहो धोय अल बिडि लेके तुरतही हेलाके संग जाय पहुँचे ॥ तब खवासने विनती करी जो कृपानाथ शेटजी हाजर हे ॥ तब आपने आज्ञा करी के शेटजीकुं पास बुलाओ ओर आज्ञा करी जो तेरे बेटा होयगो जो बडी शेटाणी महालक्ष्मीकुं होयगो ॥ तब शेटजीने दंडवत् करी विनति करी जो कृपानाथ जो आज्ञा ॥ फेरी आज्ञा करी जो अन्याश्रय मति करीयो ॥ अन्याश्रय करेगो तो जातो रहेगो ॥ तासो बडेकुं कृपा करते बेर कलु लगे नहीं ॥ सहजमेंही मनवाँछित फल दान करे ॥ तासों आप स्वेच्छातें करे सोइ प्रमाण हे सदा सर्वदा जीवकुं प्रभुजीके भरोसे रहेनो ॥ केवल निरपेक्ष भाव राखनो ॥ येइ मुख्य साधन हे ॥ जाके भाग्य होय सो समजेगो ॥ इति श्रीगिरिधरलालजी महाराजके वचनमृत बारसो समाप्त ॥ १२ ॥

 [वचनमृत १३ मो.] 



अब तेरमो वचनमृत आप आज्ञा करे ॥ जो श्रीगुसांइजीके काकाजी केशवपुरी श्रीगोकुल आये ॥ आपसों मिलवेकुं तथा एकाद लालजीको अपने आश्रममें ले जावेके विचार सों ॥ श्रीगोकुलजीमें आये ॥ बाहार डेरा करे ॥ सो श्रीगुसांइजी अपने पित्रव्य जानीके मिलवेकुं पुत्रपौत्रादिक संगलेके पधारे ॥ सो डेरापें गये सो आश्वासना करी ओर आपने आज्ञा करी जो आप हमारे बडेहो तासों आपकुं भिक्षा निमंत्रण हे ॥ सो आप हमारे घर पधारेगे ॥ फेरी इनने कही जो आपकुं मिलवेकुं आयो हुं ओर एक कार्य ओर हे सो तुम सिद्ध करो तो भिक्षाकुं आउं ॥ तब आप अंत-र्यामी सो पहेलेइ जानी गये हते परंतु लौकिकके लीये पूछयो कहा कार्य हे ॥ तब इनने कही जो तुम्हारे पुत्रपौत्रनमें ते एकाद हमको देउं जो

मेरो आश्रम आवेरे, ओर मेरी सत्ताकुं बलावे, तुम हमारे भ्रातृयहो तासों
 हमारो तुम्हारे उपर जोरहे ॥ थोडीसी बिरियां तो आप चुप रहे ॥ फेरी
 कही के ठीक हे ॥ ए इतनेमें हे सो सब आपकेइहे सो जाके कल्लु न
 होयगो सो आपके संग आवेगो !। सो में घर पूछीके सलाह करीके सबेरे
 आप भिक्षाकुं आवोगे तब जवाब देउंगो ॥ यों केहेके घर पधारे ॥ फेरी
 घरमें सब बालकनकुं बुलाये ओर कही जो काकाजीने आज्ञा करी सो तुम
 सबननें सुनी ॥ तब कहीजो सबननें सुनी ॥ तब सबननें विनति करी जो जे जे
 सुनी तोहे हम सब आपकी आज्ञामें हे ॥ फेरी श्रीबालकृष्णजी बोले जो
 जाको कल्लु न होयगो सो आपके संग आवेगो ॥ सो आपने कृपा करीके
 हम सातोनकुं तो निधि पधराय दीनी हे ॥ सो आपकी कानीसों हम सेवा
 हु करे हे ॥ ओर जाके कल्लु न होय सो जाय ॥ तब आप मुसकायके
 पोढे ॥ ए बात होती वीरियां श्रोगोविंदरायजीके बडे लालजी श्रीकल्या-
 णरायजी छोटी अवस्थामें हते सो पास बेटे हते सो सुनीके बोहोत चिंता-
 तुर भये ॥ निंद न आइ ॥ जो मति तातजी मोकुं न दे दे ॥ या सोचके
 मारे आखी रात्रि निंद न आइ ॥ फेरी जब प्रातःकाल भयो तब श्रीगु-
 साईजी श्रीनवनितप्रियाजीको राजभोग धरी सुकुटुंब सहित बिराजे ॥ तब
 श्रीगिरिधरजीकुं आज्ञा करी जो काकाजी कुं पधराय लाउ ॥ जो राजभो-
 गको दर्शन करेंगे ॥ ओर प्रसादहु लेइंगे ॥ तब श्रीगिरिधरजी केशवपुरीको
 बुलायवेकु पधारे ॥ ता पाछें श्रीकल्याणरायजी दोउ श्रीहस्त जोडीके गद-
 गद कंठ होय विनति करीवे लगे ॥ सो ढाढीको पद गायो ॥ सो या पद
 में आपके अंतःकरणको हार्द सब निवेदन करी दीनो ॥ सो पद ॥

राग धन्याश्री ॥ हों व्रज मागनो जु ॥ याको अर्थ ॥ जो हों याचक
 व्रजकुंहुं मागत हों ॥ जा ॥ व्रज तजी अनत न जाउं ॥ बडे बडे भूपति
 भूतलमहियां दाता सुर सुजान जु ॥ कर न पसारों शिश न नाउं या व्रजके
 अभिमान ॥ १ ॥ याको अर्थ. जो बडे बडे भूपति पृथ्वीमें हे तथा सूर्यहुं



सबके दाता हे परंतु मैं तो काहुके आगे न तो कर पसारूं न तो शिष्य नमाउं, जो या ब्रजको अभिमान करीकें, तासों ब्रज छोडीके अन्यथा न जाउं, ऐसे कह्यो ॥ मूल ॥ सुरपति, नरपति, नागलोकपति, मेरे रंक समान जु ॥ भांति भांति मेरी आशा पूजवे या ब्रज जन जजमान ॥ २ ॥ याको अर्थ ॥ सुरपति जो इन्द्र, ओर नरपति जो बडे बडे राजा, नागलोकपति जो पातालके राजा शेषजी, आदि सब मेरे भाये रंक हे ॥ तासों मेरी जो आशा अनेक भांतिकी सो आप पूर्ण करेंगे, क्यों के आप मेरे यजमान हो तासों ॥ मूल. ॥ मैं व्रत करी करी देव मनाये अपनी घरनी संयुत जु ॥ दियो हे विधाता सब सुखदाता श्रीगोकुलपतिके पुत ॥ ३ ॥ अर्थ ॥ जो मैं व्रत करीके देव मनाये, अपनी घरनी संयुत जु ॥ ताको कारण जो इनकुं याद्यो तो नहीं ओर इन देवनकुं में मनाये, काहेको, जो अपने ष घर आयवेके ताई ॥ सो विधाता सब सुखदाता, जातें श्रीगोकुलके पति तिनको मैं पूत भयो हुं ॥ मूल. ॥ हों अपनो मन भायो लेहों कीत बोहो-रावत बात जु ॥ ओरनको धन घन ज्यों वरखत मो देखत हसी जात ॥ ४ ॥ अर्थ ॥ जो अब मैं अपने मन भायो आपके पाससों लेउंगो ता बात क्यों बोरावत हो ॥ ओरनकों जो सात बालकनकों धन घन लों वरसैं, तेसे सातों स्वरूप रूपी धन जो मेघ बरसावें ऐसे धन दीये, ओर बाबा मोकों देखीके हसी जात हो ॥ मूल ॥ अष्टसिद्धि नवनिधि मेरे मंदिर तुम प्रताप ब्रज इश जु ॥ केहेत कल्याण मुकुंद तात करकमल धरो मम शिष्य ॥ ५ ॥ अर्थ ॥ अष्टसिद्धिजो श्रीनाथजी आदि सोतो स्वरूप, तथा नवनिधि जो श्रीमहाप्रभुजी तथा आप ओर सातो बालक सो तो मेरे मन मंदिर नाम मेरे हृदयमें बिराजत हे ॥ तासों हे मुकुंद तात ! आप मेरे मस्तकपें कमलरूपी अभय कर, हों जो कल्याण सो ताके शीषपें धरो ॥ ओर सदा मोंको ब्रजमें स्थिति राखो ॥ ये, विज्ञप्ति श्रीकल्याणरायजीनें श्रीगुसांइजीसो करी ॥ फेरी श्रीगुसांइजी अतिही स्नेहसों गोदमें लेके आप

श्रीमुखको तांबूल अधरामृत श्रीकल्याणरायजीके श्रीमुखमें दीयो सो तांबूलको स्वरूप श्रीहरिरायजीको प्रागटथ हे ॥ ओर फेरी श्रीमस्तकमें श्रीहस्त धरीकें स्वास्था करे जो तोकों काहुको न देउंगो ॥ फेरी केशवपुरी आये, दर्शन करे ॥ फेरी भीक्षा करी, फेरी पूछयो जो काल मेंने कही हती ताको कहा उत्तर हे ॥ तब आपनैं कही जो सब हाजर हे जो आवे ताको ले जाओ ॥ तब सब बोली उठे जो हम तो कोउ जावेवारे नही हे ॥ तब केशवपुरी बोहोत रीस होयके श्राप दीये जो ॥ तुम्हारे माथे करज रहेगो ॥ ओर परदेशमें रहेवो करेगो ॥ फेरी बेटी तुम्हारे घरमें रहेगी ॥ फेरी चतुर्थ केहेवे लगे तब आपने कही जो अब क्षमा करीये नही तो हमारे कलु केहेनो पडे सो आछो नही ॥ ओर आपके जो वाक्य हे सो हम कबूल राखेहे ॥ जो तीनों आपनी प्रसन्नता हती ॥ जो करज न होय तो परदेश पधारवो न होय ओर परदेश करे विना जीवको उद्धार न होवे ओर बेटी हुं घरमें रहेगो तों सेवा करेगी ॥ तासों ए श्राप कबूल राखे ओर केशवपुरी दक्षिण गये ॥ सो रामकृष्णभटजीके वंशमेंते बालकलेके चेला करे ॥ इति श्रीगिरिधरलालजी महाराजके वचनामृत त्रयोदश समाप्त ॥

 [वचनामृत १४ मो.] 

अब चतुर्दशमो वचनामृत आपनैं आज्ञा करी जो श्रीभगवान ओर श्रीगुरुदेवको दोउनको एक रूपही समजनों इनके विषे द्विधाभाव न राखनो ॥ सो आगे भगवदिननें निरूपण कर्यो हे ॥ जो “ छितस्वामी गिरिधरन श्रीविठ्ठल येइ तेइ तेइ येइ कलु न संदेह ” ॥ ओर सुरदासजीने हु गायो हे जो ॥ “ सुर कहा कहे द्विविध आंधरो विना मोलको चरो ” ॥ ओर कृष्णदासजीने हुं गायो हे जो ॥ “ जाके मनमें उग्र भरम हे श्रीविठ्ठल श्रीगिरिधर दोय ॥ ताको संग विषम विषहुंते भूले चतुर करो जिन कोय ” ॥ ओर श्रीवल्लभाख्यानमें हुं गोपालदासजीने एसे वर्णन कर्यो हे ॥ जो रूप बेउ एक ते भिन्न थइ विस्तरे ॥ ओर ॥ सगुण स्नेही श्यामला



वाहाला, या में हूं दोउनको एकरूप निरूपण हे ॥ एसे अनेक भगवदिनने गाये हे ॥ ओर एसे श्रीभागवत इत्यादि बडे बडे ग्रंथमें तथा मात्र मारग विषे श्रीठाकुरजीको तथा श्रीगुरुदेवको एक ही रूप बताया हे ॥ तासों श्रीगुरुदेव हे सोइ सकल सिद्धिदायक हे तासों जो कोइ श्रीगुरुदेवके विषे द्विधाबुद्धि राखे ओर कैसेहुं ज्ञानी होय ताको आसुरी जाननो ॥ ताको संग वैष्णवकुं न करनो ॥ तथा श्रीगुरुदेवके वंश पुत्र पौत्रादिक सोउ गुरु तुल्य हे एकही रूप समजनो ॥ ता वात में संदेह नही राखनो ॥ तथापि संदेह होय ताको उत्तर ॥ जो श्रीमहाप्रभुजीने दामोदरदासजीसों पूछीके तुम श्रीगुसांइजीकों काहा करी जानत हो ॥ तब दामोदरदासजीने कही जो में तुमारे पुत्र करके जानतहूं ॥ तब दामोदरदासजीसों श्रीमहाप्रभुजीने आज्ञा करी जेसे हमकुं जानो हो तसेइ इनकुं जाननो ॥ श्रीगुसांइजी आप चरणामृत तथा चरणस्पर्श दामोदरदासकुं न देते सो फेरी दामोदरदास बोहोत आग्रह करीके लेवे लगे ॥ तासों गुरु, गुरुपुत्र, पौत्र एकही रूपहे ॥ इति श्रीगिरिधरलालजी महाराजके वचनामृत चतुर्दशमो संपूर्ण १४

 [वचनामृत १५ मो] 

अब आपने पंदरमो वचनामृत आज्ञा करे जो ॥ श्रीदादाजी महाराज संवत् १८८६ के सालके मगसर मासमें धंधुका पधारे सो वार्त्ता ॥ सो धंधुकामें बिराजे ताहांसो छे कोसपें भीमनाथ महादेव हे ॥ तहां अतित पूजारी हे ॥ सो बावाजीने विनति करवाइ ॥ धंधुकाके वालम ब्राह्मण माधो पुरुषोत्तम करीके इनके कामेती हते ॥ सो वाके संग विनति करवाइ ॥ जो श्रीमहाराजाधिराज यहां पधारे ॥ एसे विनति करीयो ॥ जो यहां पधारे तो मोको दर्शन होय ॥ एसे वाकी ओरसों माधवने विनति करी ॥ तब आपकुं पधारवेको एक ओर हु कारण हतो तासों आज्ञा करी जो इहां पधारेंगे ॥ तब धंधुकासो कुच कीयो ॥ सो मारगमें एक गाम तगडी करीके आयो ॥ तहां तलावके पास पाजके उपर मेना बोल्यो ॥ सो कींमा-



डमुंदिके आप यहां एकाद घडी पोढे ॥ फेरी जागीके संगमें जो जो वैष्णव
 हते तिनकों बुलाये ॥ सब भेले भये ॥ तब आज्ञा करी जो यहां श्रीमदा-
 चार्यजी श्रीमहाप्रभुजी बिराजे हे सो तुम्हारो केसो मनोरथ हे ॥ तब कोउ कल्लु
 कोउ कल्लु डरीके विनती करीवे लगे जो कृपानाथ ! यहां स्वामीनारायणको
 गाम हे ॥ तब आपने आज्ञा करी जो तुम चिंता मति करो आप सर्व
 समर्थ हे, सो कोउ कल्लु बातसों डर मति राखो ॥ तब सबनने विनति
 करा जो कृपानाथ बोहोत आछो ॥ हमारे अहोभाग्य हे ॥ जो बनेगी सो
 सेवा करेंगे ॥ तब आपने आज्ञा करी जो या पालपें खोदो ॥ फेरी उहां
 खोदायको मजुर लगाये जेसे आपने आज्ञा करी हती जो एक ओर कोणो
 थोडो खंडित हे सो वेसेइ आज्ञा प्रमाण चोतरो निकस्यो ॥ सो सब देखिके
 बडे आश्चर्यको पाये जो आपको केसो प्रताप हे ॥ सो सब जे जेकार कर
 परम आनंदको प्राप्त भये ॥ ओर धंधुकामें वधाइ पोहोंची वधामणी पठाइ ॥
 सो सब वैष्णव लोग लुगाइ आये ॥ इतनेमें आप भीमनाथ होइके पाछे
 पधारे ॥ फेर चोतराके उपर बैठक बनवेकी आज्ञा दीनी ओर उहां अत्यंत
 आनंद हर्ष भयो ॥ जाको कहां तांइ लिखे ॥ सो आपने अपने स्वकीय
 जानीके धंधुकाके वैष्णव उपर ऐसी कृपा करी ॥ सो वा दीनतें अद्यापीतांइ
 परम आनंद वहे रह्यो हे ॥ ओर परम रमणिक स्थल जेसे ब्रजभूमि समान
 हे जो जाय ताको आनंद होय हे ॥ ओर इहांका बैठकको चरित्र सब
 बैठकनके चरित्रनमें लिख्यो हे ॥ तासो इहां नहि लिख्यो हे ॥ ओर उहां
 एक रायणको पेडहे सो पांच सात वरसको वृक्ष भयो हे तबसों फलवे
 लग्यो हे ॥ सो फलीके श्रीमहाप्रभुजीकी सेवामें अंगीकार होवे लग्यो ॥
 जो रायण हे सो सो वर्षमें फले हे परंतु आपकी कृपातें वे वृक्षहु सेवामें
 वेगो अनुकूल भयी ॥ एसे आप गोधरा पधारे ॥ तांहां नागजीभाइ के
 घरमें बैठक श्रीगुसांइजीकी आपने प्रकट करी ॥ सो उहां अचानक पधारीके
 लोगनसों पूछयो जो इहां नागजीभाइको घर हे ? तब लोगनने बतायो

जो नागजीभाइ देसाइको घर तो इहां हतो एसे लोग केहवे लगे ॥ सो वा जगे कलु देख्यो न जाय एसी कचरा कुढानसों भरी राखी हता सो उहांके वैष्णवनकुं बुलाय ओर बडो रीस करीके खीजे जो यहां नागजी-भाइके घरमें श्रीगुसांइजी बिराजेहे ओर एसो स्थल करी राख्यो हे सो तुमकुं उचित नहि हे ॥ तब सब वैष्णव विनति करीवे लगे जो महाराज हमकु खबर नही जो आप बिराजेहे ॥ अब कृपाकरी के दर्शन कराइये ओर हम तो गरीब हे सोबने एसी सेवा कृपाकरीके देखावेंगे ॥ फेरी आप आसन बिछायके बिराजे ओर आज्ञा करी जो यहां खोदो ॥ सो सब लोग तुरतही हाथोहाथ कचरा उठायवे लगे ओर गाममें जो रहे वैष्णवकुं बुलाये सो सब मजुर कारीगर लेके आये सो उहां खोयो सो आज्ञा प्रमाण सब बैठक निकसी ॥ बैठकके दर्शन करतेइ आपने साष्टांग दंडवत् करे ॥ ओर सब वैष्णव लोग लुगाइ धोल विगेरे कीर्त्तनानंद करवे लगे ॥ सो वा समयको आनंद लिखवेमें नही आवे ॥ एसो आपको प्रताप चरित्र अनेक हे सो कहां तांइ लिखे ॥ इति श्रीगिरिधरलालजीमहाराजके वचनामृत पंदरमो संपूर्ण ॥ १५ ॥



 [वचनामृत १६ मो.] 

अब दासने विनति करी ॥ जो कृपानाथ एसे ओर हु बालकनने कहुं बैठक प्रकट करी होयगी ? तब कृपा करीके आप षोडशमो वचनामृत आज्ञा करे ॥ जो भरुचमें श्रीमहाप्रभुजी तथा श्रीगुसांइजीकी बैठक हे ॥ सो हमारे काकाजी श्रीव्रजभूषणजी महाराजने प्रगट करी हे ॥ सो तबहु तहां एसो इ आनंद भया ॥ तथा जंबुसरमें हुं श्रीहरिरायजीकी बैठक हे सोउ आपने (श्रीव्रजभूषणजीने) प्रगट करीहे ॥ ओर आणंदमें श्रीविठ्ठलनाथजी तातजीकी बैठक हे ॥ सो हु आपने प्रगट करी हे ॥ एसे तीन बैठक श्रीव्रजभूषणजी महाराज काकाजीने प्रगट करी हे ॥ ओर हमारे श्रीगुरुदेव श्रीद्वारकेशजी महाराजने श्रीमथुरांजीमें सतघरामें श्रीनाथजीकी

चरणचोकी प्रगट करी हे ॥ संवत १९०० की सालमें जा समय हमहुं साथ हते ॥ सो फेरी मथुरास्थभट्ट गोकुलेश तथा मथुरेशके दोउभाइके माथे पधराय दीये ॥ सो वाके वंशके अब सेवा करेहे ॥ ओर दुसरे बालकनने बेठक प्रगट करी होय जाकी हमको खबर नही हे ॥ जो खबरहती सो लिखाइ हे ॥ इतिश्रीगिरिधरलालजी महाराजके वचनामृत षोडशमो संपूर्ण ॥ १६ ॥

 [वचनामृत १७ मो] 

अब सत्तरमो वचनामृत आपने आज्ञा करी ॥ जो राजनगरमें छप्पन-भोग भयो संवत १८९५की सालमें ॥ सो वहां आसामी बोहोत चगदे ॥ तामें नव आसामी लोगलुगाइ हरिशरण भये ॥ सो ए खबर श्रीछोटाजी नानाजीको भइ ॥ तब तासमय पांच सात बालक पास बिराजे हते ॥ सो वामें नगरवाले गोस्वामी श्रीब्रजनाथजी दादाहुं हते ॥ सो श्री छोटाजी नानाजीसों विनति करी ॥ जो काकाजी आज्ञा होय तो इन सबनकुं जीवाय देउ ॥ तब श्री छोटाजी नानाजीने कही जो ए काम मेरे नहीं करावनोहे क्यों के तुम तो ए काम करीके चले जाओ नगर, ओर फेरी सारे राजनगरके मुडदा आयके मेरे बारणे पडे, तब में ए काम करुं के सेवामें जाउं ॥ तासों ए काम सर्वथा करनो नहीं ॥ याकी आडीसुं राजकी कहे-वासुंनी होयगी तो समज लेइंगे ॥ फेरी राजमें कामदार वैष्णव मोतीभाइ गोविंद हते ॥ सो वानें सब काम मांडी वाल्यो ॥ जो ओर कोइ होतो तो अरबडाट पडतो ॥ तासों एसो भारी मनोरथ होय बोहोत तो एसी संकडासमें दर्शन करावने नही ॥ जगे सांकडी हो तो ओर जगे श्रीप्रभु-जीकुं पधरावने ओर चारो आडी दंदोबस्त करीके दर्शन करावने ॥ इति श्रीगिरिधरलालजी महाराजके वचनामृत, सत्तरमो संपूर्ण. ॥ १७ ॥



 [वचनामृत १८ मो.] 

अब अष्टादशमो वचनामृत आपने आज्ञा करी ॥ जो श्रीब्रजभूषण

महाराज बड़े तातजी श्रीव्रजनाथजी महाराजके पिताजीको जन्मदिन मागशर शुद्धि २ को आवे हे ॥ सो तिनके चरित्र वर्णन आपने कृपा करी सुनाये सो लिख्यते ॥ सो प्रथम तो श्रीव्रजभूषणजी महाराजने कांकरोलीके ओर पास कोट तथा दरवाजे बनवाये ॥ ओर श्रीसर्वोत्तमजी तथा श्रीनामरत्नको तथा श्रीनवरत्नको धोल तथा वधाइ तथा श्रीव्रजपरिक्रमा चोरासीकोसकीका धोल इत्यादिक पदार्थ आपके कोये हे ॥ सो सब जगे प्रसिद्ध हे ॥ ओर कांकरोलीमें बडो बाग हे सोहु आपने करायो हे ॥ ओर एक समय आप बैठकमें बिराजे हते तब राणाजी उदपुरसों दर्शन करवेकुं आये ॥ तिनके संग राणाजीके भाणेज नाम माधोसिंहजी वे हुं दर्शनकुं आये हते ॥ सो राणाजीकुं आपने आशीर्वाद दीयो ओर माधोसिंहजी सों कहीके आउ आमेरपति ॥ तब माधोसिंहजीने विनति करी ॥ जो अन्नदाताजी “दादाजीभाइ रे आगे माहारी कंड बटे हें” ॥ तब राणाजीने कही जो अब तो आपके आशीर्वादतें निश्चय आमेरपति होय चूक्यो वामें संदेह नहीं ॥ फेरी राणाजी तो दर्शन करीके राजनगर गये ॥ ओर भाणेजजी माधोसिंहजी यहां कांकरोलीमें रहे ॥ तब फेरी आपसों विनात करी जो कृपानाथ जो में जेपुर जाउंगो तब आपके पधारे विना राज्यासनपर नहि बेतुंगो ॥ जासों मेरी विनतिकी सुध राखीके आप वाइ समयपें जरूर पधारेगे ॥ तब आपने आज्ञा करी जो ॥ शुभस्य शोभं ॥ फेरी राणाजीके संग गये ॥ फेरी भगवदीच्छातें जेपुरके राजा केसरीसिंहजीने फोजके डरके मारे झेरको प्यालो पीयो तब ए प्रभु श्रीव्रजभूषणजी महाराजके आशीर्वाद तें माधोसिंहजी आमेरपति राजा भये ॥ तब आपको कामदार विगेरे भले मनुष्य पधरायवेकुं पठाये ॥ तब आप जेपुर पधारे ॥ सो मोती हुंगरीतांइ राजा माधोसिंहजी सामें आये ॥ बोहोत भक्तिभाव सों विनति करीके पधराये ओर केहेवे लगे जो आज मेरो बडो भाग्य हे ॥ जो आप पधारे ॥ फेरी आपकुं हवेलीमें उतारो दीयो फेरी वे दुसरे दिन

दर्शनकुं आये ॥ तब विनति करी जो मांका राजकी एसी रीति व्हे जो गलताजीवारे तथा सीतारामजी तथा सलेमाबादवारेनकों शिष्य ठेठसों होवे हे ॥ ओर महारे तो सर्वस्व आप हो ॥ तासों पेहेले आप शरण लीजे ॥ पाछें आप आज्ञा कीये जो तुम्हारे पहले जाकी होवेकी रीति होय सो उहां होयके फेरी हमारे पास आवो ॥ हमारे भये पीछे ओरको होनो उचित नहीं ॥ तब कहीके जो आज्ञा ॥ एसे कहेके महेलमें गये ॥ फेरी आप कथा केहेके पोढे ॥ फेरो दुसरे दिन गलताजीवारे तथा राममहंत विगेरे जिनकी रीति होयगी सो करी लीनी ॥ फेरी महाराजके शरण आये ॥ तब विनति करी जो कृपानाथ सनाथ तो आज भयो हुं इतरे दिन तो रीतिको रायतो हतो सो कर्यों ॥ यौं कही भेट करीके आज्ञा मांगीके महेलमें गये ॥ यह सुनिके गांमकी रैयत तथा पटादार उमराव कामदार विगेरे जो दैवी जीब हते सो सब शरण आये ॥ यह सुनिके संतमहंत जो जेपुरमें हते तिनकुं आछी न लागी ॥ तासों राजाजीसों कोइ द्वारा केहेवाइ जो बल्लभकुल हे सो आपकी बडाइ करे हे ॥ ओरनकुं नीचे पाडवेकुं करे हे ॥ यह बात राजाजी सुनिके चूपे व्हे रहे ॥ फेरी एक दिन कथा सुनवे राजाजी गये तब वे बात केहेवेवालेकुं संग ले गये ॥ कथा भये पीछे हाथ जोडीके महाराजसों विनति करी जो राज आज्ञा होय तो चार प्रश्न में करुं ॥ तब आप आज्ञा करी जो कहीये ॥ तब राजाजीने विनति करी ॥ जो सब देवता नमें कोनसे देवता बडे ? ॥ सब तीर्थनमें कोनसो तीर्थ बडो ? सब पर्वतनमें कोनसो पर्वत बडो ? सब नदीनमें कोनसी नदी बडी ॥ ताको उत्तर आपने आज्ञा करी ॥ जो देवतानकी पूछी तामें जगदीश बडें हे ॥ तीर्थनकी पूछी तामें पुष्करजी बडे हें ॥ पर्वतकी पूछी जामें मेरु पर्वत बडो हे ॥ नदीमें चरणोदकी गंगा हे सो बडी हे ॥ तब राजाने विनति करी जो देवतानमें श्रीगोवर्द्धननाथजी बडे नही हे ? तब आपने आज्ञा करी जो वे देवतानमें नहीं हे ॥ वे तो देवतानके देवता देवाधिदेव



देवेन्द्र हे ॥ ओर तुमने तो हमकुं देवतानकी पूछी सो कही ॥ तब फेरी विनति करी जो तीर्थनमें व्रज बडो नहीं ॥ तब आपने आज्ञा करी जो तुमने तीर्थनकी पूछी सों कही ॥ ओर व्रज तो अपनो श्रीप्रभुजीको निज-धामहे ॥ जीनकुं गोलोक केहेहे सो हे ॥ फेरी विनति करी जो पर्वतनमें श्रीगिरिराजजी हरिदासवर्य सो नहां ॥ तब आपने आज्ञा करी जो श्रीगिरिराजतो अपनो केवल लीलाको स्थल हे ॥ ओर आपको स्वरूप हे सेव्य सेवक भाव करीके बिराजत हे ॥ ओर तुमने तो पर्वतकी पूछी तासों कही जो पर्वतको राजा तो मेरु हे ॥ ओर फेरी विनति करी जो नदीमें श्रीमहाराणीजी, श्रीयमुनाजी मुख्य नहीं ? तब आज्ञा करी जो ये नदी नहीं हे ॥ ए तो श्रीस्वामिनीजी तुल्य तुर्य प्रिया रूप हे ॥ तासों नदी में तो मुख्य श्रीगंगाजीही हे ॥ तब राजा ए वचन सुनिके मेहेलमें गयो ओर वे बात केहेवे वालेकी फेंट पकरीके मेहेलमें सों निकास दीयो ॥ ओर राजाको निश्चय भयो ओर या मार्ग विषे दृढता बधी ॥ फेरी राजाकी विनतिसों कीतनेक दीन आप जेपुर बिराजे ॥ फेरी राजाको प्रसन्न करीके कांकरोली पधारे ॥ एसे आपके अनेक चरित्र हे सो कहां तांड लिखवे में आवे ॥ इति श्रीगिरिधरलालजी महाराजके वचनामृत अष्टादशमो संपूर्ण ॥ १८ ॥

 [वचनामृत १९ मो] 

अब आपने उन्नीसमो वचनामृत आज्ञा करी जो ॥ श्रीव्रजभूषणजी बडे तातजी चोरासी वर्ष भूतलपें बिराजे ॥ ओर पाछें आपके पौत्र श्री विठ्ठलनाथजी महाराजफों घर सोंप्यो ॥ जो तुम जानो ओर घर जाने ॥ सो फेरी घरको कार्य श्री विठ्ठलनाथजी महाराज सब करते ॥ सो एक बिरियां खरासको बंदोबस्त कर्यो जो खरासमें नये बेल हते सो तो खरासकी सेवामें राखे ॥ ओर बुडे बेल सेवा लायक न रहे तिनकुं आज्ञा भयी जो बागमें ले जाउं ॥ सो बागमें ले गये ॥ सो ए वातकी बडे तातजी श्रीव्रजभूषणजी महाराजके पास खबर पहींची ॥ तब राजभोग करीके

आप दरीखानाके आगे पधारे ॥ सो पारेख तुलसीदासजी हते ॥ सोउ वृद्ध हते ॥ सो तुलसीदासजीकुं आज्ञा करी जो बेटे कहा हो चलो ॥ तब इनने विनति करी जो राजा कहाँ चले ॥ तब आज्ञा करी जो बागमें चलो ॥ तुमहुं वृद्ध हो ॥ ओर हमहुं वृद्ध हे ॥ प्रभुनकी सेवा तो कछु नही बने हे तासों बागमें चलो महाप्रसाद तो विट्ठल पठावेगोइ ॥ सोए वातकी खबर श्रीविट्ठलनाथजी महाराजकुं भइ जो तातजी बागमें पधारे हे ॥ सो सुन-तही तातजीके पास पधारे ओर विनति करी जो आप यहां केसे ठाडे हो ॥ तब आज्ञा भई जो हम ओर तुलसीदासजी बागमें जाइमें ओर तुम भडे भये सेवा लायक भये सो तासों हमारो कहा काम हे ॥ तब श्री विट्ठलनाथजी महाराजने शरण पकडी लिये ओर विनति करी मोतें अप-राध भयो होय सो क्षमा करे ॥ ओर बेटकमें पधारे ओर तुलसीदासजी सों कही जो अबीके अबी बागमेंसो बेल आयके खरासमें बंधेगे तबमें भोजन करंगो ॥ एसी आज्ञा तातजीकी प्रसन्नता होवे के ताई श्रीविट्ठल-नाथजी महाराजने करी ॥ सो वाही समय बेल लायके खरासमें बंधवाये ॥ तब तातजीकी प्रसन्नता भइ ॥ ओरहु तातजीने नीतिविनोद ग्रंथ भाषामें कीयो हे तामें राजनीति बोहोत आछी निरूपण करी हे ॥ ओरहु ग्रंथ आपने कीये हे ॥ ओर आपको बडो अतुल प्रताप हे ॥ तामें उदेपुर तथा जेपुरमें वे जो करते सो होतो ॥ ओर उदेपुरमें अजबकुंवरबाइने सराय उदेपुरसों तीन कोसपें हे सो भेट करी ॥ ओर आपकों हीराके आभरणको बडो शोख हतो ॥ सो सोजोडि हार विगेरे सब संमराये हे ॥ ओर सुफेद वस्त्रपें आपको बडो शोख सो आप सिंगार करते तब सुफेद पाघ छजेदार तथा जामा तथा मोती लटकमें धरतें ॥ श्रीकंठमें एकाद मोतीकी कंठी तथा श्रीहस्तमें तुलसीकी माला राखते ॥ एसेइ सदा सर्वदा रहते ॥ आपके चित्रमें जहां तहां एसेइ दर्शन होवे हे ॥ तासों जानी पडेहे जो श्वेत वस्त्रपें आपकी प्रसन्नता बोहोत हती ॥ आपके यशके दोहा, कवित्त, छंद;

अनेक तरेहके यश चुंडाव तथा गोपालदासजीने जो ज्ञातके क्षत्रि रजपूत हते ॥ सो इनकुं गुरुभक्ति भारी हती ॥ वे बडे भक्त हते ॥ मेवाडमें करेडाको राज हे उहाँके वे राजा हते ॥ सो गुरुभक्तिके स्नेहते दासनामा गोपालदास नाम धारण कयो हतो वाने गाये हे ॥ सो ए श्रीवज्रभूषणजी महाराज एसे प्रतापी भये जिनने बडे बडे राजाको अपनो प्रताप जतायके शरण लिये ॥ ओर आपके श्रीहस्ताक्षर बहुत सुंदर आप लिखते सो पत्रनमें कहुं कहुं दर्शन होवे हे ॥ जैसे रत्नजटित ॥ श्रीभागवत मूल समग्र आदि ओरहु ग्रंथ आपने लिखे हे ॥ सो सरस्वतीभंडारमें बिराजेहे ॥ आपको प्रागटथ संवत् १७६५ के मागसर शुदि २ को हे ॥ इति श्री गिरिधरलालजी महाराजके वचनमृत उन्नीसमो संपूर्ण ॥ १९ ॥



 [वचनमृत २० मो] 

अब आपने वीसमो वचनमृत आज्ञा करी ॥ जो दान देनो सो पात्र देखीके देनो ॥ अपात्रकुं न देनो ॥ अपात्रकुं दीयो जाको फल आगे लिखे हे ॥ जो एक शाहुकारने एक फकीरकुं एक पैसा दीनो ॥ सो वा पैसाको वे सुत लायो ॥ वा सुतकी जाल बनाइ ॥ वा जालसे वे मच्छी पकडवे लग्यो ॥ सो जीतनी मच्छी मरी ताको पातक वा शाहुकारको लग्यो ॥ ताको फल ॥ जो यह लोकमें दरिद्रता आइ ओर परलोकमें हस्या आइ ॥ तासों दान पात्र देखीके करनो ॥ तासों एसो कलु आय पडे तो रोकड न देनो ॥ अन्नादिक देनो ॥ ओर एक ब्राह्मणकुं एक शाहुकारने एक पैसा दीनो ॥ सो वाने एक पैसाको कागद लायके कागदमें टीपणा लिख्यो ॥ सो टीपणा घरघर बाँचिके जो द्रव्य पेदा भयो ताका फल वा शाहुकारको भयो ॥ तब वा ब्राह्मणको टीपणा बाँचीवेमें द्रव्य बढ़यो ॥ जब दुसरे कागद लायके श्रीमद्भागवत लिख्यो ॥ सो वासो बाँचीके लोगनकुं सुनावे ता द्रव्यसों या ब्राह्मणको पोषण हु आछी रीतिसो होवे लग्यो ॥ सो वे फल वा शाहुकारको भयो ॥ ता प्रभावते द्रव्यहुं बहुत बढ़यो ॥ ओर वैकुण्ठ शक्ति भइ ॥ श्रीगीताजीमें कसो हे ॥ सो भ्रोक ॥

अदेशकाले यद्दानमपात्रेभ्यश्च दीयते ॥

असत्कृतमवज्ञातं तच्चामसमुदाहृतम् ॥ भ. गी. अ. १७-२२



तो श्रीभगवान् आपने अर्जुन प्रति आज्ञा करी ॥ तासों अपात्रको दान न देनो एसे आज्ञा करीके आप पोढे ॥ इति श्रीगिरिधरलालजी महाराजके वचनामृत वीसमो संपूर्ण ॥ २० ॥

 [वचनामृत २१ मो] 

अब एकवीसमो वचनामृत आपने आज्ञा करी ॥ जो गदाधरमिश्रके बेटा हरिशरण भये तब गदाधरदासकुं एक ही बेटा हतो ॥ तासों चित्तमें कष्ट बहुत भयो ॥ सो शोकग्रस्त होय गये ॥ सो काहुसों बोलेबतरावे नही ॥ सो बात श्रीगुसांइजी के आगे काहुने सोंपो ॥ तब शीतकालके दिन हते आपने आज्ञा करी जो सवेरे राजभोग आरति उपरांत गदाधरदासके इहां चलेंगे ॥ वा वातकी खबर गदाधरदासकुं भइ जो तुम्हारे यहां श्रीगुसांइजी पधारेंगे ॥ सो शीतकालके दिन हते तासो वेगही पधारत भये ॥ सो वधाइ गदाधरदासकुं भइ ॥ जो आप रस्तामें पधारतहे एसी खबर भई ॥ तब उठीके हाथमें झांझ लेके श्रीप्रभुजीके सन्मुख साहामें गये ॥ जहां सन्मुख दर्शन होतही साष्टांग दंडवत करे ॥ ओर रागखटमें एक पद गायो ॥ सो पद ॥

आज नंदलाल मुख चंदनेन्न विरखी परम मंगल भयो भवन मेरे ॥ कोटी कंदर्प लावण्य एकत्र करी जबही वारों तबही नेकहेरे ॥ १ ॥ सकल सुख सदन हरखीत बदन गोपवर प्रबलदल मदनदल संग घेरे । कहो कोउ केसे हु नाहीन सुध बुध रहस गदाधर मिश्र प्रभु गिरिधरन टेरे ॥२॥ या कीर्तनको अर्थ तो प्रत्यक्ष ही हे ॥ सो सुनिके आप बोहोत प्रसन्न भये ॥ ओर गावते बजावते आये ॥ तहां समाधान तो कित रख्यो जो श्रीप्रभुजीके आगे शोकत्व रहोंगा तो मेरो अलौकिक बिगडेगो ॥ एसो गदाधरदासजीने विचार्यो जो लौकिक तो बिगड्यो ओर अलौकिकमें

श्रीप्रभुजीके आगे शोकत्व रहेंगे तो मेरो अलौकिक बिगडेगो ॥ तासों अति प्रसन्नतासों लौकिक शोकको त्याग करीके अति आनंदयुक्त प्रभुनके सन्मुख गावत बजावत गये ॥ जो आप देखिके कहेंगे जो तुम्हारो आछो न भयो तो मेरो सर्वस्व बिगड जायगो ॥ तासों लौकिक सोच कलु न राख्यो ॥ न आपको दिखायो ॥ फेरी थोडी बिरियां गदाधरदासके घर बिराजके पाछे पधारे ॥ सो भोजन करी बिडी आरोगीके शैयापें पधारे ॥ सो निज सेवकको आज्ञा करी ॥ जो दश पांच वा बिरियां पासबेठे हते ॥ तिनसों कही जो देखो इनको धर्म ॥ जो विवेक, धैर्य, ओर आश्रय तीनों इनकुं सिद्ध भयो काउकुं कलु सिद्ध भयो ओर इनको तो तीनों पदार्थ एकही काल सिद्ध भयो हे ॥ सो सुनीके सब वैष्णव वा समय पास बेठे हते सो प्रशंसा करी गदाधरदासकी सराहना करवे लगे ॥ सो जीनके श्रीप्रभुजी आप श्रीमुखते सराहना करे हे जो पुष्टिमार्गमें विवेक धैर्य ओर आश्रय तीन पदार्थ मुख्य हे ॥ तामेंते कोइ भाग्यवानकुं एक पदार्थ सिद्ध होय हे ओर ए गदाधरदासकुं तीनों पदार्थ सिद्ध भये ॥ सो ए गदाधरदासके अहोभाग्य हे ॥ सो वे गदाधरदास एसे टेकके कृपापात्र हते ॥ तासों वैष्णवकुं तीनों जो विवेक धैर्य ओर आश्रय विषे रहेनो मुख्य पदार्थ येइ हे ॥ श्रीमहाप्रभुजी ने विवेक धैर्याश्रय ग्रंथ, षोडश ग्रंथमें निरूपण कयों हे ॥ तासों ए ग्रंथ मुख्य हे ॥ इति श्रीगिरिधरलालजी महाराजके वचनामृत एकवीसमो संपूर्ण ॥ २१ ॥

 [वचनामृत २२ मो.] 

अब आपने बावीसमो वचनामृत आज्ञा करी ॥ जो जेपुरके राजेन्द्र माधोसिंहजी परम वैष्णव हतो ॥ सो वाके राजमें एसी रीति हे ॥ जो गलताजीवारें संत महंत राजमें आवे ताकी संग चेला आवे तिन सबनको चरणामृत राजाजी आप ले एसी ठेठकी रीति हे ॥ राजाजी अपने हाथसों सबको पांव धोवे ओर सबको चरणामृत लेते ॥ सो माधोसिंहजीकुं ए



घात आछी न लागती ॥ परंतु ठेठका रीतिसों करनी पडती ॥ सो वाको एक प्रयत्न रच्यो सो अपने घोडाको चरवादार हतो ताको बिन गलता-जीवारेनको चेला करवायो ॥ फेरी वे संत महंत आये तब खेलानमें बेहु आयो ॥ तब इनकी रीति प्रमाण राजेन्द्र इनके पांव धोवते जाय ओर चरणामृत लेते जाय ॥ सो लेते लेते वे चरवादारको नाम पुरिया हतो सोउ पांव धोवायवेकुं आयो ॥ तब राजेन्द्रजीने कही के अरे पुरिया तुं हे ॥ तब उठीके हाथ जोडीके कही जो अन्नदाताजी इनमें सगरे पुरियाइ पुरिया हे ॥ कोइ अधूरो नही हे ॥ वे सबकी पेहेचान वा पुरियानें याद दिवाइ जो ए फलाणो हे ए ढोकणो हे एसे सबकुं ओलखाये ॥ फेरी वा दिनसुं वे संतमहंतको चरणामृत लेनो बंध भयो ॥ दूर ते जल डारी देहें इतनो वाको सन्मान राख्यो ॥ ओर पांव अपने हाथसों धोवते चरणामृत लेते सो सब छोड दीयो ॥ फेरी सबनकुं शीख दीनी ॥ ओर कइो जो एसेइ गवोला सबनमें चलेहें ॥ मार्ग तो एक श्रीमहाप्रभुजीको मुख्य हे ॥ जामें काहु घातकी कसर नहीं हे ॥ एसे निश्चय भयो ॥ जो ए माधवसिंहजीसों आज तांड जेपुरके राजा हमारे घरके सेवक होते आये हे ॥ सो ए मर्यादा इननें तोडी ॥ ओर सब संप्रदायको हक राजमेंते उठाय दीयो ॥ ए जेपुरको घर सातसें वर्ष पहेलेके राजा कल्लु सैमजते न होयंगे जो वैष्णवताको संग्रह कर्यो होयगो ॥ वा समयमें कोइ शास्त्रार्थ करवेवाले न होयंगे सो आपनहो चतुर भये ॥ एसी पूछताछ अबही भइहे ॥ ओर भगवद् द्वेष अबही होवे लग्यो हे ॥ सो भगवद् द्वेषीनकुं कहा कहेनो ॥ आपने आज्ञा करी सो श्लोक ॥

यः पुमान्पितरं द्वेष्टि तम् विद्यादन्यरेतसं ।

यः पुमान् श्रीहरिद्वेष्टि तं विद्यादन्यरेतसं ॥ १ ॥

यह श्रीजगदीशकी आज्ञा हे ॥ जो अपने बापसों तथा श्रीठाकुरजीसों द्वेष करे सो दुसरेके वीर्यतें उत्पन्न भयो जाननो निश्चय हे ॥ ता पर एक



प्रसंग कह्यो ॥ के इन राजाजीकुं नाम सुनायवेकुं श्रीदादाजी महाराज जेपुर पधारे ॥ तब इनकुं नाम सुनायके पधारे तब राजाजी विदा करी-वेको आये ॥ तब रावलजी लक्ष्मणसिंहजी तथा बडी राणी केसरबाइने राजाजीकुं शिखायके विनति करवाइ जो पृथ्वीनाथ ! म्हारो सगपण उद-यपुर व्हे एसे आप करें ॥ तब आपनें आज्ञा करी जो हम दिवानजीसों केहे देइंगे ॥ करनो नकरनो तो इनके हाथ हे ॥ फेरी आप कांकरोली पधारे ॥ पाछें जब आप उदयपुर पधारे तब महाराणाजी स्वरूपसिंहजी स्हामें पधरायवे आये ॥ जब जेपुर संबंधी बात भइ ॥ तब आज्ञा करी जो जेपुर राजेन्द्रने हमकुं बोहोत प्रसन्न राखे ॥ फेरी आज्ञा कीये जो बडे राणाजी सिरदारसिंहजीकी बाइ दोग हे तिनमें सुं एकादको सगपण जेपुर होय तो बोहोत आछो ॥ क्योंकि बराबरीकोठिकानोहे तासों व्याहको आ-नंद आछो आवेगो ॥ ओर इननें या बातकी कहेनहु करी हे ॥ तब राणा-जीनें कहीजो आप कहे तेसें संमत हे सब तरेह आछो हे ॥ परंतु आपकी आज्ञा उलंघन सर्वथा नहीं करनी ॥ परंतु वीर्यपलट सुनेहे ॥ सो लोक-प्रसिद्ध हे ॥ तासों आप नहीं लिखेंगे ॥ पाछें एकाद दिन बिराजीके आप कांकरोली पधारे ॥ फेरी जेपुर लिखी दीनो जो इहां करवेको इनको मन नहीं हे ॥ सो एसे वे बातकी आज्ञा करीके आप पोटे ॥ इति श्रीगिरिधरलालजी महाराजके वचनामृत बावीसमो संपूर्ण ॥ २२ ॥

 [वचनामृत २३ मो.] 

अब तेवोसमो वचनामृत आप आज्ञा करे ॥ जो माधसिंहजीके बेटा प्रतापसिंहजी हते सोउ बडे भक्त हते ॥ सो श्रीब्रजनिधजीके उपर बोहोत आसक्ति हती ॥ ओर इननें एद स्याल ठुमरी बोहोत कीये हे तामें छाप श्रीब्रजनिधजीकी धरीहे ॥ सो श्रीब्रजनिधजी श्रीविठ्ठलनाथजी महाराज तातजीके सेव्य कीये हे ॥ सो इन प्रतापसिंहजीके अगाडी वात चली जो श्रीवल्लभकुल तो आखो दिन सेवामेंइ रहेहे ॥ सो या बातमें राजाकुं संदेह

भयो ॥ जो मंगलातें राजभोग पर्यन्त तथा उत्थापनतें लगाय सेन पर्यन्त तो सेवा हे सो तो जाने हे ॥ परंतु आखो दिन कहेहे सो बिचमें कहा करते हायगे एसे संदेह मनमें रख्यो तब एक दिना राजभोग उपरांत प्रहर एक पीछे अचानक श्रीगोकुलनाथजीके मंदिरमें चले गये ॥ सो जातेइ जनानामें चले गये ॥ सो इहां श्रीदादाजी, श्रीकमलावहुजी, श्रीगोस्वामी श्रीगोवर्धनेशजीके बहुजी सो गादि तकिया उपर बिराज रहे हंतं ओर अगाडी आरति थालमें पुरत हते ॥ सो राजाको देखीके चादर ओढी लीनी ओर बाइनसों हेला पाडे सो बाइ सब खाय रही हती ॥ फेरी राजाने विनति करी जो आप तो मेरी मा हो ओर में बेटा हुं ॥ अब लाज केसी ॥ तो हुं आपतो बोले नहीं ॥ चादर ओढीके गादीपें बिराज रहे ॥ फेरी राजाने माको पटा भेट कर्यो ओर वा दिनासों मा कहीके बोलते ॥ ओर गाम भेट करे ओर निश्चय भयो ॥ जो इनको व्यवहार आठो प्रहर सेवामेंइ हे ॥ सो ए तो काननसोंसुनी आगली वात हे ॥ ओर अब देखवेमें हमारे भाभीजी श्रीपद्मावती बहुजी महाराजको अष्टप्रहर सेवामेंही लग्न हे ॥ दोउ बिरियां न्हाये विना चले नहीं ॥ ओर जगायवेतें लगाय पोढायवे तांडकी सेवा सब अपने श्रीहस्तसों करते हे ॥ ओर भोग रागसों तथा अनेक तरेहके मनोरथसों श्रीद्वारकाधीशको लाड लडावेहें ॥ काहु वातकी कसर नहीं ॥ असोइ अपने श्रीहस्तसों बोहोत सुंदर करे ॥ सो श्रीप्रभुजी चारों श्रीहस्तसों आरोगे हे ॥ सो महाप्रसादद्वारा स्वाद मालम पडे हे ॥ तथा आरति ओर छट्टी आप बहुत सुंदर मंडे हे ॥ सो ओर तो काहा जाने परंतु हमारी जातिके बहु बेटा तथा कोइ वैष्णव भाविक सेवामें रीतिभांति जाने सो समजे ॥ सो बोहोत सरावे हे ॥ छट्टीकी बेली प्रतिसाल नइ नइ होवे हे ॥ सो एसी विचित्रता ओर जगे देखवेमें आवे नहीं ॥ ओर हमकुं तो श्रीद्वारकाधीशकी सेवाको अलौकिक फल आपके चरणारविंदके प्रतापसों मिल्यो हे ॥ ओर हमतें जो कलु बने हे सो सब आपका अनुग्रह जाननो ॥ ओर हमतो

नित्य प्रति श्रीद्वारकाधीशपें यह मांगे हे ॥ जो यह चरण सदा हमारे माथेपें रहे ॥ ओर आज कालजो सुख श्रीप्रभुजीको हे एसो सुख सदा सर्वदा बन्यो रहे एऽ मांगे हे ॥ ओर श्रीविठ्ठलेश्वरायजीके घरमें श्रीविठ्ठल-रायजी के बहुजी श्रीरुकमणीबहुजी जाको उपनाम श्रीदादीजी महाराज सब कोउ कहते हे ॥ सो आप बिराजे तहां तांइ श्रीविठ्ठलेश्वरायजीको सेवा बडी अलौकिक स्नेह रीतिसों करो ॥ सो सेवा तो आज हु होय हे ॥ ओर श्रीनटवरलालजीके यहां हमारे नानीजी श्रीव्रजकोरबहुजीने श्रीनट-वरलालकुं वेसेइ लाड लडाये ॥ सो वा समय द्रव्यादिकको संकोच हतो ओर अबके तो द्रव्यादिकसों आनंद हे ॥ सो काकाजी श्रीव्रजरायजीहुं परम स्नेहसों दोउ मंदिरमें सेवा करे हे ॥ सो बडो वैभव तथा रायभोगमें कलु कसर नही ॥ ए तो हमारी दृष्टिपथसों देखी बात हे ॥ ओर कीर्त्तनको सुख तो श्रीद्वारकाधीशको जो हे ॥ वेसो ओर जगे नहीहे ॥ तासों अपने भक्तिमार्गमें मुख्य सेवाही पदार्थ हे ॥ जो स्नेहपूर्वक करे जाकी सराहना ओर बडाइ होय सो कहां तांइ लिखे ॥ मुख्य सार सेवाहि जाननो ॥ इति श्रीगिरिधरलालजीमहाराजके वचनामृत त्रेतोसमो संपूर्णः ॥२३॥

 [वचनामृत २४ मो.] 

अब चौवीसमो वचनामृत आपनें आज्ञा करो जो आजकाल तो राजानमें मुख्य भगवद्भाविक श्रीकिसनगढके राजाजी पृथ्वीसिंहजी हैं ॥ सो अपने मार्गमें बोहोत कुशल हे ओर अपने मार्गके ग्रंथ बोहोत देखेहे तथा पढेहुहे ॥ ओर सेवामें स्नेह बोहोत हे ॥ सो श्रीकल्याणरायजी श्री गुसांइजीके सेव्य हे ॥ सो इनके माथे बिराजे हे ॥ सातो बालक इन श्रीकल्याणरायजी सों शृंगार शिखते सो स्वरूप किसनगढ राजाजीके माथे बिराजे हे ॥ ओर नागरिदासकृत कीर्त्तन गवेहे सो वे अगाडी किसनगढके राजा भये तिननें करेहे ॥ सो नागरिदास बडे भगवदी भये हे ॥ तासों आज तांइ किसनगढके राजाजीके घरमें अखंड भक्तिभाव अबीतांइ एक-

सार चल्थो जाय हे ॥ हम किसनगढ गये सो देखीके चित्त बोहोत प्रसन्न भयो ॥ राजाजीने ब्रह्मसंबंध कोटावारे गोस्वामी श्रीकन्हैयालालजीको कयों हे ॥ ओर महाप्रसाद मंदिरमें ही लेवेहे ॥ ओर सावकाशमें विद्वन्मंडनकी पोथी देखे हे ॥ ओर श्रीमहाप्रभुजीको चित्र जो आप बिराजतेइ भयो हे सो प्राचीन स्वरूप चित्र इनके यहां बिराजत हे ॥ सो मंदिरमेंइ श्रीकल्याण-रायजीके पास बिराजे हे ॥ तब दासने विनति करी ॥ जो कृपानाथ ए चित्र इनकुं केसे प्राप्त भयो ॥ तापर आपने आज्ञा करी ॥ जो पृथ्वीपतिने चितेरे पठायके चारों संप्रदायके आचार्य ता समय जो होइंगे तिन सब-नके चित्र करवाय मंगाये तामें श्री महाप्रभुजीके चित्र पृथ्वीपतिके पास आयो ॥ सो किसनगढ राजाजीने दर्शन करे सो चित्तमें आइ जो ए पदार्थ इहां न बैये ॥ ए पदार्थ काहु भांतिसो अपने माथे बिराजे तो अहोभाग्य ॥ सो देशाधिपतिके सब राजा चाकरी करते ॥ सो एक समे कल्लु भारी काम आयो ॥ सो काहुसों न बन्यो सो किसनगढ राजाजीने श्रीप्रभुनकी कृपातें वे काम सही कयों ॥ सो देशाधि-पतिकी बहुत प्रसन्नता भइ ॥ तब कह्यो जो जो मागो सो देउं ॥ तब इनने यह माग्यो जो हमारे इष्टगुरुदेवको चित्र आपके यहां बिराजे हे सो देउ ॥ तब वे चित्र देशाधिपतिने किसनगढ राजाजीकुं दियो ॥ सो ता दिनसों ए श्रीमहाप्रभुजीको चित्र किसनगढ बिराजे हे ॥ ओर श्रीगुसांइ-जको असल चित्र श्रीचंद्रमाजीके घरमें बिराजे हे ॥ सो श्रीगुसांइजी आप श्रीहस्तसों अलंकृत करीके श्रीरघुनाथजीकुं दीयो हे ॥ सो स्वरूप गौर हे ॥ तहां संदेह होय जो आपको श्याम स्वरूपको वर्णन कहे हे ॥ सो तहां निर्णय ॥ जो छितस्वामी वधाइमें कही आये हे ॥ जो “सांवरे वर्णपूर्ण घनचंदा देखीयत तीनलोक उजीयारे” ॥ तथा बल्लभाख्यानमें दोउ जगे निरूपण हे. प्रथम ही आरंभमें “वंदु श्रीविठ्ठलवर सुंदर नव घनश्याम

१. श्रीगुसांइजीना गौर स्वरूप संबन्धी अमे प्राचीन भगवद्गीतोना श्रीसुखथी जे आख्यायिका भ्रवण करी छे ते नीचे मुजबः—



तमाल" ॥ सो ए हु स्याम स्याम स्वरूप निरूपण भयो तथा दुसरे ॥
 "सगुण स्नेही श्यामलावाला अहर्निश दर्शन आपोजी" ॥ यहाँ हु श्याम-
 स्वरूप निरूपण हे ॥ तासों इत्यादि वाक्यतेँ निश्चय तो श्यामस्वरूप हे ॥
 परंतु ए बात हमने एक दो शिष्ट चितेरेनकुं पूछी सो इनने कही के हमकुं
 तो लिखिके श्लोक दियो हे ॥

सायं कुञ्जालयस्थासनमुपविलसत्स्वर्णपात्रं सुधौतं
 राजयज्ञोपवितं परितनु वसनं गोरमम्भोजवक्त्रम् ।
 प्राणानायम्य नासापुटनिहितकरं कर्णराजद्विमुक्तं ।
 वन्देऽधोन्मीलिताक्षं मृगमदतिलकं विड्डलेशं सुकेशम् ॥



तथा कवित ॥ आपको कयों थको सो कवितः—सांझके समय कुंजसदनमें
 बिराजमान कनकके पात्र शुभ धोवती बसतहैं ॥ यज्ञोपवित अंग उपरना
 हुं श्वेत सोहे गौर ए भोजमुख मंद मुसकतहैं ॥ नासिकापकरि प्रणायम्यहुं
 आप करे सुंदर सुकेश कर्ण मोती द्वे लसत हैं ॥ अर्ध यन्मिलनेत्र तिलक
 मृगमदको भाल एसे विड्डलेश भक्तहृदयमें बसत हे ॥१॥ याको अर्थ ॥
 जो सायंकालके विषे कुंजालयमें बिराजत हे सो आपके सन्मुख सुवर्णपात्र
 धर्यो हे ॥ ओर सुंदर धोती धारण करी हे ॥ शोभायमान यज्ञोपवित धारण
 कयों हे ॥ ओर उपरणा धारण कयों हे. ओर सुफेद कमल जेसो मुखार-

आपश्रीना पंचमलालजी श्रीरघुनाथजीने एषो नियम हतो के पोते शैयामांथी उम्ह्रां नेत्रकमल मुदीनेज
 उम्ह्रा अने श्रीगुसांइजी पासे पहोची बंडवत करी आपश्रीना मुखारविंदनी भांखी करे त्यारे नेत्र खोलता,
 एक समय पोते सहेज अवेरा जाग्या तेथी पोताने श्रीगुसांइजी पासे छेड जनार खवास भगवच्छायी ते
 स्पष्टे हाजर नहीं होवाथी आपश्री एकलाज श्रीगुसांइजी पासे चाल्या, नेत्र मुंदेला होवाथी वच्चे एक थांमलो
 आव्यो ते आपश्रीने वाम्यो छतां पोते तो श्रीगुसांइजी पासे पहोह्या, बंडवत करी मुखारविंदनां दर्शन
 करी नेत्र खोल्यां. श्रीगुसांइजीए पुछ्युं ! बाबा आ हुं थयुं ! पोते सवळी हकीकत निवेदन करी आथी
 तक्षणेज श्रीगुसांइजीए एक चिताराने बोलावी पोतानुं स्वरूप सिद्ध कराल्युं तो गौर स्वरूप आव्युं, बीजी
 बसत पण गौर स्वरूप आव्युं, त्रीजी बसत पण तेमज थयुं, तेथी पोते विचार कयों के हवे आ स्वरूपथीज
 मूल उपर बिराजवानी श्रीनो इच्छा जणाय छे त्यारथी पोतानुं गौर स्वरूप थयुं छे, आ वार्ता श्रीगुसांइजीनो
 ५८ वर्षनी उम्हरे बनी छे एष भगवदीयो कहे छे.

विंद ॥ ओर श्रीहस्तसो प्राणायम्य करे हे ॥ ओर दोनोइ श्रीकर्णमें मुक्ता धारण करे हे ॥ ओर कल्लुक खुले नेत्र हे ॥ ओर कस्तुरीको तिलक श्री मस्तकपें सदाइ बिराजेहे ॥ सुंदर हे केश जीनके ॥ एसे श्रीगुसांइजी आप हे ॥ सोइ आज्ञातें गौर वर्ण चित्र भये ॥ परंतु आपको स्वरूप तो श्यामहीहे यह निर्धार भयो ॥ इति श्रीगिरिधरलालजी महाराजके वचनामृत चोवीशमो संपूर्ण ॥ २४ ॥

 [वचनामृत २५ मो.] 



अब पचीशमो वचनामृत आप आज्ञा करी जो संवत् १९३३ के माघ कृष्ण ९ नोमके दिन सोमवार हतो ॥ सो श्रीभाभीजी महाराजने आज्ञा करी जो अबके आखे शीतकालमें मावठा भयो नहीं ॥ एसी आज्ञा राजभोग आरती समे करी ओर कछो जो राजभोग उपरांत चंदोवा बंधाय दीजो ॥ ओर उत्थापन समय अंगीठी तीन करवाइयो ॥ तब हमने फेरि विनती करी जो जे जे जोरावरीसों ॥ तब आज्ञा करी जो आखो शीतकाल यौंइ जावे लग्यो तब केसे करे ॥ सो झापटीयाजीसुं केहेवाय दीनी जो चंदोवा बंधाय दीजो तथा अंगीठी तीन कराय दोजो ॥ सो वाइ प्रमाण मंदिरमें तो भयो ओर ठंडहु पडी जो ॥ मावठाको कार्य एसेही होत लग्यो ॥ एसे श्रीप्रभुजी अपने स्वकीय भक्तनके मनकें मनोरथ निरंतर सिद्ध करत हे ॥ ए वार्ता आज भइ ॥ सो एइ आज्ञा करिके पोढे ॥ एसे श्रीवल्लभ-देवके बालकको प्रताप हे जो इच्छामें आवे सोइ करे ॥ श्रीवल्लभ चाहे सोइ करे ॥ सो जाबिरियां आज्ञा भई ॥ ताबिरियां कल्लु न हतो ॥ इति श्रीगिरिधरलालजी महाराजके वचनामृत पचीशमो संपूर्ण ॥ २५ ॥

 [वचनामृत २६ मो.] 

अब छवीसमो वचनामृत आपने आज्ञा करी ॥ जो हमारे श्रीचन्द्र-माजीके चरणस्पर्श तथा आरतीको व्यवहार हे ॥ ओर श्रृंगारको नही हे ॥ सो मुखीयाजीके पुत्र द्वारकादासनें प्रश्न कयो ॥ जो चरण स्पर्शवारेकों

आरती कैसे मिले ? ओर चरण स्पर्शवारे कुं आरती ए तो नई बात हे ॥ ताको कारण कहा ? तापर आपने आज्ञा करी जो अपने घरके श्रीगिरिधरलालजी भवाइवारेनें श्रीचंद्रमाजीके घरके श्रीवल्लभजी महाराजके पास गानविद्याको अभ्यास कर्यो हतो ॥ सो श्रीवल्लभजी महाराज श्रीजीद्वार होते ॥ सो कांकरोली आये सो गुरुदक्षिणामें श्रीद्वारकाधीशकों श्रृंगार दियो ॥ ओर परस्पर व्यवहार कर्यो ॥ ओर श्रृंगारकी सेवा सब दीनी ॥ सेवा करि विदा होयके कामवन पधारे ॥ फेरि श्रीगिरिधरलालजी महाराज व्रजकुं पधारे यात्राके लिये ॥ सो खबर गोस्वामी श्रीवल्लभजीकुं भइ जो श्रीगिरिधरलालजी श्रीगोकुल पधारे हे ॥ तब आप श्रीवल्लभजी महाराजने मुखियाजीसों आज्ञा करि जो में कांकरोली गयो तब श्रीद्वारकानाथजी के सेवा श्रृंगार करे हे ॥ सो अब ए अपने इहां आवेंगे तब देने पडेगें ओर अपने इहां तो कोइको श्रृंगार देवेकी रीति हे नही ॥ जो में यहां रहुंगो ॥ ओर ये इहां आवेंगे तो श्रृंगार जरूर देने पडेगें ॥ तासों परदेश जाउं ॥ ओर ए इहां आवे तो तुम सेवा श्रृंगारीकी करवाइयो ॥ परंतु श्रृंगारकुं तुम बेठी जइयो ॥ वा विरियां ए कलु कहे तो तुम कहियो " जो हमारे महाराज तों परदेश पधारे हे ओर मेरो सामर्थ्य नहीं हे " एसे कहियो ॥ ओर सब भांतिसो समाधान राखोगे ॥ ओर मेरो तो एसे करें बिना बचवेको उपाय हे नही ॥ तासों एसे समजायके काशीके परदेशकुं पधारे ॥ शिघ्र ही तैयारी छानें छानें करी दीनी ॥ सो काहुको खबर न पडी, जो काशीके परदेशकों पधारे हे ॥ फेरि श्रीगिरिधरलालजी कामवन पधारे, सो श्रीचंद्रमाजीके मंदिरमें इ उतरे ॥ सवेरकी वखत आप स्नान करि शंखनाद करवाये ओर मुखियाजी हुं आप सो अत्यंत प्रसन्नतासों सब सेवामें हाजर रहे ॥ ओर मुखियाजीने मंगलभोग धरिके आपसुं विनति करि जो आपके पधारेकी महाराजकुं खबर नही ओर कलु अचानक बात आय पडी सो उताबले काशीको पधारे ॥ तब आपने आज्ञा करी जो हमारे मिलवेको

चित्त बहोत हतो ॥ सो बिराजते तो हमकुं हुं मिलते ॥ फेरि समय भये मंगलभोग सराये, मंगला आरति करिके श्रीहस्त धोवे पधारे इतनें मुखियाजी श्रृंगारकी चोकी उपर श्रीठाकोरजीकुं पधरायके श्रृंगार करवे लगि गये ॥ फेरि श्रीगिरिधरलालजी श्रीहस्त धोयके पधारे ओर आज्ञा करि जा मुखियाजी ए बात कैसे ॥ तब मुखियाजीनें बिनती करी जो कृपानाथ ! ए बात मेरे बलकी नांही हे ॥ आपने सोकों आज्ञा नही करी ॥ जो श्रृंगार देवेकी मेरी सामर्थ्य नही हे ॥ जो आप बिराजते तो सब बात होती ॥ तासों ओर सेवा तो आप भलेइ करे ॥ आपको घर हे ॥ फेरि आपनें आज्ञा करि जो भले जेसो हमकुं इहां मिलेगो तेसे हमारे घरसों इनकुं मिलेगो ॥ एसे कहे के बिराजे, ओर तो सब सेवा करी ॥ तबसों श्रीचन्द्रमाजीके धरधारेनसों श्रृंगार व्यवहार नहीं हे ॥ ओर सेवा तथा आरतीको व्यवहार रह्यो ॥ ओर सातो घरनके श्रीगुसांइजीको व्यवहार तो लेनो देनो बराबर हे ॥ ओर श्रीगुसांइजीकुं तो देनोइ हे ॥ श्रीचन्द्रमाजी सानुभाव हते दिखावते ओर काकाजी श्रीब्रजभूषणजीकी हुं बडी कृपा हती ओर इनके बेटा व्यस मुरलीधरजी बेहु बहोत आछे हते ॥ कितनेक समाचार श्रीचन्द्रमाजीके घरकी रीतिके इनके मुखतें वाकब भयेहे ॥ इति श्रीगिरिधरलालजी महाराजके वचनामृत छवीसमो संपूर्ण ॥ २६ ॥

 [वचनामृत २७ नो.] 

अब मुत्ताइसमो वचनामृत आपने आज्ञा करी ॥ जो श्रीगुसांइजी आपनें श्रीमहाप्रभुजीके तीन ग्रन्थ कीये हे ॥ जाके नाम ॥ एकतो 'श्रीसर्वोत्तम हे ॥ जोयामें आपके अष्टोत्तरशत नाम निरूपण करेहें ॥ ओर सर्वोत्तम नाम धर्यो ॥ सो सबनमें श्रेष्ठ हे ॥ तासों सर्वोत्तम एसो नाम धर्यो ॥ ओर श्रीवल्लभाष्टक किये ॥ तामें आपके स्वरूपको वर्णन कर्यो ॥

१ २. श्रीसर्वोत्तमस्तोत्र तथा श्रीवल्लभाष्टक आ वे ग्रन्थ उपर गुजराती टीका अमरा तरफथी छपाह हालमां प्रगट थइ छे.

ओर श्रीस्फूर्तकृष्णप्रेमामृत ग्रन्थ कीयो तामें आपके गुणको वर्णन कर्यो ॥ जो श्रीमहाप्रभुजीके गुणानुवाद एसे हे ॥ जो ए तीन्यो ग्रन्थको पाठ वैष्णवकुं नित्य प्रति करनो चाइये ॥ ओर श्रीमहाप्रभुजीके तथा श्रीगुसां-इजीके बावन ग्रन्थ हे तामें षोडश ग्रन्थ श्रीमहाप्रभुजी आप प्रथम किये ॥ तिनमें आपनें सब मार्गको सिद्धान्त निरूपण कर्यो हे ॥ तामें प्रथम श्री-यमुनाष्टकको आरंभ कर्यो ॥ जामें कारण येइ हे जो “स्वभावविजयो भवे-द्वदति बल्लभः श्री हरेः” याको पाठ करेतें स्वभावको विजय होवे हे ॥ तासों श्री यमुनाष्टकको पाठ प्रथम करनो ॥ षोडश ग्रन्थके प्रारंभमें प्रथम श्रीयमुनाष्टक राख्यो हे ॥ सो याइ कारण ॥ जो प्रथम स्वभावको विजय होय तब अलौकिकमें प्रवेश होय ॥ ओर श्रीयमुनाजीकी तिन ठोर मुख्यता राखी हे ॥ “विशुद्धमथुरातटे” सो तो “विश्रांत” जहां श्री-महाप्रभुजी तिबारीमें विराजे हे ॥ ओर दुसरो “सकल गोप गोपीवृते” “रावल ओर ठकुराणी घाट हे” ॥ सो मम मनःसुखं भावय ॥ जो मेरे सुखपूर्वक भावना होय ॥ सो ए श्रीमहाप्रभुजीके वचनमृतहे ॥ दुसरो ग्रन्थ सिद्धान्त मुक्तावलि किये ॥ तामें सब संशयको नाश होय ॥ ओर मुख्य जो मानसी सेवा ताको प्रश्न बताये ताके साधन दोय “तनुजा तथा वित्तजा” ओर तिसरो ग्रन्थ बालबोध किये तामें मार्गकी रीति बताइ ॥ ब्रह्मको निरूपण किये ॥ ओर बालबोध यातें नाम धर्यो जो सहजमेंइ बोध बलवन्त होय ओर चतुर्थ ग्रन्थ पुष्टिप्रवाहमर्यादा करे ॥ जामें पुष्टिको तथा प्रवाहको तथा मर्यादाको भेद तीनों न्यारे न्यारे देखाये ॥ पांचमो ग्रन्थ सिद्धान्तरहस्य किये ॥ जामें जीवकुं ब्रह्मसंबंध अवश्य करनो ॥ जासों सर्व दोषकी निवृत्ति होय ॥ भगवद् प्राप्ति होय ॥ ओर छट्टो नवरत्न ग्रन्थ आज्ञा किये ॥ जामें चिंताकी निवृत्ति किये ॥ चिंता निवृत्त भये विना अलौकिक प्राप्ति न होय ॥ तामें मुख्य “श्रीकृष्णः शरणं मम” येह औषधि रूप साधन हे ॥ तासों चिंता रेहेवे पावे नही ॥ जब

चिंताकी निवृत्ति भइ तब अंतःकरणमें बोध लगे ॥ सो फेरि सातमो अंतःकरण प्रबोध कयो सो अंतःकरण प्रबोध कयो जामें श्रीकृष्णके नाम विना परम दैवत नाहिहे ॥ येहे निश्चय भयो तब अंतःकरणको प्रबोध भयो ॥ तदनंतर अष्टम विवेकधैर्याश्रय ग्रन्थकीयो जामें विवेक, धीरज ओर आश्रय ए तीनों निरूपण किये ॥ जो वैष्णवकुं समयानुसार तीनोंको ग्रहण अष्ट-प्रहर राखनो ॥ तब नवमो श्रीकृष्णाश्रय निरूपण कयो ॥ जामें आगे आश्रय उपर निरूपण कयो हे सोइ श्रीकृष्णाश्रय मुख्य हे ॥ तदनंतर दशमो चतुःश्लोकी निरूपण कयो ॥ जो आश्रय करिके श्रीकृष्णको चरणारविंद सेवनभजन करनो ॥ येइ मुख्य पदार्थ हे इनसों भक्ति बढे ॥ ता पाछें एकादशमो भक्तिवर्द्धनि किये ॥ जासों भक्ति बढे जामें दोय मुख्य राखे सेवा ओर कथा ॥ पाछें द्वादशमो जलभेद भयो ॥ जामें वक्ता वीश-प्रकारसों निरूपणकरे ॥ ता पाछें त्रयोदशमो पंच पद्यानि आज्ञा करे तामें श्रोताके भेद कहे ॥ ता पीछे चतुर्दशमो संन्यासनिर्णय आज्ञा करे सो कलिमें संन्यास वर्जित हे ॥ कयो जो संन्यासी होयके कर्मत्याग होय नही तो वा संन्यासीके लीये शास्त्रमें ओर श्रीगीताजीमें लिख्यो हे जो श्लोकः—
 काम्यानां कर्मणां त्यागं संन्यासं कवयो विदुः ॥” तासों काम्य कर्मको त्याग करनो सो या युगमें होय न सके, तासों भक्तिरूपी संन्यास करनो ॥ ताकी विधि सब या ग्रन्थमें बताइ हे ॥ ता पीछे पंदरमो निरोध लक्षण आज्ञा किये ॥ जो भक्तिरूपी संन्यस्त सिद्ध भये पीछे निरोध होय सो कहा ॥ तब आपने आज्ञा करि ॥ जो सब इंद्रिनके अनुरागसों तथा लौकिकसों आसक्ति छूटि जाय ओर केवल भगवद्चरणारविंदमें चित्त लगी जाय ताको नाम निरोध हे ॥ सो निरोध सिद्ध भये पीछे सेवाफल निरूपण कयो जो निरोध भये पीछे सेवा सिद्ध होय ॥ सेवा सिद्ध भये पीछे कलु न रह्यो ॥ सर्वोपर साधन मुख्य सार हे सोइ सेवाहे ॥ या प्रकार श्रीमहाप्रभुजी अपने आधुनिक जीव उपर कृपा करिके स्वाभिप्राय षाडशग्रन्थ निरू-

पण किये ॥ सो वैष्णवको षोडशग्रन्थको पाठ नित्य नियमपूर्वक करनी उचित हे ॥ तासों अन्यथा दोष बाधा न करे ॥ ओर श्रीपुरुषोत्तमसहस्र नाम स्तोत्र आपके बडे पुत्र श्रीगोपीनाथजीको यह नेम हतो जो श्रीमद्भागवतजीको पाठ भये पीछे भोजन करनी ॥ सो तिसरे दिन श्रीभागवतजीको पाठ पूरो होतो तब भोजन करते ॥ सो बात श्रीमदाचार्यजीको निभ्यति न दिखी सो या के लिये श्रीभागवतजीमेंसोंश्रीपुरुषोत्तमके सहस्रनाम प्रगट करिकें श्रीगोपीनाथजी सों आज्ञा करी जो याको पाठ करवो करो जासों श्रीमद्भागवतजीके समग्र पाठको फल होयगो ॥ यह आज्ञा भई तब श्रीगोपीनाथजीकुं नित्य भोजनकी अवकाश आइ ॥ तासों श्रीमहाप्रभुजीने तथा श्रीगुसांइजीने जीतने ग्रंथकिये हे सो सब स्वाभिप्राय आज्ञा किये हे ॥ तासों ए ग्रन्थको परिचय वैष्णवकुं राखनी ॥ ओर प्रबोध तथा श्रीमधुराष्टक तथा श्रीस्वामिन्यष्टक तथा श्रीस्वामिनीस्तोत्र तथा परिषुद्धाष्टक तथा आर्या तथा गुस्तरस तथा व्रतचर्या इतने ग्रंथको पाठ श्रीगोस्वामी बालक करे ॥ वैष्णवकुं योग्यता नही हे ॥ एसे आज्ञा करिकें आप पोषाक धरिकेखिरकमें गौमाताकुं मीठी धुली अरोगायवेकुं पधारे ॥ इति श्रीगिरिधरकालजी महाराजके वचनामृत सत्तावोशमो संपूर्ण ॥ २७ ॥





[वचनामृत २८ मो.]



अब अष्टावीशमो वचनामृत आपने आज्ञा करे ॥ जो खिरकमें पधारे सो गौमाताकुं धुलीप्रसाद खवायके बेठकमें पधारे ॥ सो वा दिन मिति माघकृष्णपक्ष १० मंगलवार, संवत् १९३३ के दिन आप अत्यंत प्रसन्नतामें बिराजे ॥ ओर आज्ञा करि जो आजको दिन अत्यंत आनंदको हे ॥ खिरकमें ग्वाल गांगबोले ॥ फेरि ग्वालको मुखिया गौरज लायो ॥ सो गौरज आपने नेत्रनसुं लगाइ तथा श्रीअंगमें लगाइ ॥ तब दासने विनती करी जो कृपानाथ ! गौरज मोढेमें लेनी के न लेनी ॥ तब आपने आज्ञा करि जो गौरज तो शरीरसों तथा आंखनसों लगावनी चाहीये मोढेमें नही लेनी

॥ तब आपने आज्ञा करि हे “जो गौरज गंगा न्हात हों” जो इनको माहात्म्य शरीरकों लगायवेको हे ॥ सो सब देह पवित्र हो जाय ओर मोढेमें न लेवेको अभिप्राय ये हे ॥ जो गौरजमें बाल आवेहे सो बाल आवे तो बडो अपराध पडें तासों न लेनी ॥ तापें आपने आज्ञा करि जो एक मुकुंद ब्रह्मचारी हतो ॥ सो देशाधिपति होवेके लीये नखशीख तांइ अपने शरीरको होम कयों ॥ सो चेलानकुं कही राख्यो जो सब देहहोमते मोढो आवे तब मोकां दुध पिवाइयो ॥ सो सब देह होमते जब मोढो शेष रह्यो तब दुध पिवायो ॥ सो बिनाछांनें पिवायो तासों देशाधिपति तो भयो ॥ परंतु म्लेच्छ भयो ॥ सो अकबर पादशाह भयो ॥ सो दुधमें केश आयो तासों ॥ ओर चेलाने हुं पियो सोउ सब म्लेच्छ भये ॥ ओर जिन चेलाने दुध नहि पियो सो उत्तम जातिमें बिरबलादि हिंदु भये ॥ सो ए बाल दुधके भीतर आवे ताको अपराध एसो हे ॥ तासों गौरज लेवेके तांइ विचार रखनो सो गौरज शरीरकोंइ लगावनी ओर जलहुं छांनें बिना नहि पिवनो ॥ जलके भीतर बारिक जीव रहे हे देखे न पडे एसे ॥ तासों जल छांनिके इ पोवनो ॥ ओर शास्त्र श्रीमद्भागवत ॐएकादश स्कंधमें श्रीठा-
कुरजीने उद्धवजी प्रति आज्ञा करि हे ॥ इति श्रीगिरिधरलालजी महारा-
जके वचनामृत अष्टावीशमो संपूर्ण ॥ २८ ॥

 [वचनामृत २९ मो.] 

अब उनतीसमो वचनामृत आपने आज्ञाकिये जो ॥ श्रीगुसांइजीके पांचमें लालबावा श्रीरघुनाथजीको व्याह हतो ॥ सो ताइ दिना तुलसी-
दासजी अयोध्याजीसुं आये हते ॥ सो भीड भाडसों भीतर जावे न पायें ॥ ओर भीतर श्रीगुसांइजी आप समाधि धरके बिराजे हते ॥ सो आप


ॐदृष्टिपूर्तं न्यसेत्पादं वस्त्रपूर्तं पिबेज्जलम्

सत्यपूर्तां वदेद्वाचं मनःपूर्तं समाचरेत् ॥

श्री. मा. ११. १८. १६.

अर्थ—दृष्टियी पवित्र करेने पग मूकवो जोइए, वस्त्रयी पवित्र करेले जळ पीवुं जोइए, सत्ययी पवित्र अयेले वाणी बोलवी जोइए, अने मनयी पवित्र अइने आचरण करवां जोइए.

अंतर्यामी हते ॥ सो खवासको आज्ञा करी जो बाहर एक लंबे तिलकवारो डोकरा आयो हे ताको बुलाय लाउ ॥ सो खवास जायके सब भीडमेंतें तुलसीदासकुं भीतर ले आये ॥ फेरि श्रीगुसांइजीकों तुलसीदासने दंडवत करे ॥ वा समयकी शोभा देखिके बोहोत प्रसन्न भये ॥ श्रीगुसांइजी भारी पोषाक जामा पहरे तथा बालकहुं भारी पोषाक आभूषण विगेरे जामा धरे थके सो अत्यंत शोभाभइ थकी दर्शन करिके बडे प्रसन्न भये ॥ ओर श्रीरघुनाथजी तथा श्रीजानकीजी के दर्शन करे सो जेसी अपनी भावना हती तेसे इ दर्शन भये ॥ प्रत्यक्ष श्रीरामचन्द्रजी तथा जानकीजी साक्षात देखे ॥ तब श्री गुसांइजीसों प्राथना करी जो मोको शरण लिजिये ॥ तब आपनें आज्ञा करी जो हमारे तो तुम सरिखे ओर हु बहुत हे ओर उहां श्रीरघुनाथजीको तो तुम आखे संप्रदायमें तुम्हारे जेसे तुम ही हो ॥ पूर्ण भक्त तुमही हो ॥ तासों तुम तो उहांइ रहो ॥ एसेइ बडे चोबेजुनें श्री-गुसांइजीसों विनति करी ॥ जो कृपानाथ मोको शरण लिजिये ॥ तब आपने आज्ञा करी जो तुमारे पांवतो हम पूजे हे ॥ ता करिके तुमकुं सेवक नहीं करे ॥ ओर तुम मथुराजीमें बडे पुरोहित हो ॥ तासों ए बात तो न होय सके ॥ तब फेरी विनति करी जो मोको कहा आज्ञा हे तब आपनें कही जो कंठी तो तुम बृंदावनवारे हरिदासजीवारे मोहनदासवारेकी बांधो, ओर तिलक छापा ओर संप्रदाय हमारी राखो ॥ सो आज्ञा प्रमाण अद्यापीतांइ एसेइ करे हे ॥ ओर श्रीगुसांइजीके श्रीहस्ताक्षर पुरोहिताइके इनके घरमें बिराजे हे ॥ ओर श्रीठाकुरजी इनके घरमें बिराजे हे ॥ तिनकी सेवा पुष्टि मार्गकी रीतिसों करे हे ॥ ओर श्रीहरिरायजीके श्रीपादुकाजी इनके घरमें बिराजे हे ॥ अब इनके घरमें आजके समय सोले सत्तरे आदमी हे ॥ नारायणचंद्रजीहु आछे हे, पंडित हे ओर श्रीभागवतमें हुं बोहोत आछे समजे हे, सत्संग करिवे लायक हे ॥ इति श्रीगिरिधरलालजी महाराजके वचनानामृत उनतिसमो संपूर्ण ॥२१॥

 [वचनामृत ३० मो.]

अब तीसमो वचनामृत आप आज्ञा करि। जो एक समय श्रीगुसांइजी आप श्रोनवनितप्रियजीके श्रृंगार करत हते ॥ ता समय सब बालक पास हते सो श्रृंगार करत करत आप आज्ञा किये जो “ मंजुषाम् आनय ” इतनेमें श्रीरघुनाथजी बोले जो जो आज्ञा ॥ यों कहेके शैया मंदिरमें पधारे ॥ सो आप नीपट बालक हते ॥ तासों ओर सब बालक परस्पर बातें करिवे लगे ॥ जो ए कहा लवेंगे ॥ ओर श्रीरघुनाथजी शैया मंदिरमें जायके विचारिवे लगे ॥ जो नें कहा ले जाउं ॥ जो वेसे जाउंगो तो सब भाइ हसेंगे एसे विचार करत आपकुं रोयआइ-गइ ॥ सो अत्यंत त्रिरह भयो ॥ इतने शैयामंदिरमें श्रीमहाप्रभुजीके दर्शन भये ॥ ओर आज्ञा करी जो पेटो मगाइ हें सो ले जाउ ॥ ओर आपके श्रीमुखको चर्चित तांबुल श्रीमुखमें दिये ॥ ओर आप अंतर्धान भये ॥ ओर श्रीरघुनाथजी पेटो लेके पधारे ॥ सो नाम रत्नको प्रथम श्लोक श्रीमुखतें केहेत पधारे ॥ सो सुनिके श्रीगुसांइजी तथा सब बालक आश्चर्ययुक्त भये ॥ ओर श्रीगुसांइजी आज्ञा करी जो इनके उपर कृपा भइ ॥ जो या नाम-रत्नमें श्रीगुसांइजीके अष्टोत्तरशत नाम हे ॥ जेसे सर्वोत्तम हे तेसे ए नामरत्न हे ॥ सो दोउ बराबर जानने ॥ तासों वैष्णवकुं नामरत्नको पाठ नीत्य करने ॥ ओरहु ग्रंथ श्री रघुनाथजीने किये हे ओर व्याससूत्रको भाष्य अढाई अध्यायको श्रीमहाप्रभुजीने कयों हे ॥ ओर दोढ अध्यायको श्रीगुसांइजीने संपूर्ण कयों हे ॥ तासों अपने मार्गमें आचार्यत्व दोउनको हे ॥ श्रीमहाप्रभुजी तथा श्रीगुसांइजीको ॥ ओर श्रीसुबोधिनीजी हुं चतुर्थे स्कंधके चार अध्यायकी श्रीगुसांइजीनें करी हे परंतु श्रीमदाचार्यजीकी आज्ञा न भइ तासों प्रकरण न चल्यो ॥ ताको अभिप्राय ये हे जो श्रीभागवत हे सो श्रीनाथजीको स्वरूप हे ॥ ओर श्रीसुबोधिनीजी हे सो श्रीस्वामिनी-जीको स्वरूप हे ॥ तासों जितने श्रीअंगकी दर्शनकी योग्यता होय तितनें

निरूपण करे हे ॥ तासों प्रथम स्कंध तथा द्वितीय स्कंध तथा तृतीय स्कंध तथा दशमो स्कंध तथा एकादश स्कंधके चार अध्याय तांइ आपने करी हे ॥ सो तो दर्शन देत हे ॥ ओर ओर स्कंधमें जहां टीकाको काम पडे तहां निबंधमें तत्वदीप भागवतार्थ प्रकरण हे तामें देखि लेनों ॥ तामें हु समज नही पडे तो अबी काशीवारे श्रीगिरिधरजीको सेवक मुकुंददासकी प्रकट करी थकी श्रीमद्भागवतकी रसप्रबोधिनी टीका हे तामें देखि लेनो ॥ ओर श्रीसुबोधिनीजीमें हुं काहु ठोर संदेह अपने मनमें रहे जाय तो श्रीगुसांइजीने श्रीटीप्पणीजीमें संदेह निवर्त्त करे हे ॥ ओर श्रीसुबोधिनीजी उपर हु लालुभट्टने योजना करी हे ॥ ए सब ग्रंथ श्रीभागवतजोके उपयोगी हे ॥ ओर श्रीसुबोधिनीजी तो श्रीमहाप्रभुजीकी कृपासाध्य हे ॥ ए पदार्थ पंडिताइके अभिमान करिके कोइ विचार्यों चाहे सो नही होय सके ॥ ए तो केवल कृपासाध्य ही हे ॥ तब आपकी कृपा तें दासने विनति करी जो कृपानाथ कृपा कौन बातसों होय ? सो कृपा करिके कछो चाहीये ॥ तब आपनें आज्ञा करि जो प्रथम तो आज्ञा प्रमाण चलनो तथा सर्वोत्तमको अवगाहन बोहोतसो राखे तब कृपा होय ॥ सर्वोत्तमजीकी टीका पांचसात बालकननें करी हे ॥ परंतु श्रीबालकृष्णजी महाराजने करी हे सो सर्वोपर हे ताको नाम सर्वोत्तम भाष्य हे ॥ सो छेहजार श्लोकको पूर हे ॥ सो टीका हमने सरस्वती भंडारमें हुंढी परंतु पाइ नही ॥ सो जेकीसन पंडया तथा रंगलाल उपाध्यायसों पूछी तब इननें कही के किसनगढवारे व्यास रहते सो शोधवेकुं ले गयेहते ॥ श्रीब्रजभूषणजी काकाजीके आगे सो आप तो ग्वालियेरमें पधारे फेरि कोइने शुद्धि नही करी ॥ सो वा पोथीमें चली गइ होय तो कहा ठीक सो ॥ हमहुं कृष्णगढ गये तब शोध तो करी परंतु ठीक नही पडी ॥ सो ए पोथीपें चित्त बोहोत हे परंतु भगवद्इच्छातें मिले तब मनोरथ सिद्ध होय ॥ ओर हु श्रीबालकृष्णजी महाराजने ग्रंथ बोहोत करे हे ॥ सो पुस्तकालयमें हे ओर आपके श्रीमद्-

भागवतके पाठ करवेकी पोथी हे सो श्रीडोलतिबारीमें बिराजे हे ॥ तामें शोध अपने श्रीहस्तकी हे ॥ सो श्रीबालकृष्णजी महाराजके जेष्टपुत्र श्रीद्वारकेश्वरजीको जन्मदिन नृसिंहचतुर्दशीको आवे हे ॥ तासों श्रीगुसांइजीने विनको नाम श्री केसरीरायजी धर्यो हे सो श्रीकेसरीरायजी कहेके बुलावते ॥ सो श्रीद्वारकेश्वरजी महाराजनें श्रीबालकृष्णजीके अष्टोत्तरशतनाम नामा नामामृतग्रन्थ कियो हे ॥ सो अष्टात्तरशतनाम हे ॥ सो अतिही मनोहर हे ॥ ताको पाठ घरके बालक बहु बेटी तथा वैष्णवको अवश्य कर्यो चाहीये ॥ सर्वोत्तमवत् हे सो ताकी टीका हमने अमथाके पास श्रीमथुराजीमें लिखाइ हें ॥ सो अलौकिक भाषा करी हे ॥ ओर श्रीकल्याणरायजीनें हु अनेक वादके ग्रन्थ करे हे ॥ ओर श्रीहरिरायजीने तो आधुनिक जीवपें बडी कृपा करी हे ॥ जो शिक्षापत्र प्रकट करे हे ॥ ताकी भाषा श्रीहरिरायजीके भाइ श्रीगोपेश्वरजीनें करी हे ॥ तासों सब जीवकुं सुगमता भइ ॥ ओर श्रीबालकृष्णजीके चोथे लालजी श्रीपितांबरजीके वंशमें श्रीपुरुषोत्तमजी लेखवारे बाजे हे सो प्रसिद्ध हे ॥ विननेंहु भाष्यप्रकाश किये ओर अनेक वादके ग्रन्थ किये हे ॥ ओर काशीमें दिग्विजय करिके पंडितजीते सबनके पास विजय पत्र लियो ॥ एसे आप प्रखर पंडित हते ॥ ओर चापासेनीवारे श्रीविठ्ठलरायजी श्रीसुबोधिनीजीकी कथा बोहोत सुंदर केहेते ॥ जामें सब कोउ समजे एसे आज्ञा करते ॥ स्त्री बाल अबुध पर्यन्त समजावते ॥ ओर गोस्वामी श्रीगोपीनाथजी हु बडे पंडित हते ॥ परंतु कलु ग्रन्थ कियेकी तो खबर नहीं ॥ ओर काकाजी श्रीब्रजभूषणजीने श्रीबालकृष्णजीके सहस्रनाम किये हे ॥ ओर सब उत्सवनके, मेवाविधिके, विज्ञप्तिके, खरडा करे हे तथा ओरहु पाठके ग्रन्थ किये हे ॥ ओर श्रीब्रजाभरणजी दिक्षितजीने वादके ग्रन्थ तथा श्रीबल्लभाख्यानकी टीका भाषामें कियेहे ॥ अबिके समयमें काशीवारे श्रीगिरिधरजी सरिखे पंडित नही सुने हे ॥ तापर एक प्रसंग चल्यो जो श्रीगोकुलनाथजीके टिकेत श्रीलक्ष्मणजी

महाराज हते ॥ सो रीमां गाम हे तहां पधारे ॥ सो उहांके राजाको सेवक करवेको प्रयत्न कर्यो ॥ सो राजा तो रामानुज संप्रदायके श्रीवैष्णव हते ॥ सो इननें छलकरिके हामी भरी जो हम सेवक होइंगे ॥ पीछे रस्तामें रामानुज संप्रदायके आछे प्रखर पंडित दश बार बेठाये ओर महाराजकुं पधरायवेकुं आसामी पठांयो ॥ सो महाराज पधारे तब पंडितने रोके जो बाद करिके पधरो ॥ तासों मेंना पीछो फिरायो ॥ ओर दुसरे दिन रीमाहुं छोडनो पडयो ॥ सो बात काशीमें श्रीगिरिधरजी महाराजने सुनि ॥ सो रामकृष्ण शास्त्रीको राजद्वारमें पठाये ओर कहेवाये जो तुम्हारे जीतने शास्त्री होय सो सबनको हमारे पास पठावो ॥ सो येहे बात सुनिके राजा सब पंडितनकुं लेके श्रीमहाराजके पास दर्शनकुं आये ॥ सो भेट दंडवत् करिके बेठे ॥ फेरि श्रीगिरिधरजी आज्ञा करे जो तुम्हारे जो प्रश्न करनो होय सो करा ॥ सो वे पंडितनसों बाद करिके निरूत्तर करे ॥ फेरि वे राजा विश्वनाथसिंहने विनति करी जो कृपानाथ मोको शरण लिजिये ॥ तब आपनें आज्ञा किये जो तुम वैष्णवही हो शरण लियेको शरण कहा लेंगे ॥ वे संप्रदाय ओर ए संप्रदाय कलु भिन्न नही हे ॥ एसे केहेके समाधान कर्यो ओर हमारे आयवेको कारण तो येहे जो आज पीछे जो श्रीगोस्वामी बालक पधारे तिनसों एसो छल नही करनो ॥ सो राजाने या बातको लेख करिके भेट कर्यो ॥ पीछे एसें न करंगो एमें विनति करी ॥ पीछे आपनें काशीको विजय कियो ॥ आपने वादके अनेक ग्रन्थ ध्रुति रहस्य आदि किये हे ॥ सो काशीमें एसो डंकाबजायो ॥ एसे प्रतापी पंडित भये ॥ आप पुष्टिमार्गके पताका रूप हते ॥ तेसे चरणारविंद पास रामकृष्ण शास्त्री हु हते ॥ सो स्वामी सेवकको जोडा हते ॥ ओर नगरवारे श्रीबाबुरायजी महाराज काकाजी आपकुं कर्मकांड उपर रुचि आछी हती ॥ ओर छोटे भाइ श्रीब्रजवल्लभजी सो पंडित तो कलु कम हते परंतु प्राचीन

वार्त्ताकी खबर बोहोत हती ॥ ओर हमारे गुरुदेव श्रीद्वारकेशजी महाराज दादाने हुं पुष्टिमार्गके ग्रन्थ पाठके तथा वादके बहुत किये हे ॥ ओर श्रीब्रह्मभारुखानकी शोध करिकें श्रीगुसांइजीके सहस्रनाम प्रकट कीये हैं ॥ ओर श्रीसर्वोत्तमको नाम उद्धार हुं किये हे ॥ ओर श्रीसुबोधिनीजीको अवगाहन अष्टप्रहर रहेतो ॥ लीलामें प्रवेश होते तांइ पुस्तक आपके श्रीहस्तमें रह्यो ॥ ओर चारो वेदमें आप अत्यंत प्रवीण हते ॥ अथर्वण हु अद्याप बिराजते तांइ देख्यो करते ॥ ओर अलौकिक वार्त्ता प्राचीन प्राचीनकी खबर बहुत सो सबनकुं कृपा करिके केहेते ॥ ओर सेवामें हु दोउ बेर प्रीते ज्ञान करते ॥ आलस क्षण एको नही ॥ एसे स्वरूपको दर्शन तो जाके भाग्य होइंगे तिनने करे ॥ ओर श्रीविठ्ठलेशरायजी वारे श्रीयोगी गोपेश्वरजी महाराज हु अलौकिक दर्शन दे ते ॥ ओर वेदांतके भाष्य उपर रश्मी किये हे ॥ तामें अक्षर बोहोत झीणे लिखे हे ॥ ओर वे पोथी आपनै करिके लिखिके बांधे पीछे कोइने खोली नही ॥ ओर श्रीसुबोधिनीजी आप वांचते सौ कोइ पंडित होय सो समजतो ॥ ओर त्रैणवकुं तो श्रवण भंगल हतो ॥ ओर अष्टप्रहर अलौकिकतामें मग्न हते ॥ जो लौकिक प्रपंचादिककी खबर नहीं ॥ एसे अलौकिक स्वरूप हते ओर एसे हमारे काकाजी श्रीब्रजपालजी महाराज कामवनवारे श्रीमदनमोहनजीके टिकेत सोउ अत्यंत अलौकिक लीला देखावेहे ॥ ओर श्रीमदनमोहनजीकी सेवामें अष्टप्रहर आसक्त रहे हे ॥ ओर अबके हम ब्रजमें पधारे तब कामवन गये ॥ सो हमारे उपर अत्यंत कृपा करी बडे प्रसन्न भये ॥ ओर आज्ञा करी जो मेरे तो एक आंख श्रीमदनमोहनजी ओर एक आंख श्रीद्वारकानाथजी हे ॥ ओर हमारे यहाँकी प्राचीन वार्त्ताकी खबर बोहोत

१ आ श्रीद्वारकेशजी महाराज कृत "श्रीगोवर्धनाष्टक," तथा "श्रीगिरिराजजीनी नामावली" भामारा तरफथी प्रगट थयेल "श्रीगिरिराजभूषणग्रन्थ" मां आवी छे ते जोइ लेवुं



१ आ श्रीयोगी गोपेश्वरजी महाराजश्रीनुं चित्र तथा पोते श्रीहस्तथी लखेल श्रीरश्मिजीना ग्रन्थनुं एक पत्रनुं चित्र भामारा तरफथी प्रगट थयेल "श्रीस्वरूपदर्शन" ए पुस्तकमां आप्युं छे ते जोइ लेवुं.

हे ॥ सो सुनिके चित्त बाहोत प्रसन्न भयो ॥ परंतु विशेष रेहेवेको अवकाश नही ॥ तासों सुनवेंको चित्त रेहे गयो ॥ ओर श्रीकोटावारे श्रीमथुरेशजीके टिकेत श्रीविठ्ठलनाथजी उपनाम श्रीकन्हैयालालजी सोउ बडे पंडित हे अबके वारेमें सब बालक बिराजे हे तामें तो पंडित आप ही हे ॥ बडे चिदान हे ॥ ओर श्रीमथुराधीशकी सेवामें आप तथा आपके लालजी श्रीरणछोडलालजी बोहोत निपूण हे ॥ ओर पंडित तो आप बोहोत हे परंतु गुप्त बोहोत राखे हे ॥ तासुं पांडित्य प्रसिद्ध थोडी दीसे हे ॥ ओर श्रीचंद्रमाजीके टिकेत श्रीगोविंदरायजी इनको शास्त्रको परिचय थोडो ॥ परंतु पोथीको शोख बोहोत हे निरंतर पोथी देखवोइ करे हे ॥ तासों निज सेवकको पुष्टिमार्गकी रीतिसों शिक्षा आछी रीतिसों करे हे ओर श्रीनटवरलालजीवारे गोस्वामी श्रीत्रजरायजी काकाजीसो श्रीवल्लभाख्यानकी टीका संस्कृतमें तथा दानलोला "श्रीगोवर्धनगिरि शिखरतें मोहनदीनीटेर" इनकी टीका संस्कृतमें करी हे ॥ ओर संस्कृतको अभ्यास हु आछो हे ॥ ओर श्रीनटवरलालजीकी सेवामें हु तत्पर हे ॥ ओर गोस्वामी श्रीजीवणलालजी मुंबाइवारेने श्रीबालकृष्णचंपुग्रंथ बोहोत आछो कयों हे ॥ वामें पदनकी लालित्य बोहोत सुंदर धरी हे ॥ ओरहु कवितालंकारके साहित्यमें आप बोहोत निपूण हे ॥ ओर श्रीवल्लभाख्यानकी टीका भाषामें करिहे ओर श्रीबालकृष्णजीकी सेवामेंहु निपूण हे ॥ ओर गोस्वामी श्रीदादा गोपिकालंकारजी उपनाम श्रीमहुलालजी सो श्रीदादाजीके अष्टोत्तरशत नाम प्रगट किये ॥ ताकी टीकाकी आज्ञा हमकु भइ हे सो सावकाश सो होयगी ॥ ओर आपश्री श्रीमदनमोहनजीकी सेवा बोहोत स्नेहपूर्वक करे हे ॥ आभरणसों तथा सामग्रीसों अनेक तरेहसों लाड लडावत हे ॥ तथा सांझकुं दोउ

१. आ श्रीमहुलालजीमहाराजना बनावेलां " ३२ वचनामृत " तथा " दीनता आश्रयनां ७५ पद " तथा श्रीद्वारकामां करेल छप्पनभोगनुं घोळ, तथा " महाराजश्रीना जीवनबचित्रना केटलाक प्रसंगो " नुं पुस्तक हाळमां अमारा तरफकी छपाइ तैयार भयुं छे. जोझासुप मगावो केवुं.

बिरियांकी सेवासों पोंहोचिके कथा नित्यनेमपूर्वक करते ॥ तामें अलौकिक आनंद आवे जाको भाग्य होय सो सुने ओर समजे हे ॥ ओर गोस्वामी-दादाजीश्री गोकुलाधीशजी वैयाकरणमें बोहोत समजे हे परंतु प्रकट नही करे हे ॥ ओर अद्भुत लीला दिखावे हे ॥ अगाडीके बालकनकी कथा बार्त्ता तथा वेदवार्त्तामें निपूणताइ सेवामें प्रीति पूर्वक जो याद हती सो लिखाये ॥ एसो तो सब श्रीमहाप्रभुजीको कुल सब एकसार हे ॥ अब तो “लीला लाल गोवर्धनधरकी” हे ॥ ओर अबकें जो कोउ बालकमें विद्याको तथा वेदाध्ययन तथा सेवाविषे शिथिलता दिखे हे सो ईश्वरहुं कालको ग्रहण न करे तो ओर कोन करे? तासों कलियुगको सन्मान राख्यो हे ॥ सो ताइ करीके अन्यमार्गीयको पाखंडबढे हे ॥ सो श्रीमदाचार्यजीकी कहा इच्छा हे सो जानी नही पडे हे ॥ तासो ए मार्ग तो आपकी इच्छा अनु-सार हे ॥ ओर अबी हमारे कृत्य देखते तो एक दिन हुं नांही निभे नित्य सोवे हे ॥ नित्य भोजन करे हे ॥ नित्य गपोडा मारे हे ॥ ओर चैन उडावे हे ॥ ए हमारे चरित्र हे ॥ सो पलंगडिवारे इ पार लगावेंगे ॥ क्यों जो निजवंशमें जन्म लियो हे तासों पक्को भरोसो हे ॥ ओर श्रीगुसांइजी आपने विद्वन्मंडन ग्रंथ किये हे तामें आपके जेष्ठ पुत्र श्रीगिरिधरजीकुं वादी किये ओर आप प्रतिवादी भये ॥ सो विद्वन्मंडन ग्रंथ बडो चमत्कारिक हे ॥ शुद्धाद्वैत मतको प्रतिपादन करिके स्थापित किये हे ॥ सो वादमें बोहोत उपयोगी हे ॥ ताकी टीका लेखवारे श्रीपुरुषोत्तमजी महाराजने “सुवर्णसूत्रनामा” करीहे ओर अपने मतके ग्रंथ तो बहुत हे ॥ वादके तथा पाठके बडेनने बहुत करेहे काहु बातकी कसर नही राखी हे ॥ अत्यंत परिश्रम करिके संग्रह किये ॥ परंतु अब लौकनकी बडी कसर हे तासों अहर्निश चिंता रही आवे हे ॥ ओर पोरवंदरवारे श्रीशोभावहुजी हुं बडे प्रतापी भये ॥ जिनने श्रीसुबोधिनीजी अनुसार श्रीभागवतजी द्वाद-शस्कंध पर्यन्तके धोल १६ करे हे ॥ जामें सबनको बोध होय ॥ सुंदर राग,



न्यारे न्यारे ढाल, सहित अर्थ प्रकरण न्यारे न्यारे बताये हे ॥ तथा श्री-
ठाकुरजीके, तथा श्रीस्वामिनीजी, श्रीमहाप्रभुजी, श्रीगुसांइजीके प्रागटयके
धोल, वधावा, तथा कीर्त्तन, तथा सांजीके कीर्त्तन, विगेरे बहोत सुंदर कीये
हे ॥ जामें 'हरिदासनामा' छाप धरी हे ॥ सो आपनें श्रीहरिरायजीको
ब्रह्मसंबंध कर्यो हतो तासों हरिदासनामा छाप धरी हे ॥ तासों ए बहुजी
नमन योग्यहे ॥ इनके उपर श्रीमहाप्रभुजीकी पूर्णकृपा हती ॥ इति श्री-
गिरिधरलालजी महाराजके वचनामृत त्रीशमो संपूर्ण ॥ ३० ॥

 [वचनामृत ३१ मो.] 



अब एकत्रीसमो वचनामृत आपने आज्ञा किये ॥ जो श्रीगुसांइजीने
कीर्त्तन किये हे तामें कहुं तो छाप ललितादिककी राखी हे ॥ ओर काहुमें
सहज प्रीत राखी हे ॥ ओर एक प्रेखपर्यक शयनं या पलनामें छाप धरो
हे ॥ एसे नव वल्लभाख्यानमें छाप नहीं हैं ॥ सो ए नव वल्लभाख्यान
आपनें इ करे हे ॥ जो गोपालदास नाम कर्त्ता दिखाये हे ॥ परंतु गोपाल-
दास तो गुंगे हते ॥ सो आपनें भाइला कोठारीको पूछी जो ए कोन हे ॥
तब कोठारीनें विनति करी जो कृपानाथ ए तो गोमतीको वर हे सो तब
आपनें आज्ञा करी जो गोमतीको वरतो सागर चाहीये ॥ तब आपनें
चर्वित तांबुल देके सागर किये ॥ सो ताको प्रत्यक्ष कारण ए हे जो ए
नवआख्यान आपनें करे दिखे हे ॥ ताको अभिप्राय ॥ जो यामें आपके
दोय बहुजीके नाम निरूपण नही हे ॥ ताको येइ कारण जो पत्नीको नाम
पतिको लेनों वर्जित हे ॥ तासों आप कर्त्ता निश्चय समजनों ॥ ओर श्री-
गिरिधरलालजीने हु कीर्त्तन किये हे ॥ तामें छाप अनेक तरेहकी धरी हे ॥
ओर श्रीगोकुलनाथजीने कीर्त्तन किये हे तामें वल्लभकी छाप धरी हे ॥ जो
इनके कीर्त्तनमें मुख्य कीर्त्तन, ॥ बेठे हरी राधा संग कुंज भवन अपने
रंग ॥ सो या कीर्त्तनमें श्रीगोकुलनाथजीको वर्णन आपनें कीयो हे ॥ सो
बबे श्रीस्वामिनीजीके श्रोहस्तमें धीन हे तासों या कीर्त्तनको भाव समज

लेनो ॥ ओर श्रीहरिरायजीनें कीर्त्तन कीये हैं, तामें रसिक रायकी छाप धरी हे ॥ ओर काका श्रीवल्लभजोने कीर्त्तन कीये हे तामें निजदासकी छाप धरी हे ॥ ओर सूरश्यामकी छाप जामें आवे सो कीर्त्तन श्रीनाथजीकृत जाननें ॥ ओर ॥ “ आवत बने कान्ह गोप बालक संग ” इतमें “ वलय-कंकण ” यहाँ सो श्री नाथजीकृत हे ॥ ओर दुसरे बालक तथा वैष्णवने जो कीर्त्तन कीये हे ॥ तामें तो अपनी प्रसिद्ध छाप धरी हे ॥ तासों मालम पडे इ हे ॥ ओर जा ठोर “ श्रीद्वारकेश पदवंदन ” एसी छाप आवे ॥ सो धोल तथा कीर्त्तन श्रीभाभीजी महाराजके किये जाननें ॥ ओर श्रीब्रज-उत्सवजी श्रीघनश्यामजीके वंशमें भये तिनके पदमें ‘ ब्रजजन ’ ओर ‘ ब्रजपति ’ एसी छाप आवे हे ॥ ओर श्रीगोपिकालंकारजी श्रीमहुलालजी दादानें पद किये हे तामें ‘ रसिकदास ’ एसी छाप धरी हे ॥ ओर ‘ भक्तनामा ’ छाप हे सो हमारी हे ॥ तथा एक चोखरा हे “ वल्लभी निजदासदासी भाग्य अपने मानिके ” एसी छाप हैं ॥ सो श्रीमहाप्रभुजीके सेवक कृष्णदासी बाइ हते तिननें किये पद हे ॥ ओर श्रीपुरुषोत्तमजी मथुराजीवारे आगे भये जिनके ख्याल हे सो रासलीलामें रासधारी गावे हे ॥ ओर आपकुं रासको शोख बोहोत हतो तामों ए ख्याल रासमेंइ गवे हे ॥ एसे आज्ञा करिके आप पोढे ॥ फेरि आज्ञा किये जो गोविंदस्वामोके कीर्त्तन दोयसो बावन राखेहे तथा धमार साढेबारहे तामें ‘ श्रीगोवर्धनरायलाला ’ ए अधीकहे ‘ अचका अचका आयके भाजी गिरिधर गाल लगाय ’ यहाँ ताई गाये, पीछे रेहे गये ॥ तब श्रीगुसांइजी आप आज्ञा किये जो गोविंददास एसे क्यों रही गये ? तब विनति करी जो कृपानाथ ! धमार भाज गइ तासों इतनोइ खेल रह्यो ॥ एसे कहीके झांझ हाथमें तें गिरि गइ ओर देहाध्यास रह्यो नही सो लीलामें प्राप्त भये ॥ फेरि श्रीगोकुलनाथजीने तुक पूरी करी ॥ “ यह विधि होरी खेलही ब्रजवासीन संग लगाय ” ए तुक हे ॥ ओर सूरदासने अवसान समय “ दृढ इन चरणन केरो भरोसो ” ए पद चत्र-

भूजदासके आग्रह तें कयों ॥ ताको अभिप्राय जो सूरदासजीके अवसान समय चत्रभूजदास मिलवेकूं आये ॥ सो सूरदासजीने लक्षावधि कीर्त्तन श्रीठाकुरजीके किये ॥ एसे चत्रभूजदासने सूरदासजीसों कही ॥ जो इतने पद श्रीठाकुरजीके कहे ॥ परंतु श्रीमहाप्रभुजी तथा श्रीगुसांइजीके तो कलु नहीं किये हे ॥ तब सूरदासजीने कस्यो जो अरे बावरे ! श्रीठाकुरजी तथा श्रीमहाप्रभुजी तथा श्रीगुसांइजी ए तेनें न्यारे जानें कहा ॥ मेनें तो सगरे पद श्रीमहाप्रभुजीके ओर श्रीगुसांइजीके इ गाये हे ॥ ओर इनको दो रूप होय तो दो बेर गाउं ॥ ए तीन्यो एकही रूप हे तासों इनके पद न्यारे नही गाये ॥ अब तेरो आग्रह हे तो ए ले ॥ राग बिहागरो ॥ भरोसों डूढ इन चरणन केरो ॥ श्रीवल्लभ नखचंद्र छटा बिन सब जगमांज अंधेरो ॥१॥ साधन ओर नही या कलिमें । जासों होय निबेरो ॥ सूर कहा कहे द्विविध आंधरो । विना मोलको चैरो ॥२॥ या कीर्त्तनमें आखो सिद्धांत धरि दियो ॥ अब थोडी बेर पीछे श्रीगुसांइजी आप पधारे तब आपतें दंडवत् करे ॥ ओर गदगद होइ गये ॥ तब आपनें आज्ञा किये जो सूरदासजी चित्तकी वृत्ति कहां हे ॥ तब सूरदासजीने कीर्त्तन गायो ॥ राग बिहाग ॥ खंजन नैन रूप रसमाते, अतिसें चारू चपल अनियारे पल पिंजरा न समाते ॥१॥ उडि उडि जात निकट श्रवणनके ॥ अरूताटक फंदाते ॥ सूरदास अंजन गुन अटके । नांतर अब उडि जाते ॥२॥ ए पद सुनतही आप पधारे ॥ ओर सूरदासजी लीलामें प्राप्त भये ॥ ताको अभिप्राय जो ॥ सूरदास अंजनगुन अटके ॥ सो आपके दर्शनके तांइ रह्यो हुं । सो दर्शन होत मात्र देह छोडी लीलामें प्राप्त भये ॥ सो सूरदासजी एसें परम कृपापात्र जो श्रीगुसांइजी आप श्रीमुखतें आज्ञा करते पुष्टिमार्गको झहाझ (वहाण) केहेते ॥ अरे वैष्णव हो ! जाको कलु लेनो होय सो ले लेउं ॥ अब पुष्टिमार्गको झहाझ जात हैं ॥ एसे आप श्रीमुखतें सराहना करते ॥ इति श्रीगिरिधरलालजी महाराजके वचनामृत एकत्रिसमो संपूर्ण ॥ ३१ ॥

 [वचनामृत ३२ मो.] 



अब बत्तीसमो वचनामृत ॥ जब मकरकी संक्रांति हती तब दासनें विनति करी ॥ जो महाराजाधिराज संक्रांति तो वारे हे ॥ ओर दोयको सन्मान दान प्रसंग विषे तथा श्रीठाकुरजी तलुवा अरोगे तथा सतुवा अरोगे हे सो वात कृपा करिके कहिये ॥ ओर दुसरी संक्रांति नही माने हे ताको अभिप्राय कृपा करिके आज्ञा करीये ॥ तब आपने आज्ञा करी ॥ जो प्रथम मकरसंक्रांति हे सो उत्तरायणके सूर्य होवे हे सो देवताको दिवस उदय भयो सो देवताके तथा लौकिकमें हुं प्रातःकाल होवे ता समय दानपुन्य तथा भगवद्नाम उच्चार करवे कोइ समय हे ॥ कारणके कालकी निवृत्ति पुन्यतेइहे ॥ तासों देवताको प्रातःकाल हे सो पुन्यदानतें देवता लोक बोहोत प्रसन्न होय हे ॥ याको नाम षट् तिला हे ॥ सो तिल सुवर्णको दान अत्यंत श्रेष्ठ हे ॥ पातक निवृत्ति होयेहे ॥ “ षट् तिला पापनाशनी ” ए वचन हे ॥ सो जीव अनेक तरेहके पातक करे हे सो ए संक्रांतिके पुन्यकाल समय तिलसुवर्णदान यथा शक्ति कियेतें निवृत्त होवे हे ॥ एसे वेदोक्ति प्रसिद्ध हे ॥ सो श्रीठाकुरजी हुं वेदोक्त रीतिसों तिलकी सामग्री अरोगे हे ॥ ओर मेष संक्रांति मने हें ॥ ताको कारण ॥ जो मेषके सूर्य हे सो प्रथम सूर्य हे तथा उष्णकालको आगम हे सो ता करिके सतुवा अरोगे हे ॥ सो वात्सल्यतासों ॥ ओर पुन्यकाल हे ॥ सो तो प्रथम संक्रांति हे तासों वेदोक्त रीतिसों हे ॥ तथा मकरसंक्रांतिके दिन गेंद उत्सव हे सो अपने घर बाललीलाको शृंगार टोपाको होवे हे ॥ ओर गेंदके खेलके कीर्त्तन होये हे ॥ ओर धनसंक्रांतिको तो एक मास पर्यंत सामग्री अरोगे ॥ ओर धनुर्मास माने हे ॥ सो भाव गुप्त हे लिखवेमें नहीं आवे ॥ इति श्रीगिरिधरलालजी महाराजके वचनामृत बत्तीसमो संपूर्ण ॥३२॥

 [वचनामृत ३३ मो.] 

अब तेतीसमो वचनामृत आपने आज्ञा करी ॥ जो एक बनिया



हतो ॥ सो बडो कृपन हतो ॥ कबहुं काहुको छदामकी कोडि न देतो ॥ सो एसे कुटिल कर्म करत अवसान समय आयो सो कोउ ब्राह्मणने कही जो शेठजी एकाद गौदान तो कर्यो चाइये ॥ तब शेठजोने कही के दोय रूपैयामें गाय मिले तो गौदान करे ॥ सो वाके पाडोशीके घर बुढी गाय हती ताको अवसान समयहुं आयो हतो ॥ तब पाडोशीने कह्यो जो दोय रूपैयामें मेरी गाय लेउ ॥ फेरि दोय रूपैया देके लीनी ॥ ओर गाय तो चली शके नही ॥ तासों वा पडोशीके घरमेंइ नाडी बांधिके संकल्प करायो ॥ सो दान करे ॥ पीछे दोय घडी जावी ॥ फेरि देहान्त भयो ॥ फेरि एकाद दिनमें शेठजीहुं देहांत भये ॥ सो यमदूत ले गये ॥ तब चित्रगुप्तके उपर हुकम भयो जो या जीवको कृत्य देखो ॥ तब कृत्य लिखीयाजीने देख्यो ॥ सो पुन्य संबंधी तो ए गाय दोय घडी जीइ सो निकसी ॥ ओर पातककी तो गिनती नहीं ॥ सो या बनियासों पूछ्यो जो पेहेले कहा भुक्तनो हे ॥ सो यानें कही जो पापमें तो रहेइ बनेगो ॥ परंतु पुन्य तो रंचक हे ॥ सो पेहेलेइ भुक्तुंगो ॥ इतनो केहेतही गाय लायके याके पास ठाडी करी ॥ तब गाय बोली जो दोय घडीको मेरे उपर तेरो हुकम हे ॥ जो तुं कहे सो में करं ॥ तब बनियानें कही जो तुं वैकुंठको मार्ग जाने हे ॥ तब गायने कही हां जानुं हुं ॥ मेरो पुच्छ पकड ले ॥ सो बनियाने गायको पुच्छ पकडि लीनो ॥ सो वैकुंठके द्वारपें ले गइ ॥ इतने दोय घडी पूरी भइ ॥ सो गाय तो अंतर्धान हो गइ ॥ इतनेइ प्रभुजीकी स्वारी इनकें भाग्यसों पधारी ॥ सो पार्षदने देखतही कही के या पापीको यहां कोननें लाय पथा हे ॥ इनको यहांसो काढो ॥ तब वा बनियानें कही जो एक मेरी विनति प्रभुजी आगे होवे देउं फेरी काढीयो ॥ इतने श्रीप्रभुजी पधारे सो दर्शन करिके विनति करि जो कृपानिधान मेरे दोय विनति करनी हे जो मृत्यु लोकमें आपको माहात्म्य एसो सुन्यो हे ॥ जो कोउ जीव वैकुंठमें जाय सो निर्भय हो जाय ॥ वैकुंठमें गये पीछे ओर जगे

न जाय ॥ ओर आपके भृत्य कहे हे जो याकों काढो ॥ सो कैसे ए बात सुनिके श्रीप्रभुजी मुस्तकाये ॥ इतने फेरि विनति करी जो अजामिल सरिखे अधमको आपके नाम मात्रसों उद्धार भयो एसे आपके यश में सुने हे ॥ तो आपके शाक्षात् दर्शन करे जाको कहा फल ॥ सों आप सुनिके बोहोत प्रसन्न भये ॥ ओर आज्ञा भइ जो याकों यहाँइ रेहेवे देउ सो यह आज्ञा करिके आप निजमंदिरमें पधारे ॥ ओर वा बनिया षतु-भूज स्वरूप भये ॥ ओर सायुज्यकी प्राप्ति भइ ॥ तासों गौदान एसो हे घडि जीइ सो दोइ घडिके पुन्यको एसो प्रताप हे ॥ तो आछि रीतिसों उत्तम गौदान करे ॥ ताको कहा कहेनो ॥ तासों जीवकुं गौदान तो जरूर कयोइ चाइये ॥ गौदानकी एसी महिमा हे ॥ इति श्रीगिरिधरलालजी महाराजके वचनामृत तेतोसमो संपूर्ण ॥ ३३ ॥

 [वचनामृत ३४ मो.] 

अब चोतीसमो वचनामृत आप आज्ञा करि ॥ जो श्रीविठ्ठलनाथजीने सब मंदिरमें सोनोंई सोनों करि दियो ॥ जो उत्सवादिमें सब पीरोइ पीरो हो जाय ॥ दीवी तथा धोवेके घडा पर्यंत सुवर्णके कराये ॥ एक दिन बडे तातजी श्रीवज्रभूषणजी महाराजके आगे काहु वैष्णवने रहस्यमें विनति करी जो लालजीने सब मंदिरमें सोनाकोइ साज करि दियो हे ॥ एसे विनति करी ॥ तापर आप आज्ञा करे ॥ जो तुं देखे जो में याके घर जन्म लेके सब अरोगाय देउंगो ॥ फेरी श्रीविठ्ठलनाथजी महाराजके वहाँ अष्टमासाको प्रस्ताव आयो ॥ सो बडि प्रसन्नतासों आपने कयों ॥ पाछे जब प्रागट्यको समय भयो तब आप मोहोरनकी थेली लेके बिराजे ॥ ओर आज्ञा करे जो विठ्ठलके बेटाकी वधाइ दे ॥ ताकुं ए थेली मोहोरनकी देउ ॥ इतनेमें कोइने आयके वधाइ खाइ ॥ जो लालबाबांको प्रागट्य भयो ॥ तब आपने आज्ञा करी जो कयों जुठो बोले ॥ में तो बेछ्यो हुं ओर लालजी कहांसो होवे ॥ जो फेरि खबर ल्याउ ॥ तब वानें फेरि जायके तजविज



करि ॥ तब बेटीजीको प्रागटय हे ॥ तब रुपैयानकी थेली बाको दीनी ॥ ओर सब आनंद वधाइ पुत्रवत् मानी ॥ ओर शोभा बेटी याकोनाम धर्यो ॥ ओर आज्ञा करे जो ए शोभा प्रकट भइ हे ॥ फेरि श्रीव्रजभूषणजी काकाजीको प्राकटय भयो ॥ सो बडे तातजीको निश्चय जानिकें श्रीविठ्ठलनाथजी तातजीने श्रीव्रजभूषणजी नाम धर्यो ॥ तासों श्रीमहाप्रभुजीके कुलमें पुनः पुनः प्रागटय तिसरी चोथी पुरुषावेइ प्रागटय होबे हे ॥ तासों नाम हु वेइ धरे हे ॥ जो स्वरूपलीला संबंधी हे सो कारणरुप प्रागटय होय हे ॥ ओर श्रीदादाजीमहाराजको प्रागटय हे ॥ सो लेखवारे श्रीपुरुषोत्तमजीको हे ॥ सो श्रीगोकुलनाथजी तातजीको स्वप्नद्वारा आज्ञा करे जो पहले मेरे श्री द्वारकाधीशकी सेवा पठन पाठन करिकें न भइ हती तासों अब सेवा होइगी ॥ सो श्रीप्रभुनकी सेवा मन करिकें करेंगे ॥ एसे आज्ञा करिके प्रगट भये ॥ सो श्रीगोकुलनाथजी तातजीने नाम श्रीपुरुषोत्तमजी धर्यो सो जाको प्रागटय सो इ नाम जाननों येइ निश्चय समज ॥ एसे आज्ञा करिके आप पोढे ॥ फिर पोढे पोढे आज्ञा करि जो ए बात हमसों कपडवंजके पास चोइला (बायड) गाम हे तहाँ एक बाइ वैष्णव श्रीगोकुलनाथजी तातजीकी सेवक वोहोत वृद्ध हती ओर भगवदी हती वानें कही ॥ ओर दादाजी महाराजसों लालजी केहेती ॥ ओर यों केहेती जो जब आपको प्रागटय भयो तब मेरेहु एक बेटा भयो हतो ॥ एसी वे पुरातन हती ॥ सो हमकुं कपडवंजसों पधरायके ले गइ ॥ एक दिन राखे ॥ ओर वोहोत स्नेह कयों ओर हमकुंहुं लाला कहेके बोलती ॥ सो दुपेरीमें पोढे तब ए वार्त्ता कही ॥ सो पचीसाकी सालमें भगवद् चरणारविंदमें प्राप्त भइ ॥ एसे भगवदीके दर्शन एसे समयमें भगवद् कृपासों होय हे ॥ इति श्रीगिरिधरलालजी महाराजके वचनामृत चोत्रीसमो संपूर्ण ॥ ३४ ॥

 [वचनामृत ३५ मो.] 

अब पेंतीसमो वचनामृत आपनें आज्ञा किये ॥ जो श्रीगुसांईजीके

प्रागटय पीछे श्रीविठ्ठलनाथजी तातजीको प्रागटय हैं ॥ तासों श्रीविठ्ठल-
 नाथजी नाम धर्यो ॥ सो प्रागटय श्रीगुसांइजी आप को इ हे ॥ ओर
 श्रीगोकुलनाथजीके प्रागटय आगम पास श्रीगोकुलनाथजीतातजीको प्रागटय
 हे ॥ सो श्रीगोकुलनाथजीकोइ हे ॥ ओर ए दोउ भाइके स्वरूप बोहोत
 सुंदर दोउनको एक अनुहार हतो ॥ ओर आपसमें दोउ भाइनको
 स्नेह बोहोत हतो ॥ सो श्रीजीद्वार पधारते तब मुखियाजी पूछते जो आप
 श्रीविठ्ठलनाथजीहो के श्रीगोकुलनाथजीहो ॥ सो आज्ञा करते तब खबर
 पडती ॥ ओर श्रीद्वारकाधीशकुं अकेले नहीं छोडते ॥ दोउ भाइमें ते एक
 पासइ बिराजते ॥ एक भाइ परदेश पधारते ॥ तो एक भाइ घर रहते ॥
 ओर नरभेरामभट्टजी भये सो इनके आगे भये ॥ सो ॥ इनने कल्पवृक्ष
 श्लोकबंध बनायो हे ॥ तामें सब बालंकनके यश धरे हे ॥ तथा उत्सव
 निर्णयहु करे हे ॥ सो अपने मार्गमें प्रमाण मने हैं ॥ ओर उत्सवको
 संदेह होय तो इहांसो निर्णय करी पठावते ॥ सो श्रीजीद्वारमें मानतो ॥
 अबहुं बोहोत संदेह हाय तो इन नरभेरामभट्टके लेखतें निश्चय होवे हैं ॥
 वे नरभेरामजी श्रीप्रभुनके प्रतापतें प्रखर पंडित भये हते ॥ अब तो
 पुष्टिमार्गमें पंडित गुप्त हे ॥ मुंबइमें श्रोजुनागढवारे गोस्वामी श्रीमगनजीके
 दोहिता गोवर्धनलाल उपनाम 'गद्दुलाला' कहे हे सो श्रीमदाचार्यजीकी
 कृपातें अलौकिक नेत्र खुले हे ॥ सो अबी तो हमारी ज्ञातमें इनके जेसो
 विद्वान कोउ दिसें नहीं हे ॥ जेपुरसें चोसठ प्रश्न आये ताको प्रतिउत्तरको
 ग्रन्थ 'सत् सिद्धान्तमार्तंड' नामा कियो हे जामें अपने मार्गकी बात
 बोहोत आछी हे ॥ ओर ग्रन्थ इननें बोहोत किये हे ॥ सो आजके समयमें
 ए गद्दुलाल शिघ्र कवि हे ॥ ओर मथुरास्थ भट्टनमें मथुरादासभट्ट हते ॥
 सो वैष्णव हते ओर श्रोसुबोधिनीजीकी कथा बोहोत सुंदर करते ॥ सो
 श्रीनाथजीद्वारमें श्रीगोकुलनाथजीके मंदिरमें रहेते ॥ ओर श्रीनाथजीकी
 शाकंरकी सेवा अष्टप्रहर करते ॥ ओर कथाप्रसंग इ चलावते ॥ सेवा

स्मरण दोउ बात निरंतर अवगाहन हते ॥ ओर श्रीदादाजी महाराज कथा केहेते ॥ सो ए भट्ट मथुरास्थ भट्टनमें गंगाधर शास्त्रीके बेटा कन्हैयालाल शास्त्री हे सोउ बडे पंडित हे ॥ ओर अलौकिक दृष्टि हे ॥ ओर हमारे बालकृष्ण शास्त्री हुं वेदांतमें बोहोत आछे ॥ वैष्णवताहुं हे ॥ इनके भाइ श्रीकिसनजीकों उदेपूरके राणाजी स्वरूपसिंहजीने परीक्षार्थ कंठिको उपद्रव उठायो ॥ जो कंठि सगरे तोडि नांखो ॥ सो कितनेकने तो डरके मारे कंठि तोडी नाखी ॥ फेरि इनसों कही के तुमहुं तोडी नाखो ॥ तब इननें कहो जो हमारे प्राण जाते तो कबुल हे परंतु ए बात तो मोसों नही होय ॥ एसे कछो ॥ सो वा बाबत राणाजीने बडो धमकी दीनी ॥ साम, दाम, दंड, भेद करे परंतु इननें मानी नही ओर कही के, राजा रुठेगो तो देश लेगो परंतु धर्म तो नहीं छोडेंगे ॥ एसी दृढता देखीके राणाजी बोहोत प्रसन्न भये ॥ ओर दुशाला दीनों ओर बडी सराहना करी ओर कछो जो तुं धन्य हे जो सब तरेहको कष्ट सखो परंतु डिगे नहीं ॥ तासों तुम्हारे अहोभाग्य हे एसे राणाजीने शाबाशी देकें विदा किये ॥ तासों ए राणाजी स्वरूपसिंहजी हुं एसे हते जो जीनके अंतःकरण विषे निश्चय हतो जो सबनमें शिरोमणी श्रीमहाप्रभुजीको मार्ग हे ॥ तामें वैष्णवकी परीक्षार्थ यह काम उठायो सो आपने आखे उदेपुरमें श्रीकिसनजी शास्त्री अत्यंत धोरजवान वैष्णव देखे ॥ इति श्रीगिरिधरलालजी महाराजके वचनमृत पात्रिसमों संपूर्ण ॥ ३५ ॥



 [वचनमृत ३६ मो.] 

अब छत्तीसमो वचनमृत आपने आज्ञा किये ॥ जो एक समय आप प्रसन्नतामें विराजे ता समय पास बालकृष्ण शास्त्री तथा धंधुकावारे वैष्णव विशाभाइ, मुखियाजी द्वारकादास आदि बेठे हते ॥ वा समय आपनें अमथासों आज्ञा करि ॥ जो कृपानाथ में कहा प्रश्न लायक हुं तब आपनें आज्ञा करि ॥ जो कल्ल चिंता नहीं कल्ल तेरी बुद्धि पोहोंचे एसो हूं कर ॥

तब आपकी कृपा प्रादुर्भावसों एक प्रश्न कर्यो ॥ जो कर्म प्रबल के शरण प्रबल ? तब शास्त्रीजीनें कही जो प्रश्न तो आछो हे ॥ ताके वचनः—
नकर्तृत्वं न कर्माणि लोकस्य सृजति प्रभुः । [भ. गी. अ. ५. श्लो. १४]



यामें ए बात हे ॥ जो जीव जेसो कर्म करे तेसो फल भगवान देइ हे ॥ या बातमें तो कर्म मुख्यता हे ॥ अब पुष्टिमार्ग में जो शरण शब्दहे सो भगवद आश्रय को वाचक हे ॥ सोउ आश्रय दोय प्रकारके हे ॥ एक तो लौकिक धर्म लेके शरण होय ओर दुसरो श्रीगुरु कृपासाध्य शरण होय ॥ बा शरणमें कर्मकी सामर्थ्य नही जो बाधा करि शके ॥ क्यों जो कृपामार्गमें कर्ममार्गकी निवृत्ति पेहेले इ होय गइ ॥ पाछें शरण सिद्ध भयो ॥ अब इहां शरणके आगे कर्मको प्रबल सामर्थ्य नही ॥ सो तातें मुख्य तो शरणहो प्रबल हे ॥ जो 'ज्ञान प्रसादेन' ए श्रुति हे ॥ ता तें ए अर्थ हे के ॥ ज्ञान प्रसाद करिके विशेष करिके जाको अंतःकरण शुद्ध भयो होय एसो जे पुरुष हे सो ध्यान करतो भयो निष्कलंक भगवत्स्वरूप हे ताकोइ देखे हे ॥ ताकोही शरण हे ॥ सो कर्मादिकनसों अति प्रबल हे ॥ ओर प्रभु जो हे सो आपके स्वरूप छोडिके ओरको दीखे नही ॥ ए श्रुतिको अर्थ हे ॥ जो शरण भये पीछे भगवद् उपयोगी शरीर अलौकिक होयहे तासांही शरण प्रबल हे ॥ तासां जीवको शरण हो सदा कर्त्तव्य हे ॥ सर्वथा कर्त्तव्य हे ॥ ओर शास्त्रीजी सों एक प्रश्न आपने कर्यो ॥ जो कोइ एक जीव मार्गके स्वरूपमें समज्यो नही हे ओर फक्त नाम मात्र सुनिके देहांत होइ गयो हे ताको परलोक सुधरे के बिगडे ॥ याको उत्तरः—जो मृत्यु समय जीवकी कल्पना होय जो में नाम सुन्यो मेरी वखत आइ परंतु मोसों पुष्टिधर्मको आचरण, स्मरण, सेवादि भये नही ॥ परंतु आछो भयो जो मेंने नाम सुनि लियो हे बोहोत सुंदर भयो हे ॥ ऐसो जो अमल करिके गयो ताकों तो जन्म लेनो पडेगो ॥ ओर अमल न कर्यो ओर जात रह्यो तोउ श्रीगुरुदेवके आगे कान धर्यो हे ॥ सो तो

मिथ्या नहीं जायगा ॥ परंतु कोई जन्मांतराय लेके प्रभु जरूर अंगीकार करेंगे ॥ परंतु वा जीवको सोच प्रभुनको बोहोत रहे हे ॥ यामें प्रमाण ॥ श्रीगीताभाष्यको हे ॥ सो पुनर्जन्म ले या मार्गमें प्राप्त होय वैष्णवकुलमें जन्म लेके शरण श्रीमहाप्रभुजीके कुलमें आवे ओर आगेके मनोरथ रहे गये होय सो आप सिद्ध करे ॥ एसे आप परम दयाल बाँह्यप्रहेकी लाज आपकुं हे तासों शरणागत जो जीव भयो ॥ ताके भाग्यको पार नहींहे ॥ यमयातनादि भय तें निवृत्त भयो ॥ ओर वैष्णवके घरमें जो जीव जन्मे ताको शरणागत जरूर करनो ॥ ओर शरण भये बिना जीव जातो रहे तो वे जीव आसुरी जाननो ॥ तासों जी जीव वैष्णव के घर जन्मे ताको तरतही शरणागत करायो चाड़ीये ॥ कारण जो वैष्णवकुं जीव मात्र उपर दया राखनी ॥ ओर जीवकुं शरणागत करायेको बडो उपकार हे ॥ ३६ ॥ इति श्रीगिरिधरलालजी महाराजके वचनमृत छत्रीसमो संपूर्ण ॥ ३६ ॥

 [वचनमृत ३७ मो.] 

अब सैंतीसमो वचनमृत आपने आज्ञा करे ॥ जो श्रीलाडिलीजीको प्रागटय श्रीठाकुरजीके प्रागटयतें पेहेलो हे के पीछे हे ॥ एसे आपने आज्ञा करी ॥ सो पास शास्त्री बालकृष्णजी तथा अमथा तथा कालूराम पानगरिया ए बेटे हते सो सबननें विनति करी जो कृपानाथ ए बाततो कृपाकरिके आपही आज्ञा करी चाड़ये ॥ तब आपनें आज्ञा किये जो श्रीलाडिलीजीकी माता कीरतिजीको पीयर रावलमें हे ॥ सो रावल पधारे हते ॥ सो उहां रावलमें जन्म श्रीलाडिलीजीको श्रीठाकुरजीके प्रागटयतें दोय वर्ष पेहेलो भयो ॥ भादों सुदि ८ के दिन भयो ॥ परंतु नेत्र नहीं खुले ओर श्रीअंगको उद्योत प्रगट न दिखायो ॥ एसेइ चिराजे रहे ॥ सो कलु मालम नहीं पडे ओर कहुं खबर हु नहीं ॥ जब श्रीठाकुरजीको प्रागटय भयो तबही नेत्र खोले ॥ फेरि भादों सुदि ८ अष्टमि को जन्म दिन प्रगट भयो ॥ ओर बधई तब चली ॥ तहांताई किरतिजी रावलमें

इ बिराजे रहे ॥ नेत्र खुलते तांइ सो नेत्र खुले ॥ तब वधाइ पोहोंची ॥ तथा श्रीगोकुलजीमें श्रीनंदरायजीके घर विगेरे सब जगे वधाइ पोहोंची सो प्रसिद्ध जन्मदिन लोकप्रसिद्ध श्रीठाकुरजीके प्रागटय पीछे पंद्रे दिनको हे परंतु हे दोय वर्ष पेहेले ॥ तासों श्रीलाडिलीजी श्रीठाकुरजीसों दोय वर्ष बडे हे ॥ ओर आपकी आज्ञातें दासनें प्रश्न कयों ॥ जो श्रीभागवतमें श्रीलाडिलीजीको नाम प्रकरण कछु नही हे सो काहेतें ॥ तब आपनैं आज्ञा करि जो श्रीभागवतहे सो स्वयं आपनेही व्यासजीके हृदयमें बिराजीकें समाधिभाषा कयों हे ॥ तासों श्रीलाडिलीजीको नाम निरूपण नही कयों ॥ जैसे श्रीवल्लभाख्यानमें श्रीगुसांइजीके समस्त परिवारके नाम बहु-बेटी युक्त निरूपण करे हे परंतु स्वपत्नीको निरूपण नही हे तैसें ए दोउ बात एक सार हे ॥ अब श्रीलाडिलीजीको व्याह श्रीठाकुरजीसों भयो के कहुं ओर जगे भयो ? तब आपनैं आज्ञा करि जो अपने तो लौकिक अलौकिक एक सार हे ॥ जो आप सदा एकसार रसरूप श्रीवृंदावनमें बिराजे हे ॥ ओर व्याह संकेतादि दोउ प्रकार भये हे परंतु गोडियाजीके मतमें तो दुसरि जगे भयो बतावे हैं ॥ सो वाकी तो वे जानें ॥ इति श्रीगिरिधरलालजी महाराजके वचनामृत सेंतीसमो संपूर्ण ॥ ३७ ॥

 [वचनामृत ३८ मो.] 



अब अडतीसमो वचनामृत आप आज्ञा करे ॥ जो रेवाजीके किनारे गुजरातमें एक चाणोद गाम हे ॥ तहां ओर, ओर नर्मदाको संगम हे ॥ वा गाममें ब्राह्मणकी वस्ती बोहोत हे ॥ वे ब्राह्मण तो शैव्य ओर स्त्री वैष्णव ॥ सो स्त्रीके सत्संगते कितनेक ब्राह्मणहु वैष्णव भये हे ॥ सो सत्संग एसो पदार्थ हे ॥ जैसे श्रीमधुराजीमें चोबेकी स्त्रीकी भक्तिसों कितनेक चोबे भगवदपरायण भये ॥ तासों सत्संग एसो सारभूत हे ॥ सो चाणोद गाममें एक मंदिर शेषशाइ पोढानाथको हे ॥ सो स्वरूप बोहोत प्राचीन अलौकिक हे ॥ सो उहां हम दर्शनको गये ॥ ओर स्नान कराये

सो श्रीअंगमें माता कैसे दाग दिखे पड़े ॥ तब उहाँके सेवकनसों पूछयो तब उनमें वार्त्ता कही के अकस्मातथी श्रीठाकुरजीके श्रीअंगमें गुमडागुमडी होय गये ॥ सो सगरे विस्मय पाये जो ए कहा भयो ॥ जो वाके ताँड़ अनेक उपाय शांति होम जप पाठ जिनजिननें जेसो कह्यो तेसो कर्यो परंतु काहु उपायसों मिटयो नहीं ओर खबरहुं न पडी ॥ जो कहा बातसों ए उपद्रव भयो ॥ इतनेमें श्रीठाकुरजीकी इच्छासों श्रीदादाजी महाराज पृथ्वीपरिक्रमा करते करते उहाँ पधारे ॥ सो सब सेवकननें विनति करी ॥ जो महाराज श्रीठाकुरजीके श्रीअंगमें एसो परिश्रम भयो हे सो हमने अनेक उपाय करे परंतु परिश्रम मिटयो नहीं ॥ अब आप आज्ञा करे वैसे करे ॥ तब आपनें आज्ञा करी जो सबेरे हम जगायवेतें राजभोगपर्यंत सेवा करेगें पीछे कहेंगे ॥ ओर पंचामृतकी तैयारी कराइयो ॥ ओर वस्त्र केसरिको जोड हमारी आडीसों सिद्ध करवाइयो ॥ ओर सामग्री हुं पुष्कल अरोगे ॥ राजभोग पीछे सब सेवक प्रसाद ले ॥ एसें आज्ञा करी खाइ अरोगिकें आप पोढे ॥ फेरि प्रातःकाल स्नान करि संध्यावंदन करिके चरणसोइ मंदिरमें पधारे ॥ सो श्रीठाकुरजीकुं जगाये ॥ मंगलभोग धरे ॥ फेरि आरती करी, पंचामृत स्नान करायो, सो पंचामृत स्नान करावतही सब गुमडा मिटगये ॥ फेरि शृंगार करे भोग धरे ॥ सेवक सब बोहोत प्रसन्न भये सो कहुं कहुं अजहुं माता कैसें दाग श्रीअंगमें दिसे हैं ॥ सो वे सेवकननें फेरि विनति करी ॥ जो महाराज ॥ ए परिश्रम प्रभुनकुं कैसे भयो ॥ तब आपनें आज्ञा करी ॥ जोकोइ लुइ (रजस्वला) स्त्रीको स्पर्श भयो हे ॥ तासों आज पीछे स्त्री मात्रको चरणस्पर्श करावना बंध हे गयो ॥ सो ता दिनसों स्त्री जनको चरणस्पर्श नहीं होवेगें ॥ ओर श्रीप्रभुनको अत्यंत श्रम हतो ॥ सो सब आपके श्रीहस्तके स्पर्श मात्रतें निवृत्त भयो ॥ सो प्रताप ए दादाजी श्रीद्वारकेशजी महाराजनें चाणोदमें जताये ॥ सो ए बात उहाँके सेवकनके मुखसों सुनि सो लिखाइ हे ॥

ओर श्रीबद्रिनाथजी आप पधारे श्रीमथुराजी रेहेते तहांसो ॥ सो हम हठ करि संग जावेकुं एक्कामें चढे सो आपनें नांही करी तब रहे गये ॥ सो अबी तांइ श्रीबद्रिनाथजीकी यात्रा हमको नही भइ ॥ सो आप श्रीदादाजी तो पधारे सो हरद्वारके अगाडी पधारे ॥ ओर द्रव्यको संकोच भयो तब कथा वांचे पीछे खवास धनपालनें विनति करी जो महाराज द्रव्य मेरे पास घटी गयो हे ॥ सो आज्ञा होय तो हरद्वारसों ले आउं ॥ तब आपनें आज्ञा करी जो सबेरे प्रयत्न करेंगे ॥ यों कहेके आप तो पोढे ॥ फेरि रात्रिमें वा गामके राजाको श्रीबद्रिनाथजीने आज्ञा करी ॥ जो इहां श्रीद्वारकेशजी महाराज तेरे गाममें पधारे हे ॥ सो हमारी यात्राकुं पधारे हे ॥ सो द्रव्यको संकोच भयो हे तासुं तुं जायके द्रव्य भेट कर ॥ सो प्रातःकाल भयो आप स्नान करिके संध्यावंदन करते हते वा समये खवास धनपालने फेरी विनति करी जो अब कहा आज्ञा हे ॥ तब आप चूप होइ रहे ॥ इतनेमें समाचार आये जो आपके दर्शनको राजा आवे हे ॥ सो राजा आयो दंडवत् करिके समाचार पूछे ओर बोहोत प्रसन्न भयो ॥ फेरि पूछी जो आप कहांसो पधारे ? श्रीबद्रिनाथजी पधारवेके समाचार सब बात पूछे सो कहे तब ए राजाके मनमें निश्चय भइ जो स्वरूप तो वेइ, श्रीबद्रिनाथजीने आज्ञा करि सोइहे ॥ तब विनति करी जो श्रीबद्रिनाथजी आपही हो ॥ एसे कहेके विनति करी एक सहस्र रुपैया भेट करिके राजा गयो ॥ यह चरित्र आपको देखिके सब जन आश्चर्य भये ॥ फेरि आप श्रीबद्रिनाथजी पधारे ॥ सो रस्तामें जो जो तीर्थ आये तिनके चित्र अपने हाथसों करे हे ॥ ओर श्रीबद्रिनाथजी पधारे सो उहां श्रीबद्रिनाथजीमें श्रीमहाप्रभुजीकी बैठक आगे व्यासाश्रममें हती सो उहां कोइ जाय सके नही ॥ जो मार्ग बोहोत विकट हे ॥ तासों श्रीमहाप्रभुजीकी बैठक श्रीबद्रिनाथजीके निकट सिद्ध करवाइ ॥ एसो अलौकिक आनंद करिके घर पधारे ॥ ता पीछे थोडे दिन पीछे हमारो यज्ञोपवित श्रीगोकुलमें किये

तामेंहुं संकोच भयो ॥ सो श्रोद्वारकाधीश आपको स्वकीय जानिकें वसोवारे कसियाभाइ रामदासकी स्त्री हरखाबाकुं व्रजयात्रा करिवेकुं पठाइ सो यज्ञोपवितमें जो खरच भयो सो वा बाइने कर्यो ॥ फेरि हम पूर्वके परदेशकुं गये सो बुढिया सारंगपुर तथा मेरट जिल्ले में फिरे ॥ जो श्रीदाउजीके छप्पनभोगपें श्रीदाउजी आय पोहोचि ॥ जो दोय सहस्र रुपैया भेटमें आये ॥ सो श्रीदाउजीके छप्पनभोगमें लगे ॥ सबननें एसे कछो जो पेहेलो परदेश तो श्रीभगवद् अंगीकार करानो, सो वेसेइ श्रीदाउजीके विनियोग भये ॥ ओर श्रीदादाजीने दोय छप्पनभोग श्रीगिरिराजजीके किये ॥ फेरि कलुक दिन श्रीगिरिराजजीमें बिराजे ॥ फेरि हम कुटुंब समेत श्रीजाद्वार पधारे ॥ सो वर्ष एकाद श्रीजीद्वारमें बिराजे ॥ फेरि हमारो हाथ तो श्रीद्वारकाधीशने पकड्यो ॥ फाल्गुन कृष्ण ४ चोथके दिन अनुग्रह करि स्वकीय किये ॥ पति श्रीद्वारकाधीश भये ॥ सो ता दिन शहेराको शृंगार होवे हे ॥ सो याही कारणसों होवे हे ॥ सो हमकुं तो अभयपदको दान दिये ॥ जो एसे धनीको हाथ पकडायो, सो बडेनकी कृपासों बडे आनंदमें दिन जाय हे ॥ फेरि आप श्रीगिरिराजजी पधारे फेरि दासने विनति करिके वैष्णव मथुरामल्लकुं आप बछडाके अवतारमें लाये ॥ श्रीनाथजीके खरासकी सेवामें सोंपि ॥ सो प्रकार कृपा करि विस्तारपूर्वक कहिये ॥ सो कलुक दिन बिराजीके श्रीयमुनाजीको छप्पनभोग, कृष्णगंगाके घाटपें कर्यो सो वा छप्पनभोगमें हम नहीं हते ॥ इहां कांकरोलीमें बिराजते ॥ फेरि श्रीजीद्वार पधारवेको विचार कर्यो ॥ इतने मथुरामल्लजीकी खबर आइ, जो श्रीगोकुलमें हरि शरण भये ॥ सो मथुरामल्लजीकी सराहना आपनें बोहोत करि ॥ जो वैष्णव बोहोत आछे सत्संगलायक हते ॥ परंतु सेवा न करि ॥ सो मथुरामल्लजी जातके लुवाणा हते ॥ सो मरे पीछे आपको स्वप्नमें विनति करी जो कृपानाथ आपतो श्रीजीद्वार पधारो हो ॥ सो मोहुंको श्रीनाथजीको सेवामें लेत पधारो ॥ में अमुके


गाममें आहिर मथुरादासकी गायके पेट बछड़ा भयो हुं, जन्मयो हुं ॥ सो सेवा नहीं करि तासों ॥ सो अब सेवा करवावेंगे तब होइगी ॥ सो आप वा गाममें पधारे ॥ सो वाके घरसों ले आये ॥ सो वानें एसेइ दे दिये, सो ले के सिंहाड (श्रीजीद्वार) पधारे, सो श्रीनाथजीके खरास में बांधे ॥ सो बात प्रसिद्ध भये तैं वे बछड़ाको मथुरामल्लको जन्म सुनिके वैष्णव आयके भगवद् स्मरण करते ॥ तब वे बछड़ा मुंड हलावते ॥ सो एसे एसे अनेक चरित्र हे ॥ सो श्रीदादाजी श्रोद्वारकेशजी महाराज एसे उग्रप्रतापी हते ॥ इति श्रीगिरिधरलालजी महाराजके वचनामृत अडतीसमो संपूर्ण ॥३८॥

 [वचनामृत ३९ मो.] 

अब उनचालीसमो वचनामृत आप आज्ञा करे ॥ जो हमारे बडे तातजी श्रीव्रजभूषणजी महाराज सो श्रीनाथजीको झुमका ले आये ॥ तब पास नथुभाइ धंधुकावारे बेठे हते दरिखानाको काम करते सो इननें प्रश्न कर्यो जो कृपानाथ केसे लाये ॥ ताको कारण कृपा करिके कहिये ॥ तब आज्ञा करे जो आगे एक दिवस आप श्रृंगार करवेको श्रीजीद्वार पधारे सो आगे झुमका बेठकमें रहेतो हतो ॥ ओर मुखियाजी आय गये ओर जागवेकी अवेर होवे लगी सो बडे घरवारेको जागवेमें अवेर भइ तासों ॥ तब आप बेठकमें जाय सिरानेसों झुमका ले आये ॥ ओर ताला खुले शंखनाद भये सो शंखनाद होते सुनी बडे घरवारेकी नींद खुलिगइ ॥ नींदमेंहें जागे तब खवाससों पूछी जो हमारे पूछे विना झुमका कोननें पधरायो ॥ तब खवासनें विनति करी ॥ जो कांकरोलीधारे पधारे हे सो झुमका लेके पधारे ॥ सो सुनिके आप चूप होय गये ॥ फेरि आपहुं छान करिके मंदिरमें पधारे ॥ फेरि राजभोग आरति उपरांत झुमकालेके अपने मंदिर पधारे ॥ फेरि उत्थापन समय झुमकालेके श्रीनाथजीके मंदिर पधारे ॥ फेरि सैनपर्यंत सेवा पोहोंची पोढाय अनोसर करिके फेरिहु झुमका लेके अपने मंदिर पधारे ॥ एसो दोय दिन बिराजे तहां ताई झुमका

अपने पास रखो ॥ फेरि सेन समे भोग धरिके बेटे हते तब बडे घरवारेनसों कछो जो हम सब भैयाबंधन मिलिके तुमकों श्रीनाथजी सोंपि हे सों श्रीनाथजीके सुखार्थ ओर कोउकित कोउकित तासों आपके जागते तो अवेर होय ॥ ओर श्रीनाथजी विराजे रहे ॥ तासों झुमका प्रसादी भंडारमें रहेगो ॥ एसे आज्ञा करि ॥ तब बडे घरवारेनें कही जो आप बडे हो सो आप इतनी शिक्षा न करो तो कोन करे ॥ ओर हमारी भूल हे सो कसुर माफ करे ॥ अब आज्ञा प्रमाण झुमका प्रसादीभंडारमें रहेगो ॥ ओर प्रसादीभंडारी मुखियाजी आयवेकी बिरियां जाति पेहेले धरि देइंगे ॥ ओर अनोसरमें संभालीयो ॥ ये बात केहेके आप मंदिरमें पधारे ओर ए अपनी बेटकमें पधारे ॥ बेटकमें पधारे तब अधिकारीनें विनति करिके कृपानाथ झगडा चूक्यो? तब आपनें आज्ञा करि जो झगडा कायको हे भूलचूककी बात हे ॥ सो बडे बडे न कहे तो ओर कोन कहे ॥ ओर ठेठसों भूलचूककी बात कांकरोलीवारे केहेते आये हे सो यामें कलु नइ बात नहीं हे ॥ ओर श्रीनाथजीकी वात्सल्यता इनके चित्तमें आइ तासों कही ॥ सो एसे केहेके सराहना बोहोत करी ॥ सो फेरि श्रीजीद्वारसों विजय करिके बडे तातजी श्रीकांकरोली पधारे ॥ ओर एक समय राणाजी सिरदारसिंहजी तथा श्रीगोविंदजीके झगडा भयो सो श्रीनाथजी जागते चार घडी तांइ अवार भइ ॥ सो इहां सो श्रीदादाजी महाराज भृंगार करवेकुं पधारे हते ॥ सो वे झगडा देखतेइ आपनें श्रीनाथजीकुं जगाये ॥ ओर श्रीगोविंदजी सो हुं कही जो तुम्हारे झगडामें श्रीनाथजीको क्यों दुःख देते हो ॥ एसे श्रीनाथजीके घरमें कलु व्यतिक्रम होते तो सब बालक भैयाबंधन मिलिके केहेते सो मानते ॥ ओर अबतो श्रीनाथजीके घरमेंसों श्रीगिरिधारीकी एसी मरजी भइ ॥ जो सब भैयाबंधनको हक उठाय देनो एसी मरजी हती ॥ तासों प्रत्यक्ष फल भयो सो आपन सब देखे हे ॥ जो ब्रजवास करने पड्यो ॥ तासों श्रीनाथजीकुं अभिमान नहीं सुहाय हे ॥ आगे आगे

जिनजिननें अभिमान कयों सो सबनको निवृत्त कयों हे ॥ अर्जुनादिकको ॥ तासों पुष्टिमार्गमें तो गर्व प्रभुनकुं सुहावे नही हे ॥ इति श्रीगिरिधरलालजी महाराजके वचनामृत उनचालीसमो संपूर्ण ॥३९॥

 [वचनामृत ४० मो.]



अब चालीसमो वचनामृत आप आज्ञा करे ॥ जो एक समय श्री-ठाकुरजीनें अर्जुनको रथ हांकयो ॥ सो ता वातपें भीमको गर्व भयो ॥ जो देखो अर्जुन ओर हम भैयाबंधन ॥ ओर सामर्थ्यमें कलु कम तो हे नहीं ॥ परंतु अपनो रथ तो कोइ दिन हांकयो नहीं ॥ सो ए वात भीमके चित्तकी श्रीठाकुरजीने जानी सो एक समय भीमसेनकुं कखो जो आज तुम्हारो रथ हम हांकेंगे ॥ सो भीमसेनने शिष्टाचार कयों परंतु चित्तमें भाव हतो ॥ सो आर्काक्षासों रथ प्रभुनके पास हकवायो ॥ सो एक समे रथ हांकिके भीम तथा प्रभुजी मृगयादि सेलके तांइ चले सो श्रीठाकुर-जीको जलकी तृषा लगी ॥ सो जलकी आज्ञा भीमसों करी जो हमतो रथघोडा संभालेंगे ओर तुम जल ले आवो ॥ तब जल लेवेको भीमसेन गये सो एक नदीसी कोस दो कोसपें देखी तामेतें जल लाये ॥ तब प्रभुनको जल अर्पण कयों ॥ तब आपनें आज्ञा करि जो ए जल कहांसि आयो हे ॥ ताको प्रमाण लावो तो जल अरोगे नहीं तो धर्यो रहेगो ॥ तब भीमसेन वा नदीके किनारे किनारे चले गये तब नदीको अंत आठ दश कोसपें आयो ॥ तहां देखे तो एक राक्षस ठाडो ठाडो रोवे हे ताके नेत्रके जलकी नदी वहे हैं ॥ ओर वे राक्षसकुं रोवतो देखि अभिमान भयो जो ए बिचारो दुःखी हे तासों इनको दुःख भांगनो ॥ तासों वा राक्षससों पूछी के हमारो क्षत्रीको धर्म हे सो तुं दुःखी कहा बातसों हे ॥ हम तेरो दुःख निवृत्त करेंगे ॥ तब वा राक्षसके चित्तमें आइ जो तुं मेरो दुःख कहा भागेगो ॥ तब भीमने कही जो तेरो दुःख होय सो निश्चय में दूर करुंगो ॥ तुं कहे ॥ तब वानें कही जो मेरी स्त्री एक राक्षस ले गयो

हे ॥ सो लाउ तब भीम वा राक्षसके पास गये सो वे राक्षसकुं या राक्षसने दूरतें दिखायो ॥ सो वे स्त्री ले गयो सो राक्षस बडो जबर हतो ॥ सो ए भीमने भाठा बडे बडे पर्वत जैसे दूरतें पटके परंतु वाकी खातरमें नही ॥ सो एसे करते वे राक्षस जाग्यो सो देखिके भीमकी पाछें पाछें ॥ दोडयो सो भीम आगे वे पाछें ॥ एसे करते एक टोंटो लुलो राक्षस एक दूर वनमें रहतो ॥ तहां भीमसेन जायके निकसे ॥ सो वा राक्षसने भीमसेनको स्वास्था कीये जो भगे क्यों डोलो हो ॥ तब भीमने वाकी सब बात कही जो अमुको जगे एक राक्षस एक लुगाइ ले गयो हे लुगाइको धनी राक्षस रोवो करे हैं ॥ तासों में इनसों बंदी हे जो तेरी लुगाइ लाइ देउंगो ॥ सो अब लुगाइको तो वे देवे नही ओर मोकों तो भगाय दियो तब वानें कही के कलु चिंता मती करो एसे भीमको वा टोंटे राक्षसने धीरज दीनी ॥ ओर अपनी जगामें राखे ॥ ओर उहां बेठे बेठे अपने हाथ लंबे करीके वा राक्षसकुं बुलाय लियो ॥ ओर धमकी दीनी सो इन टोंटिके डरसों वानें वाकी स्त्री दे दीनी ॥ सो भीमसेनने वा स्त्रीको लेके वा रोवते राक्षसकुं दीनी जायके सोंपी ॥ ओर टोंटे राक्षससों पूछी ॥ जो तुम बलवंत हो ॥ ओर तुम्हारे हाथ पांव कोनने तोडे हे ॥ तब वा टोंटे राक्षसने कही जो हम सब राक्षस ओर इन्द्रको युद्ध भयो तब वा इंद्रके संगमें एक अर्जुन हते ॥ पांडु राजाके पुत्र सो वे महाबलिष्ठ हते सो वानें लडाइमें मेरे हाथ पांव तोडे हे ॥ सो ता दिनने टोंटो हुं ॥ ये बात सुनिके भीमसेनकुं बडो आश्चर्य भयो ॥ फेरि चित्तमें विचार्यों जो अर्जुन हुं मेरो भाइ हे ॥ परंतु इनके सामर्थ्यकी बात कहां तांइ लिखिये ! जो मोकों जानें भगायो ताको तो इन टोंटिने बेठे बेठे बुलायके धमकी देते इ वाकी लुगाइ याके डरके मारे दे दीनी ॥ एसो तो ए टोंटो सामर्थ्यवान हे ॥ ताकों मेरे भाइ अर्जुनने टोंटो लुलो क्यों हे ॥ सो ए आप कबूल करिके बात करे हे तासों अर्जुनके सामर्थ्यकों धन्य हे ॥ फेरि विचार्यों जो भेंनेहु

सामर्थ्यको अभिमान कर्षो ॥ ताको फल प्रभुने देखायो ओर अर्जुनने एक बेर गर्व कियो सो वार्ताः—श्रीद्वारकामें एक ब्राह्मण हतो ॥ ताके दसबारे बालक भये ॥ सो जीवे नहीं जन्मते इ जाते रहे ॥ सो ए ब्राह्मण पढ्यो बोहोत हतो ॥ सो मरे बालकको लेके राजद्वारमें आयो ॥ ओर श्रीठाकुरजीके आगे डारे ॥ ओर हजारन गारी श्रीठाकुरजीकुं देवे लगे ॥ ओर थके तब घृतककों लेके चल्यो जाय ॥ सो एसे एक समे वे मर्यो बालक लेके आयो सो गारी गुप्ता अनेक तरेहके दुर्वचन प्रभुनसों केहे रह्यो हे ॥ सो आपतो कबहु इनसों कलु बोलते नहीं ॥ वा समे अर्जुन पास बेठे हते सो क्षत्रिधर्मके अभिमानसाँ ए ब्राह्मणसों केहेवे लगे ॥ जो अबके तेरे बालक होवे तब तूम हमसों खबर करियो ॥ तब वा ब्राह्मणने कही जो ए त्रिलोकाधिपति भगवान बिराजेहे जासों तो कलु न भयो ॥ ओर तोसों कहा होयगो ॥ तब अर्जुनने कही जो हम क्षत्रिय हे हमारे देखते कोइ प्रजा दुःख पावे नहीं ॥ तासों हम तेरे बालकको रक्षण करि सकेंगे ॥ सो एसे अर्जुनने वा ब्राह्मणको दम दिलासा कर्षो सो कोइ समे पायकें वाके फेरि बालकको समय आयो ॥ तब वे ब्राह्मण अर्जुनके पास आय बात कही के चलो अब मेरे घर बालकको समय हे सो रक्षा करो ॥ तब अर्जुन सब तरेहसों बंदोबस्त लेके आये ॥ सो वाके घरमें सुतिकासोइ उहाँ सब चोकी पेहेरा इत्यादिक बंदोबस्त करि दियो ॥ जो ओर कोउ चैंटी पर्यंत भीतर प्रवेश होय सके नही ॥ एसे सरपिंजर कर्षो ॥ फेरि बालक जन्म्यो सो तो देख्यो ॥ परंतु बालकको देह नहीं रह्यो ॥ पेहेले तो शब पढ्यो रेहेतो ओर या बिरियां तो शबहु न रह्यो ॥ सो समाचार अर्जुनने सुने तब बडो आश्चर्य भयो ॥ फेरि अर्जुनने वा ब्राह्मणसों आस्वास्था करी सब जगे पातालमें तथा यमलोक स्वर्गादिक सब जगे देखी आये सो कहुं न पाये ॥ जहाँ जहाँ अपनी गम्य तथा जीवकी स्थिति हे तहाँ ताँइ देख्यो ॥ परि कहुं खोज न पाइ ॥ तब पाछे आये तब वा ब्राह्मण तो लाखन गारी देवे

ओर कहे जो मेंने भगवानको आश्रय छोडि तेरो व्यंढलको आश्रय कियो ॥
 तातें बालकको देह हुं न देख्यो ॥ सो ए वचन सुनिके अर्जुनने तो चिता
 खडकी ओर जरवेको उपाय कर्यो ॥ जरवेकों सिद्ध भयो ॥ तब श्रीठाकुर-
 जीनें आज्ञा करिके अब रथ समुद्रमें चलावो ॥ सो अर्जुन रथ हांके,
 श्रीठाकुरजी भीतर पधारे ॥ सो सातोऽमुद्र, सातोद्विप भेदके लोकलोकाचल
 पर्वतके पास गये ॥ सो फेरि तो आगे जीवकी गम्य नही ॥ ओर अंधकार
 आयो तहां सूर्यचन्द्रकीहु गम्य नही हे, तब अर्जुन तो गभराये ॥ तब
 रथ हांकवे आप बिराजे ॥ ओर सुदर्शनजीकुं आज्ञा दीनीके प्रकाश करो ॥
 सो सुदर्शनजीने प्रकाश कर्यो ॥ सो वा प्रकाशतें पर्वत उपर चढायके रथ
 उतार्यो सो लोकालोक धाम अपनो हे तहां आपको स्वरूप भुमांवासुदेवको
 अष्टभुजाको हे उहां गये ॥ देखतेइ परस्पर प्रसन्न भये ओर आज्ञा भइ
 जो केसे पधारे ॥ तब वे ब्राह्मणके बालककी बात कही ॥ सो सुनतेही
 वे बालक दिखाय दिये सो अर्जुन देखिके बडे आश्चर्य भये ॥ फेरि पधा-
 रवेकी आज्ञा भइ जो कालकी मर्यादा हो चुकी हे ॥ आगे आपकी इच्छा ॥
 एसे परस्पर बातें भइ ॥ फेरि वे ब्राह्मणके बालक लेके द्वारकां पधारे ॥
 सो बालकतो ब्राह्मणकुं दिये ॥ ओर अर्जुनने प्रभुनकी लीला देखिके अपने
 मनमें धिःक्लार मान्यो ॥ एसे प्रभुसामर्थवान कर्तुमकर्तु अन्यथा कर्तु
 सर्व सामर्थ्यवान् सो मेरो गर्व निवार्यो ॥ ओर मेरी प्रतिज्ञा सत्य करवेके
 तांइ मोकों अपना जानिके ब्राह्मणके बालक लाय दिये ॥ सो सब बातके
 कर्त्ता श्रीप्रभुजी आपहे ॥ आप बिना कोइ गर्व करे सो जूठो हे ॥ समुद्रा-
 दिकने गर्व कर्यो सोउ अंतमें हायों ॥ ओर हुं जिन जिनने गर्व किये हे
 बडेबडेनें सो वे गर्वित नरको तो मान खंडनकर्त्ता आपइ हे ॥ आपको नाम-
 गर्व भंजक हे ॥ तातें गर्व सर्वथा काहुंकुं न करनो ॥ गर्वकरे सो प्रभुनको
 न सुहावे ॥ एक समे राजा जेसिंहजी जेपुरवारिकी राणी दर्शनकुं आइ ॥
 पेहेले राजा दर्शन करिके गयो रानीसों कह्यो जो श्रीप्रभुनके दर्शन करो,

बड़ो आनंद होयगो ॥ तब रानीने क.ह्यो जो में तो अपनौ रीतिसों जाउगीं ॥ तब राजाने कही जो इहां श्रीप्रभुनके आगे रीति-पडदा काहको ॥ सो रानीने न मान्यो ॥ तब राजाने आय विनति करी कृपानाथ ! रानीको दर्शनको मनोरथ हे परंतु वे पंडाकी रीतिसों आयवेकी कहेहे ॥ तब आज्ञा करी जो भलेइ ॥ सब भौडभाड सरकाय दीनी ॥ ओर पंडेसों रानी दर्शनकुं आइ ॥ इतने श्रीनाथजोने बडो दरवजो अपने हाथसों खोलि दियो ॥ सो लोक दर्शन खुले जानिके भीतर गये ॥ सो रानीके उपर सेकडन भौड जाय पडी, सो रानीको बखनकी शुद्धिहु न रही ॥ फेरि गभरातो धकी अपने डेरापें आइ ओर राजासों खीजवे लमी ॥ तब राजाने कहीके में कही करुं ॥ मेंने तो पेहेलेइ कही हती के ऐ प्रभुनके आगे सर्वादा पडदा काहको ॥ तथापि एतो ब्रजके ठाकुर हे ॥ इनने काहुको पडदा राख्यो नही हे ॥ तासों मान, बडाइ, गर्व, प्रभुनको सुहावे नही ॥ तासों गर्वादिक न कर्त्तव्य षइ हमारी शिक्षा हे ॥ जाको रूषे सो माने ॥ इतिश्री गिरिधरलालजी महाराजके वचनामृत चालीसमो संपूर्ण ॥ ४० ॥

 [वचनामृत ४१ मौ.] 

अब आपने एकतालीसमौ वचनामृत आज्ञा करी ॥ सो वार्त्ता ॥ जो श्रीनाथजीके इहां अलंकार श्रीबालकृष्णजी महाराजके समराये हे ॥ सो जडियाने श्रीगुसाइजीसों विनति करी ॥ जो लालसाहब अलंकार श्रीनाथजीके बनवावे हे सो कैसे बनाउं ॥ बाको नमुना मोको मिल्यो वैये ॥ तब आपने आज्ञा करि जो नमुना तो लालजीके पासही हे ॥ जो आपके नेत्र हे सोइ नमुना हे वैसेइ करि लायो ॥ सो श्रीगुसाइजी आपें देखिके बोहोत प्रसन्न भये और श्रीनाथजीको शृंगार श्रीबलकृष्णलालने कयों ॥ नये अलंकार कराये ॥ सो सैव्यसैवक एक स्वरूप दर्शन भये ॥ अलौकिक आनंद भयो ॥ सो श्रीबालकृष्णलालके नेत्र ऐसे कमलदल समान लंबायमान ॥ सो देखेइ बनें ॥ सो ग्रंथ, कीर्त्तन, श्रीवल्लभाख्यानादि

सब श्रीबालकृष्णलालको रूप तथा नेत्रको अलौकिक वर्णन, दर्शन किये जिन जिनने कयों हे ॥ सो वचन: " श्रीबालकृष्ण मुख चन्द्रमा पंकज नैन विशाल " दुसरे । श्रीबालकृष्णमन रंजन खंजन अंबुज नैन" तिसरो । श्रीबालकृष्णलाल देखि मन्मथही लजान" । चोथो " श्रीबालकृष्ण बालकेलि रूपही " । पांचमो " कमल लोचन कमलापति छबिको नांही ए समान रे रसना " ॥ इत्यादिक अनेक जगे निरूपण हे ॥ श्रीद्वारकेश्वरजी महाराज अपने जेष्ठपुत्रनें आपको (श्रीबालकृष्णजीको) नामामृतग्रंथ कियो हे, तामें हुं निरूपण कयों हे ॥ जो 'कंजलोचन' आपको स्वरूप मन्मथको मन्मथ हे ॥ आप षट्गुण संपन्न हे ॥ तामें पांचगुण हे सो तो गुप्त हे ओर विर्य गुण प्रगट हे ॥ एसे गुणारमक छइ लालजी हे ॥ तामें आपको एक एक गुण धर्यो हे ॥ तासों छे लालजीको प्रागत्य हे ॥ तामें विर्यकी आधिक्यता तासों तीसरे हे ॥ सो विर्य रूप श्रीव्रजभूषणजी हे ॥ ताको सब वैभव हे ॥ अब आप श्रीबालकृष्णजी महाराजके षट् पुत्र तिनके नाम निरूपण करत हे ॥ सो निचे प्रमाण:-ज्येष्ठ पुत्र श्रीद्वारकेश्वरजीको प्रागटय संवत् १६२२ वैशाख शुदि १४ नृसिंहजयन्ति ॥ २ ॥ दूसरे श्रीव्रजनाथजीको प्रागटय १६३२ के कार्तिक शुदि ९ अक्षय नवमी ॥ ३ ॥ श्रीव्रजभूषणजीको प्रागटय, संवत् १६३६ चैत्रशुदि ९ रामनवमी ॥ ४ ॥ श्रीपोतांबरजीको प्रागटय १६३९ चैत्रवदि १ डोलोत्सव ॥ ५ ॥ श्रीव्रजालंकारजीको प्रागटय भादोशुदि ११ दान एकादशीको संवत् १६४३ ॥ ६ ॥ श्रीपुरुषोत्तमजीको प्रागटय संवत् १६४४ ज्येष्ठ शुदि ६ कोहे ॥ एसे षट्बालक श्रीगुसांइजीके आगे प्रगट भये हे ॥ सबको नाम कर्ण आपनेइ कयों हे ॥ सो सब विर्यरूप प्रत्यक्ष श्रीबालकृष्णजी आप दिखाये हे ॥ तेसेइ श्रीद्वारकाधिप राजाधिराज आपके माथे बिराजे हे ॥ तेसेइ श्रीबालकृष्णलाल आप सो सेव्यसेवक एकही रूप अखंड राजधानीयुक्त बिराजे हे ॥ वेसोइ स्ववंश अद्याप तांइ नित्य नौत्तम लीला करकें नाना प्रकारके मनोरथपूर्वक



प्रभुनकों लाड लडावे हे ॥ श्रीविठ्ठलेश्वरायजीके घरमें तो एक श्रीहरिरायजी भये हे ॥ ओर इहां तो ठेठसां अद्याप तांइ एक एककी नवीन लीला श्रीप्रभुन विषे प्रतिक्षण वर्धमान हे ॥ ए श्रीबालकृष्णलालके प्रताप तेजको बल हे ओर हमारी दृष्टिसों तो देखि हे ॥ जो श्रीभाभोजी महाराज श्रीपद्मावती बहुजी महाराज सोउ जेसे आगे भये वेसेइ रीतिसों प्रभुनकुं लाड लडावे हे ॥ नित्य नये आनंदको दान देहें श्रीप्रभुनकुं आरोगवेको क्रम श्रीदादाजी महाराजसों बंधायो हे ॥ ओर नंद महोत्सवको सुख तो इहांइहे वेसो ओर जगे नही हे ॥ सो न तो कहुं देख्यो न सुन्यो ॥ एक समय श्रीबालकृष्णलालको श्रीयशोदाजीको भेष धारण करवायो ॥ ओर सब स्वरूप सहित श्रीनाथजी बिराजे ॥ ओर श्रीनवनितप्रियजी पलना झूले हे ॥ श्रीबालकृष्णजी श्रीयशोदाजी रूपसों पलना झूलावते ॥ ओर श्रीगुसांइजी सब बालकन सहित नंदमहोत्सव करे हे ॥ यह अलौकिक सुख श्रीगिरिराजमें भयो ॥ सो पलनाके कीर्त्तन होते ॥ सो राग आसावरी ॥ “तुम ब्रजरानीकेलाला ” ए पलनामें ॥ “बोहोर्यो लिये जननी गोद करि अस्तन चले चुचाइ ॥ ” ए तुक गाइ सो सुनिके सुनतहो श्रीबालकृष्णलालकों श्रीयशोदाजीको प्रादुर्भाव होय गयो ॥ सो स्नेह अत्यंत प्रभुन विषे मातृचरणकों भयो ॥ सो ए शब्द सुनत हो स्तनमें ते दुधकी धार चली ॥ सो श्रीनवनितप्रियजीके मुखारविंदमें प्रवेश भयो ॥ ओर पलनामें ते श्रीनवनीतप्रियजीकों गोदमें पधराय लिये ॥ सो वार्त्ता श्रीगुसांइजीने जानी सो आप पधारिके श्रीनवनीतप्रियजीके पलनामें पधराय लिये ॥ ओर वा समय श्रीबालकृष्णलालको देहानुसंधान न रख्यो ॥ एसे आनंदावेश भये ॥ सो तिन दिनातांइ देहाध्यास नही रख्यो ॥ फेरि चोथे दिन सावधान भये तब श्रीगुसांइजीने आशिर्वाद दिये ॥ जो नंद महोत्सवको सुख तुमको तथा तुम्हारे वंशपरंपराप्रति वर्ष एसेइ होयगो ॥ सो या वार्त्ताको विवेचन श्रीद्वारकेशजी महाराजने नामासृतमें भली रीतिसों कर्यो हे ॥

सो धीगुसांडजीकी कानीसों नंदमहोत्सवको सुख वेसोइ अघाप तांइ
 चरयो आवे हे ॥ कभाइ, पलना, ढाढी सब अति आनंदसों होय हे ॥
 सो देखेइ बने ओर गोरससों चोक्र आसो भरि जाय हे ॥ सो " मानों
 आंसन दधिको उदधि भयो ॥ ओर उपरसों दधि छिरके हे ॥ गोपी, ग्वाल,
 प्रेमसभ भये थके श्रीद्वारिकाधीश पलनामें बिराजे हे ॥ श्रीचशोदाजी
 पलना गुलावे हे ॥ ॥ बहु बेटी बीडि अरोगावेहे ॥ बालक नंदमहोत्सव
 करे हे ॥ श्रीनंदरायजी पटापें बिराजे हे ॥ श्रीनंदरायजी बैठकमेसों पधारे,
 सो पाके पधारे तहां तांइ आनंदको समुह छाय जाय ॥ सो ए आनंदकी
 घात देखेही बने ॥ कलु लिखवेमें नही आवे ॥ नंदालयकी लीला तदरुप
 दर्शमान होय हे ॥ श्रीकाकाजी श्रीनजभूषणजी महाराज तथा श्रीदादाजी
 महाराजकुं नंदमहोत्सवमें देहानुसंधान न रहेतो, एसो जिनजिननें दर्शन
 करेहे सो केहेहे ॥ सो एक समय नंद महोत्सव होते ढाडि गावते जामें
 तुक गाइ ॥ जो " ढाडिन मेरी झांझ बजावे " ॥ यातुकपें काकाजा
 श्रीचंदावलिवहुजी महाराजको भीतरसों तिबारीमें तें हाथ पकरके बाहर
 चोक्रमें पधराये ॥ ओर झांझ श्रीहस्तमें दीनी एसे प्रेमासक्त आप होइ
 गये ॥ जो एसो आनंद प्रति जन्माष्टमी होवोइ करे हे ॥ बडेनक्री कानीसो
 सो कहां तांइ लिखे ॥ एसेइ यहां सब उत्सवको आनंद होवे हे ॥ इति
 श्रीगिरिधरलालजी महाराजके वचनामृत एकतालीसमो संपूर्ण ॥४१॥

४१ [वचनामृत ४२ मो.] **४१**

अत्र बेहेतालीसमो वचनामृत दासने विनति करी ॥ जो कृपानाथ
 कान्तामंथकीके उत्सवमें कलश आने हे; तामें मोर, मंजरी, धरे हे ॥ एक
 तो अममोर तथा सरसोंके फूल; एसे तथा बेर, खजुर, जव तथा राइके
 फूल तथा कुंडके फूल, एसे सात जातके मखर, पुष्प मंजरी धरे हे ताको
 भद्र कहा हे ॥ ओर कान्तकलु तो वैशाख मास जामें मेष संक्राति होय
 तब कान्तकलु होय हे ॥ एसे शास्त्रमें निरूपण कमावे हे ॥ ओर एसाथ-

शुक्लपंचमीको वसंतपंचमीको उत्सव मनेहे सो कृपा करिके कहिये ? ॥ तब आप आज्ञा करे ॥ जो याको भाव येहे ॥ जो अनंग हतो सो अंग भयो ताको श्रीमहादेवजीने कामदेवकुं जराय दियो ॥ सो श्रीकृष्ण जो श्रीप्रभुजीके घर श्रीरुक्मिणीजीके उदर प्रकट भये सो नाम तो प्रद्युम्नजी हे सोइ कामदेवको स्वरूप हे ॥ सो श्रीभागवतजीमें कथा प्रसंग हे ॥ सो ब्रजमें कामदेवको जन्म माघशुक्ल ५ को मने हे ॥ सो वसंत बिना कामदेव वृद्धिको नहि प्राप्त होय हे ॥ तासों आगम उत्सव मने हे ॥ तासों अंब-मोर, मंजरी इत्यादि नवाङ्कुर कलशमें धरि श्रीस्वामिनीजी श्रीप्रभुनके पास पधारे हे ॥ ओर इनकी भावना अलौकिककी बात तो गुप्त हे ॥ सो लिखवेकी आज्ञा न भइ ॥ सो लिखवे सुनवेकी योग्यता नहि हे ॥ तासों वसंतके दश दिन हे सो दश दिन हलके खेल होय ओर रेशमी वस्त्र अंगीकार करे हे ॥ ओर श्रीनाथजीके तो घेरदार वागो तथा सुतरु वस्त्र, ओर छजेदार पाघ, ओर, एक चंद्रकाको सिंगार होवे हे ॥ जहां कुल्हे पेहेरे हे तहां बाललीलाकी भावना जाननी ॥ पाघको सिंगार होय जहां किशोरलीलाकी भावना जाननी ॥ पुष्टिमार्गमें दोइ लीला मुख्य हे ॥ बाललीला तथा कीशोरलीला ॥ श्रीद्वारकेशजी महाराज गाये हे ॥ जा “घोषत्रिय भावना उभय जाने” ॥ सो वसंतपंचमीकी वार्त्ता या प्रमाण कृपा करि कहे ॥ इति प्रसंग ॥ इति श्रीगिरिधरलालजी महाराजके वचनामृत बेहे-तालीसमो संपूर्ण ॥ ४२ ॥



 [वचनामृत ४३ मो.] 

अब आपने तैतालीसमो वचनामृत आज्ञा करे ॥ जो जीवकों स्वाधिकार अलौकिक प्रश्न करनो ॥ तापें आपने आज्ञा करि ॥ जो अनन्य भक्त श्रोता जो राजा परिक्षित बालपणामें सेवारूपि श्रीठाकुरजीके स्वरूपके खेलोंनासों खेले हे ॥ लौकिक खेलोंनासों खेले नही ॥ ओर वक्ता श्रीशुकदेवजी सरिखे निःस्पृही परमहंस से दशमस्कंधमें रास पंचाण्यायी

पर्यंत कथा भइ ॥ सो राजाकी दशा सुनतही ओर वहे गइ. तब प्रश्न कयों
 “धर्म संस्थापनार्थाय” भगवान तो धर्मस्थापनार्थ प्रगट भये हे ओर एसी
 लीला कयों करी ॥ एसो प्रश्न कयों ? तब श्रीशुकदेवजीने विचार्यों जो ए
 पात्र इतनोंइ हे ॥ तासों अगाडिकी कथा कही नही, ओर मर्यादा रीतिसों
 समाधान कयों ॥ एसे समाधानमें निरूपण कयों जो श्रीप्रभुनके चरित्र
 अनेक प्रकारके हे ॥ अपने देखनो नही अग्निमें जो डारे सो भस्म हो
 जाय ॥ तासों प्रभुनके विषे अन्यथा विचार न करनो ॥ यों केहेके पंचा-
 ध्यायकी समाप्ति करी ॥ ओर अगाडि फागुनकी लीला तथा दानलीलाको
 विचार हतो सो वर्णन नहि कयों ॥ कयों जो फागुनकी लीला तो परम
 रसरूप हे ॥ तासों श्रीभागवतमें गुप्त हे तासों ए लीलाको निरूपण न कयों
 ॥ सो श्रीभागवतमें गुप्त राखो ॥ तासों अलौकिक बात हे सो अधिकार
 पूर्वक करनी ॥ जो अष्टसखाके कीर्तनादिक विचारनं, कलु समजते होय
 तो भले, परंतु काहुके आगे न केहेनो ॥ तथा न कलु आपनी बुद्धिसों
 नयो करनो ॥ बे तो सखा हते सो सखासो कलु दुरावनही ॥ वानें गायो
 सो आपनं मान्यों ॥ पीछे जीवको अधिकार नही हे ॥ ओर कलु समजते
 होय तो शुद्ध भाव राखी अपने चित्तमें विवेचन करी अहोभाग्य माननो
 ॥ ओर क्षणक्षणमें सावधान रहेनो ॥ ए पुष्टिमार्ग हे ॥ सो चोधारे खांडाकी
 धार हे ॥ तासों सावधानीसों पकड़े तो बचे नही तो आपही मरे ॥ साव-
 धानीसों पकड़े तो शत्रुकों पराजय करे ॥ शत्रुसो कहा ॥ जो दुःसंग तथा
 विना अधिकारिसों व्यवहार करे सो ॥ तासों मुख्य श्रीगुरुदेवकी आज्ञा

प्रमाण चलनो ॥ श्रीगुरुदेवकी आज्ञा हे सोइ सारभूत हे ॥ राजा युधि-
 रनें श्रीप्रभुनकी आज्ञा विषे प्रपंच कयों ॥ सो अंगुरिया गली ॥ ता
 प्रभुनके आगे चतुराइ न करनी ॥ तथा प्रपंचहुं न करनो ॥ श्रीप्रभु-
 तथा श्रीगुरुदेव एक ही हे ॥ युधिष्ठिरने कहा प्रपंच कयों ॥ जो माह
 भारतको युद्ध भयो ॥ तब एक हाथीको नाम अश्वस्थामा हतो ॥ ओ


द्रोणाचार्यजीके पुत्रको नाम हुआ अश्वस्थामा हतो ॥ सोवे हाथी अश्वस्थामा काम आयो सो सबनने कही जो ॥ अश्वस्थामा मर्यो ॥ तब इनके बापने कहीके युधिष्ठिर केहे तो में मानुं ॥ तब युधिष्ठिरसों समजाये जो तुह्यारे कहेते मानेगें ॥ तब युधिष्ठिरने कहीके मेंतो जुठो न बोलुंगो ॥ तब अर्जुनादि सबनने श्रीप्रभुजीसों प्रार्थना करी ॥ जो आप समजावेंगे तो युधिष्ठिर एसे बोलेंगे ॥ तब हम सब बचेंगे नहि तो द्रोणाचार्यको कोप एसो हे ॥ जो पांडवकी जड रहेवे नही पावे ॥ तासों ए उपाय करे बिना चलेगो नही ॥ तब आप युधिष्ठिरसों कहो जो या बिरियां सत्यको हठ मति करो ॥ ये हमारी आज्ञा हे ॥ सो युधिष्ठिर चित्तमें चतुराई करि के बोले ॥ जो द्रोणाचार्यने पूछी ॥ तब कही जो अश्वस्थामा मरे ॥ नरो वा वा कुंजरो सो स्पष्ट बात नही कही तासों श्रीप्रभुने विषे इतनो प्रपंच रह्यो ॥ सो वाके लिये अंगुरीगली तासों गुरु भगवद् आज्ञा विषे विश्वास राखनो ॥ अपनी चतुराई न करनी ॥ इति श्रीगिरिधरलालजी महाराजके वचनामृत तेतालीसमो संपूर्ण ॥

 [वचनामृत ४४ मो.] 

अब दासने विनति करी ॥ जो श्रीगोकुलनाथजीके वैष्णव दोय सलीको तिलक करे हे बिचमें एडीको चिह्न नही सो श्रीगोकुलनाथजी एसो तिलक करते ? तब आपने आज्ञा करि जो एक समय पृथ्वीपतिने तिलक कंठीपें बोहोत चढाई करी ॥ जो कोउ तिलक हुं न करि सके, कोउ कंठी हु न बांधी शके ॥ सो वाके डरके मारे कोइ तिलक माला धारण न करि सके ॥ ओर कोइ करे तो म्लेच्छ तिलकको मोढो लगाइके चाटि ले ॥ एसो उपद्रव उठायो ॥ जो समय श्रीगोकुलमें परवानो पठायो जो सातोबालकसों कहेवायो जो कलु करामति बतावो, के श्रीगोकुलतें उठी जाओ, के तिलक कंठि मति राखो ॥ तब सातो भाइ भेले होयके विचार कयों जो अब कहा कर्त्तव्य हे ॥ तब श्रीगिरिधरजीने आज्ञा करिजो

करामति देखावेकी तो श्रीदादाजाकी आज्ञा नहीं हे ॥ तब श्रीगोकुलनाथजीने विनति करि ॥ जो कल्लु करामति दिखाये बिना चलेगो नहि ॥ तब श्रीगिरिधरजीने आज्ञा करि जो चले तहां तांड़ तो कल्लु न बतानो फेरि अंतमें कल्लु न चले एसो होय तो कल्लु बतावनो ॥ इतने में पृथ्वीपति को हलकारो आयो सो वाने कही के हुकम मंजुर करोके श्रीगोकुल छोडो ॥ सो श्रीगिरिधरजी तो श्रीनवनीतप्रियजी को संपुट झांपी जीमें पधराये तथा श्रीमथुरांधिशकुं हुं पधराय सोरांजी पधारे तब सब बालक हुं अपने अपने सेव्य स्वरूप पधराय सोरांजी पधारे ॥ श्रीगोकुल खाली करि दियो ॥ फेरि उहां चार महिना बिराजे ॥ तब श्रीगोकुलनाथजीने विनति करी ॥ जो दादा आज्ञा होय तो में पृथ्वीपति के पास जाउं ॥ तब श्रीगिरिधरजी ने कही जो भलेइ पधारे ॥ परंतु कार्य परवेवात जो कल्लु करो सो करोगे ॥ तब श्रीगोकुलनाथजीने विनति करीजो जो आज्ञा ॥ फेरि श्रीगोकुलनाथजी आगरे पधारे ॥ तहां बिरबलसों खबर कराइ ॥ जो पृथ्वीपति सों कहो जो हम पधारे हे तुम्हारे जो बात पूछनो होयसों पूछो ॥ तब बिरबलनें खबर करी ॥ तब बिरबलनें खबर करी ॥ तब पृथ्वीपतिने कही के काल बुलावेंगे ॥ सो तब जो चुगलीखोर हुते तिननें जानी जो अब अपनी बात जायगी ॥ सो पृथ्वीपति सों दिखाये जो इनके पाससों पुरो चमत्कार लेनो तब पृथ्वीपतिने कही जो ॥ तुमही कही सो तब इनने कही जो ॥ एक अस्थिको चोतरा करिके वाके उपर इनकुं बेठावने ॥ तब पृथ्वीपतिने कहीजो ए सलाह ठीक हे ॥ एसेइ करेंगे सो वे लुञ्जानने मुलाकातकी तैयारीमें वेसोइ कर्म कर्यो ॥ सो चोतरा करिके सुपेत खोली चढाइदीनी फेरि प्रातःकाल भयो तब खबर मालुम करि के आप मुलाकातको पधारिये ॥ सो आप पधारे सो वा चोतरापें गादीतकीया विछाये हते ॥ तापें बिराजे ॥ फेरि बीरबल तथा देशाधिपति दर्शनको आये सो मानुं सुर्य उदयो ॥ एसे दर्शन भये ॥ सो अंतःकरणमें कपटतो घणोहतो



करो ॥ ये हमारी आज्ञा हे ॥ सो युधिष्ठिर चित्तमें चतुराइ करि के बोले ॥ जो द्रोणाचार्यने पूछी ॥ तब कही जो अश्वस्थामा मरे ॥ नरो वा कुंजरो सो स्पष्ट बात नही कही तासों श्रीप्रभुने विषे इतनो प्रपंच रह्यो ॥ सो वाके लिये अंगुरीगली तासों गुरु भगवद् आज्ञा विषे विश्वास राखनो ॥ अपनी चतुराइ न करनी ॥ इति श्रीगिरिधरलालजीके वचनामृत तेताली संपूर्ण ॥

 [वचनामृत ४४ मो.]

अब दासने विनति करी ॥ जो श्रीगोकुलनाथजीके वैष्णव दोय सलीको तिलक करे हे बिचमें एडीको चिह्न नही सो श्रीगोकुलनाथजी एसो तिलक करते ? तब आपने आज्ञा करि जो एक समय पृथ्वीपतिने तिलक कंठीपें बोत चढाइ करी ॥ जो कोउ तिलक हुं न करि सके, कोउ कंठी हु न बांधी शके ॥ सो वाके डरके मारे कोइ तिलक माला धारण न करि शके ॥ ओर कोइ करे तो म्लेच्छ तिलकको. मोढो लगाइके चाटि ले ॥ एसो उपद्रव उठायो ॥ जा समय श्रीगोकुलमें परवानो पठायो जो सातोबालकसों कहेवायो जो कलु करामति बतावो, के श्रीगोकुलतें उठी जाओ, के तिलक कंठि मति राखो ॥ तब सातो भाइ भेले होयके बिचार कयों जो अब कहा कर्त्तव्य हे ॥ तब श्रीगिरिधरजीने आज्ञा करिजो करामति देखावेकी तो श्रीदादाजीकी आज्ञा नही हे ॥ तब श्रीगोकुलनाथजीने विनति करि ॥ जो कलु करामति दिखाये बिना चलेगो नहि ॥ तब श्रीगिरिधरजीने आज्ञा करि जो चले तहां ताई तो कलु न बतानो फेरि अंतमें कलु न चले एसो होय तो कलु बतावनो ॥ इतने में पृथ्वीपतिको हलकारो आयो सो वाने कही के हुकम मंजुर करो के श्रीगोकुल छोडो ॥ सो श्रीगिरिधरजी तो श्रीनवनीतप्रियजी को संपुटजीमें पधराये तथा श्रीभथुरांधिशकुं हुं पधराय सोरोंजी पधारे तब सब बालक हुं अपने अपने सेव्य स्वरूप पधराय सोरोंजी पधारे ॥ श्रीगोकुल खाली करि दियो ॥ फेरि उहां चार महिना बिराजे ॥ तब श्री गोकुलनाथजीने विनति

करी ॥ जो दादा आज्ञा होय तो में पृथ्वीपति के पास झाउं ॥ तब श्रीगिरिधरजी नें कही जो भलेइ पधारो ॥ परंतु कार्य परत्वेवात जो कलु करो सो करोगे ॥ तब श्रीगोकुलनाथजीने विनति करीजो जो आज्ञा ॥ फेरि श्रीगोकुलनाथजी आगरे पधारे ॥ तहां बिरबलसों खबर कराइ ॥ जो पृथ्वीपति सों कहो जो हम पधारे हे तुम्हारे जो बात पूछनो होय सों पूछो ॥ तब बिरबलनें खबर करी ॥ तब पृथ्वीपतिने कहीके काल बुलावेंगे तब शो चुधली रखोरहतो तीन नेंझानीझो अपनी बात जायगी तब पृथ्वीपति सों सिखाये जो इनके पाससों पुरो चमत्कार लेनो तब पृथ्वीपतिने कही जो ॥ तुमही कही सो तब इनने कही जो ॥ एक अस्थिको चोतरो करिके वाके उपर इनकुं बेठावने ॥ तब पृथ्वीपतिने कहीजो हां ए सलाह ठीक हे ॥ एसेइ करेंगे सो वे लुच्चानने मुलाकातकी तैयारीमें बेसोइ कर्म कयों ॥ सो चोतरा करिके सुपत खोली चढाइदीनी फेरि प्रातःकाल भयो तब खबर मालुम करि के आप मुलाकातको पधारिये ॥ सो आप पधारे सो वा चोतरापें गादीतकीया बिछाये हते ॥ तापें बिराजे ॥ फेरि बिरबल तथा देशाधिपति दर्शनको आये सो मानुं सुर्य उदयो ॥ एसे दर्शन भये ॥ सो अंतःकरणमें कपट घणो हतो जो दंडवत तोन करेंगे सो आवतही तेजःपुंज दर्शन होतेइ दंडवत होयगये तब आपने आशीर्वाद दिये तब पृथ्वीपतिने विनति करीजो आप बिराजे जामें कहा हे तब आपनें आज्ञा करिके नीचे चमेलीके फुल हे ॥ सो तब पृथ्वीपति मुसकाइ मेहेलमें गयो ओर आपहुं उतारेकी जगेमें पधारे ॥ फेरि पृथ्वीपतिनें वे चोतरा खुदवायो ॥ सो तामेंते चमेलीके फुल टोकराके टोकरा निकसे ॥ वाकी माला करि देशाधिपति आदि सब कचेरीके कामदार लोगनने पेहेरी ओर सब आश्चर्य पाये ॥ ओर चुगलखोरके मोठे पर लगी ॥ तब पृथ्वीपतिने बिरबलसों कही जो ए सच्चे देवहे इनको पाछें गोकुल बसावेकी विनति करनी ओर इनकी बातहुं रहे ॥ ओर कलु अपने हुकूमकी बात हु रहे एसे करनो ॥ तब बिरबलने कहीजो



भले सबेरे पधारेंगे ऐसे कहेके कचेरी बरखास भइ ॥ पृथ्वीपति सोए ॥
 फेरि प्रातःकाल भयो ॥ बिरबलकों पधरायवेकों पठाए सो पधरामणीकी
 रीतिसों स्वारी सहित पधारे ॥ सो विस्तार मालप्रंसगमें प्रसिद्ध हे ॥
 तासों यहां नांही लिख्यो ॥ सो पधारे तब पृथ्वीपतिने अत्यंत आदरसों
 पधराये ॥ ओर विनति करी जो श्रीगोकुल सुबस करिये ॥ तब आपनें
 कही जो हमारी तो नांही नही हे ॥ तुम्हारे प्रतिबंध सों छोड्यो हे ॥ तब
 देशाधिपतिनें कही जो कृपानाथ ! कठु मेरी हुं राखी चइये ॥ ओर मालातो
 आपने सबनकुं चमेलीकी पहेराइहे ॥ तब श्रीगोकुलनाथजीने आज्ञा करी
 जो ठिकहे ओर भाइनकीतो इम हांमी नहो भरे ओर हमतो तुम्हारे
 कहेसो निचेको तिलक न करेंगे ॥ सो वाके देखतेइ तिलक पोंछि दीनो
 सो बेसोइ रख्यो ॥ श्रीगोकुलनाथजीने ऐसे कयों सो वा दीनसों श्रीगोकु-
 थजीके घरमें बालक तथा वैष्णव विनाएडीको तिलक करे हे ॥ सो तब
 फेरि उहां देशाधिपतिके पास श्रीगिरिधरजीके नामको परवानो करवायो ॥
 तब सब बालक बहु बेटीने सहकुटुंब श्रीगोकुल सुबस कयों ॥ ऐसे श्री-
 गोकुलनाथजी उग्र प्रतापी यशको स्वरूप हे ॥ सो यशगुण तो प्रगट हे ॥
 ओर पांच गुण सो गुप्त हे ॥ सो ऐसे षड्गुण युक्त हे ॥ इति श्रीगिरिधर-
 लालजी महाराजके वचनामृत चुंमाळीसमो संपूर्ण ॥ ४४ ॥

 [वचनामृत ४५ मो] 

अब आपने पीसतालीसमो वचनामृत आज्ञा करी ॥ जाभें श्रीप्रभुजीके
 चोवीस अवतारहे ॥ तामें मुख्य दश अवतारहे ॥ सो निर्णयसिंधुके प्रमा-
 णमें तें आपनें आज्ञा किये सो लिख्यते ॥ (१) वैत्र शुक्ल ५ श्रीमत्स्या-
 वतार (२) जेष्ट शुक्ल १२ श्रीकूर्मावतार (३) वैत्र शुक्ल ९ श्री वराह-
 अवतार (४) वैशाख शुक्ल १४ श्रीनृसिंहावतार (५) भाद्रपद शुक्ल १२
 श्रीवामनअवतार (७) वैत्र शुक्ल ९ श्रीरामाअवतार दाशरथीको प्रागटथ
 (८) पौष शुक्ल ७ श्रीबुद्धावतार श्रोजगदिश प्रागटथ (९) माघ शुक्ल

३ कल्किअवतार भविष्यति (१०) भाद्रपद कृष्ण ८ अष्टमी श्रीकृष्णावतार प्रागटय ए दख अवतार चोविसमें मुख्य हे ॥ तब दासनें विनति करि ॥ जो कृपानाथ दश अवतार मुख्य आपनैं आज्ञा करे तामें जयन्ती तो चार मानेंहे ताको कारण कृपा करिके कहिये ॥ तब आपनैं आज्ञा करी ॥ जो जन्माष्टमी हे सो तो पुष्टि पुरुषोत्तम परिपूर्णत्तम प्रागटय हे ॥ तासों प्रथम तो ए जयन्ती मुख्य हे दुसरो वामन जयन्ती हे ॥ सो देखवेमेंतो इंद्रके लिये बलिराजाकुं छले परंतु पुष्टिरितिसों बलिराजाको निरोध भयो ॥ तासो ए पुष्टिभक्त भए ॥ जो कोउ निरोधरूप सों श्रीप्रभुनको अनुसरे सो पुष्टिबाजें ॥ तासों वामनजयंति पुष्टिमें मानेंहें ॥ सो आप चार महीना तांइ वेदोक्त रितिसों बलिराजाके इहां बिराजे हे ॥ सो चार महोना देव-शयनितें लगाय देव उत्थापन तांइ विवाहादि कार्य नहि होवेहे ॥ ए वेदोक्त रितिहे ॥ तासों ओर यहां पुष्टिमें तो सदानंदहे तासों बलिराजाकी पुष्टि भक्ति हे ॥ तासों ए वामन जयंति पुष्टि में मानी हे ॥ जोर रामनोमीहे सो मर्यादा पुरुषोत्तमको प्रागटय हे ॥ तामें चार कार्य पुष्टि करेहे सो तो प्रथमहो निरूपण करेहे ॥ तासों ए रामावतारकी जयंति हे ॥ सों पुष्टि हे ॥ सो मानेहें ॥ ओर नृसिंहजयन्ती सो केवल भक्त संकट निवारणार्थ प्रागटय हे ॥ तामें प्रल्हादादिककी भक्ति केवल निरोधकी भइ ॥ सो मानी के हिरण्यकशिपुको वध कर्यो ओर प्रल्हादजीके शांतगुण सो आपहुं चाटिके शांत भये सो केवल प्रल्हादजी की भक्ति निरोधकी हे ॥ सोइ पुष्टि भक्ति हे ॥ तासों ए चार जयन्ती मुख्य हे ॥ सो पुष्टिमार्गमें मानी हे ॥ ओर एकादशी चतुर्विंशति ओर दोय अधिक मासकी इतने व्रत पुष्टिमार्गमें राखे हे ॥ सो इन व्रतको धारण वैष्णवनको अवश्य करनो ॥ इन व्रतनमें श्री महाप्रभुजीको अत्यंत आग्रह हे ॥ सो आप श्रीजगदिश पधारे सो वा दिना एकादशी हुती ॥ सो आप दर्शनकुं पधारे तब पंड्याने सखडिमहा-प्रसाद आपकुं दियो ॥ सो आप श्रीहस्तमें लेके ठाढे भये ॥ सो महाप्र-

सादकी स्तुती करत करत आवेशमें एकादशीकी सब रात्रि व्यतित भइ ॥ फेरि प्रातःकाल भयो सो वेइ महाप्रसाद आपनें लेलियो ॥ दंतधावन तथा स्नानादिकको कलु बाध नहि ॥ कारण जो रात्रिदिवस महाप्रसादकी स्तुति करतमें व्यतित भयो ॥ जासों श्रीमहाप्रभुजी एसे दयाल तथा चतुरशिरोमणी तथा वेदोक्त धर्मरक्षक सो इतपेंतो एकादशीको अवधारणा राखी ॥ ओर श्रीमहाप्रसादहु आदरपुर्वक अंगिकार किये ॥ तासों एकादशीपें प्रभुनको अत्यंत आग्रह समजनों ॥ ओर महाप्रसादकी स्तुति वचनामृत ग्रंथकी खोज बहुत करि सो वा बिरियाके वचनामृत लिखे गये नही लगेहे ॥ तासों लिख्यो नही ॥ एसे हमकु मालुम पडे हे ॥ ओर श्रीमहाप्रभुजीकों प्रागटय एकादशीको हे सो जयंती माननीं के नही ॥ तब आपनें आज्ञा किये जो ए तो चार जयंतीमें पांचमी जयंती जेसे हारके बिचमें पदक जेसी हे ॥ सो अत्यंत श्रद्धापूर्वक करनो ॥ ओर एकादशी व्रत जरूर करनो ॥ ओर जयंतीमें तो कोउमें व्रत हे, कोउमें पारणाहु हे ॥ कोइ ठेकाणे अपने मारगमें तो अठाविस व्रत हे ॥ इति श्री गिरिधरलालजी महाराजके वचनामृत पीसतालीसमो संपूर्ण ॥ ४५ ॥

 [वचनामृत ४६ मो.] 

अब आपनें पेहेले आज्ञा करि ॥ जो श्रीगुसांइजी आपनें पेहेलोइ छप्पनभोग श्रीगोकुलमें कयों ॥ सो सातो स्वरूप भेले बिराजे ॥ फेरि श्रीगोपालपुरमें श्रीनाथजीको छप्पनभोग कयों ॥ सो दोउ क्रम न्यारे हे ॥ ता पाछें गोस्वामी श्रीगोवर्धनेशजी महाराजनें छप्पनभोग श्रीसिंहाडमें कयों ॥ सो श्रीनाथजीके पास सातो स्वरूप पधराये ॥ तथा फेरि श्रीनव-नितप्रियजीको छप्पनभोग कयों ॥ तामें श्रीद्वारकाधिशनही पधारे ॥ छ स्वरूप पधारे ॥ ता समय श्रीगिरिधरलालजी बिराजते ॥ सो उहां श्रीद्वारकाधिशको भावना सों पधराये ॥ सो श्रीद्वारकाधिशके बालक बहु बेटीको प्रत्यक्ष दर्शन भये ॥ ता पीछे श्रीगिरिधरलालजी महाराजनें इहां कांकरा-

लीमें छप्पनभोग श्रीद्वारकाधिशको कर्णों ॥ सो वामें बडो अलौकिक सुख भयो ॥ श्रीनंदरायजी श्रीयशोदाजीके दर्शन सब बालक बहु बेटिनकुं प्रत्यक्ष भये ॥ ओर श्रीगिरिधारीजी महाराजनें घस्याढमें छप्पनभोग कर्णों ॥ श्रीनाथजीको अन्नकुट उदेपुरमें भयो ॥ सो आपनें आज्ञा करी जो में अन्नकुट अरोग्यो नहीं ॥ तब श्रीगिरिधारीजी महाराजनें घस्याढमें छप्पनभोग कर्णों ॥ सो छप्पनभोग प्रतिसाल मागशर शुक्ल १५ को होवे हे ॥ ओर घस्याढमें चार पांच वरस ताई श्रीनाथजी बिराजे ॥ ओर श्रीगिरिधारीजी महाराजको देहांत घस्याढमेंइ भयो ॥ ओर एक लालजीहुं उहां देहांत भये ॥ तब श्रीभागीरथी बहुजीको श्रीनाथजीने आज्ञा करि जो मोको इहांसो पधरावो ॥ जो न पधरावोगे तो तुम्हारो वंश समाप्त होयगो ॥ तब उदेपुर केहेवाइ परंतु महाराणीजी भीमसिंहजीनें न मानी तब श्रीभागीरथी बहुजीने काकाजी श्रीब्रजभुषणजी महाराजसों केहेवाइ जो श्रीनाथजीकी आज्ञा एसीहे ओर राणाजी नहि- मानेहे ॥ तब या बातको प्रयत्न आप करिये ॥ सो वा प्रयत्नमें रुपैयां एक लक्ष उठे अपने उड़ाके ॥ ओर आप उदेपुर पधारे ॥ ओर राणाजीसों कही जो श्रीनाथजीकी इच्छा घस्याढमें पधारवेको हे ॥ सो यामें कलु प्रतिबंध मति करो ॥ यहां हु तुम्हारो राजहे ओर सिंहाड हु तुम्हारो हे ॥ तब राणाजीने विनति करि जो आपकी आज्ञा सों पधरावेदेउहुं आप मेरे गुरुदेवहो तासों आपकी आज्ञा उलंघन कैसे करूं ? ॥ तासों भले पधरावो ॥ नही तो मेरी मरजी तो इहांसो पधरावेकी नही हुती परंतु आप गुरुदेव हो जो इच्छा होय सो मेरे कबुल हे ॥ फेरि आप घस्याढ पधारके श्रीनाथजीको सिंहाडमें पधराये ॥ वा दिन सों अद्यापताई सिंहाडमें श्रीनाथजी अपनी स्वइच्छासों बिराजे हे ॥ ओर परम आनंदसों सबकों दर्शनानंद देवेहे ॥ फेरि सिंहाडमें श्रीदाउजी महाराजने छप्पन भोग कर्णों तापर सातों स्वरूप पधराये ॥ सो सब जगे आप पधारे ॥ ओर सब श्रीगोस्वामी बालकनसों अस्थंत

दिनरा करिकं सातों स्वरूप पधराय लाये ॥ सो श्रीदादाजी महाराजकों अन्नकुट आरोगवेकी इच्छा हे तासों श्रीद्वारकाधिशाकों पधरावेंगे ॥ ताप आप लिखे जो या मनोर्थमें श्रीनाथजीको द्रव्य उठेगो तासों हमारे प्रभु नही पधारे ॥ तब श्रीदाउजी महागजने फेरि प्रति उत्तर लिख्यो ॥ जो या मनोर्थमें द्रव्य परभार्यो पटनावारे बालुद्वैजनाथको उठे हे तासों आप कल्लु संदेह नही लावेंगे ॥ ओर श्री चंद्रमाजी तथा श्रीबालकृष्णजी बाबत अक्षर करि दिये ॥ तब श्रीद्वारकाधिशा अन्नकुट आरोगवे पधारे ॥ ओर श्रीनवनीतप्रियजीके दोय तीन मनोर्थ भये ॥ तामें तो श्रीद्वारकाधीश नही पधारे ॥ ओर या मनोर्थकी भावना गोस्वामी दादाजी श्रीद्वारकेशजी महाराजनें प्रगट करीहे ॥ तामें सब बिस्तार लिखेहे तासो इहां सुक्ष्म प्रसंग लिख्यो हे ॥ फेरि जेपुरमें श्रीदादीजी श्रीजमुनावहुजीने श्रीचंद्रमाजीको छप्पन भोग क्यो ॥ तामें श्रीमदनमोहनजीको पधराये ॥ ओर श्रीमदनमोहनजीको छप्पन भोग श्रीरुक्षमणी दादाजीनें क्यो ॥ तामें श्रीचंद्रमाजीकों पधराये ॥ फेरि श्रीद्वारकाधीशको छप्पन भोग श्रीदादाजी महाजने ॥ संवत १८९५ के सालमें क्यो ॥ सो बडो भारी मनोर्थ भयो ॥ दोय राजा आये हते ॥ जामें एकतो महाराणा श्रीसरदारसिंहजी तथा बिकानेरके राजाजी तथा वैष्णव देशदेशके आये सो भीड एसी भइ जो धोवदा तांड चारों पास सबनके डेरा भये हुते ॥ ओर बालक पधारे तिनके नाम लीखत हुं ॥ १ गोस्वामी श्रीगोविंदरायजी सिंहाडवारे ॥ २ गोस्वामीनी श्रीलक्ष्मिवहुजी ॥ ३ गोस्वामीनी श्रीछोटेवहुजी श्रीदाउजीके ॥ ४ गोस्वामी श्रीदादाजी आप मनोर्थ कर्ता ॥ गोस्वामी श्रीद्वारकानाथजी छोटे मंदिरवारे ॥ ६ गोस्वामी श्रीगोपेश्वरजी ॥ ७ गोस्वामी श्रीकृष्णरायजी ॥ ८ गोस्वामी श्रीगोकुलउत्सवलालजी ॥ ९ गोस्वामी श्रीविठ्ठलरायजी लालजी ॥ १० गोस्वामी श्रीदादाजी श्रीद्वारकेशजी ॥ ११ गोस्वामी दादाजी श्रीगोकुलालंकारजी ॥ १२ गोस्वामी श्रीनरथुजीमहाराज श्रीबालकृष्णजीवारे



इतने गोस्वामी बालक तथा बहु बेटी न्यारे ॥ दोय बहुजी बडे घरकेन के तो नाम लिखेहे ओर बहु बेटीनके लिखे नही ॥ या रिति सों याद हती सो लिखाये ॥ ओर श्रीगोपीवल्लभमें सब छप्पन भोगके मनोर्थकी सामग्रि आरोगे ॥ चोहरे टोकरानकी पंगती निजमंदिर, तिवारी, डोलती-बारी, शौयामंदिर, भोगमंदिर, चोकमें, तथा जलघरा पर्यंतभइ ॥ निजमंदिरमें सखडिभोग आयो ओर श्रीनाथजी आदि सब स्वरूप पधारे तिनको सबनकों भोग आयो ॥ छप्पनभोगके किर्तन भए ॥ फेरि निजमंदिरको भोग सरिके राजभोग आये ॥ फेरि राजभोगके दर्शन भीतरके पेंडे जग-भोहनमें सो राजा तथा शेठ शाहुकार लोकनकुं पेहेले भये ॥ राजभोगके दर्शन बिनाखंडपाट मंडे खुले ॥ ओर आरती भइ ॥ बडे आनंदसों ॥ फेरि जगमोहनमें सुखपाल पधारि श्रीद्वारकांधीशको सुखपालमें श्रीमहाराजनें पधराये ॥ ता समय सब बालक सुखपालके पास तथा राजा दोय अगाडि सुखपालके डंडापें तथा घरके सब सेवक सुखपालके पास तथा अंगाडि किर्त्तनिया किर्त्तन करते थके ध्वजा, पताका, चंचर, छोंगा इत्यादिक समाज वार्जीत्र सहित पधारे ॥ सो उपले चोकठामें बिराजे ॥ दर्शन खुले ॥ कोइ बालक चंचर लिये ॥ कोइ मुरछलकरि रहे हैं ॥ सो एसो दर्शन करि जलघराकी बारी होय तलावपें घोडाघरपें चले जाय ॥ सो कोउकुं दर्शनमें अरबराट नही पडतो ॥ दर्शनको बोहोत सुख भयो ॥ थोडे दर्शन भये फेरि आपनें आरती करी, न्योंच्छावर करी, फेरि मुखियाजी पंड्या माहेश्वरजीकुं पास राखके सब बालक सहित बैठकमें पधारे ॥ पीछे भोजन किये फेरि सब बालक तो भोजन करिके पोढे ओर आप तो मंदिरमें श्रीठाकुरजीके पास पधारे दर्शन खुले ॥ तब दिवस घडो १ हुतो सो रात्रिप्रहर सवागइ तब दर्शन होय चुके ॥ पाछें श्रीप्रभुजीकुं सुखपालमें पधराये दर्शन भये ॥ इतनी बेरमें भीतरसों भोग सरिगयो ॥ सो उपर फुलगर तथा हवा महेल ताई महाप्रसाद पधारे ॥ तब सब मंदिर

निचेसाँ खासा भयो तब कलस बंध्यो, मार्जन भयो, दर्शन होते सिंहासनपें पधारे ॥ चुनकी आरति भइ, नोच्छावर भइ, फेरि टैरा खेंच्यो, पीछे शितल भोग आयो ॥ सर्वत्र झारी भरि फेरि नित्यवत खंडपाट धरिके अनोसर भये ॥ फेरि ज्ञातको तिलक भयो ॥ दक्षणा चोकमें बटि, फेरि बैठकमें पधारे ॥ स्नान करे, भीतरिया सेवक टेहेलुवा सब न्हाये ॥ शंखनाद भये ॥ उत्थापन भोग, संध्या भोग, भेले भये ॥ फेरि संध्या आरति भइ ॥ फेरि सब ठेकाणे भेट भइ ॥ फेरि श्रीमहाप्रभुजी, श्रीगुसांइजी, श्रीबालकृष्णजीको दंडोत करिके सब शृंगार वडो कर्यो ॥ ओर सब ठेकाणेके वडे करे फेरि श्रीरायजुघर पधारे ॥ सो सब बालक जगमोहनतांड पहोंचायवे पधारे ॥ फेरि प्रसादी वल्ल, बिडा, माला, सब ठेकाणेके बालक बहु बेटिनकुं यथा योग्य दिये ॥ फेरि श्रीठाकुरजीके शृंगार वडे भये ॥ सैनभोग आये नित्यवत् पोडे ॥ फेरि अष्टमीके दिन तीन घडी दिन चढे शंखनाद भये ॥ जागते समय दर्शन करिके श्रीगोविंदरायजी तथा श्रीलक्ष्मीवहुजी श्रीजीद्वार पधारे ॥ ओर सब बालक राजभोग उपरांत भोजन करिके पधारे ॥ मनोरथके आभ्रणमें हीराको टिपारा बन्यो हे ॥ तथा जरीको साज, सो प्रतिवर्ष टिपारेको शृंगार वेइ दिन होय हे, तथा साज हुं बंधे हे ॥ तथा उत्सवकीरीतिसों उत्सव हुं मनेहे ॥ वा समय पंडित कविश्वर, चारण, भाट, विगेरे उत्सवके आनंदमें आये ॥ जीनबे कवित, छंद, दोहा, श्लोक, विगेरे करे हे ॥ ओर श्रीगुसांइजीके उत्सवके तिलकके दर्शन करिके राणाजी तथा बिकानेरके राजाजी विदाय भये ॥ मुखियाजी आदि सब सेवकनकुं पेहेरामणि दिये ॥ सो सब भंडारके चोपडामें नामों हे ॥ यह वार्ता हमारे भाणेज त्रिधरा गोपीनाथजी लल्लुजीके मोढेसुं सुनी सो कही ॥ अब राजनगरमें गोस्वामी श्रीछोटाजी नानाजीने छप्पन भोग कर्यो श्रीनटवरलालजीको ॥ ओर श्रीनाथजीको छप्पनभोग श्रीमहाराज दादाजी महाराजने कर्यो ॥ तथा तीन छप्पनभोग काशीवारे श्रीगिरिधरजीने श्रीनाथजीके ॥ ओर तीन छप्पन भोग श्रीगिरिसजके



दादाजी श्रीद्वारकेशजी महाराजने किये ॥ ॥ जामें एक मनोरथमें हम हुते सो बडो आनंद भयो ॥ फेरि श्रीबलदेवजीको छप्पन भोग दादाजी श्रीद्वारकेशजीने किये तामें हुं हम हुते ॥ श्रीमदनमोहनलालजी श्रीदादाजीजे पास पधारे ॥ दोउ स्वरूप भेले आरोगे ॥ श्रीगोकुलके बालक सब पधारे ॥ बडो अलौकिक आनंद भयो ॥ फेरि श्रीमधुरांजीमें श्रीयमुनाजीको छप्पन भोग कृष्णगंगाके घाटपें दादाजी श्रीद्वारकेशजीने कयों ॥ एसे पांच छप्पनभोग दादाजी श्रीद्वारकेशजीने करे ॥ ओर संवत १९१६ के सालमें दादाजी श्रीगोपीकालंकारजीने श्रीगिरिराजोको छप्पनभोग कयों ॥ फेरि सीहाडमें गोस्वामी श्री कृष्णरायजीने श्रीविठ्ठलेशरायजीको छप्पन भोग कयों ॥ तामें बडेनको मर्याद छोडिके सुरतिनकुं बुलाये सो मनोर्थमें बडो विघ्न भयो ॥ सो छप्पन भोगकी सामग्रि सिद्ध भइ थकी एक महिना तांड रहे गइ ॥ पीछे छप्पनभोग आरोगे सो महाप्रसाद वैष्णवसों लियो न गयो ॥ अब श्रीडाकोरजीमें छप्पन भोग श्रीरणछोडरायजीको गोस्वामो दादा श्रीगोपीकालंकारजीने कयों तामें गोस्वामी बालक २९ तथा बहू बेटी न्यारे ॥ इतने स्वरूपको संभ्रम भयो ॥ आर बडो आनंद भयो ताको वार्ताको प्रकार दादाने कयों हे सो वामें सब विस्तार हे ॥ तासों इहां नही लिख्यो ॥ ओर काशीमें श्रीगिरिधरजी महाराजके बेटोजी श्रीश्यामाबेटीजी मांमीजीने श्रीमुकुंदरायजीको छप्पन भोग कयों ॥ तामें सब उत्सव वर्ष दिनके भये ॥ तामें श्रीगोपाललाल श्रीमुकुंदरायजी भेले बिराजे ॥ ओर भेले सामग्री आरोगे ॥ सब बाहीरकी तैयारी लाला श्रीकिसनजीने करी ॥ ओर लौकिक में आनंद भारो भयो ॥ ओर ज्ञातको समुदाय आछो भयो ओर रोशनी बोहोत सुंदर भइ ॥ ओर वाइ समय बावा श्रीजीवणलालजोके जनेउकोहुं आनंद आछो भयो ॥ परंतु श्रीमहाप्रसाद हरिदासजीने आलसकेमारे सडायो सो पंदरे दिनमें बांटयो. ओर या मनोरथके कवित, दोहा, छंद, कविनारण, तथा लाला श्रीकिसनजीने

किये हे ॥ ए मनोरथ सं. १९२९ के चैत्र मासमें भयो हे ॥ अब बेट शंखोद्धारमें गोस्वामी दादा श्रीगोपिकालंकारजी-श्रीमद्गुलालजीने छप्पन भोग कयों ॥ सं. १९३० के फागणशुदि ५ के दिन मनोरथको मुहुर्त राख्यो तासों पंचमीको भयो ॥ ओर अत्यंत अलौकिक आनंद भयो ॥ बडोदाके राजाने तथा नगरके जामसाहेबने कर छोड दीयो तासों मनुष्यकी भीड बहोत ५-१० कोसके पासके मनुष्यनकुं पैसाके संकोचते दर्शन न भये हुते सो सो वर्षके बुढे होते तांइ सो आपने जीव उपर दया करिके या मनोर्थद्वारा श्रीद्वारकानाथजीके दर्शन कराये ॥ ओर दुनिया हुं बोहोत भेली भइ ॥ ओर वरसदिनके उत्सव भये ॥ कुंडवारो भयो ॥ सो मनोरथकी वार्त्ता न्यारि 'प्रसिद्ध भई हे ॥ तासों इहां बोहोत नही लिखी ॥ अब बालक पधारे तिनके नाम १ गोस्वामी श्रीगोपिकालंकारजो छप्पनभोग कर्ता ॥ २ गोस्वामी श्रीगिरिधरलालजी कांकरोलीवारे ॥ ३ गोस्वामी श्रीवज्ररायजी श्रीनटवरलालजीवारे, राजनगरवारे ॥ ४ गोस्वामी श्रीलालमणिजी अमरेलीवारे ॥ गोस्वामी श्रीलालमणिजीके लालजी श्री-विद्वलरायजी ६ तत्पुत्र श्रीवल्लभलालजी ॥ ७ श्रीपुरुषोत्तमलालजी ॥ ८ गोस्वामी श्रीजगन्नाथजी मांडवीवारे ॥ ९ गोस्वामी श्रीमथुरानाथजी कोटा वारे ॥ १० गोस्वामी दादाश्रीगोकुलाधीशजी ॥ ११ गोस्वामी दादा श्रीगो-पिकेशजी ॥ १२ गोस्वामी भाइ श्रीनृसिंहलालजी ॥ १३ तत्पुत्र श्रीगोव-र्धनलालजी ॥ १४ गोस्वामी श्रीगिरिधरलालजी जोधपुरवारे ओर बहु बेटीनके नाम ॥ १ गोस्वामीनी श्रीभाभीजी श्रपद्मावती बहुजी ॥ २ गोस्वामीनी श्रीकमलावती बहुजी आपके ॥ ३ गोस्वामानी श्रीश्रुतिबिंदा बहुजी भाभीजी ॥ ६ तीन्यो बेटीजी ॥ ७ गोस्वामीनी श्रीपार्वति बहुजी दोय श्रीगोकुलवारे श्रीगोकुलनाथजीके ॥ १० श्रीवज्रजीवणजो पोरबंदरवा-

रेके बहुजी ॥ ११ जुनागढवारे श्री द्वारकानाथजीके बहुजी ॥ १२ जुनागढवारे श्री वच्छालालजीके बहुजी, बेटीजी तथा पुत्रवधु २ जुंमे १५ ॥ १६ गोस्वामी दादा श्रीगोकुलेशजीके बहुजी ॥ १७ गोस्वामीनी श्रीगंगावहुजी श्रीदामोदरजी भाइके ॥ १८ गोस्वामी श्रीलालमणिजीके घरमें बहु बेटी ॥ १९ श्रीकमलाबेटीजी श्रीनृसिंहलालजीकी बेहेन ॥ २० श्रीलक्ष्मीबेटीजी श्रीविठ्ठलरावजीके बेटी ॥ एसे गोस्वामी बालक तथा बहु बेटी मिलीके चोतीस पेंतीसके आशरे स्वजातको समुदाय बहोत भयो ॥ ता समयके यशके कवित जामातु यशोदानंदनजीने करेहे ॥ तथा धवल इत्यादिक वैष्णवने करेहे ॥ तथा ओरहु कविने अपनी मति अनुसार करेहे ॥ ओर वा समय ॥ हक प्रत्यक्ष प्रताप दिखायो जो उहां जलको अरबडाट ठेठसों हतो, तलावहे जामें जल नही रहेतो ॥ सो जात्रीलोक मारगमें सोच करते आवते इतने समुदायमें जलको केसे होयगो ॥ सो अकस्मात मेह बरस्यो तासों तलाव भरि गयो ॥ ओर मुइल सुक्यो नहि ॥ सो जात्रीकों जलकों अंत्यत सुख रह्यो एसो प्रताप जलके प्रभावमें दिखायो ॥ सो एसी अनिर्वचनीय वार्ता कहां तांइ लिखे ॥ वाइ वर्षमें चार कार्य गोस्वामी श्रीलक्ष्मणलालजीके बहुजी श्रीचंद्रावलि बहुजीने करे ॥ सो चार्यों कार्यकी कंकोतरी एकहि साथ सब ठिकाने आइ ॥ लालजी श्रीकन्हैयालालजीको यज्ञोपवित तथा व्याह तथा श्रीगोकुलनाथजीको छप्पन भोग तथा श्रीप्रभुन सुद्धां चात्रा ॥ यों प्रकार चारं कार्यको लिख्यो कंकोतरीमें आयो ॥ सो हमारे तो श्रीबेटकी तरफ जानों हतो सो श्रीगोकुल नहि गये परंतु ज्ञातके नसुं तथा वैष्णवनेके मोडे सुं समाचार अद्भुत सुने जो चार्यों कार्य अद्भुत रीतिसों भये ॥ छप्पन भोगके दर्शनमें भीड बोहोत सो दर्शनीक वैष्णव बहोतसे दर्शन करे बिना रेहे गये एसे वैष्णवके मोडेसों सुनीहे ॥ इति श्रीगिरिधरलालजी महाराजके वचनामृत छेंतालीसमो संपूर्ण ॥

 [वचनामृत ७४ मो.] 

अब सुडतालीसमो वचना अमृत आप आज्ञा करे ॥ जो श्रीगोकु-
नाथजी श्रीसुबोधिनीजी विचारते ॥ तब पास कल्याणभट्टजी बैठते ॥
सो जहां कठिन विषय आवतो तहां आप आज्ञा करे जो भट्टजी कठिन
विषय बोहोत हे ॥ तब भट्टजी केहेते जो राजकों कठिन हैं हमकुं तो
कठिन नही हे ॥ ताको अभिप्राय जो आपकुं कठिन कछो जो जाको
चौदशाखको नीरंतर अभ्यास, एकएक अक्षर विषे प्रविनताको, कलुक
विकटता मालुल पडे कोइ पद अटपटो आये तें, ओर हमसे मुखको एक
अक्षरकी खबर नही हे ॥ ताको विकट पदको सोच काहेको? तासों आपको
सब बातको विचार हे ॥ हमारे तो कलु न बंचेको सोच कहा ॥ ओर
बंच गइ तो हु कहा ॥ एसे कल्याणभट्टजीने विनति करी ॥ तासों श्रीसु-
बोधिनीजीमें श्रीगोकुलनाथजीको विकटता मालम पडी ॥ तो ओरकी
गम्य कहा चले ॥ तासों श्रीसुबोधिनीजी श्रीमहाप्रभुजोकुं अतिप्रिय हे ॥
आपके मुख्य हार्द सर्वस्व हे सो आपके अनुग्रह बिना कहांसो उद्बोध
होय सो कल्याणभट्टजी श्रीगोकुलनाथजीके परम भगवदी वैष्णव हुते ॥
कल्याणभट्टजी सों श्रीगोकुलनाथजी अलोकिक वार्ता करते वे आधुनिक
सेवक जेसे न हुते ॥ सो इनद्वारा कितनीक वार्ता वचनामृत प्रसिद्ध हे ॥
इति श्रीगिरिधरलालजी महाराजके वचनामृत सुडतालीसमो संपूर्ण ॥१७॥



 [वचनामृत ४८ मो.] 

अब अडतालीसमो वचनामृत आपने आज्ञा किये ॥ जो श्रीजीस्वारसों श्री-
भट्टजीदादा फागुनके महिनामे शिंगार करवेकों पधारे ॥ सों भोलीराम
पांखेको बेटा बलदेव संग हुतो ॥ वाके दोय चाकर हुते ॥ सो बडेबागमें
सेल करवे गये ॥ सो जलपानकी चावडीके पास गये ॥ सो उहां कोइ
मनुष्य देख्यो नही ॥ तब एकने जल पीवेको मन कयों ॥ तब दुसरेने
कही जो भलेइ धीले यहां कोन दिखेहैं ॥ तब धानें जल पियो ॥ जल

पीके घर आयो ॥ घर आये पीछे जल पीवे वारेके शरिरमें झंद् आयो ॥ सो पेहेले तो धुजो बोहोत, पीछे जल पीले एसे कही ताको नाम परसराम हतो ॥ जातको श्रोमाली ब्राह्मण हतो ॥ ओर जल पीयो वाको नाम गणेश हतो ॥ जातको गुजर हतो ॥ गणेश गुजरके देहमें झंदने प्रवेश करीके परशराम श्रीमाळी ब्राह्मणको मार्यो ॥ ओर कहीके तेंनें जल पीवेकी सलाह क्यों बताइ ? एसे कहेके मार्यो जो श्रीठाकुरजीके जलपानकी वावडी लुबाइ ॥ ओर कहे यहां कोन हे तासों तेरी गुन्हेगारी सब माफ करंगो जो पचास चपटियां जलकी भरिके बाहिर काढि डारे ॥ एसे कही तब वे परसराम श्रिमालीने अपने हाथसों जलकी चपटियां पचास गिनके बहार काढि दीनी तब छोड्यो ॥ एसे श्रोठाकुरजीकी श्रीद्वारकांधीशकी सेवामें गुप्त रक्षक हे ॥ सो जलपानकी रक्षा याही रितिसों करेहे ॥ एक बिरियां श्रीमहुलालजी महाराज श्रोबालकृष्णजोकी बैठक आगे कथा केहत हते ॥ सब वैष्णव सेवक इत्यादिक हुते सो वानें अपनो कान तोड्यो ॥ सो दिखायो ओर केहेवे लग्यो कृपानाथ मोकों बोहोत मार्यो ॥ सो आपके आगे बलदेव समेतने विनती करि ॥ सो सुनिके सब आश्चर्य पामे ॥ एसो श्रीप्रभुनको अतुल प्रताप हे ॥ जो एसे समयमें हुं प्रभु निज प्रताप अपने भक्तनकुं दिखावे हे ॥ अगाडिहुं एसी अनेक बात सुनते हते ॥ सुरतवारे वैष्णव ब्रजवल्लभदास छे महिना तांइ रात्रि दिवस उहां रहेते ॥ सो वे आयके वात करते ॥ परंतु सांघ नही आवती ॥ सो ए बात सुनते ॥ ये बात सांघ लगेहे ॥ सो इनकी छेलकडी तोडी लीनी ओर कान तोडि डार्यो ॥ सो सबननें देख्यो ॥ ए बात सं. १९३३ के फागण वदी ६ के दिन भइ ॥ ओर कितने लोक वात करेहे जो बडे बागमें भुत हे ॥ सो भुत हे नहीं परंतु कल्लु प्रभुनकी इच्छाको कारण हे ॥ जो भुतकी योनी शास्त्रमें हुं निरूपण हे ॥ या बातको वचन “भूतोपि देवयोनयः” ओर पूतना मोक्ष तथा नारायण कवचमें इत्यादिकमें हे ॥

ओर पुराणान्तरमें हूँ हे ॥ ओर दोयसोबावनकी वार्तामें हतीत पतित भये
 तासों या बात मोथ्या नही कही जाय ॥ परंतु आजकाल यामें पाखंड
 बोहोत चले हे ॥ तासों जुठो सरिखो लगे हे ॥ सं. १९१४ की सालमें
 बडोदाके प्रदेशकुं हम गये हुते ॥ तर्हांहुं एक कौतक एसो देख्यो ॥ तब
 आप आज्ञा किये जो ॥ एक प्रभु काशीवारे हमारे घरके वैष्णव हे ॥
 विनके घरमें भुतनी देखी ॥ प्रत्यक्ष सो बातें करे ॥ ओर पुछे ताको उत्तर
 देती ॥ कोउ गाली दे तो वाकों वे गाली देती, ओर वाको शरिर अदृश्य
 रहे ॥ वाको नाम झवेरवहु हुतो ॥ वासों हमने बोहोत बात पुछो ॥ ताकों
 सब उत्तर दियो ॥ ओर वासों पुछीके तुं एसे प्रत्यक्ष क्यों बोलत हे ॥
 ओरनके शरिरमें क्यों नही बोलत हे ॥ तब वानें कही जो हमारेमें
 कोइ बोहोत बुरो होय सो ओरनके शरिरमें आवे हे ॥ ओर मनुष्यनकुं
 दुःख देहे एसी गंदी कायामें कोन घुसे ? ॥ आर याकों भूतनी होवेको
 कारण ? वानें कस्यो सो बात, जो मेरे बेटा भयो हुतो ओर प्रसूनिकामें
 मृत्यु भयो ॥ सो वे बेटामें मेरो चित्त रखो ॥ तासों यह दिशाकों प्राप्त
 भइ ॥ तब मेरे धनीने मोको शीसामें उतरवाइ ॥ सो वे शीसामें बोहोत
 दिना तांइ जमीनमें रही फेरि ए जमीन प्रभु काशीवारेनें बेचाण लीनी ॥
 तब वाकी नीम खोदते वे सिसा जमिनमेंते निकस्यो ॥ सो फुटो गयो ॥
 तब में बहार निकसी ॥ वा दिनातें चोडे सबनसों बोलचाल करे ॥ दोय
 तिन वर्ष तांइ ॥ एसे ए बात राजद्वार बडोदाके तथा अंग्रेज सुद्धाने जानी ॥
 अंग्रेज प्रेतयोनीको नही माने हे ॥ वानें हुबोल बतरावन सुनी ॥ तासों
 शास्त्रमें निर्माण हे सो प्रमाण आज्ञा हे ॥ सो प्रेत योनी नीश्च हे ॥ तासों
 चित्तकी वृत्त स्थिर राखी के अवसान समय भगवत् चरणारविंदमें चित्त
 लगावे ओर देह संबंधी हितकारक सगे होय सो केवल भगवद् नामोच्चार-
 णकी धुम मचाइ दे ॥ तासों भगवद् लीला संबंधी वा जीवके चित्तकी वृत्ति
 पोहोचे ॥ तब भगवद् चरणारविंद यथा भवना प्राप्त होय ॥ इति श्रीगि-

रिधरलालजी महाराजके वचनामृत अडतालीसमो संपूर्ण ॥ ४८ ॥

 [वचनामृत ४९ मो.] 

अब ओगणपचासमो वचनामृत आप आज्ञा करे जो ॥ जेपुरके राजा मानसिंह कुंभनदासजीको जडाव दर्पण देवे लगे ॥ सो न लीनो, तब दासनें विनती करी ॥ जो क्यों न लीनो लेके श्रीनाथजीकुं भेट करते ॥ तो वे वस्तु श्रीनाथजीके अंगीकार होती यामें अपनी सिद्धाइ न दिखावते तो कहा चिंता हती ॥ प्रभुनके अंगीकार तो होतो ॥ तब आपनें अज्ञा करी जो ॥ वे आरसी प्रभुनके अंगीकार उपयोग लायक न हती ॥ श्रीप्रभु तो नौतन सामग्रि अंगिकार करेहे ओर ए तो राजाकी देखी भइ हुती तासों ए विचारिके पीछी दिनी जो श्रीप्रभुके उपयोग लायक होती तो सर्वथा पीछी न देते यामें अपनी सिद्धाइ जतोयवेके लिये न लीनी सो बात नही हे ॥ परंतु वे अंगिकार लायक न हती तासों पीछी दीनी ॥ ओर कुंभनदासजीको सात बेटा हुते, परंतु डेढ बेटा केहेते ॥ सो आखे तो चत्रभुजदासजी ओर आधे कृष्णदासजी ॥ ओर दुसरे पांच वैष्णव न हते तासों वाको बेटा न गीनते ॥ तासों वैष्णवको बेटा वैष्णव न होय ताको बेटा न जाननो ॥ शरिरको मेल जाननो ॥ एसे शेठजी दामोदरदासजी संभरवालने बेटा अपनो न जान्यो ॥ जन्म ही त्याग करी दीयो वाको मोढोहुं छिपुरुषने न देख्यो ॥ वे म्लेच्छ हुतो तासों ॥ बेटा कोनसों कहेनो जो अपने कुलके धर्ममें रहे ॥ कुलको धर्म छोडे सो बेटा काहेको तहां फेरि दासनें प्रश्न कर्यो ॥ जो कुलके धर्ममें तो प्रह्लादजीने हिरण्यकशिपुको कह्यो न मान्यो सो क्यों ॥ सो आप आज्ञा करिये ॥ जो प्रह्लादजीने पीताकी आज्ञा न मानी ताको अपराध कलु लाग्यो के नही ? ॥ तब आप आज्ञा करे जो ॥ पिताको धर्म येइहे जो पिता पुत्रको सत्कार्यमें लगावे सो आज्ञा न माने तो अपराध लगे ॥ ओर ए तो भगवद्धर्मको निर्दिक्त हुतो तासों अपराध न लय्यो ॥ जेसे यदुराजाके पास यचातीस-

जाने तरुन अवस्था मागी सो न दीनो तो हुं यदुराजा धर्मशील कहाये ताको कारण पिताकी आज्ञा न मानी ओर तरुणावस्था आपनी न दीनी ताको अपराध यदुराजाको न लग्यो ॥ कारण जो बेटाकी अवस्था लेके मातासों पीता भोग करे तासों यदुराजाने पीताकी आज्ञा न मानी ॥ एसेइ प्रह्लादजीने हिरण्यकशिपुको आज्ञा न मानी ॥ तब फेरि विनती करी जो कुल धर्म तो प्रह्लादजीको न रख्यो ॥ तापें आपने आज्ञा करे जो श्रीगीताजी अष्टादशाध्यायमें श्रीठाकुरजीने अर्जुन प्रति आज्ञा करी हे ॥ सो श्लोकः—



सर्वधर्मान्परित्यज्य मामेकं शरणं ब्रज ॥

अहंत्वासर्वपापेभ्यो मोक्षयिष्यामीमांशुचः ॥१॥ इति वचनम् ।

याको अर्थ ॥ हे अर्जुन ! सर्व धर्मको परित्याग करिके मेरेइ शरण आव, ओर में तेरे सब पापनको मोक्ष करुंगो, सोचमतिकरे, एसे आज्ञा हे ॥ तासों भगवद् धर्म मुख्य हे ॥



ओर प्रह्लादजीको कुल धर्म सोइ भगवद्धर्महे क्यों जो ब्रह्माजी तथा कश्यपजी भगवद्धर्म में हुते ॥ तासों कुल धर्म प्रह्लादजीने त्याग क्यों हे ॥ तब दासने विनति करी जो मेरे पिताके पिता सखीदास रामानंदी संप्रदायमें हते ॥ ओर मेरो पिता ओर में आदि परिवार सबतो राजके शरण हे ॥ तामें कलु कुलधर्म तो बाधक नही ॥ तब आपने कृपा करिके आज्ञा करी जो ए बात तो तेरे पिताने विशेषता करी जो मर्यादामें हते सो पुष्टिमें भए तामें कलु हिनता न भइ ॥ तासों हिनता हे सो कुलधर्म में बाधक हे ॥ ता समें जा समागमके शास्त्रि राधाकिसनजी पास बेटे हते विनने विनति करी जो ॥ कृपानाथ ! श्रीगीताजीमें भगवद् आज्ञा हे के “स्वधर्मे निधनं श्रेयः परधर्मो भयावहः” याको अर्थ ॥ जो अपनो कुलधर्म बुरोहे तोहु श्रेय करता हे ॥ ओर दुसरेको धर्म आछो हे तोहु अपनेकुं तो भय कारक हे ॥ एसो भगवद् आज्ञा हे तब आपने आज्ञा

करी जो तुमने प्रश्न बाहोत आछो कयों याको उत्तर यह जो ए कारिका वरण धर्मके उपरहे ॥ ब्राह्मण हे सो ओर तीन वरणको धर्म करे ओर शुद्र हे सो ब्राह्मणको धर्म करे तो वे भयावहहे तासों जा वर्णमें होय सोइ करनो ॥ सोइ श्रीगीताजीमें आज्ञा करी हे ॥ तासों ए वचन कुल धर्मके उपर नहि लगे ॥ कुलधर्मके उपरतो "सर्व धर्मान् परित्यज्य" ए श्लोक हे जो आगे लिख्यो हे ॥ तासों भगवद् धर्म हे सोइ मुख्य हे ॥ तासों वैष्णवकुं भगवद् धर्म, सेवा, कथा, किर्तन, यहलोक परलोक के श्रेयकी इच्छा राखतो होय तो ताकोतो भगवदाश्रय इ करनो ॥ तासों सकल मनोर्थ सिद्धि होय ॥ इति श्रीगिरिधरलालजी महाराजके वचनामृत ओगणपचासमो संपूर्ण ॥ ४९ ॥

 [वचनामृत ५० मो.] 

अब आपने पचासमो वचामृत आज्ञा करे जो ॥ उद्धवजी भगवानके परम सखा हते ओर स्वरूपाकृतीहु आप सदृश श्री ठाकुरजी जेसेहे ॥ ओर वृत्तिमें श्रेष्ठ हे ॥ एसे उद्धवजी तिनको गोपीजनकी शांतना करिबेके लिये श्रीगोकुलकों पठाये ॥ सो गये तो हते ज्ञान देवेकुं सो आप ज्ञान प्राप्त होयके आये ॥ ओर ब्रजको प्रेम देखीके उद्धवजीको नेम तथा ज्ञान हतो सो कीतको कीतवा प्रेम समुद्रमें बहे गयो ॥ ओर श्रीनंदबाबाजु तथा श्रीब्रजराणीजु तथा समस्त ब्रजभक्त आदि बाल वृद्ध पर्यंत ओर वृक्षादिक सब गौ, पशु, पक्षी, सब ब्रजके मंडलेनकेकों श्रीठाकुरजिके उपर अत्यंत स्नेह देखिके उद्धवजी अत्यंत प्रेम विवस भये ॥ गदगद कंठ होय गये ॥ ओर एइ मनमें आइ जो में या ब्रजमें रहूं तो बाँहोत आछो ॥ सो प्रभुनसो एइ माग्यो जो ब्रजमें गुल्म लतौषधि होउं ॥ तापें दासने प्रश्न कयों जो ॥ एसे परम सखा होयके ए कहा माग्यो ए तो अपनोइ स्वारथ माग्यो ॥ जो ब्रजमें रहेनो परंतु एसो कयों न माग्यो जो षडे वृक्ष अब कदंबादिक होयके श्रीप्रभुजी ब्रजभक्तन संग विहार करतमें छायारूपी सेवा करनी ओर लीलाके दर्शनहु होते ॥ ओर ब्रजको वासहुं



होतो ॥ सो कृपानाथ उद्धवजी मागवेमें भूले हे ॥ ए तो ध्रुवजीकी नाइ इनने माग्यो ॥ जो ध्रुवजी पांच वर्षके हुते ओर श्रीभगवद् प्राप्ति भइ ॥ ता समय श्रीठाकुरजीके पास राज माग्यो ॥ ओर चरणारविंदकी सेवा न मागी ॥ ताको सोच बडो रह्यो ॥ पश्चात्ताप बहुत भयो ॥ ए बाततो एसे भइ ॥ तापर आपनें आज्ञाकिये जो ए बात एसे हे ॥ जो ए तो समज-वेको फेर पड्यो ॥ उद्धवजीने ठीकही माग्यो जो गुल्म लतौषधि होउं ताको अभिप्राय ये रह्यो जो ब्रजमें सदा श्रीठाकुरजी नागे चरण सोइ फिरेहे ॥ सो भगवदिने हुं गाये हे ॥ जो "सुरदास प्रभु नागे पायन अनुदिन गैयाचारी" ॥ एसे गाये हे तासों उद्धवजीने यह माग्यो जो गुल्म लतौषधि होउं तो आप चरणारविंद धरे ॥ तहां कांटा, गोखरु, विगेरे चरणारविंदमें चुमे तासों गुल्म लतौषधि होयके चरणारविंद नीचे रहूं ॥ ओर प्रभुनकुं सुखदलगे ओर शिल कंटकादिक चरणारविंदमें चुभे नहि ॥ ताके यत्न सों यह माग्यो ॥ जो प्रभुनकुं सुखदत्व ओर अपनो कृतार्थ तासों पश्चात्ताप होय ॥ एसी बात नही हे ॥ क्यों जो ध्रुवजी तो बालक हते ॥ ओर राज आकांक्षासों तप करवे गये हते ॥ तासों राज माग्यो ॥ ओर इनकुं तो ब्राजभक्तद्वारा ज्ञान प्राप्त भयो ॥ तासों उचित ही माग्यो हे ॥ यामे संदेह न करनों ॥ तासों दासकों वैष्णवकुं चरण सेवा ही मुख्य हे ॥ तासों ब्रजमें श्रीगिरिराजजीके पास उद्धवजीकी बैठक हे ॥ ओर १गुल्म लता रुपी सदाइ उद्धवजी उहां बिराजे हे ॥ फेरि वैष्णव नथुभाइने विनति करिजो नंदगामके पास उद्धवजीकी बयारी हे उहां नही हे ? ॥ तब आपनें आज्ञा किये जो उहांतो गोपोजन सों ज्ञान प्राप्त भयो सो स्थल हे ॥ इति श्रीगिरि-धरलालजी महाराजके वचनामृत पचासमो संपूर्ण ॥

 [वचनामृत ५१ मो.] 

अब एकावनमो वचनामृत आपने आज्ञा किये ॥ जो श्री महाप्रभु-



जीके बालक तो सब एक सार महदकुलहे ॥ ओर पुजनीय हे ॥ यामें ए
 हमारे इष्ट हे ॥ ए दुसरे घरके हे हमतों फलाणे घरके हे ॥ ए जो भीष्म
 भाव हे सो कृपानाथ हमारी जीवकी अज्ञानता दीसेहे ॥ ओर आपतो सब
 एकही हो ॥ सो ब्रह्मसंबंध दुसरे बालकको लेनो के न लेनो ॥ एतो प्रश्न
 दासने कर्यो ॥ तामें आपने आज्ञा करी जो मुख्य तो सातघर हे ॥ ओर
 बालक हे सो सातघरके हे ओर सातघरमें सेवाकी रीति न्यारी न्यारी हे ॥
 कोइ ठोर उरसवको क्रम कल्लु हे ॥ कोउ घरको क्रम कल्लु हे ॥ सो वैष्णव
 जाके घरके सेवक होय ता घरकी रिति करेहे ॥ बाप श्रीमथुरेशजीके घरको
 सेवक ओर बेटा दुसरे घरको होय ओर घरमें श्रीठाकुरजी बिराजते होय
 तब कोनसे घरकी रिति करे ? तासों एक ही घरमें रहेनो उचित हे ॥
 ताको कारण जो पिता श्रीमथुरेशजीके घरको सेवक होय ॥ ओर बेटा
 श्रीद्वारकानाथजीके घरको सेवक होय तब श्रीठाकुरजीकी सेवामें रिति
 अगाडिसों श्रीमथुरेशजीके घरकी चलती होय ॥ ओर पांच पैसाकी सेवाहु
 श्रीमथुरेशजीके घर पहुँचती होय ॥ एसे चलते पिताको देहांत भयो ॥
 आर बेटाकी घरमें मुखत्यारि भइ ॥ ओर श्रीठाकुरजीकी तथा घरकी रिति
 श्रीमथुरेशजीके घरकी होती होय ॥ ओर बेटा श्रीद्वारकानाथजीके घरको
 सो वाको तो ॥ श्रीद्वारकानाथजीके घरकी रिति करनी उचित हे ॥ ओर
 श्रीप्रभु तो श्रीमथुरेशजीके घरकी रितिसों हीलेहे सो रिति न करे तो
 गुरु द्रोही होय ॥ सो नवरत्नमें कइयो हे ॥ जो श्रीमहाप्रभुजी आप आज्ञा
 करे हे जो "सेवाकृतिगुरोराज्ञा" ओर शास्त्रमें गुरुको आज्ञा हे सोइ मुख्य
 हे ॥ तासों सेवक तो जा घरके हो ते होइ वा घरकेनसों ब्रह्मसंबंध करनो
 ॥ ओर बालककी सेवा तो भले इ अपनी शक्ति प्रमाण करे ॥ परंतु सेवक
 तो एकही घरको होनो मुख्य हे ॥ तामें प्रभु प्रसन्न रहे ॥ ओर घरकी
 रिति नही मिटे ओर बेसेतो गुरुकुलके सबहे ॥ सो माननो तो सबकुंही
 चैचे यामें आपनो धर्म रहे तासों दासने विनती करीके ए मेरी अज्ञानता

हे ॥ सो बालक विषे भिन्न भावतो नही गिननो ॥ भीन्न भावगिने सो तो अज्ञानही हे ॥ ओर ब्रह्मसंबंध तो एक ही घरको लेनो ब्रह्मसंबंध भये विना जीवकी शुद्धता नही हे ॥ ओर जीवकी शुद्धता विना सेवाको अधिकार नही हे ॥ ओर सेवा सिद्ध भये विना पुष्टिमारगमें अंगिकार नहि होय ॥ तासों सेवा विषे विरुद्धता न होय ॥ ओर श्रीप्रभुप्रसन्न रहे ॥ ओर श्रीगुरुदेवकी आज्ञा सधे ॥ या प्रमाणे जीवकुं रहेनो ॥ इति श्रीगिरिधलालजी महाराजके वचनामृत एकावनमो संपूर्ण ॥ ५१ ॥

 [वचनामृत ५२ मो.] 

अब वावनमो वचनामृत आप आज्ञा करे ॥ जो कामको दहनतो कोइ करि शके, परंतु रोष दहन करनो बोहोत ही कठिन हे ॥ श्रीमहादेवजी भक्तनमें शिरोमणि हे ॥ श्रीप्रभुजीको अह गिंश ध्यान करेहे ॥ सोउ कामदेवकों तो जरायो परंतु क्रोधको दहन तो नहि होय शक्यो ॥ क्रोध तथा कामको दहन तो श्रीप्रभुजीसोइ भयोहे ओर कोइको सामर्थ्य नहि ॥ ब्रह्मादिक शिवादिकको सामर्थ्य नहि तो ओरनको कहा चलाइ ॥ बद्रीकाश्रममें श्रीनरनारायण तपस्या अयापहु करेहे सो एक समय इंद्रनेजानी जोइनकी तपस्या बोहात बढी सो तपके जोर सों मेरो इंद्रासन ले लेइंगे ॥ तासों वसंतऋतु तथा मंदवायु तथा अप्सरागणको पठाइ ॥ ओर कष्टो जो तुम सब जायके इन नरनारायणजाको तप भंगकरो ॥ सो वे सब बद्रीकाश्रममें गये सो सब दुर रहे इनके तपके तेजसों नजीक जाय न सके ॥ सो आपने देखिके नजीक बुलाए ॥ जो तुम आओ एसे आदर आपने कर्यो ॥ फेरि आपको वैभव सब इनकों दिखायो ॥ सो देखिके बडे विस्मयकों प्राप्त भये जो ए सो वैभव तो इंद्रने स्वप्नमेंहु न देख्यो होयगो एतो अद्भुत वैभव आपने श्रीनरनारायणजीने कृपा करिके देखायो ॥ ओर एक अप्सरा उर्वशी वाको नाम हतो ॥ सो इनकुं दीनी ॥ जो इनकुं तुम इंद्रके लिये ले जाउ ॥ एसी आपने कृपा करी ॥ जो इंद्रने तो योग

भंग करवेके ताँइ इतनों उपद्रव कयों ॥ ओर आपने तो कृपा करिके उलटि उर्वशी इनकुं रिझके दोनी ॥ जैसे गोवर्धन यज्ञमें श्रीठाकुरजीने अपने भक्तनको अन्याश्रय छोडायवेके निमित्त श्रीगोवर्धन पूजा करवाइ ॥ तासमय इंद्रने बडो कोप कयों ॥ ओर जल बरसायो ॥ ताकोहु आपने सेवामानी लीनी ॥ तासों श्रीप्रभुजी ऐसैं दयाल हे ॥ जो जीवकी सेवा थोडीसी होय ताकुं आप बोहोत करि माने हे ॥ तहां भगवदोने गायो हे ॥ जो "राइ जीतनी सेवाको फल मानत मेरु समान ॥ समजदास अपराध सिंधु सम बुंद न एको जान" एवचन हे ॥ तासों श्रीप्रभुजो एसे दयाल हे ॥ पुतना विष देवेकुं आइ ताकों माताकी योग्यता दिनि ॥ एसे भृगुजीने हृदयस्थलके विषे लत्ताप्रवहार कयों ॥ सो आश्रण करिके मान्यो ॥ ओर उलटो आज्ञा करी जो तुम्हारे पाँवनमें लगी होयगी ॥ श्रीप्रभुजी एसे उदार राय, करुणा समुद्र हे ॥ जो ए एसो न विचारे तो अपनो ठेकागो कहुं लगे नही ॥ इति श्रीगिरिधरलालजी महाराजके वचनमृत वाचनमो संपूर्ण ॥ ५२ ॥

 [वचनमृत ५३ मो] 



अब त्रेपनमो वचनमृत आपने आज्ञा करी ॥ जो एक समें होल्करके आगे काहुने कही जो मेवाडमें श्रीनाथजी विराजे हे सो पारसको स्वरूप हे ॥ लोहके स्पर्श करे तो सोनो हो जाय ॥ सो सुनिके विचारी जो में उनकुं ले आउं ॥ ताके लिये बहोत बडि फोज लेके मेवाडमें आयो ॥ जो इनके समाचार इंदोरके वैष्णवने श्रीगिरिधारीजी महाराजसों लिखे ॥ जो ए दुष्ट एसो विचारके अपने इहां आवे हे ॥ सो समाचार वाँचीके श्रीगिरिधारीजी बोहोत सोच युक्त भये ॥ राणाजीको पत्र लिखे ॥ ताको जुबाब राणाजी लिखे जो आप मारी पास पधारी आवे तो आछो, नाँहि तो एती दुरसों ठीक नही पडे ॥ तासों श्रीनाथजीको उदेपुर पधरायवेको उद्योग कयों ॥ सो गोपीबल्लभ श्रीजी द्वारमें अरोगे ॥ ओर उस्ताको बुलाए ॥

सो सघरे घणे लगे ॥ सो श्रीनाथजी उठे नही ॥ सो मंथ्या आरतिको समय होय गयो ॥ पीछे ब्रजवासीननें गारी दीनी के मुंड कटावेगो कहा ? चले क्यों नहि ? तब आप उठे, चोडोलमें पधारे फेरि सब ब्रजवासी लगिके गाडामें पधराये ॥ सो बाढेरा पधारे ॥ ओर खीचडीको राजभोग आयो ॥ जब होल्करकी खबर आइ के श्रीजीद्वार पोहोँच्यो हे सो सुनिके तरकाल राजभोग आरति भइ ॥ ओर उदेपुर आडि कुष भयो ॥ श्रीनवनीत-प्रियाजी तथा श्रीविट्टलेशरायजी उदेपुर पधारे ॥ सेवक ब्रजवासी सब संग हतो ॥ सब श्रीजीद्वार खाली करि दियो ॥ सो देखिके होल्करने कहि जो भागे ताको पिछाडो नहि करनो ॥ इहां रहते तो जोहोती सो होती ॥ ओर याके तो भागवेकी टेव हे, सो भाग गयो ॥ एसे केहेके रेहे गयो ॥ ओर श्रीनाथजी तो उदेपुर पधारे ओर होल्कर आयवेकी सुनिके अपने-इहां काकाजी श्रीब्रजभुषणजी महाराजसों सवननें विनती करी ॥ जो श्रीनाथजी तो उदेपुर पधारे हे, ओर आपुनहु इहांसो उदेपुर तथा जहां अपनी इच्छा होय उहां पधरावे तो ठिक हे ॥ क्यों के ए दुष्ट हे ॥ तापर आपनें आज्ञा करी के जो में तो प्रभुनकुं कहूं न पधराउंगो क्योंके हमारे बडेननें इहां पधराये हे ॥ सो में तो पधरावुं नही ॥ एसे आज्ञा करिके पधराये नहि ॥ फेरि होल्करके डेरा राजनगर भये, ओर फोजके मनुष्य सब दर्शनकुं आये ॥ सो जगमोहनमें दुसरो स्वरूप पधरायके दर्शन कराये सो तहां बनियाको भेटको द्रव्य बहोस आयो ॥ दर्शनीनें रूपयानकी मुठी भरी भरिके फेंके, ओर सांजके समय होल्कर दर्शनकुं आयो ॥ सो मल्लुकचंदजीनें कहीके पहले हमकुं महाराजके दर्शन करावो तब मल्लुकचंदजीनें श्रीकाकाजीसों विनती करिके होल्कर आपके दर्शनकी विनती करेहे ॥ तब आपने आज्ञा किये जो में तो या दुष्टको मोंढो न देखुं ॥ इनने श्रीनाथजीकुं बोहोत परिश्रम करायो हे. तांसां मेंतो याको मोंढो न देखुंगो ॥ ओर आयो हे ताको सन्मान क्यों चाइये ॥ सो लालजीके दर्शन करावो ॥ सो फेरि श्रीगिरिधरलालजीके दर्शन बैठककी नीचली तीबारीमेंसां कराये

सो साक्षात् श्रीद्वारकांधीशके दर्शन श्रीगिरिधरलाल दादाने सबनकुं दिये ॥ फेरि इहां दर्शनको समय भयो, आरतिकी खबर आइ, तब आप आज्ञा करे ॥ जो दर्शनकुं चलो ॥ तब फेरि विनती करी जो दर्शन कौनके करने कन्हैया तो इहांइ दर्शन देहे ॥ ओर विनती करी जो में खरचीसें टुट रह्योहुं सो कल्लुक टुकडा मोंको तुं मिल्यो चाइये ॥ जौ वासो इंदोरपार हो जाउं ॥ सो आप साक्षात् कन्हैयाके पास न मागुं ॥ तासों मोको टुकडा मिल्यो चइये ॥ सो वाइ समय बडोदावारे शेठजी हरिभक्तिवारी शेठाणी रतन-बाइको पलना सोनाको नव्वे (९०) हजारको वृथा पडी रह्यो हतो सो देदियो ॥ फेरि श्रीप्रभुनको दर्शन करिके बहार निकस्यो ॥ सो बहार निकसिके देखेतो कांक्रोलीके दरबज्जे तथा कोट सुवर्णमय देखे ॥ ओर गामकी वस्तीमें छपरेके केलु केलु प्रति सिरबन्धी शस्त्रधारी देखी ॥ सो देखीके अत्यंत विस्मय भयो ओर केहेवे लग्यो जो इहां तो शिरबन्धी बहोत हे ॥ ओर ए टेकरीवारे देव सचचे हे ॥ फेरि डेरारपे गयो ॥ सो कल्लु सुझे नही आंधरो सो होय गयो ॥ फेरि इहांसो महाप्रसाद पधारे ॥ सो तब मुखियाजीसों वानें कहि, जो हमकुं तो सुझे नहि हे सो काहेतें ॥ तब कहीके मोकों एसो दिसेहे जो ए देव द्रव्य लायो हों तासों होयगो ॥ तब मुखियाजीनें कहिके एसे तो सहि ॥ तब वा द्रव्यके मेवाडके सरदारन उपर आघेके रक्का करि दिये ॥ ओर आघे रुपैयानको अपने नामके कर-जाउ खत लिखि दियो ॥ सो मुखियाजी लेके श्रीकाकाजी महाराजके पास आये ॥ सो आपने देखे तो मेवाडके सरदारनके खत देखिके कह्यो जो हमतो विनके पास लेवे मांगे कोइ नही ओर इन दुष्टनकुं पीछे दे तो वाकुं दुख देवे सोवे सब रक्का तलावमें डारि दिये ओर सबनकुं लुडाये ॥ एसे आप दयालु हते ॥ ओर इनके नामको खत सो आजहुं भंडारमें पड्यो हे ॥ सो कोउ लेवे गयो नहि ॥ ओर इननें पठायेहुं नही ॥ एसे करि करायकें डेरा उठे ॥ अब श्रीनाथजी तो उदेपुर बिराजे ॥ पीछे घस्याड

पधारे ॥ मंदिर तैयार भयो ॥ इतनें घस्याढ बिसजे ॥ फेरि घस्याढमेंते स्वइच्छा भइ तब सिंहाडके मंदिरमें बिराजे ॥ राणाजी पधरावेकी नांहि करते ॥ सो श्रीकाकाजी महाराजने आपने पधराए सो अद्यापतांइ सिंहाडमें आनंद सों बिराजे हे ॥ सो सिंहाडमें पधरायवेके तांइ अपने घरको द्रव्य एक लक्ष रुपैया खरच भयो ॥ ओर श्रीनाथजी उदेपुर पधारे सो होल्करको तो व्याज नाम मात्र हे परंतु कार्य कारण ओर हतो ॥ जो उदेपुरमें अजब-कुंवरबाइको वचन दियो हतो तासों पधारे ॥ ओर श्री विठ्ठलेशजी उदेपुरसों कोटा पधारे ॥ फेरि सात स्वरूप श्रीदाउजी महाराजने मनोर्थ करिके पधराये ॥ तब पधारे ॥ सो अद्यापतांइ श्रीसिंहाडमें बिराजे हे ॥ अब जो पलना होल्करको दिये सो वृथा पडि रह्यो हतो एसे आज्ञा करि लिखायो ॥ जो वृथा पडि रह्यो हे सो दिये सो वा बिरियां मुखियाजी द्वारकादासनं प्रश्न कयों जे कृपानाथ ! एसो सोनाको पलना वृथा पड्यो हतो ताको कारण कहा सो कृपा करिके कहिये ? तब आपने आज्ञा करी जो जाबिरियां हरि-भक्तिवारी शेठाणीरतनबाइनें पलना भेट कयों ओर, जन्माष्टमी उपर जुले ओर दर्शन करे ॥ फेरि श्रीकाकाजी महाराजके पास आइ तब आपने आज्ञा करी जो पलना तो बोहोत सुंदर हे परंतु सांकल पतली बोहोत हे तासों प्रभुनकुं पधरावते डर लगेहे ॥ तासों सांकलमें ओर सोनों पडेतो ठीकहे ॥ सो तबवानें आपके अगाडि विनती करीके महारी श्रद्धा षटलीज छे, फेरि निचे उतरतें केहेते उतरीके महाराजने पण लोभ छे ॥ सो आपने कर्णमें सुनि लीनी, वाइ बिरियां आज्ञा भइ जो अब ए तेरो पलना प्रभु कबहुं अंगिकार न करेंगे ॥ तासों ऐ वृथा लिखायो ॥ फेरि दुसरे दिन दंडोत करिवेआइ तब विनती करी जो महाराज अपने घरको केटलो खरच हे सो मोको लिखाय दिजोथे ॥ सो प्रति साल पठावती जाउं ॥ सो आप सुनिके मुस्कायके कहि जो तेरी कहा सामर्थ्य हे ॥ ओर मेरीहुं कहा सामर्थ्य हे जो प्रभुनके खर्च चलावेंगे ॥ ए तो पलंगडिवारो



सब चलावेहें ॥ ओर त्वेसों एसो अहंकार आयो जो में श्रीप्रभुनको खरच चलाउं जा हमकों मोढो मति देखावे ॥ एसे आज्ञा करि सो फेरि बडोदा चलिगइ ॥ तासो जीवकुं प्रभुनके आगे विचारके बोलनो ॥ ए बात स्हज नही समजनी ॥ ए अग्नि हे आज्ञा प्रमाणे चलवेकी आज्ञा करनी परंतु आशंका न करनी ॥ एसो आपको अलौकिक चरित्र हे ताको वर्णन कहां तांइ करे ॥ इति श्रीगिरिधरलालजी महाराजके वचनामृत त्रेपनमो संपूर्ण ॥ ५३ ॥

 [वचनामृत ५४ मो.] 

अब चोपनमो वचनामृत आप आज्ञा करे जो एक समय काकाजी श्रीव्रजभूखणजी महाराज धंधुकाके परदेशकुं पधारे ॥ सो उहां विराजे सो तेरे चौदे दिन तांइ विराजे रहे ॥ परंतु सेवा कछु न भइ ॥ सो आप उक्तायके पधारे जो यहां कहां तांइ बैठे रहे ॥ ए बात सब वैष्णव सुनिके आपके मेनाके आगे आय पडे ॥ ओर विनति करी कृपानाथ ! हमतो जीव आपके हे ॥ हमारे दोष अपराध सामेंतो आप देखेंगे नही ॥ ओर दया करिके पधार्यो चाइये ॥ आप एसेइ पाछे पधारेंगे तो हमकुं मोढो दिखायवेकी ठोर न रहेगी आपके कहायके आपसों विमुख रहेंगे तो फेरि हमारो कहां बचावहे ॥ सो कृपा करिके पधारिये ॥ तब आप अपने स्व-किय जानिके आज्ञा करी जो जन्मष्टमी पास आवे हे ॥ तासों हमारे कांकरोली अवश्य जानो हे ओर दिन टुटेतो ठीक नहि ॥ तासों तुम आज सेवा सब निवड लेहु तो ठेरे ॥ तब फेरि वैष्णवने विनति करिके कृपानाथ एसे पधरामणी एक दिनमें केसे निपटे ॥ तब आपनें आज्ञा करि जो तुम सब जगे तैयारी कराओ ॥ हम सब निवड लेइंगे ॥ फेरि आप मेनामें बिराजके छडिस्वारीसों गाममें पधारे सो सेवा सब दोष प्रहरमें लेके सब वैष्णवको मनोर्थ सिद्ध किये ॥ जेसे रासोत्सवमें अनेक व्रजभक्तनकों अनेक रूप करि रात्री बढायके सबनके मनोर्थ सिद्ध किये

तेसें इहां हुं आप करे ॥ फेरि शिग्रहि कुच करिके कांकरोली पधारे ॥ सो जन्माष्टमी तथा अन्नकुट तथा डोल तीन उत्सव तो आप सदाइ घरके करते ॥ ओर इन उत्सवके बिचमें सावकाशमें परदेश होतो ॥ कितनेक ठेकाणे आप दोय स्वरूपसों पधारिके सेवा लेते ॥ जेसी अवकाश प्रमाणे सेवा निबडलेते ॥ जेसे श्रुतदेव तथा जनकविदेहिके घर श्रीप्रभुजी दोय-स्वरूपसों पधारिके दोउ भक्तनको मनोरथ सिद्ध कयों तेसेइ आप प्रताप जतावते ॥ ओर आपकुं अस्पर्शको संदेह लुइ जायवेको बोहोत हतो सो एकसो आठ घडासों स्नान करते ॥ विस विस घडातो काननमें कुडावते ॥ ओर श्रीद्वारकांधीशकों श्रृंगार श्रीहस्तमें रेशमी पंजा पेहेरिके करते ॥ बोहोत सुंदर श्रृंगार ओर वेगी करते ॥ ओर सामग्री हु श्रीप्रभुनकुं बोहोत अरोगावते ॥ एसे तो हमारे बडेनने तथा ओर घरनमें कोइ बालकनने श्रीप्रभुनकुं लाड नहि लडाये होइंगे ॥ महाप्रसाद गोमाता तथा घोडा घोडि विगेरे पशु तलककों मिलतो सो बात तो जगत्प्रसिद्ध हे ॥ उत्सवकी तथा नीत्यकी सेवा विधि, स्तुतिके श्लोक आपनें बोहोत प्रगट किये हे, सो खरडामें लिखे हे ॥ ओर नंदमहोत्सवको सुख अपने भक्तनकों आनंदावेशमें देहानुंसधान तीन दिन तांइ न रहेतो सो तासमें जे भक्त कृपापात्र होइंगे तिनको दर्शन भए होइंगे ॥ ताके भाग्यकी कहांतांइ वर्णन करे ॥ ओर आपको श्रीअंग पेहेले तो गौर हुतो ॥ सो पीछे स्नान बोहोत करवेतें श्यामता दर्शन देते ॥ ओर शास्त्रको अध्ययन हुं आपकुं बोहोत हतो ॥ तथा श्रीसुबोधिनीजीकी कथा नित्य आज्ञा करते ओर वैष्णव दुर्लभदासके उपर अत्यंत कृपानुग्रह करिके कितनीक बात अलौकिक वार्त्ताको दान करते ॥ ओर आपने दोय विवाह किये हते ॥ सो पहेले बहुजीको नाम श्रीचंद्रावलिवहुजी तथा दुसरे श्रीभागीरथीवहुजी ॥ श्रीचंद्रावलिवहुजीके श्रीगिरिधरलालजी तथा श्रीकमलाबेटीजी, श्रीगिरिधरलालजी पधारी गए पीछे आपने बोहोतही विरक्तता करी ॥ श्रीकमला-

बेटीजी के पति बालकृष्णभट्टजी श्रीचंद्रमाजी के घरके दोहिता हते ॥ ओर श्रीबेटोजीके लल्लु दोग, एकतो गोपनाथजी तथा दुसरे मथुरानाथजी हते ॥ तामें बडे लल्लुजी बोहोत भगवदीय श्रीद्वारकाधीश उपर बोहोत अशक्ति हती ॥ जैसे बडेनके दोहिता चैये एसेइ हुते ॥ धर्म उपर निष्ठा बोहोत आछी हुती ॥ ओर कितनिक वार्ता प्राचिन घरकी इनसों हमकुं प्राप्त भइ ॥ आधी रात्री तांइ इनके हमारे होवो करती एसे परम-भगवदीय हते ॥ एसे आप श्रीमुखसों आज्ञा करिके पोढे ॥ इति श्रीगिरिधरलालजी महाराजके वचनामृत चोपनमो संपूर्ण ॥ ५४ ॥

 [वचनामृत ५५ मो.] 



अब पंचावनमो वचनामृत आप आज्ञा करे ॥ जो श्रीविडलेशराय-जोके घरके टिकेत श्री (योगी) गोपेश्वरजी माहाराजके चरित्र आपने आज्ञा किये ॥ जो एक समे नाथुवासमें न्हार आयो ॥ सो श्रीनाथजीकी गाय एक बहार रेहे गइ हुती सो वा गायके उपर वानें चोंट करी ॥ सो आप श्रीगोपेश्वरजी महाराज अपनी बैठकमें बिराजे हुते तहां खबर पडी सो वाको हत हत करी ओर थाप मारीके कह्यो के एरे दुष्ट ! इहां क्यों आयो हे ! एसे कहिके कह्यो जो चल्यो जा ॥ यहां सो ॥ सो वा बिरियां आप कथा केहेत हते ओर अचानक कथाके बिचमें ए प्रकरण भयो सो सबकोउ अत्यंत देखिके आश्चर्यको प्राप्त भए जो ए महाराजने कहा आज्ञा करि जो कलु समज न पडि कितनेक अज्ञानी हुते सो केहेवे लगे जो ए महाराजकी तो एसी प्रकृती हे ॥ सो कभी कभी एसेइ करे हे ॥ फेरि कथाकी समाप्ति भइ ॥ सब अपने अपने घर गए ॥ एक दो अंतरंग कृपापात्र वैष्णव हुते वानें विनती करी जो कृपानाथ ! कथा होत समें आपनें आज्ञा करी जो कलु समज न पडि सो कृपा करिके समजायो चइये ॥ तब आप आज्ञा करे जो नाथुवासमें श्रीनाथजी की गाय बहार रेहे गइ हुती ॥ ताको सिंहने दुःख दियो सो धमकायके काढि दिनो ॥ फेरि सबेरे गोवालने

खिरककेकिवाड खोले ॥ तब गाय बहार ठाडि देखि ॥ न्हारके पंजा लगे
 थके सो गायको ले जायके खिरकमें करी ॥ फेरि गोवालने आयके अधि-
 कारीसों सब समाचार केहे जो ॥ गायकों श्रीनाथजीने बचाइ नहि तो
 व्याघ्र काहेकों छोडतो ॥ ये बात शाकधरमें भइ ॥ तब सब वैष्णवकुं रात्रीकी
 बातपें प्रतित आइ ॥ ओर सबकों आपके स्वरूपकों ज्ञान भयो ॥ जो एसे
 प्रतापी हते ॥ ए बातें भइ ता समय हमारे शास्त्रि बालकृष्णजी उहां
 हाजर हुते ॥ एसे आप महानुभाव हते ॥ एसे आपके अनेक चरित्र हे ॥
 तामें मुख्य हे सोइ लिख्यो हे ॥ ओर जो वैष्णव आवे सो घडि बेठे ॥
 ताको बेठ बेठ पुछे तुं कहां रहे ह ॥ तेरो नाम कहा हे ॥ तेरो जन्मदिन
 कब हे ॥ एसे वारंवार वैष्णवको पुछे ताको अभिप्राय जो जन्मदिन सो
 तो ब्रह्मसंबंध कयों सोइ सत्य जन्म दिन हे ॥ वाको तो ए आशय हे ॥
 ओर तुं कोन हे सो अलौकिकमें कोन हे ॥ ओर कहांकोहे ॥ सो तो कोनमें
 घरको सेवक हे ॥ सो या जीवको उत्तर देवेको ज्ञान कहांसो होय ॥ तासों
 आप वारंवार पुछते जो कछु अलौकिक उत्तर देवे सो ज्ञान तो कहांसों
 होइ इनकोतों केवल लौकिक खबर हे ॥ लौकिक गाम नाम तथा जन्म
 होय सो लौकिक दिन वर्ष बतावे तासों आप बेरबेर पुछे तब मूरख जीव
 जाने जो महाराज भोरेहे ॥ ओर आपनें भाष्यप्रकाशके उपर 'रश्मीजोना-
 मक टीका छत्तीस हजार श्लोककी करी हे सो आपके हस्ताक्षर झीणे बोहोत
 लिखेहे ॥ जब कोइ विनती करतो के कृपानाथ ! बहोत जीणे अक्षर लिखे
 हे आगे बचेंगे नही ॥ तब आपनें आज्ञा करी जो अधिकारी कागद देवे
 नही ॥ अब या समय एसी मुग्ध लीला काकाजो श्रीबजपालजी दिखावेहे
 तासों बडे के वचनहे सो परम अलौकिक हे ॥ महा कारुणीक जाननें या
 वचनामृत विषे जीव चतुराइ करे सो वृथा हे ॥ तासों ए भगवद वाक्य

१ वा अ. योगीणेश्वरजीतुं चित्र तथा रश्मि ग्रन्थना आपना श्रद्धेहस्ताक्षर अष्टाष्ट
 स्वरूप दर्शन पुस्तकमां आपेला छे.

विषे श्रद्धा राखिके अलौकिक भाव विचारनों ॥ ओर निश्चे अलौकिक हे ॥ ओर एक समय श्रीगोपेश्वरजी महाराजको कलियुग नजरे पड्यो ॥ रसो-इके द्वार ठाडो थको, सो आप लकडि लेके वाको सिंधपोरि बहार करि आये ॥ ओर आप सत्यराम बाबा श्रीनाथजीके जलपानकी सेवा वारे हते ॥ तिनसों वात कही जो आज हमने कलियुग यहां ठाडो देख्यो ॥ सो हमतो वाको बाहार काडि आये हे तब सत्यराम बावानें कही जो आप बडेहे चाहेसोइ करो ॥ ओर सत्यराम बाबा हुं बहोत आछे वैष्णव हते ॥ एक बिरियां महाराणाजी जवानसिंहजी दर्शन करिवेकुं आये ॥ सो फोज-फोटाकी भीडके मारे ॥ नाथुवाससों गागर अवारी आइ ॥ तासों सत्यराम बाबाके रिस बहोत लगी ॥ ओर राणाजी दर्शन करिके जापटियाकि कोटडि आगे ठाडे रहे हते ॥ ओर सत्यराम बाबा सों जेश्रीकृष्ण करे तब सत्यराम बाबाबोले जो आपके बडे आवते तब श्रीनाथजी सामग्रि अधिक अरोगते ॥ ओर तुम्हारे आये तें श्रीनाथजी बेठि रहे ॥ सो ठाकुरजीकुं बी आपके राजमें बिराजेको फल होय ॥ सो यह सुनीके महाराणाजी जवानसिंहजी बोले जो बाबा ! माहारा आयासों तो प्रभु प्रसन्न व्हे ॥ जामें मेरो आछो व्हे ॥ ओर गागरि किनने बंध करो सों बात हों डेरे जायके ठिक कहंगो ॥ ओर माहारे उपर बडि कृपा करि जो या बात कही ॥ न केहेते तो हों कंड जाप्तो ॥ एसे कंही डेरापें जाय कामेतोनको बुलाय तजविज करी जो आज श्रीनाथजीकी गागर अवारी पहाँची ताको कंड कारण हे ॥ तब विनने तजविज करिके कहिजो फोजफोटकी भोड सों रस्ता नहि मिल्यो तासों अवारी गागर पहाँचीहे ॥ तब ताकीद करी ॥ कही जो सब कोइ गागरवारेनको देखिनके तुरत सरकिजाइंगे ॥ अब अवारन होइगी ॥ सो श्रीनाथजीके सेवक अगाडिके एसे हते जो श्री-प्रभुजीकी सेवा विषे अत्यंत आतुर जो महाराणाजी पर्यंत कहुंकी परवाह न राखते ॥ एसी श्रीनाथजीकी सेवाकी लगन हती ॥ सो सत्यरामबाबा एसे

भगवदीय टेकधारी हते जाकुं मुखियाजी बलदेवजीहुं कितनीक बात सेवा-
विषे पुछते ॥ इति श्रीगिरिधरलालजी महाराजके वचनामृत पंचावनमा
समाप्त ॥ ५५ ॥

 [वचनामृत ५६ मो.] 



अब छप्पनमो वचनामृतमें आपनें जपके प्रकारकी आज्ञा करी ॥ जो
प्रथमतो अष्टाक्षरकी माला फेरावनि सोइ मुख्य मंत्र हे ॥ तासों पलार्थ
भूले तो आसुरावेश होय जाय ॥ तासों अष्टाक्षरको ध्यान राखनों ॥
ए बात कृष्णदास अधिकारी तथा कृष्णचैतन्य गोडिया संप्रदायवारेके
परस्पर प्रसंग भयो ॥ तामें लिख्यो हे ॥ सो कृष्णचैतन्यनें कृष्णदास अधि-
कारीसों कहि जो हमारे आचार्यननें कहि हे जो एक बिरियां श्रीठाकुर-
जीको नाम लिये सो भगवदावेशहो जावे हे ॥ तब कृष्णदास अधिकारीनें
कहिकें हमारे श्रीमहाप्रभुजीनें आज्ञा करी हे जो प्रभुनको नाम क्षणार्थ न
लेइतो जीवकुं आसुरावेश होय जाय हे ॥ एसे दोउनके परस्पर वार्ता भइ
॥ तासों जीवको प्रभुनको नाम क्षणार्थ न लेइ तो ? आसुरावेश होय
जाय ॥ तासों जीवकुं क्षणार्थ “ श्रीकृष्णः शरणंमम ” बिना न रहेनो ॥
वैष्णवको मुख्य धर्म एइ हे ॥ दुसरो माला गद्यके मंत्रकी ॥ सुमेर हाथमें
लेके पहले गद्यकों पाठ करिके फेरि पंचाक्षर सों माला फिरावनी ॥ समा-
प्तिमें फेरि गद्यको पाठ करना ॥ ए माला महा अस्पर्श मंदिरमें सेवा
योग्य होय ॥ एसी अस्पर्श राखिके जप करना ॥ तिसरी गोपालमंत्रकी
माला ॥ आपनकुं दिक्षा भइ होय तो जप करना ॥ सोइ सांप्रदायक
मंत्र हे ॥ सो कितनेक नही लेवे हे यामें तो यथा श्रद्धा ॥ चतुर्थ श्रीना-
थजीकी ॥ श्रीगोवर्धनोद्धरणधीराय नमः ॥ पांचमी जा घरके सेवक होय
ता मुख्य स्वरूपकी ॥ श्रीनवनीतप्रियाय नमः ॥ श्रीमथुराधीशायनमः ॥
श्रीविठ्ठलाधीशायनमः ॥ श्रीद्वारकाधीशाय नमः ॥ श्रीगोकुलाधीशाय नमः ॥
श्रीगोकुलचंद्रमसेनमः ॥ श्रीबालकृष्णायनमः ॥ श्रीमदनमोहनाय नमः ॥

इतने मुख्य स्वरूपहे तामें जा घरके सेवक होय ता स्वरूपकी माला फेरवनी ॥ छद्दी माला श्रीबलदेवजीकी ॥ श्रीबलदेवाय नमः ॥ सातमी माला श्रीयमुनाजीकी श्रीयमुनायै नमः ॥ आठमी माला श्रीगिरिराजजीकी ॥ श्रीहरिदास वर्यायनमः ॥ नवमी माला श्रीमहाप्रभुनकी ॥ श्रीवल्लभचरण कमल रेणुभ्यो नमः ॥ दशमो श्रीगुसांइजीकी श्रीविठ्ठलचरणकमलरेणुभ्यो नमः ॥ एकादशमी जाके घरके सेवक होय ताके मुख्य बालककी ॥ श्रीगिरिधराय नमः ॥ श्रीगोविंदायनमः ॥ श्रीबालकृष्णाय नमः ॥ श्रीगोकुलनाथायनमः ॥ श्रीरघुनाथायनमः ॥ श्रीयदुनाथायनमः ॥ श्रीघनश्यामायनमः ॥ ए सातमें जाके घरके होय ताकी ॥ अब द्वादशमी श्रीगुरुदेवकी ॥ श्रीगुरुदेवचरणकमलरेणुभ्यो नमः ॥ ओर श्रीगुरुदेवको नाम न लेनो शास्त्रमें लेवेकी आज्ञा नही हे तासों श्रीगुरुदेवही केहेने चलते तांइ समझ्या सों पुछवेवारेको समजावनो ॥ ताको श्लोकः—

आत्मनाम गुरोर्नाम नामातिकृपणास्य च ।

श्रेयस्कामोनगृह्णीयांजिष्ठपुत्रकलत्रयोः ॥

यह श्लोक पतंजली ऋषिने कब्यो हे ॥ सिद्धांतकौमुदीके कदंतमें हे ॥ याको अर्थ ॥ आत्म जो अपनो, तथा गुरुको, तथा अति कृपणको, तथा जेष्ठ बेटाको, तथा छिको, इतने नाम अपने श्रेयकी इच्छावारो पुरुष न ले ॥ एसे उपर लिखे प्रमाण द्वादशमाला वैष्णवकुं अवश्य फेरवनी ॥ तथा बनी आवे तो सर्वोच्चमकी तथा नामरत्नकी माला फेरवनी ॥ ए द्वादशमालाके जपतें पुष्टिमार्गमें मुख्य सार निरोध हे ॥ सो सिद्ध होय हैं ॥ तासों अवश्य जप करनों ॥ इति श्रीगिरिधरलालजी महाराजके वचनामृत छप्पनमो संपूर्ण ॥ ५६ ॥

 [वचनामृत ५७ मो.] 

अब सत्तावनमो वचनामृत आपनें आज्ञा करी ॥ जो जप समय ध्यानको प्रकरण कहे ॥ जो प्रथम १ “श्रीकृष्णः शरणं मम” ए माला

फेरते श्रीस्वामिनीजी सहित श्रीठाकुरजीको ध्यान करना ॥ जो श्रीठाकुरजी द्विभूज, श्यामस्वरूपको ध्यान करना ॥ श्रीस्वामिनीजी पीत स्वरूप, शृंगार वस्त्र सुद्धा एसे युगल स्वरूपको जो मेरे शरण हे ओरको आश्रय नहि हे ॥ एसो चित्तमें धारण करिके ध्यान करना ॥ श्री ॥ जो श्रीस्वामिनीजी तथा कृष्ण जो श्रीप्रभुजी एसे द्विदलात्मक नामसों श्रीकृष्णः शरणं ममः सिद्ध होय ॥ एसो ए ध्यान करिके अष्टाक्षर माला फेरे ॥ अब दुसरी माला गद्यकी ताको ध्यान प्रकार ॥ वा समय श्रीठाकुरजी श्रीठकुरानी घाटपें प्रगट होयके श्रीमहाप्रभुजी सो ब्रह्मसंबंध करायवेकी आज्ञा किये ॥ सो स्वरूपकेसो हे सो कोटि कंदर्प लावण्यमय, श्याम वरण, द्विभूज, शृंगार धोती उपरणा, कुल्हे श्रीमस्तकपें धारण किये हे एसे साक्षात् मन्मथ मन्मथ प्रगट होयके श्रीमहाप्रभुजी सों आज्ञा करे हे ॥ जो आप जा जीवकुं ब्रह्मसंबंध करावेंगे ॥ तिनकुं सर्वथा में कबहुं न छोडुंगो ॥ तासों ब्रह्मसंबंध आप जीवनकुं कराइये ॥ ए आज्ञा भइ एसे स्वरूपनको ध्यान करना ॥ ए मालामें भारि अस्पर्श राखनी ॥ आगे हु लिखिहे ता प्रमाण ॥ अब गोपालमंत्रको जप समें ध्यान करिके या श्लोक केहेनो सो श्लोकः—

फुल्लेन्दीवरकान्तिमिन्दुवदनं बर्हावतं सप्रियं
 श्रीवत्सांक मुदार कौस्तुभधरं पीतांबरं सुन्दरं ॥
 गोपीनां नयनोत्पलार्चिततनुं गोगोपसंघावृतं
 गोविन्दं कलवेणुवादनपरं दिव्यांग भूषणं भजे ॥

याकी अर्थ ॥ फुले कमल सरिखी क्रान्ति, ओर चंद्रमा जेसो श्री-मुख, ओर श्रीमस्तकपें कुल्हे, तापर जोड धरे हे, ओर हृदयमें श्रीवत्सको चिह्न हे, ओर उदार श्रीकौस्तुभ श्रीकंठमें धरे हे ॥ ओर कटि पर पितां-

१ वा श्रीअष्टाक्षरमंत्रकी टीका " श्रीअष्टाक्षरनिरूपण " नामनो ग्रंथ अमारा तरफकी छपायो हे.



वर धरे हे ॥ सो अत्यंत सुंदर गोपीजनके नयन कमलसों अर्चित तनुहे ॥ ओर गो गोप इनके समुहमें आवृत हे एसे गोविंद हे ॥ सो मधुर सुरसों वेणुं बजावत हे ॥ श्रीअंगके विषे हीराके आभ्रण पहरे हे ॥ एसे जो गोपाल, तिनको हम ध्यान करत हे ॥ एसो ध्यान हृदयमें करिके आखे मंत्रसों माला फेरनी ॥ चौथी माला श्रीनाथजीकी ॥ तामें श्रीनाथजीको सर्वांग स्वरूप चिन्ह युक्त, श्रृंगार, वागा, वस्त्र, सहित चोखुंटी पीठक, मुकुटकाछनी श्रृंगार जेसे दर्शन करे होय, एसो ध्यान करिके माला फिरावनी ॥ ओर इहां साक्षात् दर्शन न भए होय तो चित्तमें दर्शन करिके वस्त्र श्रृंगारकी चित्तमें धारण करि राखे ॥ ओर वेसोइ ध्यान करि माला फेरे ॥ अब श्रीनवनीतप्रियजीको ध्यान ॥ जो बाललोलाको स्वरूप, एक श्रीहस्तमें मांखन, दुसरे श्रीहस्तमें लडुवाको दाबे, एक पिछले चरणारविंदसों घुटुरून चले हैं, गौर स्वरूप, ओर श्रीयशोदाजीको आंज्योथको काजर सों अलंकार भूषित हे ॥ एसे स्वरूपनकों ध्यान करनो ॥ ओर श्रीमथुराधीशके स्वरूपको ध्यान ॥ श्यामस्वरूप, ओर गोलपीठक, चारभूजा, तिनचारोंनमें आयुध, कलुक आरक्त झलकत, एसे ॥ श्रृंगार महकाछटिपारेको एसे स्वरूपको ध्यान ॥ ओर श्रीविट्टलेशरायजीके स्वरूपको ध्यान ॥ युगल स्वरूप, कटिपर दोउ श्रीहस्त, तामें एक श्रीहस्तमें शंख, ॥ एक श्रीहस्तमें पद्म, गौर स्वरूप, श्रीस्वामिनीजी श्रीयमुनाजीरूप, जाके दोउ श्रीहस्तमें कमल हे ॥ श्रृंगार श्रीमस्तकपें पाघको, एसे युगल स्वरूप, को ध्यान करनो ॥ अब श्रीद्वारकाधीशके स्वरूपको ध्यान ॥ श्याम स्वरूप, चतुर्भुज स्वरूप, चोखुंटी पीठक, तीन श्रीहस्तमें आयुध, एक श्रीहस्त खाली, आभ्रण, वस्त्र, श्रीमस्तकपें शंहेराको, एसे स्वरूप, जेसे दर्शन करे होय ता प्रमाण हृदयमें धारण करिके ध्यान करनो ॥ साक्षात् दर्शन न भए होय तो चित्रजीके दर्शन करि हृदयमें धारण करि ध्यान धरनो ॥ अब श्रीगोकुलनाथजीके स्वरूपको ध्यान ॥ गौर स्वरूप, चतुर्भुज, दोउ श्री-

हस्तसौ बंसी बजावते ॥ एक श्रीहस्त उंचो, एक श्रीहस्तमें शंख, ओर-
 क्रिट मुकुटको श्रृंगार ॥ दोय श्रीस्वामिनीजी श्रीराधीकाजी श्रीचंद्रावलीजी
 ॥ श्रीराधीकाजीके श्रीहस्तमें चंवर ॥ एक श्रीहस्तमें बीन हे ॥ ओर श्री-
 चंद्रावलीजीके श्रीहस्तमें चंवरहे, दुसरे श्रीहस्तमें छडि हे ॥ एसे दोय
 श्रीस्वामिनीजी ॥ ओर स्वरूप युक्तकी धारणा हृदयमें करिके माला फेरनी
 ॥ अब श्रीगोकुलचंद्रमाजीको ध्यान ॥ श्रीअंग श्याम स्वरूप, धोतीको
 श्रृंगार, बंसी बजावते ॥ ओर नारायणदासकी खोरसौं दात्रे हे सो अद्या-
 पतांइ श्रीहस्तमें लाल छींटा दिखे हैं ॥ एसे स्वरूपको हृदयमें ध्यान करनो
 ॥ अब श्रीबालकृष्णजीके स्वरूपको ध्यान ॥ श्रीद्वारकाधीशकी गोदमें बिरा-
 जमान, गौरस्वरूप, श्रीहस्तमें माखन ओर नीपट बाललीलांको स्वरूप,
 टोपीको श्रृंगार, श्रीमस्तकपें कस्तुरीकी बींटी, एसे स्वरूपको ध्यान करनो
 ॥ अब श्रीमदनमोहनलालको ध्यान ॥ गौर स्वरूप, द्विभूज, बंसी बजावते,
 सुथन पटका फेंटाको श्रृंगार, श्रीस्वामिनीजी दोय ॥ श्रीराधाजी ओर
 श्रीचंद्रावलीजी, दक्षिण भाग श्रीहस्तमें दोउनके कमलकी कली हे ॥ ओर
 गौर स्वरूप हृदयमें धारण करनो ॥ एसे अष्ट स्वरूप हे ॥ ताकी सबनकी
 माला फेरवेकी श्रद्धा न रहे ॥ तासौं जाके घरके होय ताकी माला फेरवते
 ता स्वरूपको ध्यान करिके माला फेरवनी ॥ अब छट्टी माला श्रीदाउजीकी
 ताको ध्यान ॥ श्रीगोकुलसौं तीन कोसपें बिराजे हे ॥ ता स्वरूपको ध्यान
 करनो ॥ श्याम स्वरूप, एक श्रीहस्त उंचो, एक श्रीहस्तमें भांगको प्याला
 हे, द्विभूज हे, पीठकेंमें शेषजीको स्वरूप, जामा मुकुटको श्रृंगार, अलंकार
 घूर्णायमान, श्रीकपोलनपर मरुवट अरगजाको, श्रीस्वामिनीजी श्रीरेवती-
 जीको एक श्रीहस्त उंचो, एक श्रीहस्त नीचो हे ॥ ओर श्याम स्वरूप,
 स्हामें कोणमें बिराजे हे ॥ एसे स्वरूपको ध्यान हृदयमें करिके माला
 फेरनी ॥ अब सातमें श्रीयमुनाजीको ध्यान ॥ रत्न जडित घाटकी सीडी
 हे ॥ तहां श्रीगोवर्धनघर बिराजे हे ॥ ओर आप श्याम स्वरूप हे, ओर

प्रवाह वहे हे, ता मध्य ठाढे हे ॥ ओर द्विभूज हे, सो दोउ श्रीहस्तमें कमल लेके श्रीप्रभुजीकु समर्पत रहे हे ॥ एसी अपनी योग्यता विचारके ध्यान करनो ॥ नहि तो प्रवाहरूपी भावना विचारीके ध्यान करिके माला फेरनी ॥ आठमो श्रीगिरिराजजीको ध्यान ॥ पद्मराग मरकतमणि स्फाटिक एसे हे ॥ ओर अनेक वृक्षदिक करि शोभायमान हे, ओर जाके भीतर अनेक भांतिको लीलाके स्थल हे तथा तीनशीखर हे, ओर श्रीठाकुरजी उपर पधारे तब माखन जेसे कोमल हो जाय हे ॥ ताहिसों चरणारविंदके तथा मुकुटके तथा लकुटके श्रीहस्तके, चिन्ह युक्त हे, सो स्वरूपको ध्यान करिके माला फेरनी ॥ अब नवमो श्रीमदाचार्यजी महाप्रभुजीको ध्यान ॥ स्वेत धोती उपरणा, पद्म जो कमल सरिखे नेत्र हे ॥ स्वानंद तुंदिल जो केवल आनंदमय स्वरूप आपको हे ॥ एसे श्रीसर्वोत्तमजीके प्रथम श्लोकमें निरूपण करे हे जो अप्राकृतनिखिल ओर प्राकृत जो लौकिक धर्म ताकरिके रहित एसे निगम जो वेद ताके प्रतिपादित नाम कहे ॥ आकृति सहित ताको ध्यान करनो ॥ ओर माला फेरनी ॥ ओर श्रीमहालक्ष्मीजी सहित ध्यान करनो ॥ श्रीस्वामिनीजीको नाम श्रीमहालक्ष्मीजी हे ॥ ओर दशमो श्रीगुसांइजीको ध्यान ॥ श्याम स्वरूप, अनेक आभ्रण भूषित, केसरी धोती उपरणा पेहेरेहे ॥ दुंदतांइ शृंगार, दोय श्रीस्वामिनीजी हे ॥ श्रीरुक्मिणीजी तथा श्रीपद्मावतीजी हे ॥ तिलक कस्तुरीको, आनंदरूप सातो पुत्र, ओर पास विराजे थके, एसे स्वरूपको ध्यान करनो ॥ ओर माला फेरनी ॥ अब एकादशमी माला ॥ जा घरके सेवक होय सातमें सों तिनकी ॥ सो सातोनको ध्यान लिखे हे ॥ जो प्रथम तो श्रीगिरिधरजीको ध्यान, गौर स्वरूप, कृश जो बोहोत पतलो श्रीअंग, बोहोत सात्विक, षट्गुणसंपन्न स्वेत धोती उपरणा, शृंगार सुक्ष्म, तीन पुत्रयुक्त, ओर श्रीस्वामिनीजी श्रीभामिनीजी एसे संयुक्त ध्यान करनो ॥ अब दुसरे श्रीगोविंदरायजीको ध्यान ॥ कल्लुक स्थूल श्रीअंग, गौर स्वरूप, पितृभावमें परिपूर्ण ओर

अश्वर्यगुण प्रगट दिखावते, ओर सुक्ष्म श्रृंगार, स्वेत धोती उपरणा, श्रीस्वामि
 नीजी श्रीराणीजी चार पुत्रयुक्त बिराजमान् एसे ध्यान करिके माला फेरनी ॥
 अब श्रीमद्बालकृष्णजी ॥ विर्यगुण प्रगट, ओर गुण गुप्त, श्याम स्वरूप,
 श्री अंग पुष्ट, श्रृंगार दुंदताई भारी, कमलदलनयन, गलगोछा, केसरी
 धोती उपरणा धरे हे ॥ श्रीस्वामिनीजी श्रीकमलावतीजी, पद्मपुत्र संयुक्त,
 कोटिकंदर्प लावण्यमय स्वरूप, अत्यंत शोभायमान, कोटि काम देखिके
 लज्जित हो जाय ॥ तहां वाक्य " छवि को नाहि ए समानरे रसना "
 एसे बडेनके वाक्य हे ॥ प्रभुनके ध्यान हृदयमें करिके माला फेरावनी ॥
 अब श्रीगोकुलनाथजी श्याम स्वरूप ॥ श्रीअंग पतरो, श्रृंगार भारी, धोती
 उपरणा सफेद, तीन पुत्र युक्त श्रीस्वामिनीजी श्रीपार्वतीजी, श्रीकल्याण-
 भट्टजीसों वार्ता करते थेके, यशको स्वरूप, ओर गुण गुप्त ॥ एसे स्वरूपको
 ध्यान ॥ अब श्रीरघुनाथजीको ध्यान ॥ गौर स्वरूप, पुष्ट, घुंघरवारे केश,
 श्रृंगार भारी, केसरी धोती उपरणा, पांच पुत्रयुक्त, श्रीगुण प्रगट, ओर गुण
 गुप्त, श्रीस्वामिनीजी श्रीजानकीजी, असे स्वरूपको ध्यान करना ॥ अब
 श्रीयदुनाथजीको ध्यान ॥ द्यौं (घहुं) रंगे कल्लुक स्वरूप, श्रृंगार हलको, स्वेत
 धोती उपरणा, ज्ञानगुण प्रकट, ओर गुण गुप्त, पांच पुत्र युक्त, श्रीधनः
 श्यामजीको ध्यान ॥ श्याम स्वरूप, श्रीअंग कल्लुक पुष्ट, सफेद धोती उप-
 रणा, हलको श्रृंगार, बैराग्य गुण प्रगट, ओर गुण गुप्त, दोय पुत्रयुक्त,
 श्रीस्वामिनीजी दोय, श्रीकृष्णावतीजी तथा श्रीभागीरथीजी ॥ एसे सात
 बालक उपर लिखे प्रमाण तामें जाके घरके सेवक होय तिनको स्वरूपको
 ध्यान करिके माला फिरावनी ॥ अब श्रीगुरुदेवको जेसो दर्शन कयों होय
 तेसोइ स्वरूप हृदयमें धारण करना ॥ जो एसो वय, एसे श्रृंगार धोती
 उपरणा, ओर दासके उपर एसे कृपा करिके दृष्टि अवलोकन करे हे ॥
 कल्लुक आज्ञा अनुभव भयो होय ॥ ताको स्मृति लायके ध्यान करना ॥
 ओर श्रीस्वामिनीजी सपुत्र युक्त ध्यान करिके माला फेरनी ॥ जपकी माला



तुलसीजीकी राखनी ॥ श्रीतुलसीजीकी माला हे सो निष्कामी भक्तिमें मुख्य हे ॥ दूसरी माला हे सो सकामी भक्ति देवेवारी हे ॥ तासों अपने मारगमें तो निष्कामी भक्ति मुख्य हे ॥ तातें तुलसीजीकी मालाको जप करना ॥ ओर श्रीतुलसीजी हे सो श्रीस्वामिनीजीको स्वरूप हे ॥ इन द्वारा श्रीप्रभुनको समागम होय हे ॥ तासों तुलसीजी मुख्य हैं ॥ ओर मालाको मणकाके बिचमें ब्रह्मगाँठ हे सो ब्रह्मरूप श्री गुरुदेव हे ॥ तासों इनद्वारा श्रीस्वामिनीजी कृपा करे ॥ श्रीस्वामिनीजी द्वारा श्रीठाकुरजी कृपा करे ॥ ओर सुमेरु हे ॥ सो पृथ्वीकी सीमा हे ॥ उहांसो अगाडि जीवकी गम्य नहि हे ॥ तासों सुमेरु उलंघन न करना ॥ उहां सों पाछे फिरनो ॥ ओर उपरकी दो अंगुरियां मालासों लगावनी नही ॥ छेली अंगुलीयांकी साथकी तथा अंगुठासुं लगायक मालाफेरावनी ॥ ओर उघाडी माला न फेरावनी ॥ माला फेरत कोउसुं बोलनो नही, बतरावनो नही, एकाग्रह चित्त सों माला फेरनी ॥ कदाचित बोलवेको जरूर जाय पडे तो माला पुरि करि, सेध्यांनि राखिके, जरूर कार्य होय तितनो बोल चल करिके याकों बिदा करना ॥ के आपनकुं एकांत जानो ॥ फेरि जहांसो प्रसंग राख्यो होय तहां सों चलते होने ॥ ओर प्रसादि पितांबरको टुक तथा राखि प्रसादि मिले तो जपकी मालाको बांधने ॥ गरेमें कंठि पेहेरेहे तिनसुं केऊ जने बांधे हे सो न बांधने ॥ जपकी मालासोइ बांधनो ॥ ओर ब्राह्मण वैष्णवकुं गायत्रीकी माला अवश्य फेरवनी ॥ श्रीगुर्साइजीने गायत्री भाष्य करेहे ॥ तामें गायत्रीको स्वरूप श्रीपुरुषोत्तमके मुख्य श्रीस्वामिनीजी वर्णन करेहे ॥ तासों ब्राह्मण वैष्णवकुं गायत्री जप अधिकतामें जरूर करना ॥ वामें अन्याश्रय नहि हे ॥ ध्या प्रकार सों वैष्णवकुं ध्यान करिके माला फिरावनी ॥ इति श्री गिरिधरलालजी महाराजके वचनामृत सत्तावनमो संपूर्ण ॥ ॥ ५७ ॥

 [वचनामृत ५८ मो.] 

अब अठावनमो वचनामृत आप आज्ञा करे ॥ जो गोपालमंत्र हे

सो सांप्रदायिक मंत्र हे ॥ सो ग्रहणके मध्यकाल समय दान देवेकी रीति हे ॥ ब्रह्मसंबंधकी रीति प्रमाणे पहेले व्रत करे, फेरि ग्रहणके मध्यकाल समय होय तब दान दियो जाय ॥ ओर ए मंत्रको अधिकार चार्यो वर्ण स्त्री आदि जाको मनोर्थ होय सो लेइ ॥ पेहेले ब्राह्मणकेमें कलुक अक्षरको फेर हे ॥ ए मंत्र तथा मठके अवेरवेके तांइ सातमें वर्ष पर्यंत श्रीविष्णुस्वामीके मुख्य शिष्य बिल्वमंगल प्रेत योनीमें रहे ॥ फेरि श्रीमहाप्रभुजीको प्रागत्य भयो तब ए मठ तथा मंत्र श्रीमहाप्रभुजीको भेट करिके प्रेत योनी सां मुक्त होयके भगवद्चरणारविंदमें प्राप्त भये ॥ सो बिल्वमंगल श्रीविष्णुस्वामीके मुख्य शिष्य हतो ॥ ओर श्रीविष्णुस्वामी अपनी किशोर वयमें सेवा करते ॥ सो लीला सामग्रि तो सब सिद्ध करि धरते ॥ ओर सिंघासनपें श्रीप्रभुनको स्वरूप नहि पधरावते ॥ ओर सब सेवा मंगला सां सैन पर्यंत करते ॥ एसे करत करत अंसी (८०) वर्षकी वय भइ ॥ तब एक दिन राज भोग धरिके विनती करी जो कृपानाथ मोको सेवा करत असी वर्ष भए, दर्शन न भए, अबतो मोसों कलु बनी सके नहि, ओर अबतो कृपा करिके दर्शन दिजीये ॥ फेरि राजभोग सराय अनोसर करि महाप्रसाद-गायनकुं खवायके अपनी बेटकमें जायके सोय रहे ॥ फेरि समय भये उत्थापन करे सो किंवाड खोलतेइ ॥ श्रीठाकुरजी गादि तकियापें विराजी रहे हे सो दर्शन दिये ॥ फेरि श्रीठाकुरजी बोले जो हम तुम्हारे उपर बोहोत प्रसन्न भये हे ॥ तुमको जो वांछना होय सो मांगो ॥ तब विष्णुस्वामिने विनती करी जो आपने अत्यंत कृपा करिके दर्शन दिये हे ॥ अब मेरे सकल मनोर्थ सिद्ध भये हे ॥ जब मांगनो कहा ॥ फेरि श्रीप्रभुजीने आज्ञा करिके कलु सो मांगो ॥ तब विष्णुस्वामिने माग्यो जो “ आप मेरे इहां एसेइ विराजे रहो ” ॥ तब श्री ठाकुरजीने आज्ञा करी जो कलियुग हे तासों अब शिलावटको बुलाय स्वरूप सिद्ध करवाओ ॥ हमारे दर्शन करि के ॥ सो वा स्वरूप द्वारा तेरो सब मनोर्थ सिद्ध होयगो ॥

तब वाइ बिरियां सिलावट बुलायो सो सिलावट को हुं दर्शन दिये ॥ आपके दर्शन करिके शिलावटने अहोभाग्य मान्यों जो मेरे शिलावटपणेतें मेरो जन्म सुफल भयो ॥ अब शिलावटने आज्ञा प्रमाण, दर्शन भए, तेसोइ स्वरूप सिद्ध कयों ॥ तब विष्णुस्वामीने श्रीठाकुरजीसों बिनती करी ॥ जो कृपानाथ ! स्वरूप सिद्ध हे ॥ तब श्रीठाकुरजीने आज्ञा करी जो इनकु गादीपें पधरायकें सेवा करो ॥ एइ तुहारो सफल मनोर्थ सिद्ध करेगे ॥ एसे आप आज्ञा करि अंतर्धान भए ॥ ए कथा संप्रदायप्रदिप ग्रंथमें हे ॥ फेरि श्री ठाकुरजी तो विल्वमंगलद्वारा श्रीमहाप्रभुजीके पास पधारे ॥ कितनेक दिन अडेलमें बिराजे, फेरि साचोराके पास पधारे ॥ ताके नामकी खबर नहि ॥ ओर केसे लायो ॥ परंतु ए साचोरा मेवाडमें झाडोल गाम हे ॥ तहां लेके आये ॥ फेरि इनके वंशको कोउ उदेपुर आयकें बसे ॥ सो ए श्रीठाकुरजीकी खबर माहाराणाजी स्वरूपसिंहजीकुं भइ ॥ जो एक साचोराके घर श्री महाप्रभुजीके सेव्य श्रीठाकुरजी 'श्रीश्यामसुंदर बिराजते हे ॥ विष्णुस्वामी के ॥ ए बात सुनिके राणाजी स्वरूप सिंहजीकुं बडी उत्कंठा भइ ॥ ओर विचार्यो ए स्वरूप ए निधि अपने इहां बिराजे तो आछो ॥ फेरि या बातको आग्रह करि वा साचोराकुं बुलाय द्रव्यको लोभ दिखायके श्रीठाकुरजी पधराय लिये ॥ वाको द्रव्य देके राजी कयों सो श्रीठाकुरजी राजके मंदिरमें बिराजे हे ॥ ओर भोग रागके लिये गाम काठे हे ॥ सो पक्को बंदोबस्त करि दियो हे जो कोइ दिन कसर पडे नहि ॥ एमें प्रसन्नतासों बिराजे हे ॥ ओर गोपालमंत्रकी दीक्षा हमने गोस्वामी श्रीजीवणलालजी मुंबइवारेके पास लिये हे ॥ इति श्रीगिरिधरलालजी महाराजके वचनमृत अद्वावनमो संपूर्ण ॥ ५८ ॥

 [वचनमृत ५९ मो] 

अब ओगणसाठमो वचनमृत ॥ दासने बिनती करी ॥ जो श्रीबालकृष्णलालजी श्रीद्वारकाधीशकी गोदमें कवतें बिराजे ॥ ओर कहांतै



प्रगट भये ॥ सो सब प्रकार विस्तार पूर्वक कृपा करिके कहिये तब आपने आज्ञा किये ॥ जो ए स्वल्प श्रीमहाप्रभुजीकुं प्राप्त भये हे ॥ सो श्रीमहा-
प्रभुजोने लेके श्रीगुसांइजीकुं खेलवेकुं दिऐ ॥ जो एक दिवसकी बात हे ॥
जो गंगलभोगके लिये एक ठोर मिलतो सो एक दिन श्रीबालकृष्णजी
व ठोरकुं आरोगते हते ॥ ओर श्रीगुसांइजी आपहुं एक आडिसुं आरोगवे
लगे ॥ तब श्रीबालकृष्णलाल बोले जो एतो मेरो हे ॥ तब श्रीगुसांइजी
कहे जो ए मेरो हे एसे बालकेल करत परस्पर ऐंचातानीं करते ॥ सो
इतनेमें श्रीमहाप्रभुजी पधारे ॥ सो दोउकी बाललीला देखिके अत्यंत
प्रसन्न भये ॥ ओर कहेजो ए श्रीठाकुरजी लडायक हे ॥ सो ए जीतेगे
ओर तुम हारोगे ॥ सो ता. दिनसों दोय ठोरको बंधन करि दियो ॥ एक
इनको ओर एक इनको ॥ सो ए श्रीठाकुरजी तथा श्रीगोकुलनाथजीके
इहां बिराजे हे सो संपुटजी, श्रीगुसांइजीके पास परदेशमें विाजे ओर
परदेशमें संग रहते ॥

तब श्रीयदुनाथजीकुं आज्ञा करि ॥ जो ए श्रीठाकुरजी तुझारे
हे ॥ तब श्रीयदुनाथजीने विनती करी जो काकाजी ए श्रीठाकुरजी तो
निपट छोटे हे ॥ सो इनकी सेवा तो मोसों नही वने ॥ तब श्रीगुसांइजी
आप हसिके आज्ञा करे जो तुम तो बडे महाराजजी हो ॥ श्रीठाकुरजीमें
छोटो बडो कहा ! इतनेमें श्रीबालकृष्णजीने विनती करी जो काकाजी !
ए हमारे श्रीठाकुरजीकी गोदमे बिराजे तो बोहोत आछो ॥ तब श्रीगुसां-
इजी आप आज्ञा किये जो भले तुझारेइ नामराशी श्रीठाकुरजी हे ॥ तासों
तुझारेइ इहां बिराजेगे ॥ परंतु श्रीठाकुरजी इनकी पांतीके हे सो मागे
तय देओगे ॥ तब श्रीबालकृष्णजीने विनती करी जो आज्ञा ॥ ओर भाइ
हुं मेरे भेले रहेंगे ओर हमारे वंशके तथा इनके दंशवारिकुं नहि वनेंगो

१ भा श्रीठाकुरजी श्रीश्यामसुंदरजी केसी पीते उदपुरमां पधार्या तेनी प्राचीन घातां
" तीर्थयात्रानो हेवाल " ए पुस्तकमां मापी छे त्यां जोधुं.

तब न्यारे रेहेंगे ॥ तब श्रीठाकुरजी इनके दे देइंगे ॥ सो ए वात श्रीयदुनाथजीनें हुं कबुल करी जो दादाने कहि सो ठिक हे ॥ ओर में तो दादाके भेलोइ रहेंगे ॥ ओर दादाकी आज्ञापेइ रहेंगे ॥ फेरि दोउ भाइ बिराजे ॥ तांह तांइ तो एसेइ नीभी ॥ फेरि श्रीद्वारकेश्वरजी तथा श्रीमधुसुदनजीको झगडो भयो ॥ न्यारे भये, तब कहे जो हमारे श्रीठाकुरजी पधराय देउ ॥ हम न्यारे रहेंगे ॥ फेरि श्रीद्वारकेश्वरजीने कही जो हमारे दादाजीकी आज्ञा हमकुं पधराय देवेकी नहि हे ॥ ओर केइ दिनसो हमारे श्रीद्वारकाधीशकी गोदमें बिराजे हे सो न देइंगे ॥ सो श्रीमधुसूदनजीने श्रीगोकुलनाथजीसों जायके पुकार करि ॥ जो काकाजी ! दादा भाइ हमारे श्रीठाकुरजी नहि पधराय देवेहें ॥ श्रीतातजीने आज्ञा करिके पधराये हे ॥ सों तो आप हु जानो हे ॥ तब श्रीगोकुलनाथजी कहे जो में समजाय देउंगो ॥ फेरि श्रीगोकुलनाथजी सेवासों पहांचीके श्रीद्वारकेश्वरजीके पास पधारे ओर सब वार्ता कही ॥ आगे श्रीठाकुरजीके बट करे ता बिरियां हमहुं पास ठाडे हते सो आज्ञा करी हे ॥ जो इनके वंशके न्यारे होय तब श्रीठाकुरजी इनकु पधराय दिजो ॥ एसी आज्ञा भइहे तासों तुम हठ मति करो ॥ ओर देशाधिपतिपें जाय पुकारे तो आछो न दिखे ॥ सो श्रीठाकुर इनकु पधराय देने उचित हे ॥ तब श्रीद्वारकेश्वरजीने कही जो श्रीतातजीकी तो एसी आज्ञा ओर आप हुं काकाजी सो आपकी आज्ञा, तासोंमें पधराय देउहुं ॥ फेरि श्रीमधुसुदनजी श्रीठाकुरजीको संपुटजीमें पधरायके अपने घर ले गये ॥ सो वर्ष एकके आशारे सेवा करी ॥ फेरि श्रीबालकृष्णजीनें कछु स्वप्नद्वारा अनुभव दिखाये तो तद्द्वारो मनोर्थ वर्ष दिनतांइ सिद्ध कर्यो ॥ अब मोकों पाछो उहांइ पधरावो ॥ तब राजभोग आरति करीके संपुटजीमें पधराये ॥ ओर श्रीद्वारकेश्वरजीके पास पधरायके ले आये ॥ ता समय श्रीद्वारकाधीशको राजभोग आयवेको समय हतो ॥ सा राजभोग धरि आप बहार पधारे ॥ देखे तो श्री मधुसुदनजी हाथमें

संपुटजी लीये ठांडे हे ॥ तब आज्ञा किये जो भाइ कैसे आये झांपी लेके ? एक तो ले गये दुसरे फेरि कहा व्याज लेवे आये हो ॥ तब श्री मधुसु-
दनजी बोले जो आगे जो मेंने अपराध कर्यो ॥ सो क्षमा करे ॥ ओर इन श्रीठाकुरजीकुं तो आप बिना नहि सुहाये हे ॥ सो पाछें श्रीद्वारकांधीशकी गोदमें पधरायवे आयो हुं सों पधराइए ॥ तब कह्यो जो भाइ ! तुम तो बेरबेर पीछे लेवे आवो सो हमारे न बने ॥ तासों तुमही सेवा करो ॥ तब फेरि विनति करि ॥ जो श्री ठाकुरजीकी इच्छा यांही विराजवेकी हे ॥ तब आप श्रीद्वारकेश्वरजीने कहीके काकाजीको लावो ॥ काकाजी पधरवाय गये हे ॥ काकाजीके कहेसों हमने तुमकुं पधराय दिये हते ॥ फेरि काकाजी कहे एत्ते करे ॥ पाछें श्रीबालकृष्णलालको संपुट चोकी उपर पधरायके श्रीगो-
लनाथजीकुं पधरायवे गये ॥ सो जायके सब बात कही जो आपके चले बिना कलु कार्य होनो नहि दीसे हे ॥ तब श्री गोकुलनाथजी संग पधारे फेरि कहि जो ए पधरायवे आये हे ॥ सो पधरायलेउ तब श्रीद्वारकेश्वरजी कहे जो बेरबेर पधरायवे, बेरबेर लेवे आवेसो तो मेरे ठीक नहि पडे ॥ तब श्री गोकुलनाथजीने श्रीमधुसुदनजीसुं कही जो अबके पधराये तुमको पाछें न मिलेग ॥ ताकों बंदोबस्त करिके अक्षर करिके पधरावो ॥ तब वा बिरियां अक्षर भए ॥ ओर श्रीगोकुलनाथजी विगेरे सब बालकनकी साक्षि करवाइ दीनी ॥ तब श्रीद्वारकांधीश आगे पधराये ॥ ओर में जानतो जो मेरे दादाजी न छोडेंगे ॥ सोइ भइ ओर पाछें पधारे ॥ सो बडो आनंद मान्यो ॥ फेरि श्री मधुसुदनजी श्रीगोकुलनाथजीसों विनती करी जो मेरे बडे स्वरूपको मनोरथ हे ॥ सो श्रीगोकुलनाथजीके पास श्रीमहाप्रभुजीके सेव्य श्रीकल्याणरायजी विराजते ॥ सो स्वरूप श्रीगुसांइजीने श्रीगोकुल-
नाथजीकुं खेलवेकुं दीये हते ॥ सो श्रीठाकुरजीको श्रीमधुसुदनजीको पधराय दीये ॥ इति श्रीगिरिधरलालजी महाराजके वचनामृत ओगणसा-
ठमो समाप्त ॥ ५९ ॥

 [वचनामृत ६० मो.] 

अब साठमो वचनामृत आप आज्ञा करे जो ॥ श्रीबालकृष्णलालकी सेवा श्रीद्वारकेश्वरजी तथा श्रीगिरिधरलालजी महाराजनें आछी रितिसों करी ॥ श्रीगिरिधरलालजी लीलामें पधारे तब श्रीद्वारकेशजीके बहुजी श्रोजानकीबहुजी तथा श्रीगंगाबेटीजीने तीसरे लालजीके वंशमे श्रोवच्छभ-जीके लालजी श्रीव्रजभूषणजी महाराजकों गोद लिये ॥ सो बात चोथे लालजीके वंशमें श्रीश्यामलजीके लालजी श्रीव्रजराजजीकुं आछी न लंगी ॥ सो काशीसों तुरत पधरिके झगडा छेब्यो ॥ ओर श्रीगंगाबेटीजोसो केहेवाइ के श्रीगिरिधरलालजी तो हमकुं दे गये हे ॥ ओर तुम इनकुं क्यों दियो ॥ तब श्रीबेटीजीने केहेवाइ जो अवसान समय तो तुम हते नही ॥ ओर हमकुं आज्ञा करे हे जो तीसरे के वंशवारेनकों पोंचे सो बिनकुं गोद लीजो ॥ सो आज्ञा प्रमाण हमनें क्यों हे ॥ ता उपरांत तुमारे झगडनो होय तो भलेइ तीसरे के पीछे चोथेको दावा चलेगो ॥ परंतु बहु बेटीनसुं झगडनो आछो नही देखोगे ॥ ओर लालजी बडे होते तांइ तुमहुं रहो ॥ सेवा करो ॥ सो न मानी ॥ ओर हुं घरके बालकनसो न्याय करावो ॥ ओर ज्ञातके कहे सो दोउजने अक्षर करि देउ ॥ ओर न्याय करावो परंतु आपतो लडाकपके हुते ॥ सो काहुको न मानी ॥ ओर अढार कोसपें जायके अरजी दीनी ॥ सो श्रीगंगाबेटीजी तथा श्रीजानकीबहुजी अढारे कोस पधारे ॥ सो पृथ्विपतिने बात पुछवाइ ताको प्रतिउत्तर आपनें रीति प्रमाणे दियो जो घरतो हमारो हे ओर हमनें पोंचेंही ताकों दियो हे ओर हमारो राजी होय जाकों देहे ॥ तामें उत्तर करवेंबारे कोन हे ? सो श्रीव्रजराजजी हारे ॥ ओर पृथ्विपतिके उहांसो परवानो श्रीव्रज-भूषणजी महाराजके नामको श्रीद्वारकांधीशके टिकेतपनाको भए ॥ या भांति जीतिके श्रीगोकुल पधारे ॥ ओर श्रीव्रजराजजी उहांइ रहे ॥ फेरि उहां एक मुसलमानकुं मिलायो ॥ ओर धाडा डारवेको उपाय क्यों ॥

सो आधी रातकुं धाडा डारिके श्रीठाकुरजी वख्र भाव बोहोत ले गये ॥ श्रीठाकुरजी श्रीपाहुकाजी समेत ले गये ॥ तब धाडावारे गये पीछे मुखियाजीने संभाल्या ॥ तब श्रीप्रभुजी नहि पाये ॥ ओर सर्वस्व ले गये ॥ सो फेरि मालम पडी जो ए श्रीब्रजराजजीको काम दीसे हे ॥ ओर धाडेतीको काम नही लगे हे ॥ जो धाडेती होते तो श्रीठाकुरजी काहेको ले जाते ॥ फेरि श्रीगंगाबेटोजीने मुखियाजीसुं केहेवाइ जो श्रीठाकुरजी पीछे पधारेंगे ॥ या वातकी तो तुम चिन्ता मति करो ॥ श्रीप्रभुजी आपनकुं कबहुं न छोडेंगे ॥ मणि अपने इहां बिराजे हे ॥ श्रीमहाप्रभुजीने संवरायो थको ॥ सो मंगलभोग तें लगाय सैनपर्यंत श्रीठाकुरजी न पधारे ॥ तहां तांइ इनकी सेवा करनी ॥ ओर दर्शन काहुको न करावनो ॥ पेहेरा चोकीको पक्को बंदोबस्त राखनो ॥ ओर बालक सब तुह्वारे भरोंसे हे ॥ में आगरे जाय बंदोबस्त करोंगे ॥ इतनें तुम सब घरको बंदोबस्त राखोगे ॥ ओर श्रीब्रजराजजी तो हमारो श्रीगोकुलवास छोडावनो दीसे हैं तो भलेइ ए जस ए लेउ एसे आज्ञा करिके रथ, सवारी सब मगाइ, ओर आगरे पधारे ॥ सो सुघेइ पृथ्विपतिके जनानखानेमें पधारे ॥ सो वे बेगम बोहोत आदर करिके पधाराय ले गये ॥ ओर पुछी जो रात्रिकी बिरियां आपको पधारनो कैसे भयो ॥ तब आपने सब वृतांत भयो हुतो सो सब कह्यो ॥ जो जब हमारे श्रीठाकुरजी आवेंगे तब हम भोजन करेंगे ॥ बेगम वाही समय पृथ्विपतिके पास गइ ओर श्रीबेटिजीके पधारेको कारण सब कह्यो सो सुनि ॥ पाछें पृथ्विपति बोहोत रीस भयो ॥ ओर कहिके मेरे राजमें श्रीब्रजराजजी ऐसो जुलम करे हे ओरतकी जातकुं एतो दुःख देवे हैं ॥ यों केहेके जनानेमें आयो ओर बेगमके हाथ केहेवाइ के बेटीजी सो कहो के आप उतारेपें जाओ ॥ ओर सवेरे अपने देव देवायकेमें दांतन करंगो ॥ आप चिन्ता फिर कलु मति करो ॥ फेरि श्रीबेटीजी उतारेकी हवेलीमें पधारे ॥ ओर पादशाह अपने मेहेलमें आयके वजीरकुं बुलायो ओर वजीरसों कह्यो जो

ए देव बेटीजीको सबेरे मिलेंगे तब में दातन करुंगो ॥ यौ कहे के पृथ्वि-पति सोयो, सो वजीरने असवार पांचसो दोडाये ओर हुकम कियो जो श्री ब्रजराजजी जहां होय तहांसों लाउ ॥ सो आगरे सो तीन कोसपें गोघाट हे उहां मिले सो असवारनने कागद दियो ओर कहिजो पृथ्विपतिने सुधि करि हे सो बेगि चलो ॥ तब श्रीब्रजराजजीने कह्यो जो गंगा पुकरावे आइं होयगी ॥ तब स्वारनने कह्यो जो वे बातको तो हमकु खबर नही हे परंतु तुमकुं तुम्हारी चीज वस्त्र लेके बुलाये हे ॥ तब श्रीब्रजराजजीने विचारी जो अब न जायंगे तो जोरावरी ले जाइंगे तामें अपनी इजत बिगडेगी ॥ तासों सब वस्तु भाव सहित लेके आये फेरि असवारनने खबर करी जो श्रीब्रजराजजी आये हे उतारेकी हवेलीमें मुकाम कर्यो हे ॥ तब बिरबलने अपनी चोबदार पधरायवेकुं पठायो ॥ ओर दौय भले मनुष्य तथा पांचसे प्यादा श्रीगंगाबेटीजीके पास पठाये ॥ ओर कहेवाइके बेटीजीको रथमें पधरायके श्रीब्रजराजजीके मुकामपें जाउ ओर बेटीजीकुं इनके देव विगेरे जो इनकी चिज वस्तु होय सो सब तुमारी सामेलतासों दिवावो ॥ ओर श्रीब्रजराजजीकी होय सो उहांइ रेहेवे देउ ॥ ओर बेटीजीके पासतें एक रुक्म लिखायके पृथ्विपतिके पास पठाउ ॥ जो हमारे देव विगेरे सब चिज वस्तु हमकोपहोंची हे ॥ ओर जायके बाइके पास विनती करवाइ सो बेटीजी सुनतही बडे आनंदकुं प्राप्त भए ओर वाइ समय एक पत्र लिखीके बधैया श्रीगोकुल श्रीजानकीवहुजी पास पठाये जो श्रीप्रभुजी आपने पास कृपा करीके पधारेहे सो तुम तथा श्रीब्रजभूषणजी अपनी चीज वस्तु लेके बेगे पधारोगे ॥ ओर उहां एक दो आसामी तथा मंदिरमें चित्र सेवा पधराय आवोगे ॥ ए पत्र आगरेसों असवारनके संग पठायो अवादेसों ॥ ओर श्रीगंगाबेटीजी अस्पर्शमें न्हायके डोलीमें बिराजके अस्पर्शमें पृथ्विपतिके कामदार भले मनुष्य तथा प्यादे सब संग लेके श्रीब्रजराजजीके मुकाममें पधारे ॥ सो श्रीब्रजराजजी वजीरके इहां गये ॥ सो वजीरने खुरसी बिछा-

यदीनी सो लिखिया पास बेठायके जाद (यादी) उतरायवे लगे ॥ ओर श्रीगंगाबेटीजोनें श्रीठाकोरजीकुं जगाय ॥ ओर श्रीवजराजजीके भितर जो आदमी हते तिनकुं पांचसो आदमीकी गिरदमें दे दिये ॥ एक आसामी रेहेवे न दियो ॥ ओर श्रीगंगाबेटीजीकी आज्ञा प्रमाण सब वस्तु बे भले मनुष्यने छांटी ॥ ओर श्रीवजराजजीकी हुती सो रेहेवे दीनी ॥ अपनी सब वस्तु भाव तथा श्रीप्रभुजीकुं पधराय अपने मुकाममें पधारे ॥ ओर पृथ्वपतिके उपर रुक्का लिखि दियो जो हमारे श्रीप्रभुजी तथा वस्तु भाव सब आय पोंहोषो हे ॥ सो रुक्का लेके आसामी वजीर के पास आयो ॥ वजीरने रुक्का पृथ्वपतिके पास पठायो ॥ ओर श्रीवजराजजीसुं कहीके हवेलीमें जाउ ओर चार पेहेराको हुकम भयो जो हवेलीके बहार निकसे नही ॥ फेरि दुसरे दिन श्रीजानकी वहुजी तथा श्रीवजभूषणजी सब खटला सहीत पधारे ॥ सो परस्पर अत्यंत आनंद भयो ओर श्रीजानकी-वहुजी कहें जो तुमतो हमारे कुलमें बेटा हो, बेटी नही हो ॥ जो तुमने एसो सामर्थ्य जतायो ॥ तुझारी दीनी थकी हम सेवा करे हैं ॥ फेरि सब खटला राजनगर चलवेको बिचार कर्यो ॥ इहां रेहेगे तो फेरि हुं वे दुःख देइगे ॥ ओर उहां राज दुसरेको हे ॥ तासों उहां रहेनो ठिक पडेगो एसो बिचारीके सनोडीया पदारथजीकों उपरणा उढायो ॥ फेरि श्रीप्रभुनकुं पधराय सह कुटुंब राजनगरके रस्ता चले ॥ ओर श्रीगंगाबेटीजोने पृथ्वपतिसों केहेवइ जो श्रीवजराजजीके इहां पेहेरा बेठे हैं सो उठाये चाइये ॥ ए हमकुं आछो न लगे हे ॥ अंतमें तो ए हुं हमारे भाइ हे ॥ घरके बालक हे, इननें कर्यो ताको फल तो ए पाय चुके ॥ ओर हमारे न्यात जातमें कहे जो इनकुं रुकायके गये ॥ सो ए बात पृथ्वपति सुनिके बहोत प्रसन्न भए ॥ ओर कहे जो बडे सो बडे ॥ एसे केहेके पेहेरा सब उठाय दिये ॥ ओर अक्षर कराय लिये ॥ आज पीछे एसे दगा बखेडा न करे ॥ फेरि श्रीद्वारकाधीशकुं पधरायके राजनगर पधारे सो राजनगरमें गुप्त बिराजे ॥

ओर श्रीवज्रराजजीने फेरि हल्ला उठायो ॥ जो वजीर विगेरे कामदारनसुं
 मिलिके सिटरपिटर लगाइ ॥ ओर पृथ्विपतिको सिकारको वाज लेके संग
 चलते एसे करत करत छ महिना बिते ॥ फेरि पृथ्विपतिने वजीरसां
 पुछी जो ए श्रीवज्रराजजी इतनी हमारी साथे हे सो काहेते ? तब वजी-
 रनें कही जो आप.इनसुं पुछीये ॥ तब पृथ्विपतिने कही जो आप इतनी
 हमारी हाजरी साथे हो तो तुहमारी कहा इच्छा हे ॥ तब इन श्रीवज्रराज-
 जीनें कह्यो जो आपने मोकूं कलु न दिवायो ॥ सब श्रीगंगाबेटीजीकुं
 दिवाय दियो जो मेंने हुं याही वंशमें जन्म लियो हे सो कलुक तो मोको
 हुं मिल्यो चइये ॥ तब पृथ्विपतिने कही जो देव तो उनहीको पंचे हे ॥
 ओर तुमकुं कहा दिवाये ॥ अन्याय तो हम करे नहि ॥ तब फेरि श्रीव-
 ज्रराजजीनें कही जो बडे देव तो इचकुं दिवाये तो भले परंतु छोटे देव
 वडेनकी गोदके श्रीबालकृष्णजी हे सो तो दिवाये चैये ॥ तब पृथ्विपतिनें
 कहि जो ए बात तो ठीक हे ॥ फेरि राजनगरके सुबा उपर परवानों करि
 दियो जो तुहमारे गाममें श्रीगोकुलवारे श्रीगुसांइजी पधारे हे तिनके पास
 छोटे श्रीठाकुरजी श्रीबालकृष्णजी हे गोदके सो इन श्रीवज्रराजजीकुं
 दिवाय देउंगे ॥ तब वे परवानो लेके राजनगर आये ओर सुबाको दियो
 ॥ सुवाने परवानो बांचीके कही जो जहाँ ए विराजते होय तहाँ खबर
 कहाडो ॥ फेरि तुहमारे संग आदमी करी देउंगो ॥ सो भलेइ ले आइयो
 ॥ सो आखे शेहेरमें तो कहुं पतो नहि लग्यो ॥ सो तलास करत करत
 चार महिनाके आशरे भए ॥ सो एक दिना तंबोलीके इहांसुं पत्ता लग्यो
 ॥ जो उहांसों पान जाय हे ॥ वाके इहां पुलपछार करेतें खबर पडी जो
 इहां श्रीगोकुलसों श्रीगुसांइजी पधारे हे ॥ सो गुत रहेत हे भोंयरामें ॥
 पीछे वा रस्ताको ठीक करत पत्तो लग्यो ॥ सो जायके सुबासों कही जो
 अब परवस्ति करे हमने हुंडी काढे हे ॥ तब पांचसो सिपाइ संग करि
 दिये ॥ सो पांचसो सिपाइ लेके घर गए ॥ रात्री सबनकुं राखे सवेरे

अस्पर्श होय सब सिपाइनकुं संग लेके भोंयरके रस्ता अकेले आय गये ॥ सो ग्वालको समय हुतो श्रीगंगाबेटीजी, श्रीजानकीवहुजी, श्रीब्रह्मभूषणजी आदि बहु बेटी श्रीबालकृष्णजीको पलना झुलावत हते सो वा बिरियां श्रीब्रजराजजी उहां गये सो मुख्याजीने देखे सो देखतेही हछा भयो ॥ जो श्रीब्रजराजजी आये कहांसों, सो जातेइ श्रीबालकृष्णजीकुं पलनामें ते उठाय लिये ॥ सो श्रीगंगाबेटीजीने देखे, देखतेही श्राप दियो ॥ “ जो तु हमारे घरते पलना उठावे हे सो तेरे घर हुं पलना न बंधेगो ” ॥ सो तो सुनी अन सुनि करिके श्रीठाकुरजीको लेके सिपाइनके जुंडमें जाय पहोंचे ॥ फेरि उतारे जाय शीघ्रही तैयारी करी सुरत पधारे ॥ क्योंकि फेरि कलु अफंड उठे ॥ ओर श्रीठाकुरजी पीछे ले ले ताके डरसों जरु झट पधारे श्रीगंगाबेटीजीके डरसों ॥ सो फेरि श्रीगंगाबेटीजीने विचार्यो जो अब इहां हूं रहेनो नही ॥ जहां पादशाहको हुकम न होय उहां रहेनो ॥ तब पदारथजीने विनती करवाइ ॥ जो पादशाहको हुकम मेवाडमें नहिहे ॥ ओर एक गाम हुं राणीजीको अपने यहां भेट हे ताको नाम आसोटिया हे तहां आज्ञा होय तों चले ॥ उहां सब-वातको सुख पावेंगे ॥ ए बात सुनिके श्रीगंगाबेटीजी बोहोत प्रसन्न भए ॥ जो तुमने आछी बिचारी ॥ तैयारी करो ॥ ओर एक पत्र महाराणा राज-सिंहजीको लिख्यो ॥ तामें यह समाचार लिखे जो तुह्वारे पास मुखिया पदारथजीको पठाये हे ॥ सो मुख जुबानी समाचार कहे सो जानोगे ॥ एसो पत्र तथा महाप्रसादको कंडिया तथा उपरणा विगेरे समाधान लेके पठाये ॥ सो पदारथजी उदेपुर आये ॥ ओर पत्र दरबारकुं दियो ॥ सो पत्र तथा महाप्रसाद माथे चढाय दंडवत् करि सत्कार पूर्वक लिये ॥ ओर पुछीके आप कहां बिराजे हे ॥ तब पदारथजी कहे जो राजनगरसों कुच भयो हे ॥ ओर हुं सब समाचार यथा योग्य कहे ॥ सो सुनिके राणाजीने कहीके सांजकु बिचारिकें जुवाब देइंगे ॥ सो पत्र लेके राणाजी माके पास गये ॥

सो मा सों सब समाचार कहे ॥ तब मानें कहि जो ए तो तुम्हारे गुरुदेवहे ॥ तासों इनके बिराजे सों तुम्हारो तथा तुम्हारे देश मेवाडको कल्लु आँछोइ होनो दिसेहें ॥ तासों ए कार्य तो जरूर करनो ॥ जो घर बेठे गंगा कहांसों मिलेगी ॥ तासों श्रीगंगाबेटीजी साक्षात् श्रीगंगाजीको स्वरूप हे ॥ सो ए बात तो तुम चुकोगे नही ॥ तब राणाजीने कही जो मेरेहु मनमें ए बात हती ॥ परंतु बडेनकी सलाह लेके बात करनी ॥ तथा पांच सरदारनकीहु सलाह लेनी ॥ तब सबननें कहीजा ए बात सर्वथा जरूर करनी चईये ॥ तब पदारथजीकुं बुलवाये ओर कहीजो तुम जरूर पधराय लावो ॥ सो पत्र लिखि दियो जो आप जरूर पधारें ॥ ओर आसोटियामें बिराजे ॥ ओर मोसों घनेगी सो में सेवा करंगो ॥ सो ए पत्र लेके पदारथजी सादडि पोहोंचे ॥ सो सादडिमें श्रीद्वारकाधिप बिराजे हते ॥ सो उहां जाय राणाजीको बिनतीपत्र हतो सो श्रीगंगाबेटीजीकुं सोंप्यो ॥ ओर बिनती करी जो आपकों पधरायवेको राणाजीको अत्यंत आग्रह हे जो आप श्रीप्रभुनकुं पधरायके बेग पधारो ॥ तब श्रीगंगाबेटीजीनें कही जो ठीक हे जन्माष्टमीको उत्सव नजीक आयो हे ॥ सो तो इहांइ करेंगे ॥ उत्सव उपरांत पधारेंगे ॥ फेरि जन्माष्टमीको उत्सव उहांइ कर्यो ॥ सो आनंद अत्यंत भयो ॥ सो उहांके राजाराणा झाला हुते ॥ सो बोहोत प्रसन्न भए ॥ सो फेरि बिननें बोहोत बिनति करी जो आप इहां बिराजे तब श्रीगंगाबेटीजी आपने आज्ञा करि केहेवाइ जो उहां हमारो घरको गाम हे ओर राणाजीको आग्रह हु बोहांत हे ॥ तासों अबि तो उहांइ पधारेंगे ॥ फेरि सादडी-वारेराजानें तीन गाम भेट करे ॥ ओर बिनकुं विदा करीके मेवाडमें पधारे ॥ सो राणाजी वीस कोस तांइ साम्हें आये ॥ सो पधरायके आसोटिया पधारे ॥ सो तलाव देखिके प्रसन्न भए ॥ फेरि उहां मंदिर सिद्ध भयो ॥ श्रीठाकुरजी मंदिरमें पधारे ॥ अत्यंत आनंद भयो ॥ अब श्रीवजराजजी श्रीबालकृष्णजीकों पधराय के सुरत गवे ॥ सो सुरतमें मंदिर

सिद्ध करवाइकें उहांइ वास कर्यो ॥ सो फेरि श्रीब्रजराजजीको अवसान समय आयो ॥ सो पधारे नहि तब विनके भतिजा श्रीपुरुषोत्तमजी लेखवारे हुते ॥ विननें विनती करि जो आप कष्ट पावो हो सो कलु आजा करनी होयसो सुखेन करिये ॥ जा प्रमाण हम करेंगे ॥ फेरि बिछोनामें पोढे हते सो उठि बेटे ओर कहि जो श्रीबालकृष्णजीके लिये मेंनें बोहोत श्रम कर्योहि ओर पधराये ॥ परंतु हमारे तो कलु प्रजा हे नही ॥ सो ए श्रीठाकुरजी तथा सब सद्बुद्धि श्रीद्वारकाधीशके पास जायगी ॥ ताको बडो विचार हे ॥ तब श्रीपुरुषोत्तमजीनें विनती करि जो एकवेर तो उनकी वस्तु हे सो उहां जायगी ॥ फेरि कलु युक्ति करिके हम पधराय लावेंगे ॥ सो ए ए बातको हमारो वचन हे ॥ ओर आप सुखेन पधारिये ॥ सो आपतो लीला विस्तारी सो उत्तर क्रिया सब श्रीपुरुषोत्तमजीनें करि ॥ ओर आसोटिया पत्र लिख्यो ॥ इहां यह व्यवथा भइ हे ॥ सो पत्र श्रीब्रजभूषणजी महाराज बांशतेइ तुरत सुरत पधारे ॥ सो सुरत जायके श्रीबालकृष्णजीको तथा सब चिज वस्तको संभालिके आसोटिया पधराय लाये ॥ अति आनंदसों श्रीद्वारकाधीशके पास बिराजे ॥ फेरि लेखवारे श्रीपुरुषोत्तमजी सेवाकुं श्रीजीद्वार पधारे ॥ सो श्रीनाथजीके सेवा श्रृंगार किये ॥ फेरि आसोटिया पधारे श्रीद्वारकाधीशके सेवा श्रृंगार किये ओर ॥ फेरि एक महिना तांइ रहे ॥ स्नेह परस्पर बोहोत रह्यो ॥ ओर आपनें ग्रहणकों निर्णय कर्या हुतो ॥ सो दिखायो ॥ ओर कहिके श्रीठाकुरजीकुं तथा परिश्रम घस्तास्तमें होय हैं ॥ सो शास्त्र रितिसों तो श्रुद्धि हो जाय हे ॥ तासों तथा परिश्रम प्रभूनों देनो तामें अपने हाथ कहा आवे हे ओर कोइ कोइ अन्यमार्गिय विगरे पुछे ताकों तो हम जुवाब देइंगे ॥ ओर सुखेन श्रीठाकुरजीकों सखडि अरोगावो ॥ तब श्रीब्रजभूषणजी महाराजनें आज्ञा करि जो आगली रीति बडेनकी हे ॥ सो कैसें मेटी जाय ॥ ओर आप एसे आज्ञा करोहो तो सायंकाल पीछे कोठी खुलावे हे ॥ सो न खुलावेंगे ॥

ओर चंद्रमा देखतेइ राजभोग सेनभोग भेले सखडि आय जाइंगे ॥ यामें आगली मर्यादहुं रहेगी ॥ और प्रभुनकों परिश्रम हुं न पडेगो ॥ तातें आजसों हमारे घरमें ए रीति होयगी ॥ फेरि ए बात सुनिके श्रीपुरुषोत्तमजी बोहोत प्रसन्न भए ॥ जो आपनैं दोउ बात राखी ॥ फेरि सिंहाड पधारे ॥ उहां हुं ए बात श्रीपुरुषोत्तमजीनैं चलाइ सो उहां तो ए बात कबुल न भइ ॥ जो ठेठकी रीतिहे सोइ होयगी नइ नहि होय सके ॥ एसे श्रीजीद्वारमें तथा आसोटियामें आवते जाते चित्तमें वे बातको कपट हुतो तासों वर्ष १॥ (देढ) पर्यंत रहे ॥ जो काकाजीकों वचन दियो हे जो काहु भांतिसों श्रीबालकृष्णजीकों पधराय लाउंगो ॥ सोइ बातके तांइ श्रीजीद्वार तथा आसोटिया बिच वर्ष दिन तांइ रहे ॥ लाग हुंडते रहे ॥ सो एक बिरियां श्रीजीद्वारसों विदा होयके आसोटियामें विदाके शृंगार करवेकुं आये ॥ ओर घुडवेलकी डाग वंधवाइ ॥ ओर श्रीब्रजभूषणजी महाराजसों कही जो मामीजीको शरीर मांदगी बोहोत हे ॥ सो पत्र आयो हे तासों एकही शृंगार करिके सुरत जानो पडेगो ओर माजीको शरीर आछो भए तें फेरि आउंगो ॥ एसे समजाय ओर सांजको सेन भए पीछे पोढावती बिरियां श्रीबालकृष्णलालकुं चोटिमें पधराय लिये ॥ ओर सज्याकुं खाली उठाय दीनी ॥ ओर मुखियाजोसों माला बीडी प्रसादी वस्त्र लेके श्रीब्रजभूषणजी महाराजकी बैठकमें पधारे ॥ सो बैठकमें सो विदा होय वाइ समय शिघ्रही सुरत घुडवेलमें बैठिके रात्रिकुं पधारे ॥ सो रात्रीमें घुडवेलके डाग सो मेवाड बाहार निकसि गये ॥ फेरि प्रातःकाल इहां जगावती बिरियां सिज्यामें श्रीबालकृष्णजी नहि हे ॥ सो मुखियाजीसुं आज्ञा करि जो श्रीबालकृष्णजी शैयामें नहि हे ॥ सो उंदरा तो न ले गये होयंगे तासों सिज्या मंदिरमें सब जगे हुंडे, बोहोत हुंडे परंतु पाये नही ॥ तब मुखियाजीने विनती करी जो महाराज उंदरा तो न ले गयो हे ॥ परंतु कोइ आपमें सों लेगये दिखे हे ॥ यह घात सुनतेही आपकुं बडोइ क्लेश भयो ॥ ओर आज्ञा करेजो श्रीपुरुषोत्तम-



जिने एसी दगाबाजी करी ॥ हम इनकुं एसे नहि जानते हते फेरि
घरके भले मनुष्य बुलाय विनसूं सब व्यवस्था कही ओर राणाजीकुं पत्र
लीखे ॥ तामें सब समाखार लिखे ॥ सब चाकरननें कही जो एतो मेवाड
बहार निकस गये होंगे ॥ अब तो ओर कछु बंदोबस्त करेंगे तब आप
कहे जो ठीक हे ॥ गड़ वस्तु आवनी बडी कठीन हे ॥ ओर कहा चिंताहे
वे हु हमारे घरके हे अबि श्रीगंगाजी अत्ताजी होते तो खबर पाडते ॥
एसे आज्ञा करी तीन दीन तांइ भोजन न कर्यो ॥ सो ए बात सिंहाडमें
श्रीदाउजी महाराजनें जानी ॥ सो सुनिके श्रीदाउजी महाराज इहां पधारे
॥ फेरि समजायके चोथे दिन भोजन करवायो ॥ पीछे श्रीजी द्वार पधारे
॥ और श्रीपुरुषोत्तमजीनें सुरत पहाँचिके पत्र श्रीव्रजभूषणजीमहाराजको
बोहोत नम्रतापूर्वक लिख्यो ॥ तामें लिख्यो जो मेंने श्रीकाकाजीकुं वचन
दियो हतो तासों इतनी बात मेरे करनी पडी ॥ आप तो हमारे बडे हें
॥ हमतो आपके बेटा बेटा हें ॥ सो अपराध क्षमाइ करेंगे बडे हे सों
बेटा बेटाको अपराध मनमें नहि लावें ॥ ओर में तथा श्रीठाकुरजी आप-
केइ हे ॥ ओर आप आज्ञा करे जैसे करूं ॥ सो पत्र श्रीव्रजभूषणजी
महाराजके पास आयो ॥ सो वांचिके प्रति उत्तर लिखायो जो प्रभुनकुं
इतनो श्रम क्यों पाड्यो ? एसे वचनमें आय गये होते तो हमसों क्यों
न कहीं ॥ हम पधराय देते तामें केसो रस रहेतो ॥ चोरिके ले गये सो
ठिक न करि ॥ ओर श्रीबालकृष्णजी तो हमारे हे सो कबहु तो पधरेंगे
॥ ओर श्रीगंगाजी अत्ताजीको श्राप श्रीव्रजरायजीको हुतो सो तो तुमही
जानो हो ॥ तासों विशेष तुमको कहा लिखे ॥ सो वा दिनतें लौकिक
दृष्टीसों श्रीसुरतमेंइ बिराजे हे ॥ ओर अलौकिकतासों श्रीबालकृष्णजी
श्रीद्वारकाधीशके पास सदाइ बिराजे हे ॥ ताही भावसों छोटी गादीपें
सब समय फुलकी माला पेहेरे हे ॥ ओर ग्वालके समय ग्वाल भोग हु
आवे हे ॥ पलना षक गवे हे ॥ फेरि श्रीपुरुषोत्तमजीकुं तो लालजी भय

सो जाते रहे ॥ चार बहुजी भए परंतु फेरि लालजी न भए ॥ तब श्री-
 पितांबरजीको वंश तो अस्त भयो ॥ तब श्रीवज्रालंकारजीके वंशमें श्रीपुरु-
 षोत्तमजीके लालजी श्रीगोवर्धनेशजीको छोटपणमें लीला प्रवेश भयो ॥
 सो इनके बहुजी श्रीमहाराजः बहुजी हुते सो इननें कितनेक दिन ताँइ
 सेवा करी ॥ फेरि वृद्ध अवस्थामें अपने भाइके दोहिता श्रीगोकुलउत्सवजी
 श्रीविठ्ठलेशरायजीके घरकेनसों देवे लगे ॥ इननें नही तो वोहोत करी
 ॥ के हमारे कांकरोलीवारैनसों तोडे नही बने ॥ पासको रहेवास ठेर्यो ॥
 तासों हम नहि ले ॥ सो एक बिरियां स्नान करावतेइ हाथमें दे दिये ॥
 ओर कयो जो ए श्रीठाकुरजी तुमकों दे चुकें ॥ अब तुम जानो ओर ए
 श्रीठाकुरजी जाने ॥ तब श्रीगोकुलउत्सवजीनें कही अब तो इननें एसो
 आग्रह करिके जोरावरोसो दिये तो अब श्रीठाकुरजी अपने माथे भये तासों
 ए व्यतिक्रम भए के समाचार कांकरोली आये ॥ सो वांचिके हमारे
 तातजी श्रीगोकुलनाथजी महाराज झघडाकुं सुरत पधारे ॥ ओर इहां
 काकाजी श्रीव्रजभूषणजी महाराजनें विचारी जो श्रीविठ्ठलेशरायजीकुं इहां
 झघडाकरिके पधराय लावने ॥ जब अपने श्रीबालकृष्णजी अपने घर पधारे ॥
 तब श्रीविठ्ठलेशरायजी पाछें पधराय देने ॥ एसी सलाह विचारी के दो
 तीन हजार आदमी सिरबंधी लेके श्रीजीद्वार पधारे ॥ सो सुधेइ श्रीविठ्ठ-
 लेशरायजीको मंदिर घेरी लीयो ॥ ओर मोरचा लगाय दिये ॥ तब वीनने
 भीतरसुं दरबजे बंध करि लीये ॥ तब अपने लोक बहारसुं निसरणी
 मांडीके चढवे लगे ॥ सो बात श्रीजोवारे श्रीगिरिधारीजी महाराजकुं
 खबर भइ ॥ सो सुनतही आप उहां पधारे ॥ पधारिके काकाजीकुं समजा
 इके कही के लडाइ होइगी तो दोउ ओरके मनुष्य मरेंगे ॥ तामें आछी
 न दिखेगी तासों इहांके पंचनके पास न्याय करावो ॥ ओर पंच कहे सो
 दोउ जने कबुल राखो ॥ तब काकाजी कहे जो पंच रूपावती करिके कहे
 तो हमारे कबुल नही हे ॥ ओर धर्मकी रितिसुं न्याय करे सो तो हमारे

कबुल हे ॥ तब श्रीगिरिधारीजोमहाराजजी कहे जो रूपापति न करेंगे ॥ यथार्थ ही करेंगे ॥ पंचमें भगवान बिराजे हे ॥ आप श्रीनाथजीके कमल चोकमें षलिये ॥ तब काकाजीने कहे जो श्रीविठ्ठलेश्वरायजी वारेनकुं के चलो ॥ वादी प्रतिवादी विना न्याय कहा करोगे ॥ फेरि श्रीगिरिधारीजा महाराजनें अपनो खवास नीसरणी द्वारा उतारिकें श्रीगोविंदजी सों कहे-वाइके तुम दरवाजो खोलो तो हम आवे ॥ ओर न्याय विषे बात ठेरीहे सो पंच कहेंगे सो तो तुमकुहु कबुल करनी पडेगी नही तो पंच बहार रहेंगे ॥ सो या प्रमाण श्रीगिरिधारीजी महाराजके खवासने कही ॥ ये बात श्रीगोविंदजी महाराजने सुनीके कही जो ॥ दरवाजेके किंवाड डोढे करीके श्रीगिरिधारीजीकुं हमारे पास ले आउ ॥ तब खवास दरवाजे के किंवाड डोढे करिके श्रीगिरिधारीजीकुं श्रीगोविंदजीके पास लायो ॥ फेरि श्रीगोविंदजीने कही जो पंच करेंगे सो हमारे कबुल हे ॥ परंतु या समय मंदिर छोडके हम केसे आवे जाय ॥ हम बहार गये ओर ए. कांकरोली वारे घुसी जायतो केसें करे ॥ तब श्रीगिरिधारीजी कहे जो या बातके जमानगत हमहे ॥ अब ए श्रीठाकुरजी ले जायंगे तों हम पधराय देंगे ॥ एसे पक्की करिके सबनकुं श्रीनाथजीके कमलचोकमें पधराये ॥ फेरि पंचायति भइ ॥ तामें श्रीबालकृष्णजीकी भइ ॥ जो श्रीकांकरोलीवारेनकुं पहोंचे ताकी मेहेजर भइ ॥ जो कांकरोलीवारेनकुं जहां तांइ श्रीबालकृष्णजी न पधराय दे तो श्रीगोकुलउत्सवजी सों अलौकिक व्यवहार न रहेगो ॥ या रीतीसों मेहेजर भइ ॥ तामें सबनके अक्षर भये ॥ ओर श्रीविठ्ठलेश्वराय-जोके घरवारेने अक्षर करे ॥ तथा श्रीगोविंदजीने पत्र १ श्रीगोकुलउत्सवजी उपर लिख्यो जो श्रीबालकृष्णजीमें अपनो हक नही पहोंचे हे ॥ तासों श्रीबालकृष्णजी सब मंदिर सहित इनकुं सोंपी दिजो ॥ जो तुम मेरे विर्यसुं उत्पन्न भए होय तो सब सोंपिके इहां चले आईयो ॥ एतो पत्र श्रीगोविंदजीने लिख्यो ॥ तथा ओर बालकनने हुं मेहेजर विगरे लिख्यो

हे ॥ सो सब अद्याप तांइ अपने घरमें हाजर हे ॥ परंतु विनने कोउकी न मानी ॥ एसे श्रीव्रजभूषण काकाजीने बंदोबस्त इहां करवायो ॥ तब श्रीविठ्ठलनाथजीके मंदिरको घेरा छोडिके कांकरोली पधारे ॥ ओर ए सब पंचायती भइ ॥ ताको मेहेजर तथा पत्र विगेरे सब श्रीगोकुलनाथजीता-तजीके पास सुरत पठाये ॥ ओर राणाजीने हुं बंदोबस्तकरिदिनो ॥ जो जहांतांइ इनकेघरके बालक श्रीबालकृष्णजी न पधरायदे ॥ तहां तांइ मेवाडमें न पधारे ॥ सो फेरि मेवाडमें आयवेको तथा श्रीनाथजीको बंदो-बस्त रह्यो ॥ परंतु श्रीदाउजी महाराजने सात स्वरूपनके मनोर्थमें बुलाये ॥ सो गुप्त रितिसों आये ॥ सो बात श्रीजीद्वारमें प्रगट भइ ॥ जो श्रीव्रज-रत्नजी सुरतवारे आये हे ॥ सो वा विरियां श्रीदाउजी महाराजतो प्रदेशमें बिराजते हुते ॥ ओर इहांसुं उदेपुर राणाजीकूं खबर कराइ जो श्रीदाउजी महाराजने एसे मेंडतोडि ॥ सो ए समाचार राणाजी भीमसिंहजीने सुने तब अपने बडे पासवानमेंसों भले आसामी दोसैं सिपाईनकुं पठाये ॥ सो वे श्रीनाथजीकी उत्थापनकी झारि भरिके आवत्ते देखे ॥ सो परचारगसों कहिके इनकी झारि ले लेउ ॥ नहितो कारण ओर हे जायगो ॥ सो फेरि परचारगने झारि ले लीनी ॥ ओर वाइ साहत चलाय दिये ॥ श्रीनाथजी सों विदाबी होवे न दिये ॥ ओर श्रीविठ्ठलेशरायजीके मंदिरमें हुं न जावे पावे ॥ सुघेइ सरकाये सो सुरत गये ॥ ओर इन श्रीदाउजीने षडेनके अक्षर भये थके मेंडतोडी ॥ तासों अन्नकुटपें श्रीद्वारकाधीशजी श्रीजीद्वार न पधारे ॥ ओर अन्नकुट घर भयो ॥ ताको क्लेश श्रीदाउजी महाराजकु बोहोत भयो ॥ जो मेंने ए कहा कर्यो ॥ फेरि सात स्वरूपमें पधरावेकी खेंचलभइ सो याही वातसुं भइ ॥ तब श्रीदाउजीमहा-राजने फेरि अक्षर कर दिये तब पधारे ॥ फेरि श्रीलक्ष्मीबहुजी तथा श्री-गोविंदजीने हुं अक्षर करि दिने ॥ ओर श्रीगिरिधरलालजीने मेंडतोडी ॥ ताको फल प्रत्यक्ष भयो ॥ सो सब जाने हे ॥ सो श्रीनाथजी लुटे ॥ तासों

बडेनके अक्षरको न मानें ताको ए फल होवेहे ओर ए झघडा अबी ताई चलयो जाय हे ॥ सो श्रीमहाप्रभुजीकी आज्ञा हे जो ए श्रीठाकुरजी लडोकरे हे तासों आपसमें एसे लडालडी चले हे ॥ सो अबि ताई लडाइ करावे हे ॥ इति श्रीगिरिधरलालजी महाराजके वचनामृत साठमो संपूर्ण ॥ ६० ॥



 [वचनामृत ६१ मो.] 

अब एकसठमो वचनामृत आप आज्ञा करे ॥ जो तामें भीतरिया गोपीनाथजीनें प्रश्न कर्यो जो आप तो बडेहें आपकों जातकी कहा अटके ॥ सुरतवारेनकुं जातसुं दूर करे तो हुं श्रीठाकुरजी तो न दिये ॥ तापर आप आज्ञा करे ॥ जो जात बहार होय ताके उपर श्रीप्रभुजी कबहु प्रसन्न नहि होय हे ॥ ताको सेवाको अधिकार नहि हे ताके उपर एक पुरणांचरको इतिहास कह्यो ॥ जो गरुडजी श्रीठाकुरजीके परम प्रीय वाहन हे सो वाको हुं त्याग किये ॥ तब फेरि प्रश्न कर्यो जो गरुडजीकों जात बहार कौनने कहा बातसों करे ॥ तब आप आज्ञा करे ॥ जो एक टिटोडी टिटोडा हुते, सो बिनकुं इंडा धरवेकी बिरियां भइ, तब टिटोडासों कहिके अपनो आश्रम दुसरी ठोर करे तो आछो, इहां तो समुद्र नजीकहे सो इंडानकुं व्हेवाय देगो ॥ फेरि टिटोडा बोल्यो जो समुद्रकी कहा सामर्थ्य हे जो मेरे इंडा व्हेवाय जाय ! तुं सुखेन तीरपे इंडा धरिदे सो वानें इंडा तीरपें धरे, सो समुद्रने टीटोडाके गर्वित वचन सुने हते तासों समुद्रने जरूर करिके इंडा व्हेवाय दिये ॥ सो अपने पास राखे, सो टिटोडी क्लेश करती ओर टिटोडाको कहेवे लगी के तेरे कहे सो मेंने इंडा समुद्रके तीरपें धरे ॥ ओर समुद्र व्हेवाय गयो सो तुं कहेतो के समुद्रकी कहा सामर्थ्य हे जो मेरे इंडा व्हेवायगो सो अब समुद्रने तो इनको सामर्थ्य तोकों बतायो ओर इंडा ले गयो अब तेरो सामर्थ्य होयसो करिके मेरे इंडा लाय दे नही तो तेरे उपर मरुंगी ॥ तब टिटोडाने कहि जो में तेरे इंडा लाय देउंगो, तुं क्लेश मति करे, ओर मरे मति ॥ अब टिटोडा सब पक्षिनके पास जाय पुकार्यो



जो मोक्ष समुद्रनें बोहोत दुःख दियो हे, जो मेरे इंडा वहेवाय गयो सो दुःखको मार्यो तुम सब मिलिके मेरी सहाय करो, नहि तो हम स्त्री पुरुष दोउ जने प्राण त्याग करेंगे ॥ तब सब पक्षिननें विचार क्यो जो आपन सब चोंचमें भरि भरिके पत्थर लायके समुद्रमें डारो जो समुद्र सुकाय डारों जब इंडा दे तब मति डारो ॥ के तो इंडा दे नहि तो सुकाय देइंगे ॥ यों कहीके अपने अपने सामर्थ्य प्रमाण पत्थर लाय लायके समुद्रमें डारिबे लगे ॥ एसे करत आखो दिन व्यतित भयो परंतु समुद्रको तो कछु न बिगड्यो इतनेमें इनके भाग्यसों नारदजी कहुं सो आये ॥ ओर सबनसूं बरजे ॥ ओर सबनसों कह्यो जो ए तुम पशु बुद्धिमें कहा करोहो तुह्यारे पत्थर डारेसो कहा समुद्र सुकेगो ? तासों में तुमकों सलाह बताउं ता प्रमाण चलो तो तुह्यारो कार्य सिद्ध होय ॥ तब सब पक्षि बोले जो आप आज्ञा करे वेसे हम करेंगे ॥ तब नारदजीनें कही जो श्रीठाकुरजीको वाहन गरुडजी हे ॥ सो तुम सब पक्षिनके राजा हे सो वापें जाय पुकार करो तो वे तुह्यारो कार्यसिद्धि करि देइंगे ॥ यों केहेके नारदजी तो श्रीहार्जस गावते बिन वजावते चले गये ॥ ओर पक्षिनमें सो पांच जने मिलिके श्रीगरुडजीके दरबारमें गये ॥ सो गरुडजी सोनाके सिंहासन उपर बेटे हे ॥ पार्षद सेवा करे हे ॥ सो उहां जायके वे पक्षिननें पुकार करे ॥ जो समुद्रनें हमसों या प्रमाण बेर क्यो हे ॥ जो समुद्रनें या टिटोडाके इंडा वहाये हे सो दिवाये चइये ॥ तब श्रीगरुडजी सुनिके हंसे जो एसे छोटे बालकनके लिये में समुद्रसों कहा कहुं तुम जाउ तब वे पक्षि आयके सब जातमें कही जो गरुडजीने तो अपनी पुकार न सुनी ओर काढि दिये ॥ तब सबनकुं रीस आइ सो सबननें मिलिके बिचार्यो ॥ जो गरुडजी अपनी बात सुने नहि तो गरुडजीको जात बहार करो ॥ एसे बिचारिके जात बहार करिके एक पक्षि कहेवेकुं पठायो जो तुम जात बहार हो, एसे वे कहे वे आयो ॥ जो तुह्यारो नोता-नेवता आजसों बंध हे सो गरुडजी सुनिके रीस भये, ओर अपने अनुचर पास काढि दिवायो ॥ फेरि एक

दिन गरुडजी वैकुंठमें श्रीठाकुरजीके पास गये ॥ सो श्रीठाकुरजीने देख-
तेइ आज्ञा करि जो तुम दुर रहो हमारे पास मति आंवो हम तुमसों छुड़
जायंगे तब गरुडजीने हाथ जोडिके प्रार्थना करो जो कृपानाथ मैने कहा
अपराध कर्षो जो आप एमें आज्ञा करोहो ॥ तब श्रीभगवानने आज्ञा करी
जो तुह्यारी जातवारेनने तुमसों जात बाहेर काढे हे तासों तुम हमारे
अंगीकार न आओगे ॥ यह वचन श्रीभगवानके श्रीमुखसों सुनिके श्रीगरु-
डजी समुद्रके पास गये ओर एक पंख समुद्रमें मारी सो समुद्र खरभडवे
लग्यो ॥ ओर ब्राह्मणको स्वरूप धरि गरुड जीके पास जाय ठाडो भयो ॥
ओर बोहोत भांतिसो स्तुति करी ओर बिनती करी जो महाराज आप मेरे
उपर कहा अपराध सों रूसेहो ॥ ओर क्रोध करोहो ॥ सो आज्ञा करिये ॥
तब श्री गरुडजीने आज्ञा करी जो तुं हमारे टिटोडाके इंडा व्हेवाय ले गयो
हे सो दे, नहि तो अब रेती उलटी करी देउंगो ॥ सो वे बात समुद्र
सुनिके तत्कालहो श्री गरुडजीकुं इंडा लाय दिये, ओर गरुडजीको पुजन
कर्षो, ओर अमोल रत्नके हार श्रीगरुडजीकुं पेहेरायके समुद्रजीने दंडवत्
करि, परिक्रमा करिके; ब्रह्मरूप अंतर्ध्यान भए ॥ ओर श्रीगरुडजो इंडा लेके
सब पक्षिनके पास आये, इंडा धरे, ओर सबनकुं साष्टांग दंडवत् करे, परि-
क्रमा देके, हाथ जोडी ठाडे भये ॥ ओर बिनती करी के ओर जो आज्ञा
होय सो में करुं ओर मेरो आगलो अपराध क्षमा करो ॥ तब सब पक्षि-
नने कही जो तुम हमारी जातमें हो ऐसे कहेके इंडा टिटोडाको दिवाये ओर
टिटोडाको जात मात्रसों कही के तुम सब जलकेतिरपें इंडा धरो ॥ जल
बाधा नहि करेगो ॥ सो अद्यापताइ गरुडजीकी आज्ञा जलमात्र माने हैं ॥
सो समुद्रके तीरपेंइ टिटोडी इंडा धरे हे ॥ सो जलके एन तीरपें बराबर
इंडा धरे हे ॥ ओर गरुडजी सब पक्षिनसुं बिनती करी जो ओर कल्लु काम-
काज होय तो मेरे पास केहेवाय देओगे ॥ यों कही आज्ञा मागके श्रीगरु-
डजी वैकुंठमें श्रीभगवानके पास गये ॥ जायके दंडवत् करि बिनती करि ॥

कृपानाथ ! में जातमें होयके आयो हुं तब श्रीप्रभुजीनें आज्ञा करि जो अब तुम हमारे काम आवोगे ॥ यों कहि आज्ञा करिके स्पर्श करे ॥ तब गरुडजीकी सकल व्याधी दूर भइ ॥ ओर श्रीठाकुरजीके दर्शन करि दंडवत् करि स्थान प्रति-जाते भये ॥ तासों जातको भय तो सबनकुं राख्योइ चैये ॥ ओर जीतने सुधर्म चलेहें सो जातके भय तें चलेहे, जो जातको भय न होतो तो कबकें एक मेक हो जाते ॥ तब दासनें प्रश्न कर्यो ॥ जो मरजादी भए पीछे जातको भय नहि हे ॥ क्योंकि इनकुं जातमें जैमवे तो जानो नहि हे ॥ तब इनकों डर काहेको रह्यो ? तब आप हसिके आज्ञा करे ॥ जो मर्जाद लेवे सो धर्म राखवेकुं के धर्म छोडवेकुं ! जो धर्म राखवेकों मर्जाद ले सो तो दोउ ओरको डर राखेगो ॥ सो दोउ ओरको डर राखेगो ॥ सो दोउ ओर कहा ॥ जो एकतो मुख्य गुरु आज्ञा ॥ ओर दुसरो जो जात व्यवहार ॥ ओर धर्म खोयवेकुं मरजाद ले ताकों एक हुं डर नहि हे वे तो निडर होय जाय सो आजकाल तो कितनेक मरजादी एसेइ हे जो जीनकुं न तो गुरुनको डर, न तो जातको डर ॥ प्रत्यक्ष राट्ट राखे हे ओर मनुष्यनकुं उपदेश देवे हे जो श्रीनाथजीके दर्शन न करने ॥ श्रीनाथजी तो अपने घरमेंइ बिराजे हें ॥ एसे अनेक पाखंड करे हे ॥ ओर काठियावाडसों कितनेक वैष्णव आवे हे सो तो रस मंडली करे हे ओर दुसरेनकुं उपदेश करेहे ॥ सो वेसे मरजादी तो गुरु द्रोही तथा मार्ग द्रोही हे ॥ एसेनको संग भूलिके न करनो ॥ एसेनके संगसों आपनकुं छांटा लगि जाय ॥ तासों श्रीहरिरायजी शिक्षापत्रमें लिखेहे ॥ वेसें भगवदीकों सत्संग करनो ॥ वेसे न मिले तो पोथीको सत्संग करनो ॥ आजकाल तो पोथीको सत्संग मुख्य हे ॥ जा सों मारगमें तथा गुरुके शरणारविंदमें रति बढे ॥ एसो निरंतर अपनो स्वधर्म राख्यो चाहे ताको तो या रितिसों वरतनो ओर जातको डर तो जरूर राखनो ॥ इति श्रीगिरिधरलालजी महाराजके वचनानामृत एकसठमो संपूर्ण ॥ ६१ ॥

 [वचनामृत ६२ मो.] 

अब वासठमो वचनामृत आप आज्ञा करे ॥ जो अक्षय वृत्तिया (वैशाख शुक्ल ३,) ओर अक्षय नौमी हे (कार्तिक शुक्ल ९) सो युगादि तीथी हे ॥ तासों यह तीथीको क्षय आवेहूं नही ॥ कदाचित्त क्षय आवे तो वा बरसमें बडो उपद्रव जागे ॥ ओर इहां श्रीप्रभूजीके तो उष्णकालको प्रारंभ लगेहे सो चंदन पहेरे हे ॥ ओर खसखानों, छिरकाव विगेरे सब होय हे ॥ सो श्रीप्रभूजीके आगे हाथ जोडेइ ऋतु हाजर रहेहे ॥ सो ऋतुकों सुख आप देत हे ॥ जो बहार सों गरमीके मारे आवे ओर इहां दर्शन करे सो शीतल होय जाय एसो ऋतुको आदर हित हे ॥ जो हमारे चित्तमें निरंतर मनोर्थ होय हे जो श्रीद्वारकाधीश सदा सर्वदा दर्शन दियो ही करे ॥ क्षणार्थ अंतर न पडे परंतु कहा करे परदेश जनोइ पडे हे ॥ तब मुखियाजी द्वारकादास बोले जो आपके तो परदेशमें जगेजगे मंदिर हे जहां पधारे तहां सेवाको सुख हे ॥ तब आप आज्ञा करे ॥ जो ए घात तो ओर मंदिरनमें कहांसो आवेगी ॥ ए सुख ता इहांइ हे ॥ ओर उहां तो केवल वैष्णवनको दर्शन देवे बिराजे हे ॥ सो दर्शन देइहे ॥ ओर उहांके रेहेवेवारेके मनोर्थ सिद्ध करेहे ॥ मुख्य तो इहांइ बिराजे हे ॥ ओर भक्तनके मनोर्थ सिद्धि करवेकुं अनेक रूपसों परदेशमें बिराजे हे ॥ तासों हमकुं तो सर्वथा इहांइ सुहाय हे ॥ तब मुखियाजीने फेरि कहि जो ॥ उहां इहांको सेवा निमित्त पधारनो होवे हे तासों इहांकी सेवा मुख्यही जानिके उहां पधारनो होय हे सोइ वित्तजा सेवाहे तासों आप तो सेवा-इमें सदासर्वदा हो ॥ इति श्रीगिरिधरलालजी महाराजके तवचनामृत वासठमो संपूर्ण ॥ ६२ ॥

 [वचनामृत ६३ मो.] 

अब त्रैसठमो वचनामृत आप आज्ञा करे ॥ तब दासने प्रश्न कर्यो ॥ जो श्रीनाथजी तथा सात स्वरूप कहां सो पधारे ॥ ओर कौन कौन

वैष्णवके माथे बिराजे ओर श्रीगुसांइजीके घर कोन रितिसों पधारे सो कृपा करिके विस्तार पुर्वक आज्ञा करिये ॥ तब आप आज्ञा करे ॥ जो श्रीनाथजीके प्रागट्यकी वार्ता तो सब षरित्र न्यारोइहे सो सब वांचते देखते मालम पड़ेगो ॥ ओर श्रीनवनितप्रियजी तथा श्रीलाडिलेशजी तथा श्रीगोकुलचंद्रमाजी तथा श्रीललित त्रिभंगीजी ए चार्यों स्वरूप महावनके रस्तामेंसों डोकरी वैष्णव क्षत्राणीकुं पाये हते ॥ सो लायके श्रीमहाप्रभुजीके आगे पधराये ॥ तब श्रीनवनितप्रियजो तो सेव्य करिके गजनधावन क्षत्री वैष्णवके माथे पधराये सो ताकी विशेष वार्ता गजनधावनकी वार्तामें प्रसिद्ध हे ॥ ओर श्रीचंद्रमाजी नारायणदास ब्रह्मचारिके माथे पधराये ॥ ओर श्रीललित त्रिभंगीजी देवाकपुर क्षत्रीके माथे पधराये ॥ सो वे जीवे तहां तांइ सेवा कराइ फेरि अंतरध्यान भए ॥ तीन स्वरूप तीन जनेनके अवसानमें श्रीमहाप्रभुजीके इहां पधारे ॥ ओर श्रीमथुरेशजी करणावलमें श्रीयमुनाजीको धावो टुटिके प्रगट भए हे सो बोहोत बडो स्वरूप प्रगट भयो तब श्रीमहाप्रभुजीने दर्शन करिके विनती करी जो कलुक छोटे होइए तब श्रीमथुरेशजी कलुक छोटे भए ॥ तब फेरि विनती करी तब फेरि छोटे भए ॥ एसे करत श्रीमहाप्रभुजीकी गोदीमें आय बिराजे सो गोदीमें आपकी ठोडी बराबर भये तब आपने विनती करी जो अब सेवा होयगी ॥ सो वे पद्मनाभदासजीके माथे पधराये ॥ सो वा स्थलको नाम करणावल भयो जो करुणा करिके छोटे भए तासों ॥ सो उहां प्रागट्य स्थलपें श्रीमथुरेशजीकी बैठक हे ॥ पीछे पद्मनाभदासजीके घर तें श्रीमहाप्रभुजीके घर पधारे ॥ सो विस्तार पद्मनाभदासजीकी वार्तामें प्रसिद्ध हे ॥ ओर श्रीविठ्ठलेशरायजी श्रीगुसांइजीके प्रागट्य समय एक दक्षणी ब्राह्मण पधराय गयो सो आप घरमेंइ राखे काहुको पधराय दिये नहि ॥ ओर श्रीस्वामिनिजी श्रीमहाप्रभुजीके जनेउसुं लगि के श्रीयमुनाजीमें तें पधारे सो श्रीमुखतें आप आज्ञा करे जो हम श्रीविठ्ठलेशरा-

यजीके हे ॥ सो यह श्रीमुखके वचन सुनिके श्रीविह्वलेशरायजीके संग पधराये ॥ अब श्रीद्वारकाधीश ॥ ब्रह्मांजीके पास मागिके राजा अंबरिष पधराय लाये ॥ ओर वानें बहुत स्नेह सों, बहुत वैभव सों, सेवा करी ॥ ओर दुर्वासाकी कृत्या सों श्रीसुदर्शनजीनें राजा अंबरीषकी रक्षा करी ॥ ओर भक्त पक्ष दृढ कयों सो कथा श्रीभागवत नवम स्कंधमें हे ॥ सो श्रीद्वारकाधीश राजाके अवसान समयमें अर्बुदाचल (आबु) पर्वतमें पांच ऋषिश्वरनकुं दिये ॥ सो वेपांचे ऋषिश्वर यथा वित्तानुसार सेवा करत भए ॥ फेरि कनोजमें एक दरजी हतो वाको स्वप्नमें आज्ञा किये जो में फलाणो हुं ओर ऋषिके पास विराजुहुं सो तुं आयके ऋषिनके पास मागिके पधराय लेजा फेरि वे दरजी स्वप्नसों भाग्यो तब काहुको कहि सुनी नहि ओर सुधेइ आबुजीको रस्ता लियो, सो आतुरताको मायों दोडयोइ जाय सो दोडते दोडते बीस कोस गयो तब रात्री भइ, अंधेरो भयो सो रस्तामें एक पत्थरकी ठोकर लगी सो पडि गयो, सो अत्यंत पश्चात्ताप करने लग्यो जो अब में कैसे जाउं ! ओर श्रीप्रभूनसुं विनती करिवे लग्यो हे महाराज ! हे श्रीद्वारकाधीश ! अब में निःसाधन हुं जेसे श्रीरुक्षमणीजीवारे ब्राह्मणकुं एक रात्रमें श्रीद्वारकाजीमें ले गये तेसे मेरेकुं दृढ हे एसे निःसाधन होयके आधिरात्र तांइ जाग्यो पीछे तो नींद आय गइ सो श्रीप्रभुजी पधारि लात मारीके जगायो ओर आज्ञा करिके चलि पाछें विनती करोकें कृपानाथ ! अब मोको इतनो दुर काहेको ले जाओ हो, आप इहांसोइ पधारिये ॥ तब आप आज्ञा करेजो तोकों अबरबडाट काहेको हे हमारे संग एकहि दिनमें पहुँचनो हे ओर इहांसुं परभारे पधारे तो ऋषिश्वरनकुं आछो न लगे तासों उहां आय विनके पास मोको मागि ले ॥ फेरि वाको आज्ञा करि जो आंखमिच ले सो आंखमिंची सो आबुजीमें अपने स्थानमें दाखल होय गये ॥ सो आंख खोलिके देखे तो प्रातःकाल भयो हे, ओर ऋषिश्वर बेठे हे, श्रीठाकुरजीके दर्शन भए ॥ तब वह दरजी



देह कृत्य करि, ज्ञान करि ऋषिश्वरनके पास आय बेठयो ॥ ओर ऋषिश्वरनसूं विनती करि जो तुह्यारे पास श्रीठाकुरजी हे सो मोकुं पधराय दिजीये ॥ तब ऋषिश्वरनें कही जो हमकुं हुं आज्ञा हे यौं कहेके पधराय दिये ॥ सो प्रभुनकुं पधरायके बेसेइ एक दिनमें कनोज पहोंचे ॥ तब वानें अपने विचानुसार तुलसी क्यारेके पास एक छोटोसो मंदिर बनवाय वामें पधराये ॥ ओर पुजामार्गकी रितिसों सेवा करतो भयो ॥ सो वाके इहां कितनेक वर्षे बिराजे ॥ फेर संभरवारे क्षत्री शेट दामोदरदासजीकुं पत्र प्राप्त भयो ओर स्वप्नमें आज्ञा भइ जो ए वांचे ताको तुं गुरु करियो ॥ सो ये आज्ञा श्रीद्वारकाधीशने किये ओर पत्र हुं आपने लिख्यो हतो सो प्रभूजीनके अक्षर जीवसों केसे वांचे जाय ॥ प्रभुजी आप ही वांचे ॥ जब श्रीमहाप्रभुजी याही कार्यके लिये कनोज पधारे सो शहर बाहार बिराजे ॥ ओर वस्तु भाव सामग्री लेवेकुं कृष्णदास मेघनकुं गाममें पठाये ॥ ओर समजाये जो काहुसों कहियो मति ॥ तब कृष्णदासजीनें कहिजो जो आज्ञा ॥ यौं कहिके बजारमें गये ॥ सो-शेटजी राजद्वारसों आवते ओर कृष्णदास सामग्रि लेके जाते सो सामें मिले सो पुछी जो आप श्रीमहाप्रभुजी पधारे हे ? तब कृष्णदासजीनें कही जो आज्ञा नही हे ॥ तब दामोदरदासजी कृष्णदासजीके संग होय गये ॥ सो जहां श्रीमहाप्रभुजी बिराजते हुते उहां गये ॥ साष्टांग दंडवत करि तब आपनें आज्ञा करि ॥ जो आवो शेटजी ॥ तब शेटजीनें विनती करि जो कृपानाथ ! मोको शरण लिजीये ॥ तब आपनें आज्ञा करि जो तुमकुं पत्र प्राप्त भयो हे सो लाउ ॥ तबशेटजीनें विनती करी जो कृपानाथ ! अब पत्रकी कहाजरुरत हे तब आप आज्ञा करे जो भयवद् आज्ञा उलंघन न करनी उलंघन होय सो आछी नही तासों पत्र लाउं ॥ तब पत्र लयि तब आप वा पत्रकी व्यवस्था सब शेटजीकुं वांचीके सुनाये ॥ तामें श्रीमहाप्रभुजीके शरण आवेकी लिखीही ॥ जो थोडेइ कालमें इहां पधारेंगे तिनको तुं शरण जैयो ॥ ओर हम दरजीके

घर बिराजे हे सो पधरायके तुम सेवा करियो ॥ ए समाचार वा पत्रमें हते सो वांचिके विस्तार पूर्वक सुनाये ॥ सो सुनिके शेटजी बोहोत प्रसन्न भए ॥ ओर आज्ञा भइ जो स्नान करो सो शेटजी स्नान करी अस्प-
 र्शमें आये विनती करी जो कृपानाथ ! स्नान करी आयो हुं ॥ अब कृपा करी शरण लिजीये ॥ तब आपनें नाम निवेदन करवायके आज्ञा किये जो ॥ अब श्रीद्वारकांधीशकुं दरजीके इहां सो पधराय लाउं ॥ दरजीके इहां गये जायके श्रीद्वारकांधीशके दर्शन करे, साष्टांग दंडवत करे, ओर दरजीसों कहिके ए प्रभूनों स्वरूप हमकुं पधरायदेहो ॥ तब दरजीनें पधराय दिये जो तुहारे घर वैभवयुक्त बिराजेंगे, मेरे तो कोरी रोटी हुती सो आप जेसे तेसे निर्वाह कर्यो अब मेरो चित्त बोहोत प्रसन्न भयो ॥ जो तुम पधरायवे आये ॥ योंकेहेके पधरायके श्रीमहाप्रभुजीके पास लाये तब आप पंचामृत स्नान करवायके शेटजीके माथे पधराय दिये ॥ सो शेटाणीजीने बडे वैभव सहित सेवा करी ॥ पीछे शेटजी अवसान भए तब शेटाणीजीने सब वैभव सहित श्रीगुसांइजीके घर पधराये ॥ ओर श्रीमहाप्रभुजीने आज्ञा करी हुती जो जीननें राजा अंबरीष न देखे होय सो ये दामोदरदासजीकों देखो ॥ वे मर्यादा हुते ये पुष्टि हे इनमें इतनी आधिक्यता हे ॥ एसी कृपा आपकी हुती ॥ तथा श्रीद्वारकांधीश अनेक प्रकारके अनुभव कराये सो दामोदरदासजीकी वार्त्तामें प्रसिद्ध हे ॥ ओर श्रीस्वामिनीजी श्रीगुसांइजीकी आज्ञासों गुंजाबनमें सो श्रीबालकृष्णजी महाराजने पधराये सो गुप्त बिराजे हे ॥ अब श्रीगोकुलनाथजी श्रीमहाप्रभुजीकी सुसरारतें श्रीकाशीजीसों पधारे ॥ सो दाउ श्रीस्वामिनीजी सुद्धां ॥ बिन सुसरजीकों श्रीमहालक्ष्मीजी सिवाय कलु संतति नहि हुती तासों जो कलु घरमें वित्त हुतो सो तथा पंचायतन पुजा घरमें हतो सो ॥ समेत

१ आ पत्रमां आपेली विशेष हकीकतनो अर्थ अमारा तरफयी प्रगड धयेळ "८४ वैष्णवनी वातां" आ पुस्तकमां आपेलो छे त्यां जोडुं.

सब श्रीमहाप्रभुजीकुं दियो ॥ तामें श्रीगोकुलनाथजीहुते सो तो आप सेव्य करे ॥ ओर दुसरे पंचपुजाके देवता हुते विनकुं तो श्रीगंगाजोमें पधराये ॥ तब श्रीगणेशजी बोले ॥ जो आप हमारो अनादर करो हो तो ओर हमकुं कोन मानेगो ॥ तब आप आज्ञा करे जो तुमकुं प्रस्तावादि-कमें मानेंगे ॥ ओर श्रीमदनमोहनजी श्रीदोउस्वामिनीजी सहित यज्ञ कुंडमें ते प्रगट भए हे ॥ सोमयागी नारायणभट्टजीके आगे सो तब सों घरमेंइ बिराजे हे ॥ वैष्णवके माथे नहि पधारे ॥ सोउ पंचपुजामें आगे बिराजते सो पंचपुजा तथा सातो स्वरूप श्रीगुसांइजीनें सब बालकनकुं वांदि दिये ॥ तब वे पंचपुजाके गणेशजी श्रीबालकृष्णजीकुं दिये सो आजकाल दरिखानामें बिराजे हे ॥ ओर स्वरूप ओर भाइनेके बटमें गये हे ॥ ओर छोटे श्रीमथुरेशजी बडे श्रीमथुरेशजीके स्वरूपमें तें प्रगट भये हे ॥ पद्मनाभदासकी बेटी तुलसाको मनोर्थ सिद्ध करबेके लिये ॥ सो अब कोटामें बिराजे हे ॥ ओर श्रीबालकृष्णजी श्रीयमुनाजीके रेंणुकाके श्रीमहाप्रभुजी आप श्रीहस्तसों सिद्ध करेथके सो जोधपुरमें बिराजे हे ॥ ओर ९ श्रीमदनमोहनजी संवत १५८२के साल श्रीगोपीजीनाथजी श्रीद्वारकाजी यात्राकुं पधारे तब राजनगरमें पधारे ॥ तब राजनगरमें सीकंदरपुरमें साचोरा जयकृष्णभट्टके घर वाडि हे तहां रहे ॥ तहां श्रीमदनमोहनजीको प्रागटय भयो, प्रतिष्ठा करि तब हरिवंशदास संग भाइला कोठारीकी बाइ कंकुबाइ तथा ओर सेवक समुहमें दर्शन देके फीर श्रीगोपिनाथजोतो आप द्वारकां पधारे ॥ ओर श्रीनाथजीके पास श्रीमदनमोहनजी बिराजे हे ॥ सो श्रीमहाप्रभुजीके सेव्य हे ॥ ओर श्रीमुकुंदरायजी रामदासजीके श्रीठाकुरजी सो वे रामदास श्रीनाथजीके मुखिया भये तब बाहर न्यारी सेवाको अबकाश नहि आवतो तासों श्रीगुसांइजीने श्रीनाथजीके पास पधराये ॥ सो कोइ काल बिराजे पीछे श्रीदाउजीके बहुजी श्रीलक्ष्मीवहुजीने श्रीमहाराजजीके वंशमें काशीवारे श्रीगिरिधरजीकुं पधराय दिये ॥ सो प्रकार इनकी

वार्त्तां हे ॥ तथा श्रीअनंतशेषजी-श्रीशालिग्रामजी श्रीमुकुंदरायजीके संग पधराय दीये सो श्रीमहाप्रभुजीके गलेके पेहेरवेके हते ॥ इति श्रीगिरि-धरलालजी महाराजके वचनामृत त्रैसठमो संपूर्ण ॥ ६३ ॥

 [वचनामृत ६४ मो.] 



अब चोसठमो वचनामृत आप आज्ञा करे जो, श्री बडे दाउजी क्षी-रसागरनें ते प्रगट भये हे ॥ सो श्रीगोकुलसों तीन कोस रेठा गामहे तहाँ विराजे हे ॥ श्रीगोकुलनाथजीने पाट बेठाये हे ओर वहाँके रहेवासी ब्राह्मण सेवा करेहे ॥ ओर श्रीरणछोडरायजी सो कृष्णावतारमें आप सेवा करते सो स्वरूप हे ॥ सो बोडाणो भक्तके मनोर्थ सिद्ध करिवेके लिये गुजरातमें डाकोर गाममें श्रीद्वारकाजीसों पधारे सो अद्यापताँड विराजे हे ॥ सो आपकी वार्ता अनेक हे ॥ सो लौकिकमें प्रसिद्ध हे ॥ ओर बडोदाके राजासों रुसके भीतमें ओंघे विराजे ॥ सो श्रीहरिरायजीने मनायके सुधे पधराये ॥ ओर श्रीमहाप्रभुजीकोट्टु स्पर्श हे ॥ ओर तीन जातके सेवक सेवा करे हे ॥ एक तो श्रीगोड ब्राह्मण, तथा खेडावाल ब्राह्मण, तथा तपोधन, ओर बेट द्वारकामें चौद. स्वरूप विराजे हे ॥ तिनके नाम ॥ (१) श्रीद्वारकानाथजी सो तो श्रीपूर्णपुरुषोत्तमको स्वरूप हे ॥ ओर (२) श्री त्रीकमजी सो तो श्रीदाउजीको स्वरूप हे ॥ (३) श्री कल्याणरायजी सो श्री पद्युम्नजीको स्वरूप हे (४) श्रीमाधोरायजी सो श्रीअनिरुद्धजीको स्वरूप हे ॥ (५) श्रीपुरुषोत्तमजीसो व्युहात्मक वासुदेव स्वरूप हे ॥ ओर साम्हे (६) श्रीदे-वकीजी (७) श्रीरुक्ष्मणीजी (८) श्रीसत्यभामाजी ॥ (९) श्री जांबुवंतीजी (१०) श्रीराधिकाजी ए चार स्वरूप पटराणिके हे ॥ (११) श्रीसांक्षीगोपालको मंदिर हे ॥ ओर श्रीरुक्ष्मणीजीके मंदिर पीछे ॥ [१२] श्रीगोवर्द्धननाथजी गौर स्वरूप द्विभुज हे ॥ श्रीजांबुवंतीजीके मंदिर के पीछे ॥ [१३] श्रील-क्ष्मिनारायणजीको मंदिर हे ॥ [१४] श्रीवासुदेवजीको मंदिर हे सो चतुर्भुज श्याम स्वरूप हे ॥ ओर शंख तलाइके उपर श्रीशंखनारायणजी गौर चतु-

भुज स्वरूप अनादी कालके श्रीठाकुरजी हे सो उहां शंखतलाइके उपर बिराजे हे ओर ये चौद स्वरूप श्रीद्वारकाजीमें बिराजते सो एक विरियां म्लेच्छको उपद्रव भयो तब तेरे स्वरूप श्रीद्वारकाजीसो थोडी दुर एक कोसके आसरे गाम लाडुवामें भोंयरा हे तहां पधारे ॥ तहां बिराजे ॥ ॥ ओर श्रीवसुदेवजी अकेले श्रीद्वारकाजीमें बिराजे ॥ फेरि श्रीगुसांइजीके पांचमे लालजी श्रीरघुनाथजीने पाछे बेटमें पधराये ओर उहांकी सेवाको क्रम सब बांधे ॥ ओर श्रीद्वारकानाथजीको स्वरूप हे सो श्री स्कमणिजी सेवा करते सो स्वरूप हे ॥ सो ये स्वरूप कुवामें [सावित्रिवावमें] गुप्त बिराजते हते सो श्रीरणछोडरायजी गुजरातमें पधारे तब इहांके सेवकनकुं आज्ञा दिनी जो हमारो स्वरूप वावडीमें हे, सो तुम पधराइयो एसे आज्ञा करी सो स्वरूप ये हे ॥ ओर श्रीद्वारकाजीमें सब स्वरूप बिराजे हे सो सब नये हे ओर श्रीवसुदेवजी प्राचीन हे ॥ ओर मंदिर सब प्राचिन हे ॥ श्रीद्वारकानाथजीके मंदिरमें श्रीगुसांइजीकी बैठक हे ताके लिये आपनकुं जानो पडे हे ॥ ओर श्रीजगन्नाथजीकुं इंद्रधुम्न राजाने पधराये हे ॥ सो श्रीजगदीश माहात्म्यमें विधिपूर्वक कथा हे ॥ श्रीबलदेवजीको स्वरूप गौर हे ॥ तथा श्रीसुभद्राजीको स्वरूप पीत ओर श्रीजगदिश आप श्याम स्वरूप हे ॥ ओर मंदिरके परकोटामें अनेक देवताके स्वरूप हे ओर जब दोग अषाढ आवे तब कलेवर पलटथो जायहे आगे तो समुद्रमें सों काष्ट आवतो ओर अबतो स्वप्नद्वारा आज्ञा होवेहे ओर श्रीमहाप्रसादको माहात्म्य बोहोत हे जो कोइ म्लानी लावे ओर निंदा करे ताको तुरत पारखो बतावे हे वे बात अद्यापीहु हे ॥ ओर श्रीबद्रीनाथजीके पास पांच स्वरूप बिराजे हे ॥ एक आडि श्रीनारायणजी द्विभुज ओर एक आडि कुबेर तथा नारदजी द्विभुज, तथा उद्धवजी चतुर्भुज, बिचमें श्रीबद्रीनाथजी द्विभुज, श्याम स्वरूप बरफमें हे

१ आ श्रीमदनमोहनजी हाल समयवावमां बिराजे छे. जुको अमारा तरफयी प्रगट थयेल " ८४ वैष्णवनी वार्ता. २ बांबो अमारा तरफयी प्रगट थयेल "श्री पूर्वनी यात्रा" प पुस्तकमां वधु वर्णन छे.



तासों शीतकालमें दर्शन नहि होयहे ॥ ओर इनके प्रागटयकी वार्ता सुनी नही तासों लिखि नहि हे ॥ कुबेरधातु मय हे, मस्तकहे ॥ ओर श्रीरंगजी-द्विभुज, श्याम स्वरूप, शेष शैयामें पोढे थके, सो श्रीरंगपट्टणमें बिराजे हे ॥ बडे वैभव सों सेवा होय हे ॥ विभिषणने श्रीब्रह्माजीके पास मांगे तब ब्रह्माजीने ए स्वरूप दियो सो उठावती विरियां आपने यह आज्ञा करी जो झोकों जहां धरेंगे उहांइ रहोंगे ॥ तब विभिषणने कही जो बोहोत आछो सो फेरि उहांसो चले सो रस्तामें श्रीठाकुरजी भारी बोहोत लागे तो रस्तामें पधराय दिये लंका ताइ न पोहोंचे तब फेरि उठायवे लगे सो आप न उठे ओर कही जो तुमसो हमने पहेलेही कही हुती जो धरे पीछे न उठेंगे तब विभिषणने कही जो आपकी इच्छा मेरो मनोर्थ तो लंकामें पधरायवेको हतो परंतु आपकी इच्छाके आधि न हुं भले इहांइ आयके नीत्य सेवा करंगो सो अघ्यापी विभिषण नित्य सेवा करवे आवे हे ॥ अब श्रीविठ्ठलनाथजी पांडुरंग ॥ सो पुंडरिक भक्तके लिके व्रजसों पधारे सो वे भक्त मातापिताकी सेवा करि रह्यो हतो ॥ सो एक इंट धरी ओर कही जो कृपानाथ ए इंटपें पधारिये अबी में मातापीताकी सेवा तें पोहोंचिके आउं हुं सो सेवा तें पोहोंचिके आवे दंडवत् करी विनती करी जो कृपानाथ ! अब आज्ञा करिये तब आप इनकी सेवा देखिके प्रसन्न भए ओर आज्ञा करि जो वर मागों तब इननें माग्यो जो कृपानाथ मेरे इहांइ बिराजो ओर नामाविधान दिजिये सो पहेले मेरो नाम पाछें आयको नाम आवे तासों आप पांडुरंग श्रीविठ्ठलनाथजी बाजेहे ॥ दोउ श्रीहस्त कटिपर धरेहे, श्याम स्वरूप, श्रीशुसांइजीके स्वरूपाकृति हे ॥ अब श्रीराधारमणजी हे सो गोडिया गोपाल भइजी जो तेर १३ सालिग्रामजीकी सेवा करत हते परंतु विनको स्वरूप सेवाकी अभिलाषा हती सो मध्यके श्रीशालिग्रामजीके स्वरूप श्री-राधारमणजी होय गये, सो स्वरूप बोहोत सुंदर हैं ॥ सो श्यामस्वरूप द्विभुज बंसी बजावते सो श्रीवृंदावनमें बिराजत हे ओर श्रीबांकेबिहारीजी

हरिदासजीको मनोरथ सिद्ध करवेको निधुवनमें सो आप प्रगट भए हे [कीतनेक कहेहे के ए स्वरूप सेवाकुंजमें सो प्रगट भयेहे] सोउ द्विभूज, श्याम स्वरूप, बहुत सुंदर हे सो हरिदासजीके माथे बिराजे हे ॥ सो श्री वृंदावनमें बिराजे हे ॥ ओर श्रीलक्ष्मणबालाजी चक्रवर्ति राजाको तथा हाटीराम बाबाको मनोरथ सिद्ध करवेकूं वंकटगिरिमें ते मंदिर सहित चतुर्भुज श्याम स्वरूप प्रगट भए ॥ ए श्रीठाकुरजी हमारे दक्षिणमें रोकडिया हे ॥ इनकी विशेष वार्ता वंकटगिरि माहात्म्यमें हे ॥ ओर श्रीवरदराजस्वामी सो श्रीविष्णुकांचिमें बिराजे हे सो हु चतुर्भुज श्याम स्वरूप हे, ओर ढोकलाकी सामग्री बोहोत सुंदर अरोगे हे ॥ श्रीरंगजी तथा श्रीबालाजी तथा श्रीवरदराजस्वामी ए तीन्यो स्वरूपकी वार्ता श्रीभाभोजोमहाराजके श्रीमुखतें सुनी हुती सो लिखाइ हे ॥ एसे आप आज्ञा करे ॥ इति श्रीगिरिधरलालजी महाराजके वचनामृत चोसठमो संपूर्ण ॥ ६४ ॥

 [वचनामृत ६५ मो.] 

अब ऐसठमो वचनामृत आप आज्ञा करे जो ॥ श्रीनाथजी मथुराजी पधारे हुते सो श्रीनृसिंहचतुर्दशीके दिन श्रीगोपीवल्लभभोग अरोगिके विजय किये सो, श्रीगिरिराजजी श्रीगोवर्धनपर्वतपें पधारे पधारिकें श्रीनृसिंहजीको जन्म भयो, राजभोग सैनभोग भेले आये ओर श्रीगुंसांडजी परदेश पधारे हुते सो वाइ दिन श्रीगिरिराज पधारे सो आपने पुछी जो राजभोग अवेरे क्यों आये ? तब श्रीगोकुलनाथजीने विनतो करी जो श्रीनाथजी अपने घर पधारे हते सो बहुत सुख दियो ओर मेंने तो दादा सों विनती करी जो दोग दीन अधिक इहां बिराजे तो बोहोत आछो ॥ श्रीकाकाजीको पधारवेकी तैयारी हे परंतु दादाने न मानी ॥ तब श्रीगुंसांडजी आप आज्ञा करी जो श्रीगोवर्धन धरतो मेरे मनकी जाने हे ओर में तो पर्वतपें दर्शन करूं हुं तब इ मेरो चित्त प्रसन्न रहे हे ॥ तासों प्रभु दुसरी ठोर दर्शन न देइ ॥ क्यों के श्रीमहाप्रभुजीने पर्वतपें पधारे हे सो हमकुं तो पर्वतपेंइ

दर्शन देइंगे ॥ इतनेमें मालां बोली तब सो उपर पधारे सो पधारिकें श्रीनाथजीके दर्शन करे ओर मुस्काये ॥ ओर श्रीनाथजी मुस्कायके कहे जो हमतो आपको घर देखि आये ओर होरि खेली आये ॥ तब श्रीगुसांइजी विनती करे जो आपको घर हे ओर हमारे अहोभाग्य हे ॥ जो कृपा करि पधारे ॥ ओर आप आपको माने हे ॥ एसे परस्पर वार्ता भइ पीछे आप श्रीनाथजीकुं पोढायके बैठकमें पधारे ॥ सो यह अलौकिक आनंदकी वार्ता आपने अंतरंग भक्त सों कहे जो श्रीनाथजी अपने निज वंशके उपर एसी कृपा करे हे ॥ ओर सेनभोगमें दुसरो भोग आवे हे सो वाइ दिनसों क्रम चलयो हे ॥ ओर श्रीनाथजीके इहांतो अद्यापी सेनभोग राजभोग भेलो आवे हे ॥ सांजकुं अपने इहांतो सेनभोग अरोगिके जन्मके दर्शन खुले हे ता पीछे उत्सवको भोग आवे हे ॥ ता पीछे सेन आरति होय, श्रृंगार बडे होय पीछे पोढे ॥ ओर श्रीबालकृष्णजीके बडे लालजी श्रीद्वारकेश्वरजीको उत्सव हे ओर श्रीनृसिंहजीको प्रागटय तो दुपहरीको हे परंतु भक्तको संकट निवारण सायंकालकों भयो हे तासों उरतव वाइ समय माने हे ॥ इति श्रीगिरधरलालजी महाराजके वचनामृत पांसठमो संपूर्ण ॥६५॥

 [वचनामृत ६६] मो. 

अब छासठमो वचनामृत आपने कल्लुक ज्योतिष प्रकरणकी आज्ञा करी ॥ जो कार्तिक शुक्ल अक्षय नोमी गुरुवारके दिन सतभिषा नक्षत्रमें सतयुगको जन्म भयो हे, तातें अक्षय नोमी कहे हे ॥ सतयुगके देवताके वर्ष ४८००० तामें युगके वर्ष १७२८००० संख्या हे ॥ तामें अबतार चार भये मत्स्य, कूर्म, वाराह, नृसिंह ओर यामें शककारक राजा १४ भये ताके नाम ॥ १ सुकृत २ कृतवसु ३ कृतभोगि ४ भैरव ५ मुचुकंद ६ हिरण्यगर्भ ७ हिरण्याक्ष ८ प्रहादजी ९ नैलोचन १० बलि ११ नहुश १२ ताडकासुर १३ गजासुर १४ कृतमनु या प्रमाण चौद राजा भए ॥ ओर भगवद् स्वरूप शुक्रतनुं, मकरेश्वर लींग, नैमीषारण्यतीर्थ, जगन्नाथ पीठ, मनुष्य

आयुष्य वर्ष एक लक्ष संख्या, सत्यवादिलोक, एक पत्नीव्रत पुरुष, पति-व्रता स्त्री, ग्रहण ७६०००, तामें चाळीस हजार चंद्र ग्रहण; छत्तीसहजार सूर्य ग्रहण, देवता तथा ब्राह्मणकी भक्ती, पुरुष लंबो हाथ २१, हाडतांड पापको लेश नहि ॥ या प्रमाण सतयुगको वर्तमान हे ॥ अब त्रेतायुगको प्रकार ॥ जो अक्षय प्रतिया [वैशाख शुक्ल ३] सोमवार, रोहिणी नक्षत्र में जन्म हे ॥ तामें भगवद् प्रागटय तीन ३ ॥ १ वामनजी, २ परसुरामजी ३ श्रीरामचंद्रजी, देवताके वर्ष ३६०००, युगके वर्ष १२९६०००, संख्या हे ॥ यामें शक कारक राज २१ भए ताके नाम रघु, धर्म, कुक्ष, काकुस्थ, अंबरीष, वैशंपायन, कुश, यौमार, इंद्रमार, उच्चानपाद, हरिश्चंद्र, रोहिदास, सगर, भरत, मान्धाता, प्रथुम, दिलिप, अजेपाल, दशरथ, श्रीरामचंद्र, रावण, या प्रमाण २१ राजा त्रेतायुगमें भए ॥ ओर भगवद् स्वरूप रक्तवर्ण, ओर सोमेश्वरलिंग, पुष्करतिर्थ, जालंधरपीठ, केदारलिंग, देवता, मनुष्यको आयुष्य वर्ष १०००० लोक सत्यवादी, ग्रहण संख्या ३६०००, तामें चंद्रपर्व ३२०००, सूर्यपर्व ३१००० पुरुष प्रमाण हाथ १४ लंबो, मांसगत प्राण, रजकपात्र, सुवर्णमुद्रा, पुन्यविश्वा १५, पाप विश्वास ५ तहेवार दसेरा, अब द्वारपर युगको प्रकार ॥ भाद्रपद कृष्ण १३ बुधवार, पुष्य नक्षत्रको जन्म, तहेवार दिवारीको श्रीभगवद् प्रागटय १ श्रीकृष्णावतार, कुरुक्षेत्र तीर्थ, देवताके वर्ष २४०००, तामें युगादि वर्ष ८६४०००, शककारक राजा ७ भये ताके नाम ॥ विश्वश्रवा, जयमुनी, पूर्वमल्ल, आयन, शांतन, चित्र, पांडु, ए सात, अवंतीपीठ, भगवत् स्वरूप पीतवर्ण, आचारशील ब्राह्मण, सत्यवादी लोक, ग्रहण ४६०००, तामें चंद्रपर्व २५०००, सूर्यपर्व २१०००, पुरुष प्रमाण हाथ ७ लंबो, आयुष्य प्रमाण वर्ष १०००, चर्मगत प्राण, ताम्रपात्र, रजकमुद्रा, पुन्यविश्वा १०, पापविश्वा १०, अब कलियुगको प्रकार ॥ माघ वदि ३० शुक्रवार, श्रवण नक्षत्रको जन्म, परवहोरीको, शककारक राजा ६, तामें प्रथम युधिष्ठिर, विक्रम, शालिवाहन, विजयामी-

नंदन, नागार्जुन, कलंकी, देवताके वर्ष १२०००, तामें युगादि वर्ष ४३२०-०० महाकाल देवता श्रीगंगाजी तीर्थ, आसोधरपीठ, मनुष्य आयुष १२० वर्ष, ब्राह्मण आचार भ्रष्ट, परम म्लेच्छ लोक, ओर लोभी लोक, अष्टवर्षाणी कन्या गर्भवती, विधवा व्यभिचारता, पुरुष प्रमाण हाथ ३ लंबो, कंठगत प्राण, मृत्तिकामय पात्र, ताम्रमय मुद्रा, पुन्यविश्वा ५, पापविश्वा १५, अब पुराणके मत सो पांच संवत्सर होय हे ॥ ताको प्रकार ॥ जो बुद्धावतार हे सो सर्व धर्म मिटायेके हे ॥ ओर कल्कि धर्म स्थापक हे ॥ १ चैत्र सुदि १ के दिन बेठे सो सौर संवत्सर ॥ ३ चैत्र सुदि २ के दिन चंद्रोदय समे बेठेहे सो चांद्र संवत्सर हे ॥ ३ ओर मेष संक्रांति बेठे जादिन सो बेठे सो गणितांक अयनात्साकी रीति हे ॥ तासों आवे हे ॥ ४ वारहस्यत्य मकरके ब्रह्मस्पतिके सोवीस अंशगये पीछ लगे सो बारे वरस भुक्ते ॥ ५ नक्षत्र संवत्सर अश्वनी सों लेके रेवती तांइ एक मासमें पुरो होय ॥ ६ पांच संवत्सर पंचम स्कंधमें पुराणकी रीती सों हे ॥ अध्याय बावीसमें हे ॥ अब ज्योतिषके मतसों साठ संवत्सर हे तामें बीसी ३ ताको नाम प्रथम ब्रह्माकी बीसी बेठे हे ताको प्रकार लिख्यते ॥ संवत्सरके नाम प्रभाव, शुक्ल प्रमोद, प्रजापति, अंगिरा, श्रीमुख, भाव, युवा, धाता, इश्वर, बहुधान्य, प्रमाथी, विक्रम, वृषभ, चित्रभानु, तारक, पार्थिव, व्यय, २०.

॥ अब विष्णुकीविसी लिख्यते ॥

सर्वजीत; सर्वधारी; विरोधी, विकृत, स्वरो, नंदन, विजय, मन्मथ, दुर्मुख, हेमलंब, विलंब, विकारी सर्वरी, वाप्रचार, ध्रुव, शुभकृत, सौभव, क्रोधी, विश्वावसु, पराभव. २०

॥ अब रुद्रकी विसी लिख्यते ॥

पुर्वक, किलव, सौम्य, साधारण, विरोधकृत, परधार, अमारथ, आनंद,



सवनकुं नत्रिन स्नेह बढ्यो कद्यो न जाय एसो ॥ पाछें संवत १६२० के वैशाख शुदि ३ को श्रीपद्मावती बहुजी सो व्याह भयो ॥ फेरि श्रीद्वारका पधारे, यात्रा करि असारवा पुनः पधारे ॥ सो असारवामें प्रथमवत् रहि (पहेलांनी माफक) पधारे ॥ तहाँ कारण जो श्रीआचार्यजीको अषाढ शुद्ध २ को आराधन जो सन्यासीको श्राद्ध सो आराधन बाजे हे सो आराधन हतो तासों विधि करि [सं. १६२० अषाढ शुदि २] के पाछें श्रीद्वारका पधारे ॥ ता समय राजा नारणदास सेवक भए बाइ यमुना; रायकृष्णदास; तथा जालमदासपें अनुग्रह करे, ओर महु पर अनुग्रह करे ओर कीकापतितकोहु उद्धार कर्यो पाछें आव पाटण पधारे ॥ लक्ष्मीदास, गोपालदास, भीमजी, माधवदास, वेणीदास, सेवक हुते सो जहां ताँइ प्रभुने स्थिति किनो ३ तामध्ये अवाँत्तर कथा, संवत १६१५ में श्रीजोद्वारश्रीगिरिराज श्रीगोवर्धननाथजीके दर्शनको संघ चलयो सो साथ गोपालदास तथा रामदास साचोरा, नागजी, नारुगोपजी, झीझुं ठकर, तथा विशराम, भाइला कोठारी, भीमकुंवर बाइ तथा ओर हु ब्राह्मण, वैष्णव, गार्डा जोति चले ओर सिराइ [शीरोइ] के राजाकी स्त्री लालबाइहु संग चली ॥ सब संघ श्रीजीद्वार पहाँच्यो ता समय अधिकारी कृष्णदास तथा मुखिया, भितरिया, रामदास, तथा भगवानदास, तथा चाकरनको मुख्य जदु साथ हतो सो कृष्णदासने समाधान बोहोत भली भाँती सों कर्यो, कृष्णदास तो श्रीआचार्यजीके सेवक हते तथा गोपालदासादिक हते ॥ श्रीगुसाँइजी तें कृष्णदासने प्रथम बैर प्रभुनसों बहुत कियो हुतो ए हु जानी आदर बहुत कर्यो प्रभु मारग तब देखे अरे ए गुजराती हो ! मेरे दर्शनकुं चले क्यो न आये मारगमें तो कुशल हे ॥ पाछें जानी जो ए प्रसादमें मग्न भए ॥ ओर सब साथ १ महिना रह्यो तब श्लोक लिखि पठायो.

[वे श्लोक अशुद्ध छे] -

यह लिखी सेवकने पठायो ॥ तब धागिरिधरादिपुत्रनकी मात ।

श्रीरक्ष्मणी बहुजी पुत्र ६ साथ बिराजतहे ओर सेवक अडेल न आये तो उनको दुर्भाग्य यों कह्यो ॥ फेरि अडेलमें म्लेच्छ आयो तब प्रभु चरण बांधव देशको पधारे, ता मध्य एक वार्ता ॥ सं. १६२२ में फेरि प्रभु द्वारका पधारे ॥ तब असारवामें भाइला कोठारीके घर उतरे, केशवदास जल अरोगावते, तब परम शुरवीर धीर पुंजाजो ओर हुं धनुषधारी साथ हते ओर वैष्णवहु संग हते ॥ राजपुर के सेवक रामदास, हरिवंश, चांपाशंकर भंडारी, काशो खवास, शंकरदास, खवास, प्रभृति सब साथ हते ॥ जब नवानगर पधारे तब तर्हाको राजा जामने कही जो मारगमें काबा बहुत हे हमारी माता गइ सो लुंटी ॥ तब आपने कही जो भगवद् बलतें हमकुं तो कलु चिंता नही हे यों कही के पधारे ॥ मारगमें काबा मिले लडाइ प्रडी, आपके प्रताप तेजतें पराजय भए ओर पधारे ॥ उहां काबाकी स्त्री गोरीबाइ सेवक भइ, ओर नवानगर तांइ पहोंचावेकुं साथ आइ ॥ पाछें प्रभु राजनगर असारवामें बिराजे ॥ पाछें खंभात पधारे ॥ तहां कल्याण-रायने बहोत परम स्नेहतें आदर कयो ॥ मुरारांआचार्य, रूपापारेख, सह-जूपाल दोसी प्रभृतीनको बहुत स्नेहतें अंगीकार कयो ॥ अहा! धेनु केवल अपने बछडाके पीवेकुं दुध काढत हे मध्यमें कोउ पीयो ॥ तब कल्याण-राय सो कही बरास चंदनादि उत्तम सामग्री भगवद् योग्य लीनी पाछें स्वग्रहकों पधारे ॥ फेरि संवत् १६३७ के वर्ष पुनः श्रीद्वारका पधारे तब श्रीगिरिधरजीहु साथ हुते ॥ इडर, वडनगर, वीसनगर, महेसाणा, गोझारिया, वसइ, सिद्धपुरमें बिंदुसरोवरमें स्नान करे पाछें श्रीगदाधरजीके दर्शन करे पाछें भीलोडा ग्राममें पाककिये अरोगे, पाछें खंभात पधारे ॥ ओर स्थल पधारे ॥ सो गाम त्राड, वणसुली [वणसोल], महुधा, उमरेठ, नडीआद, महेमदावाद, अलियाणा, वाडासीनोर, लुणावाडा, किरपूर, या मारग होयके पधारे ॥ ओर महीनदीके त्रट पिलोदरा [बिलोदरा शेडी नदी उपर पण छे] गाम हे, तहां आचार्य आराधन इतो सो करे ॥

सूर्यग्रहण करे तातें पांच दिवस उहां रहे ॥ फेरी राजनगर समिप अडा-
सण, अडालज, तहांते रसद, हाथीछाला, [हाथीजण] मोडासा पधारे तहां
मेघजी करमसी राजपुत्र हुते सो सेवक भए ॥ इति 'मनुज व्याज प्रगट
श्रीपुरुषोत्तम श्रीमद् बह्म विद्वलनाथ यो पूर्ष चरित्रलीलास्तु' ॥ या
प्रमाण श्रीतातजी श्रीव्रजभूषणजी स्वहस्ते लिखी प्रत ता प्रमाण उतार्यो
हे ॥ जो यामें सब संक्षेपसों वर्णन हे परंतु बंडेनके वचनामृत बारिक न-
जरसों विचारनो ॥ इति श्रीगिरिधरलालजी महाराजके सडसठमो वचना-
मृत संपूर्ण ॥ ६७ ॥



 [वचनामृत ६८ मो.] 

अब अडसठमो वचनामृत आप आज्ञा करे ॥ जो श्रीगुसांइजी संवत
१६४४ के आसो वदी २ के दीना श्रीनाथजीकी राजभोग आरति भये
पीछे श्रीनाथजी आज्ञा किये जो ए ओधि हाथसों करेंगे सो में सुधे हाथसों
मानुंगो ॥ तब फेरि श्रीगुसांइजी सब बालकनसों कहे ॥ जो श्रीनाथजी
एसे आज्ञा करे हे तासों तुम सूर्यके सामे चलियो, जो सूर्यको पीठ देओगे
तो छाया उपर आय पड़ेगी ॥ ओरं श्रीनाथजो हे सो सबके बांटेमें हे ॥
सबहिलिमिलिके सेवा करियो ॥ श्रीनाथजीको द्रव्य आपने अंग मति
लगाइयो ॥ इतनी आज्ञा श्री नाथजीके सन्मुख आपने करी ॥ फेरि आप
माला पेहेरी, बीडा लेके श्रीनाथजीको दंडवत करीके नीचे पधारे ता
बिरियां सब बालक संग हते ॥ चत्रभूजदासादि वैष्णव हु संग हते ॥ एक
श्रीहस्त श्रीगिरिधरजीके हाथमें पकडिके दंडोतीशीला आगे पधारे, सो
तहां साष्टांग दंडवत किये ॥ फेरि श्रीगिरिधरजीनें विनतो करी जो कहा
इच्छा हे ? तब आप श्रीमुखसों कलु बोले नही ॥ ओर अगाडि पधारे
सो पुजनोशीलापे पधारे, सो पूजनी शीलाके सिंघासनके मध्यमें पधारे,
ओर उहां सबनकुं श्रीहस्त सों सेंन दे नाहिं करे ॥ ओर श्रीगिरिधरजीको
पकडि अगाडि पधारे सो अगाडि निकुंजको द्वार आयो श्रीनाथजी श्रीस्वा-

मिनीजी गलबाहि दिये थके निकुंजके द्वार ठाडे हे, सो दर्शन भए ॥ सो दर्शन होतेही श्रीगुसांइजी आप श्रीनाथजीके स्वरूपमें मिलि गये ॥ [सं. १६४४ आसो वदी २] फेरि श्रीगिरिधरजीने श्रीनाथजी सों विनती करी जो ए आपनें कहा लीला करी ॥ तब श्रीनाथजीनें आज्ञा करी जो इतने दिना तो दोय स्वरूप सों लीला करी अब हम तुमको एक स्वरूप सों दर्शन देंइगे ॥ ओर आज्ञा करी ॥ ए धोती उपरणा रहेहे सो ले जायलौकिक कार्य करो ॥ फेरि-श्रीगिरिधरजी धोती उपरणा ले श्रीनाथजीकुं दडवत करी बाहार पधारे ॥ श्रीनाथजी निकुंजमें पधारे ॥ फेरी द्वार बंध होय गये ॥ या प्रकार श्रीगुसांइजी आसुरव्या-मोहलीला देखाइ ॥ फेरि श्रीगिरिधरजी सब भाइनसों कहे जो काकाजी तो उपर मंदिरमें पधारे ओर मो सों या प्रमाण आज्ञा करि गये हे ॥ सो आपनकुं आज्ञा प्रमाण कर्त्तव्य हे ॥ सो फेरि सब उत्तर कार्य कर्यो ॥ ओर चत्रभूजदासकुं तो सुनतेंइ मूच्छा आय गइ ओर धरतीमें पडे पडे ए किर्त्तन गायो ॥ “ फेरि कब ब्रज बसहो श्रीविट्टलेश ” यह किर्त्तन गावते गावते शरिरकी विस्मृति होय गइ ॥ तामें श्रीगुसांइजीके दर्शन भए, ओर आज्ञा करे के ए सात बालक हे सो हमही हे ॥ तब फेरि मूच्छा खुली, उठि ठाडे भए ॥ फेरि हरजीपोखरमें सब बालक, सेवक, स्नान करिके आये ॥ इतनें श्रीनाथजीके संध्या आरतिके दर्शन खुले हुते ॥ सो उपर दर्शन करवेकुं पधारे ॥ सो दर्शन करतहो सब संदेह निवारण भयो ॥ श्रीनाथजीके बिराजबेकी ठोर श्रीगुसांइजीके दर्शन भये सो सब बालक दर्शन करि परम आनंदको प्राप्त भये ॥ ओर छितस्वामो किर्त्तन गावते हुते जो “विहरत सातों रूप धरे” ॥ फेरि संध्या आरति करि नीचे बैठकमें सातो स्वरूपके मंदिरमें पधारे ॥ सो मंदिर अब श्रीमथुरेजीको बाजे हे ॥ सो उहां बिराजे ॥ ओर सब बालकननें श्रीगिरिधरजी सों विनती करी जो काकाजीके ओर श्रीनाथजीके आगे वार्त्ता भइ, जो “सूर्यके साम्हे चलियो” सो कलु समज पडी नही ॥ सा आप समजाइये

॥ तब श्रागिरिधरजी सबनसों कहे ॥ जो अपने सबनके सूर्य श्रीनाथजी हे, सो इनके सन्मुख चलनो, पीठ देउगे तो छाया पडेगी सो सदा सर्वदा श्रीनाथजीके सन्मुख रहेनो ॥ येहे आज्ञा भइ हे ॥ तब सबननें कही ठीक हे ॥ अपने माथे छत्र तो श्रीनाथजी बिराजत हे एसे सबननें कही ॥ फेरि उत्तर क्रिया सों पोंहोचिके सब श्रीगोकुल पधारे अपने अपने श्रीठाकुरजी लेके न्यारे भये ॥ फेरि श्रीगुसांइजीकी आज्ञा हती जो हम न होय ता बिरियां तुम न्यारे रहियो सबके श्रीठाकुरजी पेहेलेइ बट करि दिये हुते ताहि प्रमाण पीछे सो पधराय लिये ॥ श्रीनवनीतप्रियजी, श्रीगिरिधरजीके माथे बिराजे ॥ श्रीद्वारकाधिश तथा श्रीबालकृष्णजी श्रीयदुनाथजी पधरायके रहे ॥ ओर श्रीगोविंदरायजी, श्रीगोकुलनाथजी, श्रीघनश्यामजी अपने तीन्यो स्वरूप पधरायके भेले रहे ॥ पीछे अपने अपने मंदिर सिद्ध भये पीछे न्यारे भए ॥ श्रीरघुनाथजी पेहेले सोइ श्रीचंद्रमाजीको पधराय न्यारो मंदिर करि रहे ॥ या प्रमाण श्रीगोकुल सुबस कर्यो ॥ फेरि श्रीगोकुलनाथजी कलु कार्यार्थ श्रीसोरोंजो पधारे, पीछे श्रीगिरिधरजी अपने दोय लालजीकुं बट करि दिये ॥ तामें श्रीगोकुलको मंदिर तथा श्रीनवनीतप्रियजी श्रीदामोदरजीकुं दिये ॥ ओर श्रीमथुरेशजी तथा श्रीगिरिराजजीको मंदिर छोटे पुत्र श्रीगोपीनाथजी उपनाम श्रीदक्षितजीको दिये ॥ ओर बडे लालजी श्रीमुरलीधरजी तो आपके अगाडि लीलामें पधार गये हते विष भयो तातें ॥ ओर श्रीगिरिधरजी कलुक काल सों श्रीमथुरेशजीके श्रृंगार करत हुते सो वा समय श्रीमथुरेशजीने उबासी लीनी तामें प्रवेश भये ॥ ओर आप रजाइ ओढे हुते सो रजाइ रहे गइ ॥ तब यह लीला देखीके पास दोय लालजी बेठे हते सो अत्यंत आश्चर्यकुं प्राप्त भये ॥ तब श्रीमथुरेशजीनें आज्ञा करी जो ॥ अब तुम गभराओ मति, ओर ए रजाइ लेके तुम बाहर जाउ, ओर उत्तर क्रिया करो ॥ सो उत्तर क्रिया करी तेरे दिन पीछे शुद्ध भए पीछे मंदिरमें पधारे ॥ सो श्रीगिरिधरजीके

पादुकाजीको श्रीदामोदरजीने डोलतिबारिमें पधराये, अब श्रीगिरिधरजी लीला प्रवेश भए सो समाचार श्रीसोरोजीमें श्रीगोकुलनाथजीने सुने सो सुनिके बडो क्लेश किये, ओर स्नान करिके शिघ्रही श्रीगोकुल पधारे ॥ ओर श्रीदामोदरजी तथा श्रीगोपीनाथजीको समाधान करिके शुद्ध होयके श्रीनवनीतप्रियजीके चर्णस्पर्श करवेकुं पधारे. सो चरणस्पर्श करिके, श्रीगोकुलनाथजीकूं नेत्रबल थोडो हुतो तासों श्रीमहाप्रभुजीके पादुकाजीको तथा श्रीगुसांइजीके चर्णस्पर्श करिके फेरि टटोरिके श्रीदामोदरजीसों पूछयो जो दादाके श्रीपादुकाजी कहाविराजे हे ? तब श्रीगोकुलनाथजी आज्ञा करेजो दादाके पादुकाजीतो काकाजी तातजीके भेलेइ बिराजेंगे ॥ ओर हम सब भैयानके पादुकाजी मंदिरमें न्यारे पलंगडीपें बिराजेंगे ॥ यों कहेके श्रीगिरिधरजीके पादुकाजी श्रीमहाप्रभुजी तथा श्रीगुसांइजीके संग पधराये ॥ इति श्रीगिरिधरलालजी महाराजके वचनामृत अडसठमो संपूर्ण ॥ ६८ ॥

 [वचनामृत ६९] मो. 

अब अगणोसीतेरमो वचनामृत आप आज्ञा करे ॥ जो श्रीनवनीत-प्रियजीके इहां पांच पादुकाजी बिराजत हे ॥ तामें मध्यमें तो एक श्रीमहाप्रभुजीके पादुकाजी हे, ओर तीन पादुकाजी श्रीगुसांइजीके हे, ओर एक श्रीगिरिधरजीके पादुकाजी हे जाकुं खुंटी हे ॥ एसेइ श्रीमथुरेशजीके इहां छे पादुकाजी बिराजे हे ॥ मध्यमें बटके श्रीमहाप्रभुजीके श्रीपादुकाजी श्रीगुसांइजीके बिराजे हे, तथा एक खुंटीवारे श्रीगिरिधरजीके, तथा दुसरे बडे पादुकाजी श्रीगिरिधरजीके बाकुं हुं खुंटी हे ॥ एसे छ पादुकाजी श्रीमथुरेशजीके घरमें बिराजे हे ॥ ओर इनकी जोडिके श्री पादुकाजी खुंटीवारे श्रीगिरिधरजीके सो श्रीनटवरजीके इहां [अमदावादमां] बिराजे हे ॥ अब श्रीविठ्ठलेशरायजीके इहां मध्यमें श्रीमहाप्रभुजीके छोटे पादुकाजी बिराजत हे, ओर पास जोडि एक श्रीगुसांइजीके बिराजत हे, सो भेलेइ बिराजत हे ॥ ओर दुसरी पलंगडोपें श्रीगोविंदरायजीके पादुकाजी बिना खुंटिके



बिराजत हे ॥ तिनकुं राजाजी केहेत हे ॥ एसे पांच पादुकाजी श्रीविठ्ठले-
 शरायजीके इहां बिराजत हे ॥ अब श्रीद्वारकोनाथजीके इहां मध्यमें श्रीम-
 हाप्रभुजी बिराजे हे सो पादुकाजी दामोदरदास हरसानीकों पधराय दिये
 हुते, सो श्रीमहाप्रभुजी संन्यास ग्रहण लिये हते तब आपको स्वरूप आपनें
 स्वहस्त सों कृपा करिके पधराय दिये हुते सो ए पादुकाजी हे ॥ ओर आज्ञा
 करे जो जब तोकों विरह होय तब इनके दर्शन करियो सो साक्षात दर्शन
 करते ॥ तब विरह तत्काल निवर्त्त होतो ॥ सो ए प्रभू आप साक्षात्कार
 इहां बिराजे हे, तासों इहां सब सेवा आठो भाग, झारी, वंटा, विगेरे सब
 सामग्रि यथा स्थिति यथा योग्य श्रीठाकुरजीके बत् आवे हे ॥ ओर पास
 जोडि एक श्रीगुसांइजीके बिराजत हे, ओर दुसरी पलंगडिपें श्रीबालकृष्णजी
 महाराजके श्रीपादुकाजी जोडि एक खुंटी समेत बिराजत हे, तिनसों इहां
 श्रीतातजी केहेत हे ॥ या प्रमाण इहां पांच स्वरूप श्रीद्वारकाधीशके पास बिरा-
 जत हे ॥ अब श्रीगोकुलनाथजीके इहां पादुकाजी ५ श्रीगुसांइजीके बिराजे
 हे, ओर दुसरी पलंगडिपें पादुकाजी श्रीगोकुलनाथजीके ४ हे ताकुं खुंटी
 हे, ताकों उहां श्रीठाकुरजीके पादुकाजी केहे हे, जुमले नव पादुकाजी हे ॥
 अब श्रीगोकुलचंद्रमाजीके इहां; बटके श्रीपादुकाजी एक जोडी श्रीमहाप्र-
 भूजीके ओर एक जोडी श्रीगुसांइजीके, ओर एक जोडी श्रीरघुनाथजीके,
 एसे तीन जोडी श्रीलक्ष्मीवहुजीने अपने बेटीजी दोयकुं बट करिके पधराय
 दिये ॥ सो ये तीन स्वरूप ता श्रीगोकुलमें श्रीमहाप्रभूजीको मंदिर बाजे
 हे उहां भटके माथे बिराजत हे ॥ सो फेरि वा भटके वहुने मंदिर सुद्धां
 तिनयो स्वरूप श्रीचंद्रमाजीके इहां श्रीगोविंदलालजीके सोंपण करि दीये
 एसे सुनी हे ॥ ओर तीन स्वरूप कोटामें तीघरा बंसीधर भटके वंशवारे
 सेवा करे हे ॥ छोटे श्रीआचार्यजी बाजे हे ॥ ओर श्रीचंद्रमाजीके इहां
 श्रीगुसांइजीके पादुकाजी दुसरे जोडी १ बिराजे हे, ओर दुसरी पलंगडिपें
 बिराजे हे सो जोडी १ श्रीरघुनाथजीके हे ॥ ओर तीसरी पलंगडिपें जोडी १

श्रीदेवकीनंदनजीके लालजी श्रीरघुनाथजीके हे ऐसे तान जोड़ी पादुकाजी श्रीचंद्रमाजीके पास बिराजे हे ॥ सां जहां तांइ श्रीचंद्रमाजी बालकसों बोलते सो स्वरूपके पादुकाजी आपके निकट बिराजत हे ॥ ओर श्रीयदुनाथजी उपनाम श्रीमहाराजजीके पादुकाजी शेरगढमें श्रीकल्याणरायजीके पास बिराजत हे ॥ ओर श्रीमदनमोहनजीके पास श्रीमहाप्रभुजीके श्रीहस्ताक्षरका पोथीजी श्रीमधुराष्टककी टोकाकी बिराजे हे [सांभलवा प्रमाणे आ श्रीमधुराष्टक उपर श्रीघनश्यामजीए अठार हजार श्लोकनो टीका करी छे ते बिराजे छे] ॥ दुसरि पलंगडीपें श्रीगुसांइजीके मोजा बिराजत हे ॥ ओर श्रीघनश्यामजीनें पादुकाजी धारण करे नही हे, ताको कारण आप आज्ञा करते जो हमारे तो छे दादा माथेंपें बिराजे हे तासों हमारे माथे काकाजी बिराजत हे तासों हमतो खडाउं नही पेहेरे हैं ॥ तासों श्रीमदनमोहनजीके पास श्रीघनश्यामजीके मोजाजी बिराजत हे ॥ ओर श्रीमुकुंदरायजीके पास श्रीमहाप्रभुजीके श्रीहस्ताक्षर बिराजत हे ॥ तथा श्रीगुसांइजीके दोय श्रीहस्ताक्षर बिराजत हे ॥ ओर श्रीबालकृष्णजीके इहां श्रीनाथजीके श्रीपादुकाजी बिराजे हैं, ऐसे सुनी हे ॥ सो कोन रीतिसों पधारे तथा ओर कौन कौन स्वरूप बिराजत हे सो हमारो जानों नही भयो तासों उहांकी खबर नही हे ॥ अब श्रीनटवरजीके पास बिराजत हे ताकी विगत २ श्रीगुसांइजीके, १ श्रीगिरिधरजीके, श्रीमथुरेशजीके पांतीके, १ श्रीगोकुलनाथजीके, सो काकाजी श्रीब्रजरायजीने श्रीलक्ष्मणजीके बहुजोके पास मागिके पधराये ॥ सो पांच स्वरूप एक पलंगडिपें बिराजत हे ॥ ओर नगरठट्टामें श्रीमहाप्रभुजीके श्रीपादुकाजी बिराजत हे ॥ सो जुनागढवारे श्रीमगनजीने दुसरे पधरायके वे प्राचिन हुते सो पधराय गये, ओर ये पादुकाजीको गोस्वामी श्रीघनश्यामजीके लालजी श्रीचीमनजीहुं दुसरे पधरायके ले गये, सो अब मुंबइमें इनके इहां बिराजत हे ॥ एसेइ धोलकामें श्रीमोहनलालके पास श्रीगुसांइजीके पादुकाजी बिराजत हुते सो

पोरबंदरवारे श्रीगोपीनाथजीके लालजी श्रीब्रजजीवनजी दुसरे पधरायके उहां-
 सों वे लेके डेरानमें आये, ओर रात्रिकुं श्रीमोहनलालने वे शोठको सेवा
 करते बिनकुं स्वप्नमें आज्ञा करी जो इहां श्रीगुसांइजी बिराजते सो पधारे
 तासो मेंहुं इहां न रहोंगो ॥ सो तत्काल चोंकि उठे, ओर पांच दश वैष्णव
 भेले होयके श्रीब्रजजीवनके डेरापें गए, ओर आपको जगवाये जो हमारे
 कलु बिनती करनो हे, तब खवासने जगाये सो आप समज गये जो या
 बिरियां आये हे सो कारण कलु ओर हे ॥ तासों कहिके सवेरे सुनेंगे ॥
 तब बिननें फेरि बिनती करवाइ जो सवेरे तांइ हम सब जन भूखेइ
 इहांइ बेंठी रहेंगे, ओर हमारी बिनती सुने बिना आप दंतधावन करेंगे
 तो आपकु श्रोनाथजीके शपथ हे ॥ ओर बिनमें सुं एकजनो गयो सो
 सरकारको पेहेरा लायके धरवाय दियो ॥ सो आखो डेरा विगेरे सब मनु-
 प्यादि घेरि लिये ॥ ओर तीनदीना तांइ बडो क्लेश भयो ॥ सब वैष्णव
 भुखे रहे, ओर श्रीब्रजजीवणजी हुं न आरोगे, आंणदीनी जासों ॥ फेरि
 बिनती करी जो आप हमारे श्रीठाकुरजी देहो, नही तो हमारे कंठीको
 धर्म जायगो ॥ फेरि राजको भय खायके श्रीपादुकाजी पीछे दिये, सो
 पधराय लायके श्रीमोहनलालके पास पधराये ॥ तब श्रीठाकुरजी प्रसन्न
 भये ॥ सो श्रीमोहनलालके पास श्रीपादुकाजी जुगलजोडि न्यारी पलंगडिपें
 बिराजे हे ॥ ओर दूसरी पलंगडिपें चार बालकनके चार जोडी श्रीपादु-
 काजी बिराजे हे ॥ श्रीगिरिधरजी तथा श्रीगोविंदरायजी, श्रीबालकृष्णजी,
 तथा श्री रघुनाथजीके या भांति चार जोडि हे सब मिलिके दस पादुकाजी
 बिराजे हे ॥ श्रीमोहनलाल राजा आशकरणजीके श्रीठाकुरजी हे ओर
 दूसरे श्रीनागरजी हुते सो मुंबइमें गोस्वामी श्रीजीवणलालजीके माथे
 बिराजत हे ॥ ओर श्रीमोहनलालजी तथा श्रीपादुकाजी शोठाणी प्रेमकोर
 बाइने हमारे इहां पधराय दिये हे, सो घरको बहिवट चलायवेकुं
 “मजमुंदार मनसुखभाइकुं” राखे हे ॥ ओर श्रीपादुकाजी जा दिना

सों घोरीमें गये ता दिनासों श्रीदादाजी महाराजने बंदोबस्त करी दियो जो ओर श्री गोस्वामी बालकनको अपरस होय सो सेवा न करि शके दर्शन तथा आरती करे एसे रीति राखि हे ॥ ओर श्रीगोकुलनाथजीके चतुर्थ लालजी श्रीपितांबरजीके बहुजा चोरिके पधराय लाये हे ॥ सो विनको पत्तो कहुं नहि हे जो कहां बिराजे हे ॥ वाइ दिन सों श्रीगोकुलनाथजीके घरमें बंदोबस्त होय गयो हे जो अद्यापताइ गोस्वामी बालक बहु बेटीनकुं चर्णस्पर्श नहि होय, दर्शन भलेइ करो, विनके कोइ सों व्यवहार नहि हे ॥ ओर श्रोनाथजीके इहां श्रीमहाप्रभुजीके श्रीपादुकाजी युगल स्वरूप मणिकोठामें गवाखेमें बिराजते हुते सो वामें ते एक पादुकाजी कोइ पधराइ ले गयो ताकी खबर पडी नहि, सो वादिना सों दुसरे श्रीपादुकाजी निजमंदिरमें श्रीनाथजीके दक्षिणभाग बिराजे हे ॥ श्रीबालकृष्णजीके इहां श्रीनाथजीके दोय पादुकाजी बिराजे हे एसे आगे उहांके प्रसंगमें लिखे हे, जो कोन भांति पधारे ताकी खबर नहि एसे लिख्यो हे ॥ सो ताको निश्चै गोस्वामी दादा श्रीगोपिकालंकारजी सों पुछी कें कर्यो सो आप आज्ञा करे ॥ जो श्रीनाथजीकी सेवा आगे बंगाली करते, तब अनोसरमें पेंडेपें पधरावते सोये पादुकाजी हे ॥ ओर श्रीबालकृष्णजी महाराजके श्रीपादुकाजी औरंगाबादमें एक वैष्णवके घर बिराजेहे, ताको नाम याद नही हे सो खबर मगाय लिखायवेंगे ॥ ओर कोटा में श्रीबडे आचार्यजी युगल जोडी बिराजत हे तिनकी वारता ॥ गोस्वामी श्रीत्रीकमजी मामाजीके लालजीके लालजी श्रागोविंदलालजी भाइसों पुछी सों कही जो ए श्रीपादुकाजी वेणीदास माधवदासके माथे बिराजते, फेरि कामवन वारे श्रीगिरिधारीजी हमारे बडे विनके माथे बिराजते हुते ॥ ओर छोटे मंदिरमें श्रीपादुकाजी श्रीमथुरानाथजीके पास बिराजे हे सो श्रीगुस्ताइजीके हे ॥ ओर श्रीगोकुलनाथजीके पादुकाजी युगल श्रीमथुराजोमें श्रीदाउजीके पास बिराजते हे ॥ ओर हुं कितनेक ठेकाणे श्रीगोकु-



लनाथजीके पादुकाजी बिराजे हे ॥ ओर वैष्णवके घर हुं बिराजते हे ॥ ओर एक पेटी भरिके श्रीगोकुलनाथजीके पादुकाजी न्यारे बिराजे हे ॥ ताके दर्शन हमकुं मुखियाजी सुंदरजीने कराये हे ॥ तब दासने विनती करी जो कृपानाथ ! इतने पादुकाजी पेटि भरिके केसे भये होइगें ॥ तब आप आज्ञा करे ॥ जो श्रीगोकुलनाथजीके सेवक बडे टेकी हुते, ओर भाव प्रभुनके उपर बोहोत हुतो, सो नित्य नये पादुकाजा जोड करायके प्रभुनकुं धरावते फेरि अपने घर ले जाय तासों बहोत भय ॥ सो वैष्णव-नके घर सेवा नहि बनी तब इहां पधराये ॥ सो श्रीगोकुलनाथजीके इहां ट में भेले बिराजे हे ॥ अपने तो बिराजमान बालकके पादुकाजीकी सेवा नहि होय सके ॥ ओर विशेष भाव आसकि होय तो चरणारविंद वख्रपें छपवाइके सेवा करे एसी रीत हे ॥ श्रीगोकुलनाथजीके वैष्णवकी तो अनोखी रिती हे ॥ इति श्रीगिरिधरलालजी महाराजके वचनामृत एकनो चरमो संपूर्ण ॥ ६९ ॥

 [वचनामृत ७० मो.] 

अब सीत्तेरमो वचनामृत आप आज्ञा क ॥ जो अब दासने विनती करि ॥ जो श्रीगिरिधरजीके ज्येष्ठ पुत्र तो श्रीदामोदरजी हुते सो टिकेत पणो तो उनको बजे, ओर छोटे पुत्र श्रीगोपिनाथजीकुं श्रीमथुराधिश केसे दिये ? तब आपने आज्ञा करी ॥ जो श्रीगिरिधरजीके माथे रिण हतो, सो श्रीगोपिनाथजी परदेश पधारे सो वहां एक राजाके इहां सुवर्णको काल पुरुषको दान होत हुतो सो कोइ ब्राह्मण न ले शकतो, जो लेवेकुं जाय ताके साम्हे अंगुरिया ॥ एक उंचि करि दिखावे, सो देखिके सब डरि गये, कोउ न ले शके, सो एसे करत एक महिना वित्यो तब राजानें कह्यो जो कोउ ब्राह्मण जगतमें साचा नहि हे जो दान लइ शके ! सो ए वार्ता श्रीदक्षितजीके पास आई आपको नाम श्रीगोपीनाथजी ओर जगत प्रसिद्ध उपनाम श्रीदक्षितजी बाजे हे सो आप संख्या वंदन करत हुते ओर काहु ब्राह्मणनें आइके विनती

करी जो महाराज राजानें काल पुरुषको दान करिवे काढयो हे, सो कोइ ब्राह्मण ले नहि शकेहे, तासों राजा बोले हे जो अब जगतमें ब्रह्मविज नहि हे ॥ तब श्री दिक्षितजी बोले जो एसे क्यों बोले हे ! तो ॥ काल पुरुषको दान हम लेइंगे ! ॥ सो वाइ त्रिरियां संध्या करिके आप राजद्वारमें पधारे सो वाइ काल पुरुषके पास पधारे सो उहां वह काल पुरुषने एक अंगुरिया उंची करी तब आपने तीन अंगुरिया उंची करी, तब वे पुतळा धरतीपें गीर्यो सो वामें तें आधो तो कटवायके उहांके ब्राह्मणको षटवाय दिये, ओर आधो लेके घर पधारे ॥ सो श्रीगिरधरजीको रिण सब उतारि दिये, तासों श्रीगिरधरजी अत्यंत प्रसन्न भए ॥ ओर आज्ञा करे जा एक बेर मंदिरमेंसो श्रीनवनितप्रियजी विना जो चाहे सो ले आवो ॥ सो तुमकुं माफ हे ॥ तुमसों उठे जीतनो ॥ फेरि श्रीमथुरेशजी, श्रीपादुकाजी, श्रीअनंतशयनजी, शालिग्रामजी विगेरे अनेक प्राचिन वस्तु आपनी इच्छा अनुकुल उठि गये सो लेके पधारे ॥ एसे श्रीनवनितप्रियजी श्रीमथुराधीश न्यारे घर भये ॥ ओर श्रीदिक्षितजीने श्रीगोकुलमें श्रीमथुरेशजीको मंदिर बनवायो ॥ ओर श्रीगिरिराजमें श्रीनवनितप्रियाजीको मंदिर श्रीदामोदरजीने बनवायो ॥ ओर श्रीअनंतशयनजी श्रीनंदरायजीके पूजनको स्वरूप हे, जो श्रीठाकुरजीने श्रीमुखमें ले लिये हुते सो स्वरूप ए हे ॥ एक समे श्रीनंदरायजी अपने सेव्य स्वरूप श्रीशालिग्रामजीकुं स्नान करवाय चंदन तुलसी समर्पि भोग धरो, आप ध्यान कर्यो ॥ इतनेमें श्रीठाकुरजी खेलते खेलते पधारे सो ए श्रीशालिग्रामजीकुं श्रीमुखमें धरि लिये, फेरि खेलवेकुं थोडिसी दूर चली गये, फेरि श्रीनंदरायजी ध्यानमें ते जागीके देखे तो श्रीशालिग्रामजी सिंघासल उपर नहि हे, सो सबनकुं पूछे जो मेरे श्रीठाकुरजी कहां गये ? इतने श्रीठाकुरजी पधारे सो श्रीमुखमें तें काढि दिये ॥ सो वे श्रीअनंतशयनजी हे सो श्रीमथुरेशजीके पास बिराजे हे ॥ सो सात स्वरूपमें श्रीजीद्वार पधारे तब चोरीमें पधारे ॥ श्रीमित्रविदा बहुजीने बोहोत

क्लेश कर्ष्ये ओर बोहोत दिना तांइ न पधारे फेरि अकस्मात् पधारे सो वे अब रुपाके बंटामें बिराजे हे ॥ ओर प्राचिन वस्तु श्रीमथुराधीशके घरमें वहोत बिराजे हे ॥ ओर श्रीनटवरजी श्रीमथुराधिशाजीकी गोदकें श्रीठाकुरजी हे सो श्रीमथुरेशाजीकी गोदमें ते न्यारे करिकें श्रीरणछोडजी महाराजने जोधपुर पधराये, पाछे वहांको राजा अन्यमार्गिय भये ते राजनगर पधारे, सो अथापो तांइ राजनगरमें दोशीवाडाकी पोलमें बिराजे हे ॥ सो श्रीछोटाजीनानाजीके बहुजी श्रीब्रजकोरबहुजीने काकाजी श्रीब्रजउत्सवजीकुं गोद लिये ताको क्लेश श्रीमथुरेशाजी वारे तथा श्रीब्रजरायजी काकाजी परस्पर बहुत लडे राजद्वारमें अरजी पुरजा करे तो हुं हाथ न आये ॥ सो श्रीमथुरेशाजीवारे तथा काकाजीकुं कलु व्यवहार नही हे ॥ इति श्रीगिरिधरलालजी महाराजके वचनामृत सीत्तरमो संपूर्ण ॥ ७० ॥



 [वचनामृत ७१ मो.] 

अब दासने विनती करी ॥ जो श्रीगिरिधरजीके बडे पुत्र श्रीमुरलीधरजीकुं विष भयो, एसे आपने आज्ञा करी सो वार्ता कैसे भइ ? सो कृपा करिके कहिये ॥ तब आप आज्ञा करे जो श्रीमुरलीधरजी इंद्रप्रस्थ देशाधिपतिके पास चाकरीकुं पधारे हुते, सो वा समय आपकी वय वर्ष ११ अगियारकी हुती सो पृथ्विपतिकुं जल पिवावते, सो श्रीगुसांइजी आप कंदरामें लीला प्रवेश किये ता पाछे ये पधारते परंतु पादशाहने कही के अबि मति जाओ, दोय वर्ष पीछे जैयो, हमकुं ओर को विश्वास नहि हे तासों कोइ तुम्हारो भरोंसादार आदमी हमारे पास राखी मोकुं जल पिलावे एसे बंदोबस्त करिके पधारियो ॥ बाइ प्रमाण दो वरस पीछे आप श्रीगोकुल पधारे ॥ सो श्रीनवनितप्रियजीके मंदिरमें पधारे, सो बेसेइ सुंथन पहेरे थके, श्रीमथुरेशाजीके तथा श्रीनवनितप्रियजीके दर्शन करे ॥ ओर श्रीगिरिधरजीसों पुछे जो दादाजी ओर सब श्रीठाकुरजी कहां पधारे ? तब श्रीगिरिधरजी कहे जो बावा वे स्वरूप ओर भाइनके हुते सो अपने अपने

पधराय गये ॥ ता समय रीस करिके रीस मनमेंहो मारी, ओर बालक चार पांच ठाडे हुते सो मनमें समजी गये ॥ फेरि दुसरे दिन श्रीनाथजीके दर्शनार्थ श्रीगोपालपुर पधारे सो वेसेइ सुंथन कमर बांधे थके, श्रीनाथजीके दर्शन करे ॥ श्रीगोकुलनाथजीको श्रृंगार हुतो, श्रीगोकुलनाथजीने देखके आज्ञा करी जो अपनो मारग कमी चले हे ? तुमनें श्रीनाथजीकी कानि तोडि, सो अगाडि ए मारग चलेगो ? दादासों काकाजी कहा आज्ञा करि गये हे ॥ सो तुमसों कलु कहि के नहि ! या समें आपन विचारी के चले तो आछो हे ? और दादाको तो शान्त स्वभाव हे सो कोउको कलु कहे नही, ओर हमसो तो कहे बिना रह्यो न जाय, तुम रीस मानो तो भलेइ मानो, सो रीस चढायके श्रीगोकुलनाथजीसों यावनी भाषामें बोले ॥ जो आप चाचा हे तो घरकेहो परंतु हमसों तिलतोफान मति करो, नहि तो हम फल देखाय देइंगे ॥ ओर दादाजीकुं भोरे जानिके तुम सबननें दबाय दियेहे तेसे मोकुं मति जानियो ॥ सो यह बात सुनिके श्रीगोकुलनाथजी चुप होइ गये ॥ ओर सब सेवकनकोहु बुरी लगी तथा बालक ओर पास ठाडे हुते तिन सबनकुं बुरी लगी, तब श्रीगोकुलनाथजीनें पीछे इतनी कहीजो जादिना दादा न होइंगे तब तो ए आपनकुं श्रीगोकुलमें बसवेहु न देइंगे, इनकुं तो पृथ्विपतिको बल हे ॥ ओर हमारे तो श्रीनाथजीकोइ आश्रय हे ॥ जो प्रभुजी करेंगे ॥ सो भलीही करेंगे परंतु हमारी हुं इतनी कानि न राखी तो आगे बालकनकों तो कहा पतो लगेगो ॥ सो यह बात दो तिन बालकनें सुनिके बिचार कर्यो ॥ ओर श्रीगोकुलनाथजी श्रीनाथजीकुं पोढाय, अनोसर करिके, श्रीगोकुल पधारे दुसरे दिन श्रीमुरलीधरजीने श्रृंगार काये ओर श्रीनाथजीकुं पोढायके मथुराजी पधारे ॥ मथुरामें पाइशाहकी आडिको बंदोबस्त कलु करनो हुतो ताकी भलामण आपकुं हुती सों फेरि मथुराजीमें झेर भयो सो अरोगावेवारेको नाम लिखवेमें नहि आवे हे ॥ सो बिषके जेहेरसों आपतो लीलामें पधारे सो फेरि खवासनकुं खबर पडी

सो श्रीगोकुल श्रीगिरिधरजीकुं खबर करवेकुं गये, इतनेमें दो तिन बालक आयकें झट अग्नि संस्कार करि दिथो ॥ सो खबर श्रीगिरिधरजीकुं रावलके घाटपें भइ जो उहांतो अग्नि संस्कार होय गयो हे ॥ सो श्रीगिरिधरजी पाछें श्रीगोकुल पधारे ॥ श्रीगिरिधरजीकुं श्रीगुसांइजी आपने मृत संजीवनी विद्या शिखाइ हुती तासों दोड़िके पधारे परंतु अग्निसंस्कार भये पीछे कल्लु चले नहि ॥ फेरि वे खवासने देशाधिपतिपें जायके पुकारिके सब वृतांत कह्यो तापर पृथ्वीपति बोहोत रिस भयो ओर दो हजार फोज तथा एक अमिनकुं हुकम भयो जो श्रीगोकुल जाओ श्रीगिरिधरजीको पुछीके जीनने यह कर्म कर्यो होय तिनकुं पकडिलाऊ, ओर पादशाहने बडो क्लेश कर्यो, ओर रुदन कर्यो, फेरि वे अमिन परवाना लेके श्रीगिरिधरजीके पास आयो सो श्रीगिरिधरजी परवाना वांचिके आज्ञा करि जो एसी जुठी बात कोनने देशाधिपति आगे करि, वे तो विनकी एसी लिखि हुती तासों लीलामें गये कोउने कल्लु करी नही हे ॥ तब अमीनने कही के आप राजीनामों पृथ्वीपतिसों लिखि देउ ? तब आपने कही हां लिखि दे ॥ सो राजीनामो लिखि दीनो सो राजीनामो लेके अमीन देशाधिपतिके पास गयो, सो देशाधिपति वांचीके श्रीगिरिधरजीकी बडी प्रशंसा करी ॥ जो एसे महात्मा पृथ्वीपर होने कठिन हे ॥ एसे श्रीमुरलीधरजीकुं विष भयो ॥ एसेइ श्रीविठ्ठलरायजीके लालजो श्रीगिरिधरजीकुं दानघाटीपें लोधानने बरछी मारी ॥ लोधें ओर गोरबे अन्नकुटकी चादर बाबत लडते, सो आप समजायवे गये, तासों बरछी मारी ॥ सो फेरि आप औषध करवाये सो घाव पुरवे आयो तब लाघेनने विचारो जो ए जीवेंगे तो सबनके प्राण लेइंगे, तासों नाइकू कल्लुक द्रव्य देके वाके पास झेरकी पटी चढवाइ सो आप लीलामें पधारे ॥ सो वाइ दिनसूं श्रीनाथजीके इहां अन्नकुटके दिन मीडामें चादर बिछनी बंध भइ ॥ सो अद्यापतांइ नही बिछे हे ॥ इति श्रीगिरिधरलालजी महाराजके वचनामृत इकातेरमो संपूर्ण ॥ ७१ ॥



करवायो ॥ तासों जीवकुं विना सामर्थ्य उन्मदताकी बात करे तो अप-
राधी होय ॥ ओर ब्रह्मज्ञानहुं कलु सहजनही हे ॥ या बातके तांइ बडे
बडे ज्ञानी माथो कूटी मरे हे परंतु सिद्ध नहि होय हे ॥ ए तो केवल
श्रीगुरुदेवकी कृपातें सिद्ध होय हे ॥ इति श्रीगिरिधरलालजी महाराजके
वचनामृत बोतेरमो संपूर्ण ॥ ७२ ॥

 [वचनामृत ७३ मो.] 

अब आपनें त्रयोसततितमों वचनामृत आज्ञा करे ॥ जा भगवान
निष्कपट हे, सत्यहि भाषण करे हे ॥ सो तापर वार्ता कहि जो ॥ एक
राजा हतो ताके एक बेटी हुती सो वाकी सगाइ तीन जगे भइ हती, एक
तो पीताने करी, एक वाकी मानें करी, एक वाकी भुवाने करी, ओर तिन्यो
जगे तें बरात एकहि दिन आइ, सो राजाकुं पीछे सो खबर पडि जो एसे
भइ हे ॥ सो राजा बडे सोच युक्त भयो जो अब केसे करनो ॥ सो वे
लग्न तो टालि दियो ओर वे तीन्यो व्याहवे आये थके राजानकुं हुं खबर
पडी गइ जो कन्या तो एक हे ओर व्याहवे तीन भेले भये हे, सो तीन्यो-
नने राजासुं खबर करी जो जाकुं कन्या न व्याहोगे सो लडेगो ओर
गामहुं लुंटेगो ॥ सो ए बात जानिके राजाकुं बडो विचार पडि गयो, इतनें
में श्रीभगवान गरुडजो उपर बिराजीके पधारे हुते, सो गरुडजोने नीचे
देख्यो ॥ तब भगवानसुं पुछी जो महाराज ए कन्या कोनसुं परणेगी,
इतनी गरुडजोनें पुछो ओर श्रीभगवान आज्ञा करे इतनेमे बात होतमें तो
हजारन कोस चले गये ॥ सो निचे दिखीके श्रीप्रभुजीने आज्ञा करे जो
ए कन्याकुं उहां ऐक घसियारो घास खोदतो हुतो सो बतायो, जो ए
परणेगो ॥ सो देखिके गरुडजीकुं शंका भइ जो भगवानहुं एसे गपोडा
मारे हे ॥ सो श्रीठाकुरजीकुं तो बेगि वैकुंठमें पधरायके पाछें उतावळे
अकेले वा घसियाराके पास आये, आयके बंदोबस्त कर्यो जो वाकुं अपनी
शौचमें पकड्यो पकडिके समुद्रके बिचमें एक टापु हुतो जहां मनुष्यकी

जायबेकी गम्य नहि हे, तहाँ ले जायके धरि दियो ॥ फेरि मनमें विचार्यो जो चलो देखे जो ए कन्या कोनकों घरणे हे ॥ एसी विचारीके एक पर्वतके उपर सुक्ष्म रूप धरिके बेठे सो तमासो देखि रहे हे ॥ ए बात यहाँ सो रही ॥ अब राणीने मनमें विचारो जो अपनो सगाइ ब्रथा न जाय तो आछो हे ॥ ताको कट्टू बिचार करनो ॥ सो राणिने बिचार कर्यो जो अपनी सगाइ वारे राजाकुं एक पत्र लिख्यो तामें लिख्यो जो में मेवाके झांपा नाम लेके एकसो आठ पठाउंगी, तामें तौ सब कन्याको गेहनो, तथा दायजेकी चीज, तथा छेले झांपिमें कन्याकुं बेठायके तुम्हारे पास पठाउंगी, सो लेके कृच करियो ॥ एसे पत्र लीखीके राणीने अपनी सगाइवारे राजाकुं पत्र पठायो ॥ ओर झांपा चलते करे फेरि छेले झांपिमें कन्याको व्याहको साझ सब कंकण, दोरा, कपडा, गेहेनो, पेहेराय पीरे हाथ करिके बेठाइ, ओर झांपा चलाय दियो, ॥ सो गरुडजी पर्वतपें बेठे बेठे देखते हुते सो चित्तमें आइ जो में बाको समुद्रमें बेठारी आयो हुं सो वह भूखन मरतो होयगो सो वाके तांइ ले जाउं तो बहोत आछो, एसे मनमें विचारी के गरुडजी उडे सो उडि के छेछो झांपा अपनी चोंचमें लेके चले सो वा घसियारो समुद्रके टापुमें बेठ्यो हुतो वाके पास ले जायके धर्यो, फेरि वासों कह्यो जो या झांपामें होय सो खोलि के तुं खा ॥ तब वानें कही जो आछो ॥ फेरि वाने झांपा खोलिके देखे तौ वामें एक कन्या बेठी हे, सो, देखिके गरुडजी अत्यंत आश्चर्यको प्राप्त भए ॥ ओर हाथ जोडिके श्रीप्रभूजीकी स्तुति करवे लगे ॥ जो धन्य प्रभू वैकुण्ठनाथ ! आप इश्वर अंतर्यामि हो, सो सांचे हो, मेंने जुठ मानी सो कार्य मेरेइ हाथ आपनें करवायो ॥ एसे त्रिनती करि वा घसियारा सो कहि के तुं हुं या झांपामें बिठि जा. सो फेरि वाकुं झांपामें बेठाय वा झांपाकुं उठाय वा कन्याको बाप राजा हुतो वाके पास ले गये, फेरि वाने गरुडजीकू पधारे देखिके अपनो धन्य भाग्य मान्यो ओर उंचे सिंघासनपें पधराये ओर वेद मंत्रोक्त

मधुपर्क करिके, षोडशो पष्कार पुजा करी, चरणामृत लेके, हाथ जोड़िकें स्तुति करवे लग्यो ॥ आज मेरे उपर एसे संकटमें बड़ी कृपा करी मेरी सुधि लीनी ॥ अब आपके दर्शनतें मेरो संकट जरूरही निवारण होयगो ॥ तब गरुडजी जानत हुते तो हु आज्ञा करी जो तेरे कहा संकट हे तब राजाने बिनती करी कही जो मेरे येह संकट हे तब गरुडजीने कछो जो ए झांपा खोली; तब देखे तो अपनी कन्या तथा एक घसियारो भीतर हे ॥ सो राजानें देखीके गरुडसों पुछी जो ए कौतक केसो हे ? तब गरुडजीनें पहले सो मांडिके ए बात राजासों कही ओर कही जो अब तो तेरो यह जमाइ हे, सो याकुं तुं कन्याको व्याह करी दे ॥ यों कहिके वा घसियाराको व्याह करायके तीन्यो राजाकुं समजायके चलाय दिये ॥ ओर राजाको संकट निवर्त्त भयो ॥ फेरि श्रीगरुडजी वैकुंठमें श्रीप्रभुजीके पास गये, ता बिरियां श्रीप्रभुजी दैया उपर पोढे हते, श्रीलक्ष्मिजी चरणारविंद दाबते हते, सो गरुडजीकुं देखिके आज्ञा करी ॥ जो तुम तमासो देखवे गये हुंते सो वे कन्या कोनसे राजाकुं परणी? तब गरुडजीने हाथ जोड़िके बिनती करी जो कृपानाथ ! अब मेरी हांसी क्यों करोहे ! आपको कीयो सब होय हे ॥ सो आपके वचन सत्य हे ॥ जीव हे सो तो काष्टकी पुतलीवत् हे ॥ आप नचावे तेसो नाचे ॥ एसे बिनती करीके गरुडजी निजधाम पधारे ॥ इति श्रीगिरिधरकालजी महाराजके वचनामृत त्रोतेरमो संपूर्ण ॥७३॥

 [वचनामृत ७४ मो.] 

अब आपनें आज्ञा करी जो श्रीव्रजहे सो श्रीपुरुषोत्तमको निजधाम हे ॥ ओर आपको स्वरूपात्मकहे ॥ तापें आपने एक आरुक्काइका कहीजो ॥ एक समय प्रयागराज उपर श्रीपुरुषोत्तम आप प्रसन्न भए, सों सब तीर्थनको राजपदवी दीनी, सो राजा भए ॥ तब सब तीर्थ प्रयाग राजकुं मुजरो करिवे आये सो सबनको मुजरो होय चुक्यो. तब तजवित करी जो अब सब आय चुके तब मालम पडिजो व्रजके तीर्थ तो आये कोइ नही

तब श्रीठाकुरजीको प्रयागराजनें विनती करी जो महाराजाधिराज आपकी कृपा तें सब तीर्थतो मुजरो करि गये, परंतु ब्रजके तीर्थ तो आये कोइ नहीं ॥ तब आपनें आज्ञा करि ॥ जो तोकुं तो तीर्थको राजा कर्यो हे, ओर हमारे घरको तो राजा नहीं कर्यो हे ॥ जो ब्रजके तीर्थ आवे ॥ ब्रज हे सो तो हमारो घर हे, तासों ब्रज हे सो श्रीपूर्णपुरुषोत्तमको मुख्य धाम हे ॥ ब्रजमें दोय वनकी बडोसीमाहे, तामें चोरासी कोसमें सब तीर्थ तथा स्थल आय गये ॥ सो श्रीगुसांइजी श्रीयमुनाष्टपदीमें निरूपण करे हे जो वचन “वृन्दावने चारुवृहद्वने मन्मनोरथं पूरय सूरसूते,” सो मधुवनतें लेके नंदघाट तांइ श्रीवृन्दावनकी सीमा हे ॥ ओर वृन्दावनतें लेके श्रीगोकूल तांइ ब्रह्मवन जो महावनकी सीमा हे ॥ ओर मथुरा हे सो दोउनसों न्यारी हे ॥ जो मथुरामंडल बाजे हे ॥ ओर श्रीयमुनाजी दोउ बनको विभाग करे हे ॥ ओर रत्नजडित श्रीयमुनाजीकी सीढी हे. ओर अनेक बागवगीचा आदि नाना प्रकारके वृक्ष हे सो श्रीठाकुरजीके रमण स्थल हे ॥ ओर श्रीगोवर्धन हे सो श्रीठाकुरजी आपकों स्वरूपात्मक रूप हे ॥ तामें अनेक प्रकारके रमण स्थल हे ॥ ओर रत्नजडित हे ॥ ओर कामवनमें जेते पृथ्वीमें तीर्थ हे तितनें सब हे ॥ तासों वहां परिक्रमा चार दिन रहे हैं. तासों सकल कामना पूर्ण करि तासों कामवन नाम हे ॥ जेते ब्रजके तीर्थ हे सो स्वार्थिक हे सो नाम हे तेसेइ गुण हे ॥ ओर श्रीमहावन हे सो श्रीपूर्णपुरुषोत्तमको प्रागटय स्थल हे ॥ ओर रावल हे सो श्रीस्वामीनीजीको प्रागटय स्थल हे ॥ ओर श्रीवृन्दावन हे सो युगल स्वरूपको रमण स्थल हे ॥ या प्रमाण सब स्थल श्रीप्रभुनकी लीला उपयोगी हे ॥ ओर ब्रजभक्तनके मनोरथ जहां जहां जे जे स्वरूप धारण करिके आप दर्शन दिये सो सो ब्रजमें स्थल बंधे, सो बोहोत काल करिके गुप्त होय गये सो फेरि उद्धवजी तथा श्रीभगवानके पंती वज्रनाभजीनें उद्धवजीके कहे प्रमाण स्थल प्रगट करे ॥ ओर वा स्थलनमें स्वरूप पधराये तासों

व्रजलीलाको स्वरूप उद्धवजीनें व्रजभक्तनकी कृपातें जान्यो हे सो व्रजना-
भजीकु बताये ॥ ओर आप गुल्मतौषधी होय के उद्धव कूंडमें रहे हे ॥
इति श्रीगिरिधरलालजी महाराजके वचनामृत चतुरसतितमो संपूर्ण॥७४॥



वचनामृत ७५ मो.



अब श्रीव्रजमें जीतनी पुरातन वस्तु हे सो ताके नाम लिखत हे ॥
सो आपनें पंचोत्तरमो वचनामृत आप आज्ञा करे ॥ जो व्रजमें वारे वन
हे ताको नाम ॥ मधुवन, तालवन, कुमुदवन, बहुलावन, कामवन, खिद्र-
वन, शृंदावन, भद्रवन, भांडिरवन, वेलवन, लोहवन, महावन ए वार वन
हे ॥ ओर सोवीस उपवन हे ॥ सांतनकुंड, अडिंग, श्रीकूंड, गोवर्धन,
बरसानो, परमंदरो, नंदगाम, संकेत, मानसरोवर, शेषशाइ, खेलनवन,
श्रीगोकुल, गोपालपुर, गिरिराज, परासोली, आदिबद्रि, विलासगढ, आंज-
नोखर, करेहला, कोकिलावन, दधिवन, रावल, वच्छवन, कुंवरवन, पिसायो
२४ उपवन हे ॥ व्रजमें बट १० हे तामें पीपरोलीबट, जावबट, रासोली,
अक्षय, संकेत, परासोलीबट, बंसी बट, भांडिरबट, विलासबट, श्यामबट
१० हे ॥ व्रजमें श्रीठाकुरजीके चरण चिह्न सात हे ॥ चरण पाहाडी, छोटी-
चरण पाहाडी, हाथीपदकीपास, श्रीगोवर्धनकीतलेटीमें, नंदगाममें, श्रीगोवर्ध-
नके उपर, सुरभीकुंडके उपर, व्रजमें पर्वत पांच हे ॥ श्रीगोवर्धनगिरिराज,
बरसानो, नंदीसुर, कामवनमें चरण पाहाडी-भोजनथारी, दुसरी चरण
पाहाडी ॥ देवी व्रजमें ७ हे ॥ तामें वृंदा, संकेत, कात्यायनी, मथुरा,
नावोरी, सोवारी, महाविद्या, दासी व्रजमें दो हे ॥ वंदी, आनंदी. श्रीमहा-
देवजी व्रजमें आठ हे ॥ भूतेश्वर, कामेश्वर, बुढेबाबु, गोकर्णेश्वर, चकले-
श्वर, रंगेश्वर, नंदीश्वर, गोपेश्वर. कदमखंडि चार हे ॥ सुन्हेराकी, गोविंद-
स्वामीकी, पीसायेकी, दोउमीलकी ये चार हे ॥ श्रीगुसांइजीकी बैठक व्रजमें
सात हे ॥ श्रीगोकुलमें श्रीगोकुलनाथजीके मंदिरमें, श्रीवृन्दावनमें, श्रीगो-
वर्धनगिरिराजमें श्रीमथुरेशजीके मंदिरमें, कामवनमें सुरभी कुंडमें, परासो-



लीमें, संकेतमें, पानसरोवरमें ये सात हे, श्रीबलदेवजी व्रजमें छ हे ॥ श्रीउंचोगाम, अडिंग, रामघाट, नंदगाममें, रेढामें, नरीमें ॥ व्रजमें श्रीठ-
 कुरानीघाट बे ॥ श्रीगोकुलमें तथा रावलमें ॥ हिंडोराकी ठोर ३ हे ॥
 करेहलामें, संकेतमें, गोविंदस्वामीकी कदमखंडिमें. व्रजमें दानलीला ७ तामें
 करेहेलामें, दानगढमें, गेहेवरवनमें, दानघाटी, कदमखंडि, सुन्हेराकी
 कदमखंडीमें, सांकडीखोर ॥ व्रजमें सरोवर ४ हे ॥ पानसरोवर, मानस-
 रोवर, प्रेमसरोवर, चंद्रसरोवर; व्रजमें पोखर ६ हे ॥ कुसुमोखर, हरजी-
 पोखर, आंजनोखरि, पीरीपोखर, भानोखर, इसरपोखर. व्रजमें ताल बे ॥
 रामताल, मुखारीताल ॥ व्रजमें कुप दश हे ॥ सससमुद्रकुप, नंदकुप, भांडि-
 रकूप, कर्णवेधकुप, कृष्णकूप, आनंद निधिकूप, वेद्यकूप, कूब्जाकूप, गोपकूप, ॥
 श्रीयमुनाजीके घाट सोल ॥ ब्रह्मांडघाट, गडघाट, गोविंदघाट, ठकुरानीघाट,
 जसोदाघाट, उत्तरेश्वरघाट, वैकुण्ठघाट, विश्रांतघाट, प्रयागघाट, बंगालीघाट,
 रामघाट, केशीघाट, बिहारोघाट, चीरघाट, नंदघाट, गोपीघाट, ॥ व्रजमें
 डोल ७ हे ॥ गोविंददेवजीके मंदिरमें, श्रीमदनमोहनजीके मंदिरमें, संके-
 तमें, करेहेलामें, दानगढ, मानगढ. व्रजमें प्राचिन मंदिर सत्तर हे ॥ श्रीगो-
 वर्द्धननाथजीको श्रीगिरिराजमें, श्रीमद्गोकुलमें सातो स्वरूपनको सात ७,
 रोहिणी मंदिरमेंसौ श्रीबलदेवजीको, संकेतमंदिर, दानगढमें, मानगढमें,
 श्रीगोविंददेवजीको, श्रीमदनमोहनजीको, श्रीकेशवदेवजीको, श्रीहरदेवजीको.
 श्रीश्यामलालको ॥ रासमंडलके चोतरा ३४ ॥ श्रीवृन्दावनमें पांच ५,
 कामवनमें एक, नंदगाममें दो, करेहलामें दो १०, दानगढमें दो, १२,
 मानगढमें एक, विलासगढमें दो १५, सांकरिखारेमें १६, गेहेवरवनमें १७,
 पिसायाकीकदमखंडीमें १८, जावटमें दो २०, कोकिलावनमें २१, उचेंगा-
 ममें ३, खिसलनी सिलोपें २५, सुन्हेराकीकदमखंडीमें २३, गोविंदस्वामि-
 की कदमखंडिमें २७, संकेतमें ४-३१, श्रीगिरिराजके आगे ३२, चंदस-
 खेवरमें ३३, विल्लुमें ३४, व्रजमें कुंड चोराशी हे ॥ श्रीमधुवनमें कृष्णकुंड

तालवनमें कृष्णकुंड, कमोदवनमेंकृष्णकुंड, बहुलावनमें कृष्णकुंड, सांत नकुंड, गोवर्धनकुंड, श्रीराधाकुंड श्रीकृष्णकुंड, नारदकुंड, मानसीगंगाचक्र-तीर्थ ब्रह्मकुंड, रणमोचन. पापमोचन, संकर्षणकुंड, सुरभीकुंड, अपसराकुंड, गोविंदकुंड, विलासकुंड, रुद्रकुंड, बिल्लुकुंड, अरावतकुंड, गुलालकुंड, परमंदरामें कृष्णकुंड, अलकनंदा, देहकुंड, कदमखंडिमें कृष्णकुंड, दोहनीकुंड रत्नकुंड, मदनसुदनकुंड, रावरीकुंड, गेंदोखरकुंड, गहवरवनमें कृष्णकुंड, संकेतमेंकृष्णकुंड, गोवर्धनमेंकुंड; गोवालपोखरा, उद्धवकुंड, सरस्वतीकुंड, गरुडगोविंदकुंड, नंदगाममें कृष्णकुंड, छछियारीकुंड, दामोदरकुंड, देहकुंड, मोतीकुंड, जसोदाकुंड, ललितकुंड, कदमखंडिमें जलविहारकुंड, मदनसुदनकुंड, जोगियांकुंड, झगडाकुंड, उद्धवजीकोक्यारीकोकुंड, जावमें ललिताकुंड, पिसायामें कृष्णकुंड, खीद्रवनमें कृष्णकुंड, कोकीलावनमें कृष्णकुंड, बठेनमें सीतलकुंड, चरणपाहाडीमेंकुंड, भामीनीकुंड, रासोलीकुंड, कोटवनमें सूर्यकुंड, रासोलीकोकुंड, शेषसाइमें खीरसागरकुंड, ब्रह्मकुंड, वेलवनमें कृष्णकुंड, खेलनवनमें-भद्रवनमें कृष्णकुंड, भांडिरवनमें कृष्णकुंड, श्रीवृन्दावनमें दावानलकुंड, ब्रह्मकुंड, लोहवनमें कृष्णकुंड, जीखिनगाममें बलभद्रकुंड, श्रीमथुराजीमें सरस्वतीकुंड, पोतराकुंड, विद्याकुंड, गोवर्धनमें धरमरोचनकुंड, गोरोचनकुंड, निवर्त्तकुंड, ७५ थया ॥ अब कामवनमें कुंड, आपकी आज्ञासो चोबेजीरमैयाने लिखाये सो कुंड, ८४ हे ताके नाम ॥ विमलकुंड, मदनसुदनकुंड, जसोदाकुंड, लंकाकुंड, परलंकारकुंड, श्वेतबंधरामेश्वरकुंड, गंगागोदावरीकुंड, लुकलुककुंड, महोदधिकुंड, शीतलकुंड, सुरभीकुंड, राधाकुंड, गोपालकुंड; सुरजकुंड, भोजनथारीपें कृष्णकुंड, साताकुंड, राताकुंड, गरुडकुंड, चरणकुंड, चंद्रभागाकुंड, शिवकुंड, गयाकुंड, काशीकुंड, प्रयागकुंड, पंचतीर्थमें पांच कुंड, मनोकामनाकुंड, धर्मकुंड, गौकुंड, श्यामा कुंड, अमिकुंड, मणिकर्णिकाकुंड, द्वारकाकुंड. गोपीकुंड, ब्रह्मकुंड, बलभद्रकुंड, सख्यकुंड, कैलासकुंड, वेहेवलकुंड, गोविंदकुंड, गोपकुंड, इंद्रकुंड, नारद

कूंड, उद्धवकूंड, ग्वालकूंड, गुप्तकूंड, ललिताकूंड, विशाखाकूंड, जलविहार-
 कूंड, मृगीकूंड, पुष्करकूंड, रत्नकूंड, अयोध्याकूंड, रामकूंड, दशरथकूंड,
 सीताकूंड, गायत्रीकूंड, सावित्रीकूंड, सच्चिकूंड, लक्ष्मणकूंड, भरतकूंड शत्रु-
 धनकूंड, वराहकूंड, नृसिंहकूंड, वामनकूंड, कर्णकूंड, गोमतीकूंड, सरस्वतीकूंड,
 चित्रगुप्तकूंड, प्रह्लादकूंड, पांडवकूंड, कूरुक्षेत्रकूंड, हरद्वारकूंड, बेसे तो काम
 वनमें ३०० कूंड हे परि वे सब अंतर्धान होगये हे नैमिषारण्यकूंड, बद्रीकूंड,
 दूर्वासाकूंड. ॥ ८४ भये ॥ ये कामवनमें कूंड हे ॥ अथ श्रीमहाप्रभुजीकी
 बैठक व्रजमें ५२ हे ॥ श्रीगोकुलमें श्रीगोविंदघाटपें, श्रीनवनीतप्रियजीके
 मंदिर पास पलनावारी आपकुं बिराजवेको, ओर तिसरी श्रीद्वारकानाथजीके
 मंदिरमें शैया मंदिरमें सो आपकुं पोढवेकी, श्रीमथुराजीमें विश्रान्त घाटपर,
 श्रीमधुवनमें, कुमुदवनमें, बहुलावनमें, श्रीराधाकूंडमें, मानसोगंगामें, चंद-
 सरोवरमें, गोविंदकूंडपें, आन्योरमें, गोपालपुरपूजनो शीलापे, कामवनसुर-
 भीकूंडपे, गहबरवनमें, संकेतमें, नंदगाममें, कोकिलावनमें, कोटवनमें
 भांडिरवनमें, मानसरोवरपे, श्रीवृंदावनमें वंसोबट ॥ श्रीभंगवत्स्वरूपको
 प्रकार ॥ जो प्रथमश्रीमथुराजीमें मंदिरकी विगत ॥ श्रीवराहजी, श्रीदीर्घ-
 विष्णुजी, श्रीदाउजी, श्रीमदनमोहनजी, श्रीद्वारकानाथजी, श्रीकेशवदेवजी,
 श्रीगतःश्रमजी, नये मंदिरके पाछे मंदिर हे सो प्राचिन हे ॥ श्रीरामचंद्रजी,
 अब श्रीमधुवनमें श्रीमधुवनिया श्रीकृष्ण, श्रीमथुराजीमें सतधरामे श्रीना-
 थजी बिराजे हे सो मंदिर अब सतधरा बाजे हे, श्रीतालवनमें श्रीदाउजी,
 श्रीबहुलावनमें श्रीबहुलाकृष्णजी, जीखिन गाममें श्रीबलदेवजी, श्रीअडिं-
 गमें श्रीदाउजी, श्रीराधाकूंडमें श्रीराधाकृष्णजीको मंदिर, श्रीगिरिराजजीकी
 जीभ्या, श्रीउद्धवकूंडपे श्री उद्धवबिहारीजी, श्रीगोवर्धनमें श्रीहरदेवजीको
 मंदिर संकर्षण कूंडपे श्रीबलदेवजीको मंदिर, आन्योरके पास १९ ॥ श्री-
 चंदसरोवरमें श्रीचंदबिहारीजी, श्रीपे गाममें श्रीचतुरबिहारीजीको मंदिर,
 श्रीगिरिराज श्रीगोपालपुरमें श्रीगोवर्धननाथजीको मंदिर पर्वत उपर,



श्रीढुंका बलदेवजीको मंदिर, श्रीचरण घाटीपे श्रीगिरिराजमें हे, श्रीमदनमोहनजी, श्रीद्वारकेशजी महाराजको मंदिर हे, [हाल श्रीमद्वृजी महाराजनुं मंदिर छे ते] श्रीबद्रिनाथजी श्रीअलकनंदा पे, अब श्रीकामवनमें स्वरूप सात ॥ श्रीगोकुलचंद्रमाजी, श्रीमदनमोहनलालजी, श्रीगोविंददेवजी, श्रीगोपीनाथजी, श्रीराधावल्लभजी, श्रीबलदेवजी, श्रीवराहजी, या रितिसों मंदिर ३२ बत्तीस भये ॥ अब श्रीवरसानेमें मंदिर चार ॥ श्रीलाडिलीजीके पास अष्ट सखी ओर पास बिराजे हे; श्रीमहिभानजीको मंदिर; श्रीवृषभानजीको मंदिर; श्रीकिरतिजी तथा श्रीदामाजी संग बिराजे हे ॥ एसे चार मंदिर बरसानामें हे ॥ जुमलेमंदिर ३६ छत्तीस भये ॥ आंजनोखरमें श्रीपियपियाजीको मंदिर, श्रीनंदगाममें स्वरूप ४ श्रीनंदरायजी; श्रीयशोदाजी; श्रीबलदेवजी; तथा श्रीठाकुरजीछोटी चरण पाहाडीमें श्रीशेषनारायणजी; अब ब्रह्मेशेषशाइजी; शेरगढमें श्रीबलदेवजी गौर; रामघाटपे श्रीबलदेवजी; श्रीचिरघाटपे श्रीचीरबिहारीजी; श्रीगोवर्धनपे—श्रीदानघाटीपे श्रीदानीरायजी ॥ श्रीवृन्दावनमें मंदिर ताकी विमत ॥ श्रीराधावल्लभजी; श्रीराधामाधवजी; श्रीराधारमणजी श्रीबिहारिजी; श्रीमोर्विंददेवजी; श्रीमदनमोहनजी; श्रीशृंगार बिहारीजी; श्रीगोपनाथजी; श्रीकालीयमर्दनजी; जुमलेमंदिर ५५ भये ॥ अब नरीमें श्रीदाउजी, श्रीरेढामें श्रीदाउजी; श्रीगरुडगोविंदजी, श्रीरावलमें श्रीलाडिलीजी तथा श्रीबिहारीजी, श्रीमहावनमें श्रीमथुरेशजी, श्रीगोकुलमें श्रीमथुरेशजी, श्रीबिहलेशराम्यजीको, श्रीद्वारकेशजीको, श्रीनवनितप्रियजीको, श्रीगोकूलनाथजी, श्रीगोकुलचंद्रमाजी, श्रीमदनमोहनजी, श्रीनवनितरायजी जाको राजठाकूर कहे हे, श्रीनटवरजीको, श्रीबालकृष्णजीको, श्रीआचार्यजीको, श्रीदाउजीको, श्रीमदनमोहनजी श्रीकाकाजीको, तथा श्रीमदनमोहनजी श्रीबजेधरजीके, श्रीमदनमोहनजी श्रीनत्थुजीके, श्रीचीतामणिमथोरायजी, अब इच्छा अनुकूल श्रीवृन्दावननादि बिराजमान स्वरूप

श्रीरायगोपालजी, श्रीघनश्यामजी. श्रीनिधिवनमें श्रीब्रजभूषणजी, श्री मोहनरायजी, श्रीलालजी, श्रीरसिकलालजी सब मीलीके मंदिर ८२ भए ॥ इतने ठिकाणे तो वैष्णवकूं दर्शन अवश्य करने चाहिये ॥ अधिक बने तो भलो ॥ इति श्रीगिरिधरलालजी महागजके वचनामृत पंचोत्तरमो संपूर्ण ॥७५ ॥

 [वचनामृत ७६ मो.] 



अब छोहोत्तरमो वचनामृत आप आज्ञा करे ॥ जो श्रीरामचंद्रजी रावणको मारीके अयोध्या पधारते हुते सो मारगमें अगस्ताश्रम हतो तहां आप पधारे ॥ सो उन ऋषिश्वरने बडो आदर सत्कार कयो ओर ऋषिपत्नीने श्रीसीताजीकुं पधराये ॥ फेरि सीताजीकुं ऋषिपत्नी वार्ता पुछवे लगे ॥ जो आप उहां लंकामें कौनसो ठोर रहे, ओर श्रीरघुनाथजी आपकुं कोनभांती पधरायलाये सो वार्ता कही चाहिये. सो ओर श्रीसीताजीने सब प्रकार भयो हतो सो कह्यो ॥ ओर श्रीरघुनाथजीने समुद्र पर श्वेत बांध्यो सो वृतांत सब कह्यो ॥ सो सुनिके अगस्त पत्निने कह्यो जो ए समुद्र तो हमारे पतिने तीन अंजुलोमें भरि लीनो हुतो ओर पान करि लीनो हतो ॥ यामें तुद्दारे पतीने कहा बडी बात करी जो के जाके उपर पाज बांधी ॥ तब श्रीसीताजीने आज्ञा करीजो तुद्दारे पतीको मुत्र हुतो तामें श्रीरघुनाथजी चरणारविंद केसे धरे ? तासों श्वेत बांधनी पडी ॥ तब ओर हु ऋषिपत्नि हुते सो सब हसे ॥ जो श्रीसीताजीको केसी रीस चढी हे ॥ तब फेरि ऋषिपत्निने कहीजो हम तो सहज हसे परंतु श्रीरघुनाथजी तो आप परम सामर्थ्यवान तथा साक्षात् भगवत्प्रागटय हे जो जलके ऊपर पाषाणको नतराय सके परंतु अपनी ऐश्वर्यता दिखाइ; जो नाममात्रके स्पर्शतें पाषाण तरे हे ॥ तो ओर कोउ जंतजीव स्मरण करे ताकों उद्धार होइही होय ॥ यह आपने नामको माहात्म्य दिखायो हे ॥ सो ए कार्य तो आपने बडो उत्कृष्ट कयो हे ॥ ओर ए कार्य पुष्टिको हे ॥ फेरि अगस्तजीके आश्रमतें

आगे पधारे ॥ इति श्रीगिरिधरलालजी महाराजको वचनामृत छँतेरमों
संपूर्ण ॥ ७६ ॥

 [वचनामृत ७७ मो.] 

अब सित्तोतेरमो वचनामृत आप आज्ञा करे ॥ जो श्रीरामचंद्रजी
आगे पधारे तब द्रोणगिरि पर्वतपें हनुमानजीको घर आयो; सो हनुमानजीने
बिनती करी जो कृपानाथ ! मेरे घर कृपा करीके पधारिये ॥ तब श्रीरघु-
नाथजीने आज्ञा करि जो तुझारी माता अंजनी बहिरमुख हे तासों
तुम्हारे घर न चलेंगे ॥ तब फेरि बिनती करि जो ॥ में तो आपको दास
हों तासों कृपा करि पधार्यो चइये ॥ तब आज्ञा करि जो चले ॥ फिर
द्रोणगिरिपें पधारे सो अंजनीने देखोके न तो दोउ स्वरूपको दंडवत्
कर्यो, न सन्मान आदर कर्यो, न हनुमानजीसों बोली, फिर हनुमानजीने
माता सों दंडवत् करीके कह्यो ॥ जो अपने घर श्रीपूर्ण पुरुषोत्तम पधारे
हे, ओर तुं कछु आदर सन्मानहु नहि करे हे, ओर दंडवत् हु नहि करे
हे, सो कहा ! तब अंजनी बोली, जो श्रीरामचंद्रजी काहेके पूर्ण पुरुषोत्तम
हे, जो बंदरी तथा रीछनकी साहयसों श्रीसीताजी पायें, ओर लक्ष्मणजीकुं
तुं केहेत हे जो शेषजी हे, सो काहेके शेषजी हे ? जो इतनो न जान्यो
जो श्रीरामचंद्रजीकुं कौन मारि सकेगो ! एसे जानते तो श्रीसीताजीकुं
बनमें अकेले छोड़िके चले गये सो न जाते ॥ तासों इनकुं शेषजी कैसे
कहे जाय ? ओर श्रीसीताजीकुं रावणने स्पर्श कर्यो ताहि विरीयां रावण
जरिके भस्म क्यो न होइ गयो ? ॥ तासों सीता पतिव्रता काहेकी ॥
ओर तुहुं मेरोपुत बडो कपुत भयो, जो एक छोटीसी बातकें तांइ
एते वंदर, रीछ भेले किये ॥ जो सपुत होतो तो अकेलोइ रावणकुं
मारिके सब कार्य करि आवतो ॥ इतनों श्रीरामचंद्रजीकुं परिश्रम
काहेकुं करावतो ॥ यों कहिके आपने स्तनमेंतें दुधकी धारा चलाइ,
सो वा धारासों द्रोणगिरिको शिखर टुटी गयो ॥ ओर हनुमानजी



सैं कह्यो जो मेरो एसो दुध ! तोकों मेंनें पिवायो हे ओर तुं इतनो कार्य अकेलो न करि सबयो ? ॥ तासों तु हु कपुत हे ॥ तब फेरि हनुमानजी बोले ॥ जो ए आपनें मनुष्य नाटय दिखायो हे ॥ ओर काहुके सामर्थ्य सों न भयो हे. सो अपनी इच्छा अनुकूल होय हे ॥ लीला दिखायवेकु इतनी करी हे ॥ यामें श्रीरघुनाथजीको प्रभूता घटी नही हे, प्रभुता तो हे सोइ हे ॥ तथा श्रीलक्ष्मणजीको शेष पणो हुं घट्यो नहि हे ॥ ओर श्रीसीताजीको पतिव्रतपणोहु घट्यो नहि हे ॥ ओर में जो कपूत तेनें कही सों तो सत्य हे ॥ परंतु श्रीरघुनाथजीकी आज्ञा विना मेनें नहि कर्यो ॥ फेरि अंजनीनें उठिके श्रीरघुनाथजी, श्रीजानकीनी आदे श्रीलक्ष्मणजी सब स्वरूपनको दंडवत् करे, ओर सब सन्मान कर्यो ॥ ओर हाथ जोड़ी के बोली ॥ विनती करी ॥ जो कृपानाथ ! मे इतनी बोली ताको अपराध क्षमा करियो ॥ तब श्रीरघुनाथजी आप आज्ञा किये जो ॥ तुम बडे बुडे हों. सो तुम न कहो तो कोन कहे ॥ यों कहि के अयोध्या पधारे ॥ इति श्रीगिरिधरलालजी महाराजके वचनामृत सीतोत्तरमो संपूर्ण ॥ ७७ ॥

 [वचनामृत ७८ मो.] 

अब इठोत्तरमो वचनामृत आप आज्ञा करे ॥ जो सात पुरी हे सो मोक्षदायिनी हे ॥ तीनके नाम ॥ अयोध्या, मथुरा, हरद्वार, काशी, कांची, उज्जैन, द्वारावती, (द्वारका) तामें साडे तीन श्रीविष्णुकी, साडेतीन श्रीमहादेवजीकी हे ॥ श्रीद्वारकाजी, श्रीमथुराजी, श्री अयोध्याजी, तथा आधि विष्णुकांची ॥ तामें श्रीरामचंद्रजीकीडेड हे ॥ ओर दोय पहेली लिखी हे सा श्रीकृष्णचंद्रजीकी हे एसे साडेतीन श्रीविष्णुजीकी पूरी हे ॥ अब काशी, उज्जैन, हरद्वार, तथा आधि शिवकांची ये रुद्रकी हे ॥ ओर आठमी पूरी श्रीजगदीश सो श्रीपुरुषोत्तम क्षेत्र पुरुषोत्तम पूरी ॥ तामें श्रीजगदीश विसाजे हे ॥ सो अक्षर ब्रह्मको मुख्य धाम हे ॥ ओर पूर्व समुद्रकी सीमा



दाबिके आप बिराजे हे ॥ ओर सेवा माध्वमतके आचार्यनकी आज्ञा प्रमाण चले हे ॥ ओर दक्षिणमें श्रीरंगपट्टणमें श्रीरंगजी हे तो दक्षिण-सीमा दाबिके बिराजे हे ॥ ओर श्रीरामानुजाचार्यकी आज्ञा प्रमाण सेवा चले हे ॥ सो ए श्रीरामचंद्रजीको धाम हे ॥ ओर शैव हे सो श्वेतबंधु रामेश्वरकुं धाममें गोने हे ॥ ओर पश्चिममें श्रीद्वारकाजीके विषे बेट शंखोद्वारमें श्रीद्वारकानाथजी पश्चिम समुद्रकी सीमा दाबिके बिराजे हे ॥ ओर आगलो स्वरूप हतो सो श्रीरणछोड रायजी संवत १२१२ के सालमें षोडाणा भक्तके उपर कृपा करिके गुर्जर देशपावन करवेके निमित्त श्रोडाकोर गाममें बिराजे हे ॥ ओर दोय ठिकाने श्रीविष्णुस्वामिमार्गके आचार्य श्रीवल्लभाचार्यजीके मतानुसार सेवाको प्रकार चले हे ॥ अब उत्तरदिशामें बरफके पर्वतमें श्रीबद्रिनाथजी तपोरूप अपने सबके कल्याणके लिये उत्तर सीमाकूं दाबीके बिराजे हे ॥ ओर निमावत आचार्यनके मतानुसार सेवाको प्रकार चले हे ॥ ओर वाइ बरफके पहाडमें तें गंगोत्रीके पाहाडमेंतें श्रीगंगाजी पधारे हे ओर यमुनोत्री पहाडमें तें श्रीयमुनाजी पधारे हे ॥ ओर मध्यदेश श्रीगोवर्धन पर्वतके उपर अखिल ब्रह्मांडके नाथक श्रीमदुगोवर्धननाथजी प्रथम बिराजते सो अब अजबकुंवर बाइके मनोर्थ सिद्ध करणार्थ, मेवाड देशमें; श्याड-सिहाडगामके विषे संवत १७२८ के साल; म्लेच्छके उपद्रव सों पधारे हे ॥ सो अब अनेक भक्तनके उद्धारार्थ इहांइ बिराजे हे ॥ ओर श्रीआचार्यजी महाप्रभुजी तथा श्रीगुसांइजी आपकी आज्ञा प्रमाणे आपको निजवंश पुष्टिरीतिसों अनेक बडे वैभव सों, सेवा करे हे ॥ अब सातपुरीमें मुख्य स्वरूपनके नाम श्रीअयोध्यामें श्रीरामचंद्रजी मुख्य हे, ओर मथुराजीमें श्रीकेशवरायजा सो म्लेच्छके उपद्रव सों रजधान गाम हे तहां बिराजे हे ॥ ओर इहां प्रतिनिधि बिराजे हे ॥ ओर हरद्वारमें श्रीकेदारेश्वर शिवलिंगबिराजे हे ॥ ओर श्रीकाशीमें श्रीविश्वनाथजी शिवलिंग बिराजतें हे ॥ सो म्लेच्छके उपद्रवसों प्राचिन लिंग कुवामें मंदिरहे तहां पधारे ॥ अब प्रतिनिधि बिराजे हे ॥ ओर कांचीमें

आधिपुरिमें श्रीब्रह्मदराजजी बिराजे हे ॥ ओर आधिपुरिमें श्रीशिवलिंग बिराजे हे ॥ ओर उज्जेनमें महाँकाळेश्वरलिंग बिराजते हे ॥ ओर श्रीद्वारकाजो बेट शंखोद्वारमें श्रीद्वारकानाथजी—श्रीरणछोडरायजी बिराजे हे ॥ ए सात पुरीके सातो क्षेत्रपती हे ॥ अब श्रीअयोध्यामें श्रीसरयुजी हे, ओर श्रीमथुरामें श्रीयमुनाजी हे, श्रीजीद्वारमें बनास हे सो श्रीयमुनाजीकी प्रतिनिधि हे ॥ ओर हरद्वारमें श्रीगंगाजी, ओर काशीमें श्रीगंगाजी हे, ओर कांचीमें श्रीवेदवतीजी हे, ताको उपनाम कसुंभी हे ॥ ओर उज्जेनमें श्रीक्षीप्रा हे, ओर द्वारावतीमें श्री गोमतीजी हे ॥ सो जेसो पुरीको माहात्म्य हे, तेसोइ नदीको माहात्म्य हे ॥ इति श्रीगिरिधरलालजी माहाराजके वचनामृत इठोतेरमो संपूर्ण ॥ ७८ ॥

 [वचनामृत ७९ मो.] 



अब ओगणाएसीमो वचनामृत आप आज्ञा करे हे ॥ जो अब भीष्मप्रति पौलस्तऋषि कहे हे जो भगवद्भक्त पृथ्वि प्रदक्षिणा करे तिनकुं जायबेकी अनुक्रमणिका प्राचिन पुस्तक देखीके लिखी हे ॥ या प्रमाण पृथ्वि प्रदक्षिणा करनी ॥ प्रथम पुष्करजी, जंबुमारग, तंबुलीकाश्रम, धर्मारण्य, यथातीपतन; महाकालअवंती, स्थानुतीर्थ, भद्रवट, नर्मदा, कोटीतीर्थ, प्रभास, पिंडतारक, सरस्वती संगम, बरदानतीर्थ, श्रीद्वारका गोमतीसंगम, शंखोद्वार, सिंधुसागर, शंकुकर्णेश्वर, द्रमीतीर्थ, वसुद्वारा, शिंधुत्तम, ब्रह्मतुंग, शक्रकुमारिका, रेणुकातीर्थ, पंचनदतीर्थ, भोमातीर्थ; त्रिकुंडतीर्थ; पश्चिमसंध्या, वज्रापतीर्थ, मणिमंत, देविका, कामास्थ, विथियसत्र, विनसन, अमसोद्भेद, शिवोद्भेद, नागोद्भेद, सस्यान, कुमारकोट, रुद्रकोट, सरस्वतीसंगम, कुरुक्षेत्र, कनखलक्षेत्र, हरद्वार; सतततीर्थ; प्रथ्वीतीर्थ; पंचनद, सालुकिनी हरिहरशंभु; हरिद्रक्षेत्र; दशाश्वमेध; नागतीर्थ; रत्नकद्वारपाल; पंचनद; कोद्वितीर्थ, अश्वनीकुमार; वराहतीर्थ; जयंतीसोम, एक हंस, कृतसौच; मुंजबट; पक्षीतीर्थ; सस्मित पुष्कर रामहुंद; वंसमुल; कायसोधन; लोकाद्वार,

पुष्करिणी, सोमपदार्थ, माहेश्वरपद, नारायणस्थान, सालिग्रामतीर्थ, चतुः
समुद्रकुप, वामनतीर्थ, भरताश्रम, कोशिकी, चंपकारण्य, गोष्ठिल, संन्यास-
वेद्य, निविरातीर्थ, विशिष्टतीर्थ, देवकुप, कौशिकीहृद, कुमारबोर, अज्ञि-
धारा, पितामहेश्वर, कुम्भधारा, गौरिशिखर, ताम्रकर्ण, नंदनीतीर्थ, कालि-
कासंगम, उर्वसीतीर्थ, सामाश्रम, कुंभकर्णाश्रम, कोकामुख, शकानंदा,
हृषिभद्रिप्र, औदालव, तीर्थ, धर्मतीर्थ, भामिर्त्थिसर, दंडार्षभतीर्थ, नवेदिक
द्विसेध्यातीर्थ, लोहित्यातीर्थ, जगन्नाथजी, करतोया, गंगासागर, वैराज्य,
कालतीर्थ, पुष्पावती, बद्रीका, वंशयुल्मशोणनर्मदयोत्पत्ति, कौशिल्या, हृष-
भतीर्थ, शिवकांची, रामेश्वर, धनुकोटि, रंगनाथ, मत्तंगकेदार, श्रोपर्वत,
मल्लिकार्जुन, कावेरी, कन्यातीर्थ, गोकर्णतीर्थ, वर्तकतीर्थ, वेणातीर्थ
गोदावरी नाशक, त्रंबक, रामकुंड, पंचवटी, ब्रह्मस्युणा, शशल्यव, देवहृद,
कर्पूरवेणा, कन्याहृद, ३०० थया, पयोपुरी, दंडकारण्य, सरभंगाश्रम;
पंपासर; शुकाश्रम; सूर्यार्क; सप्तगोदावरी, देवपप; लुंगकारण्य, मेघाविक;
कालंजर; चित्रकुट; भरतस्थान; कोटितीर्थ; जेष्ठस्थान; श्रृंगवेर; मुंजवट;
मथुरा; श्रीयमुनाजा; श्रीवृन्दावन; श्रीगोवर्धन; सोरम; ऋणमुक्तेश्वर;
प्रयागे समाप्ति; ३२२ ॥ शुभंभवतु ॥ श्रीकृष्णार्पणमस्तु ॥ ए पृथ्वि परि-
क्रमामें तीनसो बावीसतीर्थ; हमारे बडे तातजी श्रीवज्रभूषणजी महाराजने
श्रीहस्ताक्षर सो लिखे सो बांचिके लिखाये हे ॥ ओर श्रीमहाप्रभूजोने
तीन पृथ्विपरिक्रमा करी ॥ ओर हमारे दादाजी श्रीद्वारकेशजी महाराजने
चरणारविंदसों चलिके करी हती ॥ इति श्रीगिरिधरलालजी महाराजके
वचनामृत ओगणाएशीमो संपूर्ण ॥ ७९ ॥

 [वचनामृत ८० मो.] 

अब अंशीमों वचनामृत आप आज्ञा करे जो ॥ एक समे श्रीबल-
देवजीने भारतको आगम जान्यो, जो अब कौरव पांडवको युद्ध होयगो.
सामें आपके आश्रित कौरवादिक हते, ओर भगवद्भक्त तथा प्रणाधिक



पांडव हते. ए दोउनके बीच कोनको आदर करना ओर कोनको अनादर करना ताको विचारि करि तीर्थयात्राको मीश करिके निकसी चले ॥ सो तीर्थनके नाम ॥ प्रथम ॥ प्रभास, सरस्वति, प्रथोदक, बिंदुसर, त्रितकूप, सुदर्शनतीर्थ, विशाब्रह्मतीर्थ, शक्रतीर्थ, प्राचि सरस्वतितीर्थ; श्रीयमुनातीर्थ, सधरे श्रीगंगाजीके तीर्थ, पीछे नैमिषारण्यको पधारे ॥ उहां सुतजीको प्रसंग भयो ॥ ओर बलदानवको मार्यो ॥ फेरि उहांते कौशकीनदी पधारे, तहांते पानसरोवर जामें तें सरयु प्रगट भइ, वाके किनारे किनारे सरयुतें प्रयाग-पधारे. पीछे पुलहाश्रम, गोमतीजी, गंडकीजी, वियासा पीछे श्रोणनदस्नान करे, फेरि गयाजी, फेरि गंगासागर, महेंद्राचलपर्वत, सप्तगोदावरी, वेणानदी, पंपासरोवर, भीमरथी, श्रीपर्वत, वैकट, कांचीपुरी, कावेरीनदी, श्रीरंगजी, रशभद्रि, मथुराजी, समुद्रसेतु, कृतमाला, ताम्रपर्णी, दक्षणावति, फाल्गुनीतीर्थ, सुरपार्क, तापीजी, पयोश्री, निर्विघ्न्या, दंडकारण्य, रेवाजो, मनुतीर्थ, फेरि प्रभास पधारे ॥ उहां भीमसन दुर्योधनकूं समजाये ॥ परंतु मान्यो नही ॥ तब श्रीभगवत् इच्छा मानिके श्रीद्वारकाजी पधारे ॥ पीछे नैमिषारण्य पधारे ॥ सो रेवतीजी सहोत समाप्ति स्नान कर्यो ॥ फेरि श्रीद्वारावती तीर्थयात्रा करिके पधारे ॥ सो यह प्रसंग श्रीमद्भागवत् दशमस्कंध सीचोतेरमा अध्यायमें तें लिखायो हे ॥ इति श्रीगिरिधरलालजी महाराजके वचनामृत एसीमो संपूर्ण ॥ ८० ॥

 [वचनामृत ८१ मो.] 

अब एकासीमो वचनामृत आप आज्ञा करे हे ॥ जो इतने ठेकाणे सखडी महाप्रसाद हम लेवेहे ॥ ताको प्रकार ॥ प्रथम श्रीगोवर्धननाथजीके इहांको, सो जा ठीकाणे हम उतरे होय ता ठीकाणे भीतरिया आचके धरि जाय, पीछे कोउ हमारे सिवाय छिबे नही ॥ १ ॥ दूसरे, बेटशंखोद्धारमें श्रीलक्ष्मीजी, श्रीसत्यभामाजी, श्रीजांबुवंतीजी, श्रीराधिकाजी, श्रीशंखनारायणजी, इतने पंथि मंदिरको, सो उहां मंदिरमें जेवणगर हे, सो उहां सब

तैयारी होय उहां आयके आरोंगे ॥ एसे पांचो मंदिरमें रिती हे ॥ ओर तीसरे ॥ दक्षिणमें श्रीरंगपट्टणमें श्रीरंगजीके मंदिरमें हु मंदिरके भीतर लेइ हे ॥ तथा श्रीवृद्धराजजी, तथा श्रीलक्ष्मणबालाजीमें उहांके मुख्य सेवक जो भोग धरतो होय सो धरे, परंतु भोग सरावे नहि ॥ हमारे प्रसाद लेनो होय तो भोग हम सरावे ॥ तब हम प्रसाद लेवें ॥ ओर चोथे ॥ श्रीब-
 द्रीनाथजीमें हु मंदिरके भीतर भीतर प्रसाद लेले ॥ ४ ॥ ओर पांचमें ॥ श्रीजगदीशमें तो सबनके हाथको लेहें, तथा चारों दिशा, तीन तीन कोसकी हदताइ सखडी महाप्रसाद जाके मनमें आवे ताके हाथको लेवेकी रीति हे ॥ तामें जात भांतकी ग्लानि लायके नाहि करे तो श्रीज-
 गदीश वाको दंड तुरतही देवे हे ॥ ताते श्रीभगवत्समहाप्रसाद हे सो केवल ब्रह्मरूप अपने स्वरूप संबन्ध हे ॥ तासों बडे स्थानमें ज्ञातव्यवहारको विचार नहि ॥ श्रीजगदीशमें संवत् १९१७ के सालमें याज्ञकुं हम पधारे, सो उत्तर दरवाजे श्रीमहाप्रभुजीकी बैठक हे, तहां उतरे ॥ सो उहां महा-
 प्रसाद पधारे सो नीचे श्रीगोकुलवारे बलराम अधिकारी तथा इहांके भीत-
 रिया तथा ओर हु माणस साथके सो सब प्रसाद भेले लेते हते ॥ इतनेमें कुंवरबाइ कहुं सुं आये सो महाप्रसाद भेले लेते देखिके बलरामसुं कही के, भैया कल्लु तो विचार राखो, एसे सघरे भेले, कहा बेठे हो ॥ यों कहिके ततेडाके पास कमर सेकवे गबे सो ठाडे ठाडे कमर सेकते सो अकस्मात गडेके उपरसों जलकों ततेडा बलबलतो उपर पडयो, तासों आखो शरीर दाजी गयो ॥ एक महिना तांइ वाको कष्ट रह्यो ॥ तासों श्रीमहाप्रसादको एसो माहात्म्य हे ॥ जो कोइ समजे वा असमजे ग्लानि लावे तो वाको तुरतही दंड देवे हे ॥ तासों श्रीमहाप्रसादकी मर्याद ज्ञातविज्ञातकी श्रीज-
 गदीशके विषे नहि हे ॥ तब दासमें विनति प्रश्न कर्यो ॥ जो श्रीनाथजीको सखडी महाप्रसाद भीतरियाके हाथको धर्यो थको आप अरोगो हे; तो सात स्वरूपको महाप्रसाद भीतरियाके हाथकी सखडी न लेओ सो केसे ? सात

स्वरूप तथा श्रीनाथजी में कहा भेदहे तब आप आज्ञा करे जो सात स्वरूप तो एकहि हे ॥ यामे' संदेह नहि हे ॥ परंतु श्रीनाथजीको घर हे ॥ सो श्रीमहा-प्रभुजी श्रीगुसांइजीनें देवद्वार राख्यो ॥ ओर सात स्वरूप तो अपने घरमें बिराजते, तासों घरमें तो देवमार्ग की रीतीसुं चलनो पडे ॥ तासों न लियो जाय ॥ नहि तो भेद तो नहि हे, परंतु वेदमर्याद के तांइ विचार ॥ इति श्रीगिरिधरलालजी महाराजके वचनामृत एकासीमो संपूर्ण ॥८१॥

 [वचनामृत ८२] मो. 

अब आपने व्यासीमो वचनामृत आज्ञा करे ॥ जो जीव श्रीप्रभुजीनें सरजाये. तामें नीच उंच योनिमें तथा सत्कर्म तथा दुष्कर्म अधिकार पर-त्व कर्या करे, तामें उत्तम योनिवारे, तथा सत्कर्म कर्ताको, तो सब बातको सुखहि हे ॥ परंतु दुष्कर्म कर्ता, तथा नीच योनिके जीव, किरिट, पतंगा-दिक पर्यंतको संतोष प्रभुननें एक सरिखो दियो हे ॥ सो वाको शोच नहि हे ॥ वे हु अपनी कृतिमें मग्न हे ॥ तापर आपने एक दृष्टांत आज्ञा करे ॥ जो एक ब्राह्मण. बडो पंडित ओर वेदशास्त्रनमें निपूण ज्योतिषमें हु निपूण हतो ॥ सो वाने अपने यावत् जन्मको कर्मविपाकमेंतें निर्णय कर्यो ॥ तामें यह नक्की भइ जो फलाणा संवतमें मेरी देह त्याग होयगी, ओर फेरि एक एक श्वपचके घर सुवरी आके छोटे बच्चा होउंगो ॥ ओर माथेपें धोरो टीका एक होयगी, सो याको यत्न देख्यो जो ए जन्म मेरो काहु भांतिसो मिटे सो वाको परिहार निकस्यो नहि ॥ सो वा ब्राह्मणको पश्चाताप देहांत पर्यंत रख्यो ॥ फेरि देहांतको समय आयो, तब बेटासों कह्यो ॥ जो, मेरी एसी व्यवस्था होयगी, जो मेरो जन्म होतेइ तुं जायके वा श्वपचके घर जाय ठीक पांडके वे सुवरिको बच्चा मारी नांखीओ ॥ एसे कह्यो ॥ फेरि वे ब्राह्मण तो देहांत भयो सो वाके बेटाने पिताके वचनकी शुद्धि राखीके वा श्वपचके घर जायके देखे तो सुवरी व्याइ हे, वाके छोटे बच्चा आगे निर्माण लिखे पूर्वक भयो हे, सो पहेचान्यो सो वाको मारखेके निमित्त



खडग लेके गयो, सो वे बच्चा भाग्यो डोले, ओर वे ब्राह्मण पीछे दोड़े, सो वे वनमें गये ॥ सो उर्हा वे बच्चा बोल्यो जो या योनिमें में प्रसन्न हूं तुं मोको मारे मति ॥ तासों वाको वानें मार्यो नहि ॥ जो तासों कीडीतें लगाय कुंजर पर्यंत अपनी जन्म कृतिमें सब जीव मग्न हे ॥ इति श्रीगिरिधरलालजी महाराजके वचामृत व्यासीमो संपूर्ण ॥८२॥

वचामृत ८३ मो.

अब प्रासीमो वचामृत आपने आज्ञा किये ॥ जो श्रीठाकुरजीको कृष्णावतार भयो सो साक्षात् पूर्णपुरुषोत्तमको प्रागटय हे ॥ ओर अवतार आपके अंशकला विकला करिके कार्याकारण परत्व भये हे ॥ फेरि तिरोधानलीला ॥ ओर ए कृष्णावतार हे सो स्वयं प्रागटय हे, सो आद्यनारायणतें लेके अद्वावन पुरुषामें वसुदेवजी एह वेद वदित प्रागटय भयो हे ॥ सो केहेत हे ॥ जो प्रथम तो श्रीनारायण तें कमल भयो ॥ १ ब्रह्मा, २ अत्री, ३ चन्द्रमा, ४ बुद्ध, ५ पुरूरवा, ६ आयु, ७ नहुष, ८ ययाति, ९ यदु, १० क्रोष्टा, ११ व्रजीतवान, १२ श्वाहि, १३ सूषेकु, १४ चित्ररथ, १५ नाशबिंदु, १६ पृथुश्रुवा, १७ धर्म, १८ उसमा, १९ सूचक, २० जयामध, २१ विदर्भ, २२ क्रथ, २३ कुंती, २४ वृष्णी, २५ निवृत्ति २६ दशार्ह, २७ व्योमसूत, २८ जिमूत, २९ विकृति, ३० भीमरथ, ३१ नवरथ, ३२ दशरथ, ३३ शकुनि, ३४ करंभी, ३५ दवरात, ३६ देवक्षेत्र ३७ मधू, ३८ कुरूवंश, ३९ अनु, ४० पुरुहोत्र, ४१ आयु, ४२ सात्वत, ४३ वृष्णी, ४४ सुमित्र, ४५ युद्धाजित, ४६ अनिमित्र, ४७ वृक्षमी, ४८ चित्ररथ, ४९ विदुरथ, ५० सुर, ५१ भजमान, ५२ शिनी, ५३ स्वयंभोज, ५४ कृदिक, ५५ देवर्माढ, ५६ सुरसेन, ५७ वसुदेवजी, ५८ तद्भूत, श्रीकृष्ण चंद्रोद्योत, अब त्रेतालीसमी पुरुषामें सात्वतके वृष्णी लिखे हे. ओर दूसरे पुत्र अंधकभण, ४४ कुरुर, ४५ वह्नि, ४६ विलोमाप, ४७ कपोतलोमा; ४८ अनु; अंधक; ५० दुंबुंभी; ५१ वसु; ५२ दरिद्योत; ५३ पुनर्वसु; ५४ आहुक; ५५ देवक;

५३ देवकीजी; तद्भूत कृष्णचंद्र उद्योत भये; श्रीकृष्णजीकुं अष्टपटराणी मुख्य हे ॥ ओर तो सोलेहजार एकसत हे सो सबनकुं समान संतति प्रभुनने दीनी ॥ ताको वर्णन कहाँ ताँइ होय ॥ तामें आयमुख श्रीरूक्षमणीजीहे तिनके दशपुत्रमें ज्येष्ठ पुत्र श्रीप्रद्युम्नजी भये, साठमी पुरुषा ॥ ६० ॥ श्रीप्रद्युम्नजीके श्रीअनिरुद्धजी भये ॥ ६१ श्रीअनिरुद्धजीके श्रीवज्रनाभजी भये, ६२ प्रतिबाहु, ६३ सुबाहु, ६४ शांतसेन, ६५ सतसेन, ६६ अब श्रीकृष्णचंद्रजीके पुत्र बडे पराक्रमी भये, तिनके नाम ॥ अठार पुत्र महापराक्रमी भये तिनके नाम १ श्रीप्रद्युम्नजी, २ श्रीअनिरुद्धजी, ३ दीसमान, ४ भानु, ५ सांब, ६ मधु, ७ बृहद्भानु, ८ चित्रभानु, ९ वृक, १० अरुण, ११ पुष्कर, १२ च्छेद्बाहु, १३ श्रुतदेव, १४ सुनंदन, १५ त्रिब्राह्म, १६ विरूप, १७ कवी, १८ मयोध, या प्रमाणे अठारे कहे ॥ ओर सबनमें ए पुत्र पौत्रादिक अत्यंत पराक्रमी भये हे ॥ अब श्री रघुवंश श्रीरामचंद्रजी जामें प्रगटभ्यै सो मूल नाम १ आव्यनारायणजी, २ ब्रह्मा, ३ मरिची, ४ कश्यप, ५ सूर्य, ६ वैवस्वतमनु, ७ इक्ष्वाकु, ८ शशणाद, ९ कुकुत्स्थ, १० अनेता, ११ प्रथु, १२ विश्वरंधी, १३ चंद्र, १४ युवनाश्व, १५ शावस्त, १६ ब्रह्मदश्व; १७ धुंधुमार; १८ दृढाश्व; १९ दर्यश्व; २० निकुंभ; २१ बर्हणाश्व; २२ कृपौश्व; सेनजीत; २४ युवनाश्व; २५ मांधाता; २६ पुरुकुत्स; २७ त्रसदस्यु; २८ अनरण्य २९ हर्यश्व; ३० अरुण; ३१ त्रिबंधन; ३२ त्रिशंकुं; ३३ हरिशंद्र; ३४ रोहित; ३५ हरित; ३६ चंप; ३७ सुदेव ; ३८ विजय; ३९ भरुकू ४० वृक; ४१ बाहुक; ४२ सगर; ४३ अस्मंजस; ४४ अंशुमान; ४५ दिलिप, ४६ भगीरथ, ४७ सूत, ४८ नाभ, ४९ सिंधु द्विप, ५० अयुतायु, ५१ ऋतुपर्ण, ५२ सर्वकाम, ५३ सुदास, ५४ कल्भासंधी, ५५ अस्मक् ५६ मूलक, ५७ दशरथ. ५८ एडविंड, ५९ विश्वासह, ६० सद्वांग, ६१ दीर्घबाहु, ६२ रघु, ६३ प्रथुश्रुवा, ६४ अज, ६५ दशरथ ६६ श्रीरामचंद्रजी ॥ श्रीरामचंद्रजीके दोय पुत्र भये, १ लव २ कुश, तामें कुशको वंश चलयो, ६७ कुशके ६८ अतीथी,

६९ निशद, ७० नभ, ७१ पुंडरी, ७२ क्षेमधन्वा, ७३ देवानिक, ७४ अनीह, ७५ पारीयात्, ७६ बल, ७७ अस्थल, ७८ वज्रनाभ, ७९ षगण, ८० विद्रुति, ८१ हिरण्यनाती, ८२ पुष्प, ८३ द्रुवसंधी, ८४ सुदर्शन, ८५ सिध, ८६ मरु, सो मरु राजा हे सो कलापग्रामं बद्रिकाश्रममें रहे हे ॥ सो कलिके अंतमें जब सूर्यवंश नष्ट हो जायगो, तब ए मरु राजा हे सो सूर्यवंशको उद्योत करेंगे ॥ ओर कलियुगमें सूर्यवंशी राजा होइंगे तिनके नाम मरुके ८७ प्रसूत होइंगे, ८८ संधी, ८९ अमर्षण, ९० महश्चान, ९१ विश्वसाध्य, ९२ असेनजीत, ९३ तक्षक, ९४ बृहदबल, ९५ बृहद्रण, ९६ उरुक्रिय, ९७ वन्सबद्ध, ९८ प्रतिव्योम, ९९ भानु, १०० दिवाकर, १०१ सहदेव, २ वीन, ३ बृहदश्व ४, भानुमान, ५ प्रतिका, ६ सुप्रतिका, ७ मरुदेव, ८ सुनक्षत्र, ९ पुष्कर, १० अंतरीक्ष, ११ सुतपा, १२ मित्रजीत, १३ बृहदराज, १४ बर्हि, १५ कृतजय, १६ रणजय, १७ संजय, १८ साकय, १९ श्रुधाद, २० लांगल, २१ प्रसेन-जीत्, २२ क्षद्रक, २३ रणक, २४ सुर, १२५ सुमित्र. सूर्यवंश सुमित्र तांइ हे ॥ एसे चंद्रवंशके कुरुवंशमें संतनुराजाके भाइ देवापी, सो उहां कलाप ग्राममें बद्रिकाश्रममें रहे हे ॥ सोउ चंद्रवंश नष्ट भयेतें फेरि भुव-मंडलमें आपके चंद्रवंशको उद्योत करेंगे ॥ ओर चंद्रवंश हे. सो पुष्टिवंश हे, चंद्रमाके बुध भये, सो गुरुपत्नी सो भये, बुध के पूरुरवा भये, सो सुद्यम्न खि भये, तिनके भये ॥ ए सब कथा नवमस्कन्धमें हे ॥ इति श्रीगिरि-भरल्लज्जी महाराजके वचनामृत त्यासीमो संपूर्ण ॥ ८३ ॥



 [वचनामृत ८४ मो.] 

अब आपने चोराशीमो वचनामृत आज्ञा करे ॥ जो वष्णवकूं सत्संग करनो, परंतु तादृशि वैष्णवको सत्संग करनो, जाको आखमें श्रीठाकुरजीके दर्शन होते होय ताको नाम तादृशी वैष्णव ॥ ओर इनके लक्षण विगेरे स्वरूप वर्णनको कीर्त्तन ॥ राग कन्हरो ॥ श्रीविठ्ठलनाथ बसत जिय जाके, ताकी रीति प्रीत छवि न्यारि ॥ प्रफुल्लित वदन कांति करुणामय नैननमें

मेरे आर्शिवाद सों तेरे पुत्र होतेही वा पूत्रकों एक पेटीमें धरि. एक रत्न वाके भीतर धरि. वे पेटी श्रीगंगाजोमें आछो बंदोबस्त करिके बेहेवाय दीजो ॥ फेरि सदावत बंध करिके जो द्रव्य तेरे पास रहे सो लेके श्रीगयाजीमें जाय रहियो ॥ जो द्रव्य रह्यो होय तासों तेरो उदर पोषण निर्वाह करियो ॥ या प्रमाण तुं करेगी तो तोकुं राजप्राप्ति होइगी ॥ ए मेरो आर्शिवाद हे ॥ तासों कलु अन्यथा मेरे कहे सिवाय करेगी तो नहि प्राप्त होयगी ॥ तासों सावधान रहियो ॥ तब फेरि वानें हाथ जोडीके कही ॥ विनति करी जो आप काहु वातकी चिंता मति करियो, में सब आपकी आज्ञा प्रमाण करोंगी ॥ मेरे तो आप हि परमेश्वर हा ॥ फेरि वानें अपनी ज्ञांगमें तें तीनरत्न काढिकें दिये ओर ब्राह्मणनें देह छोडी ॥ फेरि प्रातः काल भयो तब ओर मनुष्य आये, फेरि वाकी जातवारेनकुं बुलाइ, इनकी देह वाके सुपरत करी ॥ फेरिवाकी उत्तर क्रीया जातवारेननें करी, फेरि वा बाइको समजाय वाके घर ले गये ॥ सो वाकी द्वादशपर्यंत क्रिया हो चुकी ता पीछे वा ब्राह्मणने अपनी स्त्रीसों जो कश्यो हतो वा प्रमाण वाने कयों ॥ फेरि वाको पुत्र भयो सो वाको अपने पतिकी आज्ञा प्रमाण पेटीमें रत्न सहित बंदोबस्त करीके श्रीगंगाजीमें बेहेतो पेटीमें धरी दियो ॥ सो पेटी बेहेतो बेहेतो क्षेमधन्वा राजाको पुरीमें जाय निकसी ॥ सो वा समय राजाजो श्रीगंगाजीस्नानकुं आये हते ॥ सो वा पेटीकुं देखिके अपने चक्रनके हाथ संगवाय लीनी ॥ फेरि वा पेटीकुं खोली देखे तो सरत्न पुत्र देख्यो ॥ सो पुत्रको देखतेइ राजा अत्यंत आनंदको प्राप्त भयो ओर कही जो श्रीगंगाजीने मोकुं पूत्र दियो ॥ फेरि नगरमें या रीति सो डांडी पिटवाइ जो श्रीगंगाजीने राजाकुं पूत्र दियो ॥ तासों सब घरघर बंदनवार, गोत, राग, इत्यादिक राजद्वार तथा सब नगरमें मंगल भयो ॥ ओर आछे गाजते वाजते पूत्रको घर लाये ॥ फेरि क्षेमधन्वा राजाने पूत्रको नामकरण कियो, सो वाको नाम रत्नकुंवर धर्यो ॥ फेरि धाय राखी ओर कुंवरकुं



अनेक यत्न करे ओर कुंवर बधवे लगे ॥ फेरि कुंवरको यज्ञोपवित करे, ओर क्षात्रविद्या पढवे लगे, एसे करत दश वर्षको उंमर कुंवरकी भइ, तब राजाको देहांत भयो बाकी वरसी भये पीछे फोजफांटा लेके गया श्राद्धको चले ॥ सो गयाजीमें जाय गया श्राद्ध कर्यो सो पिंडदानकी विरियां भइ तब पितृको उच्चारण कर्यो ॥ तब फल्गुजीमें तें तीन हाथ निकसे ॥ ता विरियां कुंवरजीकुं बडो विचार पंडि गयो जो कोनके हाथमें पिंड देउं ॥ जो या बातको उद्घोष भयो सो वे ब्राह्मणी फल्गुजी उपर कुटि बांधिके रही हती सा वानें ए समाचार सुने जो आज एसे कौतुक होय रह्यो हे ॥ तब वा ब्राह्मणीने राजाके खवासकुं बुलायके कही के जो राजा मेरे कहे प्रमाण करे तो में याको समाधान करीदेउं ॥ तब वे खवासनें जायके राजकुंवरसो सब समाचार कहे ॥ जो इहाँ एक ब्राह्मणी रहे हे सो एसे कहे हे जो कुंवरजी मेरे कहे प्रमाण करे तो में या बातको समाधान करी देउ ॥ तब कुंवरजीने कही अब्दय बुलावो ॥ सो वे खवास वा ब्राह्मणीकुं ले आयो ॥ सो वा ब्राह्मणीनें तीन हाथ निकसे देखिके कह्यो ॥ जो ए मनुष्य सब सरकाय वेउ ॥ ओर कनात टेरा करांय देउं ॥ फक्त राजकुंवर तथा ए बाइ दोउ जने भीतर रहे ॥ तब वा बाइनें प्रश्न कर्यो जो तुम एक एक हाथ काढो तो वांको उत्तर देउ ॥ सो एसे केहेते मात्र तीनो हाथ जलमें पीछे घुस गये ॥ फेरि ऐक हाथ निकस्यो, तब वानें पुछ्यो जो ए हाथ कोनको हे ॥ तब वे बोल्यो जो ए वीर्य मेरो हे, तब वा बाइनें कह्यो, जो वाको मोल तो तोकुं आधो रत्न दियो हे तासों तू काहेको हाथ काढे हे ॥ बल्यो जा ॥ तब वानें हाथ पाछो खेंचि लीयो फेरि दुसरो हाथ निकस्यो ॥ तब पुछी के ए कोनको हाथ हे ॥ तब राजा क्षेमधन्वा बोल्यो जो में राजा क्षेमधन्वा हुं तब ब्राह्मणी बोली जो तुम्हारो हु इहाँ कहा लगे हे ॥ या बेटाके पालवे निमित्त एक रत्न याके संग दीनो हे, तासों तुमहुं हाथ सरकाय लैउं ॥ सो राजाने हुं, पाछों हाथ खेंची

लियो ॥ फेरि तिसरो हाथ निकस्यो, सो गोरकुं बुलाय ब्राह्मणीनें कह्यो जो याके हाथमें पिंड देउं ॥ फेरि यों कही कें ब्राह्मणी जायवे लगी तब राजकुंवरने पांव पकडे ॥ ओर कही जो माजी ए बात केसे भइ ॥ यामें मोकुं समज नही पडी ॥ सो कृपा करिके कहो ॥ तब वा ब्राह्मणोने कही जो तुम श्राद्धसों पोंहोंची भोजन करिके मेरी कुटिमें आइयो तब ए बात कहूंगी ॥ यों कहीके वे ब्राह्मणी गइ फेर वे राजा श्राद्धसों निवृत्त होय, भाजन करि, वा बाइके पास एकाद मनुष्य लेके आयो ॥ सो या बाइने शुलि तें लगाय आज श्राद्ध कर्यो तहां तांइकी वात समाचार कहे सो सुनिके अत्यंत स्नेह कर्यो ॥ ओर पायन पढ्यो ॥ फेरि बाको राजमें ले गयो, ओर मा बेटे भेले रहे ॥ एसे आगे हाथ प्रत्यक्ष काढीके पिंड- दान लेते ॥ इति श्रीगिरधरलालजी महाराजके वचनामृत पंच्यासिमो सर्पूण ॥ ८५ ॥

 [वचनामृत ८६ मो.] 

अब छयासीमो वचनामृत आप आज्ञा किये ॥ जो श्रीरामचंद्रजी श्राद्ध करवे आये सो सामग्री लेके गयाजीकुं गये ॥ गोरके घर पधारे ॥ इतने अंपराह काल आयो ॥ सो पितृश्वरननें हाथ काढे ॥ सो सीताजी वा बिरियां उहां बिराजते हते सो रेतीके लडुवा करिके इनके हाथमें दे दिये ॥ सो लेके पितृश्वर तो गये. इतनेमें श्रीरामचंद्रजी पधारे ॥ श्रीरामचंद्रजी श्राद्ध करो पिंडदान करवे लगे सो फल्युजीमें सो पितृश्वरननें हाथ नहि काढे तब आपनें तीर्थगुरुनसों पूछे जो ए कहा हे ? हाथ क्यों नहि काढे हे ? तब तीर्थगुरुने कही जो कलु व्यतिक्रम भयो हे ॥ तब आपनें सोताजीसों पूछा जो तुमनें कलु खायो तो नहि ? तब सीताजीनें कही ॥ जो आप गाममें पधारे पिछे इहां दाय हाथ निकसे हते सो मेंतो खेलते खेलते वेलुके लडुवा करिके बाके हाथमें दिये हते ॥ एसे सुनिके आप बहोत खीजे, ओर कही जो ए तुमने कहा कर्यो ॥ ओर वा दिन आप पश्चात्ताप कर्यो ओर अरोगे बिना पोढे ॥ सो स्वप्नमें पितृश्वरके राजा

अर्यमा आये सो विननें कही के आजतें हाथ काढवेकी रति बंध भइ ॥
 क्योंके आगे ए वात निभेगी नहिं, तासों ॥ आप सवेरे श्राद्ध करे सो
 ब्राह्मण चटके स्थानपें बेठायके करे ॥ तो आरुके दादे परदादेकों प्होंचेंगे
 ॥ या वातमें कलु आप संदेह न करेंगे ॥ देवता हे सो परोक्षप्रिय हे ॥
 ये वात स्वप्न द्वारा कहे के अर्यमा गये ॥ फेरि श्रीरामचंद्रजीने प्रातः
 काल उठिके अर्यमाके कहे प्रमाण श्राद्ध कर्यो तब सों हाथकाढने बंध भयेहे ॥
 इति श्रीगिरिधरलालजी महाराजके वचनामृत छयासीमो संपूर्ण ॥ ८६ ॥

 [वचनामृत ८७ मो,] 

अब सित्यासीतमो वचनामृत आप आज्ञा करे ॥ जो भक्तनकी भग-
 वान सदा सहाय करे हे ॥ तासों भक्त न होय ओर ब्राह्मणकुलमें जन्मे
 तो कहा भयो ताकुं कुलिन न जानिये ॥ तापें वचन “सोइ कुलिनदास
 परमानंद जो हरि सन्मुख होइ” तासों उत्तम कुलको गर्व न राखनो ॥
 केवल प्रभुके शरण सेवायुक्त रहनो सोइ उत्तम कुल हे ॥ श्रीमहादेवजी
 परम भगवदी वैष्णव हे जो क्षणार्थ प्रभुके ध्यान स्मरण विना रहते
 नहिं हे तासों श्रीमहादेवजी कहाये ॥ सो श्रीमद् भागवतमें हूं लिख्या हे
 ॥ जो “वैष्णवानाम् यथा शंभू” ॥ तब शाहपुरा के वैष्णव रामकुंवर-
 जी पंडयानें प्रश्न कर्यो जो कितनेक वैष्णव महादेवजीकी निंदा करे हे,
 ओर श्रीमहादेवजीके इहां जाय नहिं हे, ओर शिवरात्रिको व्रत नहिं करे
 हे, सो करनो के नहिं ? शिवालयमें जानो के नहिं ? तापें आप आज्ञा
 करे ॥ जो श्रीमहादेवजी तो परम भगवदीय हे सो जेसी वैष्णवकी निंदा
 करे तेसी श्रीमहादेवजीका निंदा हे. तासों श्रीमहादेवजीकी निंदा नहिं
 करनी ॥ वैष्णवकी निंदा करतेतें श्रीप्रभूजा अपसन्न होय हे ॥ ओर शिवरात्रि
 व्रतको तो आगे भ्रगुवादि वैष्णव करते हते. सो श्रीमहादेवजीको तथा दक्ष-
 प्रजापतिको परस्पर द्वेष भयो तामें श्राप भयो जो तुम्हारो व्रत करेगो सो
 पाखंडो होयगो एसो श्राप हे ॥ सो कथा चतुर्थ स्कंध श्रीभागवतमें हे ॥

तासों शीवरात्री व्रत वैष्णव नहि करे हे ॥ अपने मार्गमें तो निंदा काहुकी हे श्रीमहाप्रभुजीनें श्रीमहादेवजीकुं इश्वर कोटीमें गीनेहे ॥ रामानुजसंप्रदायवारे श्रीमहादेवजीकी निंदा करे हे ॥ अपने नहि ॥ ओर ज़िवालयमें चलायके तो जानो नहि, ओर क्षेप्रपति होय तो चलायके जानो ॥ उहांजे श्रीकृष्ण करने, ओर जाते आवते मार्गमें शिवालय आवे तो जे श्रीकृष्ण करने ॥ इति श्रीगिरिधरलालजी महाराजके वचनामृत सित्यासीमो संपूर्ण ॥८७॥





वचनामृत ८८ मो.





अब अठ्यासीमो वचनामृतमें दासने प्रश्न कर्यो ॥ जो भ्रगुजी वैष्णव कैसे भये ? तब आप आज्ञा करि ॥ जो दशम स्कंधमें कथा हे जो भ्रगुवादि ऋषि तपश्चर्या करते हते सो उहां वानें विचार कर्यो जो तीन देवमें बडे कोन हे ॥ ताको आश्रय करे ॥ एसो विचार करी परीक्षार्थ प्रथम भ्रगुजी ब्रह्माजीके पास गये ॥ सो न तो नमस्कार किये न कछु बोले बतराये योंही जाय ठाडे रहे ॥ सो देखिके ब्रह्माजीकुं रीस चढी ॥ सो देखिके उहांसो भ्रगुजी कैलासपति श्रीमहादेवजीके पास गये ॥ श्रीमहादेवजी साम्हे मिलवेकुं पधारे ॥ सो दूर सों श्रीमहादेवजीकुं वरजे जो तुमतो अशौच हो, स्मशानादिके मलीनता विषे निरंतर रहेहो एसें अनेक तरेहके दुर्वाच्य कहे ॥ तो सुनिके श्रीमहादेवजीकुं अत्यंत क्रोध चढयो, सो त्रिशुल लेके भ्रगुजीकुं मारवेके लिये दोडे ॥ सो यह बात श्रीपार्वतीजीने महादेवजीकुं समजायके रोषकी सांत्वना करी ॥ फेरि भ्रगुजी श्रीवैकुण्ठमें भगवानकी पास गये ॥ सो इनकुं काहुने रोके नहीं ताको कारण येहे जों सनकादिनकुं आगे जयविजय पोरियानें रोके हते तामें विघ्न भयो तासों यह आज्ञा भइ हती जो कोई ऋषिश्वरनकों रोकटोककी लुटी हती तासों भ्रगुजी चले गये ॥ सो काहुने रोके नही ॥ सो उहां श्रीठाकुरजी पोडे हते सो जातेइ आपके वक्षःस्थलमें लत्ता प्रहार कर्यो, सो भगवान षोकिके जागी उठे, सो जागतहीं देखे तो भ्रगु ऋषि ठाडे हे, सो देखिके आप ठाठे होइ गये ॥ ओर आगता स्वागता

करी ओर कहे जो । तुम्हारे चरण अति कोमल हे सो आपकुं लगी गइ होयगी ॥ सो अपराध क्षमा करेंगे ॥ एसे कहेके भ्रगुजीके पांवको दाबवे लगी गये ओर बहोत आदर सन्मान कर्यो ॥ फेरि भ्रगुजी श्रीभगवतयश वर्णन करते थके सब ऋषिश्वर बेठे हते तहां आये ॥ ओर सबनसों कही जो सब देवतानमें मुख्य श्रीभगवान हे ॥ तासों इनको ही भजन करनो ॥ सो ता दिनसों भ्रगुवादिक बडे ऋषिश्वर सब वैष्णव भये, ओर श्रीभगवान इन भ्रगुजीके चरणको चिह्न वृक्षःस्थलमें अंगिकार किये ॥ सो अद्यापि मर्यादास्वरूपनमें दर्शन देते हे ॥ तब दासने विनती करी जो कृपानाथ ! पुष्टि स्वरूपनमें क्यों नाह ? तब आप आज्ञा करे जो भ्रगुजीकी तो वैकुण्ठांदाइ गम्य हती ॥ तासों पुष्टिमार्गके श्रीठाकुरजी तो गोलोकवासी हे ॥ तासों पुष्टिमार्गके श्रीठाकुरजीके भ्रगुलांछन नहि हे ॥ ओर भ्रगु हे सो मर्यादा भक्त ह्वै केवल यज्ञयागादिक करीके भगवानको नाम स्मरण करे हे ॥ ओर इहां पुष्टिमार्गमें तो सेवाहि मुख्य हे ॥ ओर सेवाके अवकाशमें भगवदुयश अहर्निष गावतें रहेनो ॥ यह पुष्टिमार्गको सिद्धांत हे ॥ ओर भिष्मपितामहहु मर्यादाभक्त हते ॥ ओर श्रीयशोदाजी, श्रीकुंतिजी ओर समस्त ब्रजभक्त, ओर बालवृद्ध पर्यंत स्त्रीपुरुष, ओर ब्रज, पशु पक्षी पर्यंत उद्धवजी, विदुरजी, श्रीशुकदेवजी, राजा परिक्षित, अकुरजी ओर श्रुतेदवराजा; जनक, बहुलाश्व, एतन्मार्गीय समस्त वैष्णव सब पुष्टिभक्त हे ॥ इनकुं श्रीठाकुरजी विषे अत्यंत प्रेम हे ॥ ओर पुष्टिमार्गके आचार्य श्रो महाप्रभुजी तथा श्रीगुसांइजी स्ववंश युक्त हे तासों या मार्ग तो आप की कृपाप्रलते सिद्धि होय हे ॥ जीवकी सामर्थ्य नहि हे ॥ केवल कृपा साध्य हे ॥ ओर जीव तो केवल अज्ञानी हे ॥ महातुच्छ हे, तासों अपनी सत्ता करीके या मार्गमें प्रवेश होय शके सो नहि ॥ प्रभुजी अपनी कृपा दृष्टिसों विचारे तो होय ॥ इति श्रीगिरिधरलालजी महाराजके वचनामृत इत्यासीमो संपूर्ण ॥ ८८॥



 [वचनामृत ८९ मो.] 

अब नव्यासीमो वचनामृत आप आज्ञा करे ॥ जो एक समय श्रीगु-
सांइजी आप आपकी बैठकमें बिराजे हते ॥ ओर निज मंडली पास बेठी
हती, ता समे सगे भाइ दोग वैष्णव आये, दंडवत् करके बेठे ॥ ओर
विनती करी जो राज ! हमारे दोग भाइकुं श्रीप्रभुजीकी सेवा करवेको मनोरथ
हे ॥ सो दोउनकुं सेवा करिवेकुं स्वरूप न्यारो न्यारो पधराय दिजिये ॥ तब
आपने पुछयो जो तुमकुं कहा कहा बातको शोख हे, ओर केसे सेवा करोगे ?
तब एकने विनती करी जो मोकुं तो काहु बातको शोख नहि हे में तो
श्रीठाकुरजीको स्मरण करूं, ओर सेवा करूं ॥ फेरि दूसरो बोल्यो जो कृपा-
नाथ ! मोकु तो सब बातको शोख हे, अत्तरको, तथा गावेकोहु, तथा लौकि-
कमें जो बात हे ताको सब मेरे शोख हे, ॥ तब श्रीगुसांइजी आज्ञा करे
जो तोकूं तो श्रीठाकुरजी पधराय देइंगे ॥ ओर इनकुं काहु बातको शोख
नहिं सो ए कहा करेगो उलटो श्रीप्रभुनकुं दुःख देइगो ॥ सो वा शोखी-
नकुं तो सेवा करिवेकुं श्रीठाकुरजी पधराय दिये, ओर वा दुसरेको काहु
बातको शोख न हतो ताको श्रीठाकुरजी नहि पधराय दिये ॥ ताको हार्द
जो जाको लौकिक शोख होयगो सो अलौकिकमें श्रीप्रभुन विषे समर्पण
करेगो वैष्णव भये पीछे कुलक्षण रहे नहि, परंतु शोख होय सोइ भावना
सो प्रभुन विषे अनुसरे तासों पुष्टिमागीय वैष्णवनकुं शोख राखनों सो
श्रीप्रभुनके सुखार्थ राखनों ॥ सो निरोधलक्षणमें दश इन्द्रिय भगवद् परत्वे
वैष्णवकी हे ॥ एसे आज्ञा श्रीमहाप्रभुजीने निरोधलक्षणमें कहे हे ॥ इति
श्रीगिरिधरलालजी महाराजके वचनामृत नव्यासीमो संपूर्ण ॥ ८९ ॥

 [वचनामृत ९० मो.] 

अब आप नेवुमो वचनामृत आज्ञा करे ॥ जो श्रीमहाप्रभुजीने अपने
मार्गमें चार प्रमाण राख्यो हे ॥ जो एक तो वेद, दूसरे श्रीगीताजी, सा-
तसों श्लोक हे ॥ जामें, श्रीप्रभुजाके वाक्य श्लोक ५७४ हे. सोइ प्रमाण



हे ॥ ओर तीसरो व्याससूत्र ॥ तापें आपने अणुभाष्य करे हे ॥ ओर श्रीभागवतमें समाधि भाषा हे सो ॥ ए चारको श्लोक ॥ वेदाःश्रीकृष्ण वाक्यानि व्याससुत्राणि चैव हि ॥ समाधि भाषा व्यासस्य, प्रमाणं त चतुष्टयः ॥ १ ॥ या श्लोकानुसार उपर लिख्यो हे ॥ ओर आचार्यपदको चारग्रंथकरे तब मिले हे ॥ सो प्रकार एक तो श्रीभागवतकी टीका, दूसरे व्याससूत्रपें भाष्य, तिसरे अपने मार्गको निबंध, चतुर्थ वादके ग्रंथ, ए चार ग्रंथ करे तब आचार्य पदवी मिले हे ॥ तासों आचार्य हे सो जा स्वरूपको आश्रय बतावे सोइ स्वरूप जानने ओर आचार्यनकुंडु वेइ स्वरूपजानने ॥ श्रीठाकुरजी आप आज्ञा करे हे जो “आचार्यमां विजानियात्” एसे एकादश स्कंधमे कहे हे ॥ तासों न तो श्रीभागवत, तथा श्रीनाथजीमें भेद जाननो; ये दोय एक हि स्वरूप हे ॥ ओर द्वादशस्कंध हे सो द्वादशअंग श्रीप्रभुनके हे. सो श्रीशोभावहुजी पोरबंदरवारने भाषामें धोल करिके भाव बहोत खुलाये हे सो सबनकुं समज पडे एसे हे ॥ सो वे धोल सोले श्रीसुबोधिनीजी अनुसार करेहे ॥ ओरहु श्रीप्रहाप्रभुजी, श्रीगुसांइजी, श्रीठाकुरजीके, धोल; कीर्त्तनादि अपनेमार्गके सिद्धांत के बनाये हे सो श्रीशोभावहुजी बडे महानुभाविक हते ओर श्रीहरिरायजीको इष्ट हतो ॥ सो वैष्णवकुं श्रीभागवतको पाठ अवश्य करनो चाहिये ॥ नित्यनियमसुं करनो जितनी श्रद्धा होय तितनो ॥ ओर कदाचित पढ्यो न होय तो ब्राह्मण वैष्णवके मुखसों श्रवण करनो ॥ इति श्रीगिरिधरलालजी महाराजके वचनामृत नेवुमो संपूर्ण ॥ १० ॥

 [वचनामृत ११ मो.] 

अब एकाणवो वचनामृत आप आज्ञा करे हे ॥ जो श्रीठाकुरजीकी मानसीसेवा करनी ॥ ताको प्रकार ॥ पहले तो ऋतु अनुसार उठिके स्नानादि नित्यकर्म करनो. फेरि जपादि पाठ नित्यनेम करनो. श्रीप्रभुजी बिराजते होय तो; सेवा करते होय ता रीतिखुं करनो ॥ फेरि एक एकांत

स्थलमें जाय बैठनो, जहां कोइ मनुष्यादिकी बोला सुनी न पड़े एसो एकान्तमें आसन बिछायके बैठनो ॥ फेरि चित्तकुं एकाग्र करनो, ओर एकासन बैठिके ओर नीची दृष्टि करि नाककी दांडी पर नजर मिलावनी ॥ फेरि जो प्रभु बिराजते होय तो प्रभुको हृदयमें ध्यान लावनों ओर जो प्रभु घरमें न बिराजते होय तो श्रीनाथजी आदि अष्टस्वरूप बिराजते हे ॥ तिनमें सो जो स्वरूपें लग्न होय ता स्वरूपको ध्यान नख शिखपर्यन्त करनो ॥ ताको प्रकार पहले तो श्रीचरणारविंदके नखनकों ध्यान करनो ॥ जानु चंद्रकेसे दशों नख हे; ओर चरण तलेमें दोउमें षोडश चिह्न हे ॥ ताको ध्यान करनो ॥ नव चिह्न दक्षिण चरणारविंदमें हे ॥ ताके नाम ॥ साधिया, अष्टक्राण, यव, जंबु, उपवित, ध्वजा, उर्ध्वरेखा, अंकुश, कमल, अब वाम चरणारविंदमें सात चिह्न हे ताके नाम ॥ मत्स, त्रिकोण, कलश, इन्द्रधनुष, वियद्, गोपद, अर्धचन्द्र, या प्रमाण दोउ चरणारविंदमें मिलिके षोडश चिह्न हे ॥ ताको प्रत्येक स्वरूप विचारिके ध्यान करनो ॥ तदनंतर अंगुरिया एडीसों लगाय चरणको तथा अंगुष्ठाको ध्यान करनो ॥ तिन बिषे आभूषण पहरे हे. तिनके नाम ॥ नूपुर, तोडा; पगपान, पायल; अणवट. विछिया. जेहर. ॥ इन संयुक्त चरणारविंदको ध्यान करनो ॥ ता पिछे पिंडु-रीको ध्यान करनो. ता पिछे गोडाको ध्यान. ता पीछे जंघाको ध्यान, ता पाछे कटिको ध्यान, फेरि वस्त्र जो घरके श्रोठाकुरजीकुं धरे होय ताको ध्यान ॥ ओर घरमें श्रीठाकूरजी नहिं बिराजते होय तो तथा विदेशमें होय तो जा स्वरूपको ध्यान करते होय ता स्वरूपके घरकी रीति प्रमाण शृंगारकी धारणा करनी ॥ कटि में क्षुद्रघंटिका, कटिपेच, इत्यादिककी भावना करनी फेरि उदरनी भावना करनी ॥ त्रिवली संयुक्त बिचमें नाभि बिराजते हे ॥ फेरि स्तनकी. वक्षःस्थलकी. फेरि श्रीहस्तकमलकी. द्विभुज वा चतुर्भुज ॥ जो अपने मनमें धारणा किये होय ताकी जो लीलाको स्वरूप होय. वेणुधारी, वा आयुद्धधारी. वा गिरिराजधारी, सो विचास्ने ॥ ओर श्रीहस्तकमलकी



अंगुरिया तथा अंगुठा तथा नखचन्द्रकी न्यारी न्यारी भावना करी ध्यान करनो ॥ साभरण युक्त कडा, पौंची, हस्त सांकलां, मुद्रिका, बाजुबंध, इत्यादिक विचारनो ॥ फेरि श्रीकंठको ध्यान करनो ॥ तामें आभुषण, कंठाभरण कौस्तुभादि फेरि श्रीमुखारविंदको ध्यान करनो ॥ जो कोटिकंदर्प लावण्य तामध्य ठोडीको ध्यान करनो, ॥ सुंदर बिडि अरोगे थके रक्त होय रहे हे; ओर दंतपंक्तिको ध्यान तथा रसनाको ध्यान करनो ॥ फेरि नासिकाको ध्यान ॥ तामें वेसर बिराजे हे; फेरि नेत्र कमलको ध्यान ॥ सुंदर कमलपत्र जेसे अंजनादि युक्त तथा भृकुटिको ध्यान ॥ पीछे भाल, ताके बिच तिलक; बिराजमान हे वांक सहित, तापर अलकावलि बिराजमान हे ॥ फेरि केशकी भावना करनी ॥ फेरि श्रीमस्तककी भावना करनी ॥ श्रीमस्तकपें पाघ, टीपारो, मुकुट, कुल्हे, शोहेरो, फेंटा, पगा, विगेरे ॥ जाको यथाभिलाष होय ताकी भावना करनी ॥ लड, शिरपेच, शिशाफल, कलंगी, सहित. फेरि श्रीकंठको शृंगार ॥ कंठमाला, चोकी, कंठी, पदक, हारमाला, हांस, ब्रवली, बेदी, हमेल, गुंजा, हलको भारी शृंगार प्रमाणे ॥ फेरि श्रीपीठकको भावना करनो ॥ ओर विना पीठक स्वरूप होय तो नही ॥ श्याम, गौर, बाललीला, किशोरलीला, जा भांतिकी लगन होय तेसी भावना करी ध्यान करनो ॥ फेरि श्रीस्वामिनीजीको ध्यान करनो, सो शिख तें लगाय नख पर्यंत अपनकुं दर्शन होते होय, जीवको अधिकार होय तितनी ता प्रमाण भावना करनी ॥ अति सकुमार स्वरूप, गौर, द्विभूज, यथास्थान, वस्त्राभरण भूषित एसे युगलस्वरूपकी मानसी करिके साष्टांग दंडवत् करने ॥ इति श्रीगिरिधरलालजी महाराजके वचनामृत एकानुमो संपूर्ण ॥११॥

 [वचनामृत १२] मो. 

अब बाणुमो वचनामृत आप आज्ञा करे ॥ जो सेवा मानसीमें प्रथम श्रीमहाप्रभुजीके स्वरूपकी भावना करनी ॥ जो श्लोक.



'सौन्दर्यं निजहृद्रतं प्रकटितं स्त्रीगूढभावात्मकं
 पुरूपञ्च पुनस्तदन्तरगतं प्रावीविशस्त्वप्रिये
 संश्लिष्टावुभयोर्बभौ । रसमयः कृष्णो हि तत्साक्षिकं ।
 रूपं तत्त्रितयात्मकं परमभिध्येयं सदावल्लभम् ॥ १ ॥

या श्लोकको आशय ये हे जो श्रीठाकुरजी तथा श्रीस्वामिनीजी तथा दोय स्वरूप भेलेको स्वरूप श्रीमहाप्रभुजी हे ॥ एसे श्रीमहाप्रभुजी हे तिनको ध्यान करना ॥ फेरि श्रीसर्वोत्तमके पाठसों स्तुति करनी ॥ फेरि श्रीगुसांइजीको ध्यान करना ताको प्रकार श्लोक आगे लिख्यो हे "सायंकुञ्जालयस्था" याके अनुसार ॥ ओर नामरत्न स्तात्र करिके स्तुति करनी ॥ फेरि श्रीयमुनाजीकी मानसी करनी ॥ श्यामस्वरूप, शिखतें नख पर्यंत वस्त्राभरण भूषित, एसे श्रीयमुनाजी ताकी स्तुति; श्रीयमुनाजीके चालीस कीर्तन हे तामें तें एक कीर्तनसों स्तुति करना तामें, ओर मंदिरमें श्रीठाकुरजीके आगे कीर्तन गवे हे सोउ प्रथम श्रीमहाप्रभुजीको, दुसरो श्रीगुसांइजीको, तिसरो यमुनाजीको, या प्रमाण गवे हे ॥ फेरी एकाग्रचित्त होय के तीन तालि बजावनी ॥ सो तालीमें घंटानादको भाव करना फेरी तीन ताली बजाय शंखनादको भाव करना ॥ ओर जहां झालर घंटाको काम पड़े तहां तालि बजावनी, फेरि जगावतें लेके पोढावे तांइ जा प्रमाण श्रीप्रभुनकी सेवा करी होय ता प्रमाण मानसी करनी ॥ ओर ऋतु अनुसार वागा, वस्त्र, आभुषण, शैया, गादी, तकिया, खंडपाट, सिंघासन, विगेर सब साजकी भावना करनी ॥ तथा उत्सवादिककी भावना करनी. या प्रमाण मानसी सेवा करनी ॥ सो ए मानसी सिद्ध होय तो पुष्टिमार्गको परम फल हे सा प्राप्त हो जाय ॥ सो श्रीगुरुदेवकी कृपातें सिद्ध होय ॥ इति श्रीगिरिधर-लालजी महाराजके वचनामृत बाणुमो संपूर्ण ॥१२॥


 [वचनामृत १३ मो.]
 



अब आपने आज्ञा किये जो ॥ मानसी सेवा सिद्ध भइ कैसे जानिये ताको प्रकार ॥ जो राजा आसकरणजीको भइ बेसी होय तव जानिये ॥ सो वार्ता ॥ जो राजा आशकरणजीके साम्हें कोई शत्रु लडवे आयो सो ताके सामें जो राजा चढे, सो सब लडकरके बिचराजा घोडापें सवार भये, चलते, ओर मानसी सेवामें चित्त तो एकाग्र हतो सो वे सेवा करते सो वा समय राजभोग धरवेको समय हतो, सो कढिको डबरा पधरायके जाते हते सो घोडाकुं ठोकर लगी सो तासो सब कपडा जामा विगेरे सब कढि सों भरे गये ॥ तासों एसे प्रकारसों चित्तको एकाग्र सेवा विषे लगायके मानसी नित्यनेमसों करनी ओर मनमें संदेह न राखे जो बनेगी के न बनेगी ॥ एसो न विचारनो ॥ ओर स्नेहपूर्वक करे तो सिद्ध होय ॥ सो आजकालके वैष्णवकूं हुं सिद्ध भइ हे हमने हमारी आंखनसों देखी हे ॥ तब रामकुंवरजीने विनती करी ॥ जो ए वैष्णव कोनसें हे ? सो कृपा करी आज्ञा करिये ? तब आप आज्ञा किये जो कांकरोलीके वैष्णव बालकृष्णदास हते सो जातके दरजी हते, सो इहांसो तो लडिके चले गये सो बडोदाकी बैठकमें रहेते, ओर लुइवे छायवेको संदेह बहोत हतो, सदाइ अपरसमें रहेते, सो एक चटाइ बिछायके एकांतमें मानसी करते ॥ सो कोई वैष्णवनें एकाद विरियां श्रीद्वारकांधीशको श्रृंगार पूछयो ॥ तब नखतें लगाय शिखरप्यंत केहे दियो ॥ सो वानें लिखि राख्यो. फेरि इहां जादवजी नामे दरिखानापें बैठते विनसुं पत्र दिनवार लिखिके वा श्रृंगारकी पांदडि उतारिके पठाइ, सो इहां मिलाइ सो बराबर मिलि ॥ फेरि उनको प्रतिउत्तर विन जादवजीने लिख्यो ओर उहांसो श्रीद्वारकांधीशके वस्त्र बडोदासों सीवके सब जोड इहां पठावते सो सब ज्योके त्यों बेठी जाते ॥ परंतु रीस बहोत हती. आभुषणहुं पोयके पठावते, सोउ बेठी जाते ॥ सो संवत् १९२५ की सालमें भगवद् लीलामें प्राप्त भये ॥ एसे भगवदी अब होने कठिन हे ॥ श्रीब्रज-

भूषणजी महाराजकी इनके उपर पूर्ण कृपा होती ॥ ओर कलु अभ्यास सुर-
तवारे वैष्णव ब्रजवल्लभदासजीने कीर्त्तनको करिके लीलाकी मानसी करवे
लगे ॥ सो बढेनके अनुग्रहसो कलुक कृपा होइ गइ, सो विकल दशा हो
गइ ॥ जैसे श्रीनारदजीकुं श्रीठाकुरजीके दर्शन किये ओर विकल भये ॥
फेरि आकाशवाणी द्वारा आज्ञा भइ जो मेंने तो एक विरियां दर्शन दिये
सो याके लिये जो हमारे विषे भक्ति बढे ॥ अब या लाकको छोडिके मेरे
भक्त होउगे तुमकुं सब जन्मकी स्मृति रहेगी ॥ एसी आज्ञा भइ मेरे अनु-
ग्रह तें तथा तेरी हमारे चरणाविंद विषे प्रीति रहेगी ओर भक्ति कबहु भेद
न पावेगी ॥ सो ऋषिधरकी सेवा करी तथा जुठन लीनी ताके प्रभावसों
भगवद् कृपाभइ ॥ ए वार्ता नारदजीके पहले जन्मकी हे ॥ एसे इन ब्रज-
वल्लभदासकुं हुं एकवार झलक भइ परंतु विकलतासों जो वस्तु हाथ लगो
सो ताको मझा ले नहीं शके ॥ श्रीप्रभुनकीकृपामें तो कसरनहीं ॥ ओर
थोडिक बेगमवारे रावजी महासिंधजीकुं सूक्ष्म स्वरूपकी भावना सिद्ध भइ
हती ॥ ओर स्थूल स्वरूपके तो चित्र तथा स्वरूप द्वारु (चंदनादिकाष्टनी)
मयी बनाये हे सो इनकेजेसी तो विवेचना कोइनेनहीं करी ॥ सो प्रभुकी
कृपा तथा गुरुदेवकी कृपातें जो कोउ चित्त एकाकार करे तो आज हु बनी
शके हैं ॥ इति श्रीगिरिधरलालजी महाराजके वचनान्त ताणुंमो संपूर्ण ॥१३॥

 [वचनान्त १४ मो.] 



अब चोराणवो वचनान्त आपने आज्ञा करी ॥ जो तामें रामकुंवर-
जीने प्रश्न कर्यो ॥ जो कृपानाथ ! श्रीनाथजीके तथा श्रीद्वारकाधीशके दर्शन
करे पीछे मानसी करनी, एकांत बैठनो, ओर कलुक श्रमहु करनी, ताको
कारण कहा ? तब आप आज्ञा करे जो ओर ज्ञानि ध्यान करे हे एसे न
जाननो ॥ ज्ञानिको ध्यान हे सो तो केसो हे जो भगवान स्वस्थानकुं बिरा-
जेके अपने हृदयमें लावे ॥ ओर अपने तो जा दिन निवेदन भयो तादिन
प्रभुजी हृदयमें पधारे हे, तासो ज्ञान करिके लावेको तों काम नही हे ॥

ओर हु हृदयमें जो भगवान हे तीनकुं बाहिर पधरादने ताकी मानसी हे सो यामें तो बहोत ही सुखद हे ॥ ओर अपनो संप्रदायमें तो मानसी सेवा मुख्य हे ॥ सो विष्णुस्वामीने एंसी वर्ष पर्यंत मानसी करो, तब दर्शन भये ॥ ओर श्रीमहाप्रभुजीनेहुं मानसी मुख्य राखी हे सो सिद्धांतमुक्तावलीमें आज्ञा करे हे ॥ जो “मानसी सापरामता” सेवा हे ॥ सो इनके विषे चित्त लगे तासो सेवा करनी ॥ जो मानसी सेवा सिद्ध होय ॥ सो सेवा तनुजा ओर वित्तजा हे ॥ एसे श्रीआचार्यजीकी आज्ञा हे फेरि मानसी हे सो मुख्य हे ॥ सो श्रीद्वारिकेशजीने हुं गाये हे ॥ जो “मानसीरीतिकी मुख्य सेवा व्यसन, लोकवैदिक त्याग शरण गोपीशको” इति वचनात् ॥ तासों मानसी सेवा मुख्य हे ॥ तासों कोइ प्रकारसों या जीवसों मानसी सेवा बने तो अत्यंत श्रेष्ठ हे ॥ इति श्रीगिरिधरलालजी महाराजके वचनामृत चौराणुमो संपूर्ण ॥ ९४ ॥

 [वचनामृत ९५ मो.] 



अब आप पंचाणूमो वचनामृत आप आज्ञा करे ॥ जो हमारे मोसाजी काजीवारे गोस्वामी श्रीगिरिधरजीहुं मानसी करते ॥ ओर एक काच श्रीनाथजीको बनायो हतो, सो श्रीगंगाजीमें बहुत परिश्रम करिके कटि पर्यंत जलमें रेहेके; सोले नहिना तांड, पिछली एक प्रहर रात्रि रहे, वा बिरियां सों लेके पीरेबादर होते तांड एक श्रीहस्तमें तो काच ओर एक श्रीहस्तमें माला लेके श्रीगोपालमंत्रको पुरश्चरण कर्यो सो काच सिद्ध भयो तामें श्रीनाथजीके दर्शन समय समयके ऋतुअनुसार होते ॥ ओर जाको मनोरथ होतो दर्शनको तिनसबनकुं करावते ॥ फेरि आप श्रीजीद्वार पधारे सो वा काच संग लेके पधारे ॥ सो रस्तामें रजस्वला स्त्रीकी दृष्टिपडी गइ तासों श्रीनाथजोके दर्शन तो होते परंतु शृंगार समयादिकके दर्शन होते बंध हो गये ॥ ओर काच धुंधरो हो गयो ॥ सो काच इहां लायके आछीमाकुं दिये ॥ आछीमा सो कोन ? श्रीदाउजी महाराजके बड़े बहुजी श्रीलक्ष्मीबहुजी जाको सब

कोउ आछीमा केहेते सो वे काच लाइके श्रीगिरिधरजीने आछीमाकुं दिये सो वा आछीमा हमारे मौसीजी लगे, सो वे काच आप बिराजे तहां तांइ तो रह्यो फेरि आछीमा लीलामें पधारे पीछे श्रीगोविंदरायजीने चीजवस्त संभाली तामें काच न पायो कहा जाने कहां गयो ताको खबर न पडी ॥ ओर श्रीगिरिधरजी मोसाजीहु श्रीजीद्वारमें लीला प्रवेश किये ॥ आपको छप्पनभोग सातो स्वरूप भेले करिवेकों मनोरथ हतो सो आपके मनमेंइ रहे गयो. विद्याभ्यास आपको बहुत हतो ॥ पुष्टिमार्गमें सुर्यरुप हते ॥ एसे प्रतापी हते ॥ इति श्रीगिरिधरलालजी महाराजके वचनामृत पंचाणुमो संपूर्ण ॥ ९५ ॥

 [वचनामृत ९६ मो.] 

अब छनुवो वचनामृत आप आज्ञा किये ॥ जो बिल्वमंगलके एक शिष्य हतो सो मानसी सेवा करत हतो सो मानसीमें सेवा करी; फेरि खीरमें बुरो डारिवे लगे, सो कलु विशेष पडयो, तब उपरसों काढि लेवे लगे तब श्रीठाकुरजीने हाथ पकडयो, ओर आज्ञा करी कछो जो यामें तेरो कहा जाय हे ? तब वे बोल्यो जो कृपानाथ ! बहोत मीठो हो जाय तो आपकुं ज्वे नहि तासों काहुं हुं ॥ तब श्रीठाकुरजी मुस्काये ओर कही जुवाबतो ठीक बनायके ल्यायो परंतु मोकों तो मीठो बहोत भावत हे ॥ तामें खोरमें तो बहोतही मीठो चैये ॥ तब वा वैष्णव हाथ जोडिके विनती करी जो महाराज सुरत राखोंगो, ओर या अषराध तो क्षमा करे ॥ ओर अपना जानिके मोको एसी कृपा करी आज्ञा करी फेरि मानसी सेवासों पोंहोंचीके बिल्वमंगलके पास गयो, सो दंडवत् करीके विनती करी ॥ जो तुह्यारी कृपासों श्रीप्रभुजीने मोकुं अपनायो, ओर मानसीमें वृत्तांत भयो सो सब कछो ॥ सो सूनिके बिल्वमंगल बहोत प्रसन्न भये ॥ ओर कछो जो तिहारे अहोभाग्य हे जो ए बात ब्रह्मादिकनकुं दुर्लभ हे, सो तोको प्राप्त भइ फेरि वाने विनती करी जो मेरे तो आपकी कृपाको प्रताप हे ॥

एसेइ अपने संप्रदायमें श्रीगुसांइजीकी सेवामें एक ग्रहस्थ हतो वाको चित्त द्रव्य खर्च करिवनें बडो कृपण हतो सो वैष्णव भये तब विनती करि जो कृपानाथ ! मोंकुं तो एसी सेवा दिजे जामें द्रव्य खर्च न होय ॥ तब श्रीगुसांइजी आपने आज्ञा करी जो हां ! हां ! तोकुं द्रव्य खर्च न करनो पडे एसो सेवा देइंगे सो वाकों मानसीसेवाकी रीति सब बताइ ॥ सो सामग्री खोरसिद्ध करी सो तामें बुरो डारिवे लायो जब बुरो बहोत पडी गयो, तब इनके मनसों पिछो काढि लेवे लगे तब श्रीठाकुरजीनें वा वैष्णवकों हाथ पकड़्यो, ओर कइयो ॥ जो यामें तो तेरे बापके टका नहीं लगे ? यामें सूं बुरो क्यों काढे हे ? तब चोंको उठ्यो, ओर अपना भाग्य मान्यो ॥ जो धन्य प्रभू ! एसे दयालहो ॥ इति श्रीगिरिधरलालजो महाराजके वचनामृत छन्दुमो संपूर्ण ॥ ९६ ॥



 [वचनामृत ९७ मो.] 

अब सत्ताणुंमो वचनामृत आप आज्ञा करे ॥ जो मिरांबाइ हते सो मर्यादाभक्त हते, सो मर्यादाभक्त काहे ते जाने पडे ॥ जो विनके पतिके आगे लोगननें चुगलि करी, जो राणीजी तो साधुको संग करे हे ॥ ओर वाकी लाज मर्याद करे नही ॥ ओर जो आवे जासों बोले, बतरावे, सो अपनी आछी न दीखे ॥ तब राणाजीने झेरको प्यालो सिद्ध करिके पढायो, जो याकूं पीयो ॥ तब मिरांबाइके माथे मर्यादासेवा बिराजती हती, सो विनके आगे झेरको प्यालो भोग धर्यो. फेरि मिरांबाइने पीयो सो कल्लु न भयो ॥ परंतु पुष्टिभक्त होते तो झेरको प्यालो प्रभूनकुं भोग न धरते ॥ तासों मर्यादामें गिने ॥ ओर रामदासजी पंडित मिरांबाइके घर रेहेते, कीर्त्तन श्रीमहाप्रभूजीके गावते तब मिरांबाइने कइयो ॥ जो कल्लु भगवद्वयश गाओ ? सो रामदासजी सुनी अनसुनी करी गये तब फेरि कही ॥ तब रामदासजीकुं रीस चढी, ओर चित्तमें क्रोध बहुत आयो ॥ जो पुरो हिताइ छोडि देनी ॥ चित्तमें धारीके एसी विमुख हे तासों यहां रहेनो

नहीं ॥ एसे निश्चय करो क्रोध करीके बोले, जो दारी रांड ! ए कीर्त्तन प्रभुनके नहीं तो कहा तेरे खसमके हे ! यौ कहिके उठि चले ॥ सों यहबातपें हुं निश्चय समजनो जो श्रीगुरुदेव तथा श्रीठाकुरजीमें भेद बुद्धि भइ तासों पुष्टिभक्त नहि ॥ फेरि एक समें कृष्णदास अधिकारी मिरांबाइके घर आये सो चाल चलाउं आये सो देखे तो उहां वृन्दावनी महंत हरिवंशजी आदि आये हते बहोत दिनसों ॥ सो उनकी विदा न भइ हती ओर कृष्णदासजीको मिरांबाइ श्रीनाथजीकी भेट सामग्रीको द्रव्य देवे लगी, सो कृष्णदासजीने न लीनी ॥ कलु मर्यादाभक्तकी चित्तमे आइ ॥ ओर वे बडे महंत केइ दिनासुं बेठे हते तिनसुं देखायवेके लिये न लीनो ॥ ओर चले आये ॥ आयके सब वृत्तांत श्रीगुसांइजीके आगे कह्यो ॥ तब आपनें आज्ञा किये जो श्रीनाथजी तो सबकोइको अंगीकार करे हे ॥ तब कृष्णदासजीनें विनती करी जो कृपानाथ ! सो तो सांची हे परंतु इतने महंत केइ दिनसुं बेठि रहे हे तिनकी नीची नाड करी आयो हुं ॥ तब येहे सुनिके श्रीगुसांइजी आप प्रसन्न भये ॥ जो तुम हमारे घरके एसेइ हो ॥ फेरि एक समे मिरांबाइ व्रजयात्राकुं आये ॥ सो श्रीवृन्दावनमें सब जगे दर्शनकुं गये ॥ सो फेरि हरिवंशजी गुसांइजीके दर्शनकुं गये, सो बाह्यर पहेरावाराननें रोके, तब मिरांबाइनें कही जो खबर करो जो मिरांबाइ आये हे तब उननें हरिवंशजीनें केहेवाइके अबि तो मानसी करे हैं ॥ तब मिरांबाइ बोले जो मानसी तो होनी बडो कठिन हे ॥ ओर गुसांइजी तो रथको साज बनवाय रहे हे ॥ सो एसे आसामीसों केहेके मिरांबाइ गये ॥ सो कृष्ण चैतन्यजीके दर्शनकुं गये ॥ सो पहेरावालाने रोके जो स्त्रीजन उपर नहि जाय सके हैं ॥ तब मिरांबाइ बोले जो एसे स्थल वृन्दावन धाममें रेहेके बडे महात्मा होयके अजहुं पुरुषाकृति रही कहा ! इहां तो सब स्त्रीरूप हे ! सो एसे कहेके चले गये ॥ ओर कह्यो जो पुरुषके दर्शन तों में हुं नहीं करहुं ॥ ए खबर पहेरावालाने कृष्णचैतन्यजीसुं कही ॥ तब

कही के जा दोड़ि जो बे जहांसुं मिले उहांसु जरूर बुलाय लाउ ॥ तब दोड़िके पेहेरावारो गयो सो आगे जाते मार्गमें मिले, सो जायके कही जा तुमकुं कृष्णचैतन्यजी बुलावत हे ॥ तब वासों कही जो अब तो मोकुं श्रीगोकुलजी जानो हे ॥ एसे वासों केहेके डेरापें गये ॥ फेरि रात्रि भइ तब डेरापें हरिवंशजी आये सो हावभाव आदर करी आसन बिछायके बैठाये ॥ तब हरिवंशजी बोले ॥ श्रीप्रियाजीने हमकुं अभिमान बढ्यो जानिके मुख्य लखीकों हमारो अभिमान छेदनकुं पठाइ हे ॥ सो तुम्हारी बात तो तुमसों इ हे ॥ सो कहां तांइ लिखे ओर तुम तो हमसों जीती गये ॥ जो रथकी बात तो बाह्यरसों केहे दीनी सो वासमें सोइ बात होत हती ॥ फेरि मिरांबाइके तथा हरिवंशजीके अर्ध रात्रि पर्यंत भगवद् वार्त्ता बहोत अलौकिक परस्पर भइ ॥ सो दोउ देहाध्यास भुलि गये ॥ सो घडी दोयमें सावधान भये ॥ फेरि हरिवंशजी मिरांबाइ सों विदा होय अपनी बैठकमें जाय सोय रहे ॥ ओर मिरांबाइ अपनो नित्यकृत्यकरी, श्रीगोकुल आये ॥ सो श्रीगोकुलमें सब स्वरूपनके, तथा श्रोगुसांइजीके दर्शन करे ॥ फेरि श्रीगुसांइजीके दर्शन करी, बैठकमें गये ॥ तब आप आज्ञा करे जो बेंटो, ओर जुठन महाप्रसाद इहां लीजों घर तुम्हारो हे ॥ एसे शिष्टाचार कर्यो ॥ सो मिरांबाइने उहांइ प्रसाद लियो ॥ फेरि विनती करी जो श्रीनाथजीके दर्शनको अभिलाषा बहोत हे ॥ तब श्रीगुसांइजी मिरांबाइको लेके श्रीगिरिराज पधारे ॥ सो संध्या आरतिके दर्शन भये, सो दर्शन करीके मिरांबाइ बहोत प्रसन्न भइ ॥ ओर मिरांबाइकों देखिके श्रीनाथजी मुस्काये फेरि मिरांबाइने विनती करी जो कृपानाथ मेरे इहां पधारो ॥ सो श्रीनाथजीसेनमें आज्ञा करी जो पधारेंगे ॥ फेरि श्रीगुसांइजीसुं विनती करी जो इतने ठिकाने में दर्शन करे, परंतु यह सुख यहांइ आयो ॥ पहले काननसुं सुनी हती सो अब आखनसुं देखी जो प्रभुनको सुख तो इहांइ हे ॥ फेरि कथा सुनिके मुकाममें गइ ॥ श्रीगुसांइजीने इनको बहोत आदर



सत्कार करे, फेरि सबेरे भंगलाके दर्शन करी श्रीद्वारिकाजी जावेकी आज्ञा मागी ॥ ओर श्रीनाथजीके आगे नाची, ओर एक भजन गायो ॥ “ देखे हरिगुरु एक शरीर ” ए भजन गायो ॥ फेरि श्रीगुसांइजी प्रसादी वख, तथा बिडा दिये ॥ ओर श्रीमुखसों आज्ञा किये, जो मर्यादाभक्तनमें तुमसैं होने कठिन हे ॥ फेरि विदाय होयके श्रीद्वारिकाजी गये ॥ सो श्रीद्वारिकाजीमें गोमतोजी स्नान करे ओर सब जगे दर्शन करे ॥ फेरि सैनके समे श्रीद्वारिकानाथजीके आगे नृत्य कर्यो ॥ सो नृत्य करत करत सदेहसों श्रीद्वारिकानाथजीके स्वरूपमें लीन होय गये ॥ फेरि मिरांबाइके मनुष्य उदेपुर आये ॥ सो मिरांबाइ एसे भगवदी हते सो श्रीद्वारिकानाथजी सदेह अंगीकार कर्यो ॥ तासों इनके भाग्यको पार नहीं ॥ ओर इनके सेव्य ठाकुरजी श्रीगिरिधरलालजी हते ॥ सो मिरांबाइको अंगीकार भयो जाइ बिरियां अंतर्धान भये ॥ ओरके पास सेवा न करवाइ ॥ ओर इनके भजन कीर्तनमें छाप “ मिरांके प्रभु गिरिधर नागर ”को आवे हे ॥ एसो ए मिरांबाइ वैष्णव तामें स्हेज नहीं समजने ॥ इनकुं देखोके श्रीनाथजी मुस्काये ॥ या समान कोन बडभागी ॥ पुष्ट वैष्णवकूं देखिकें तो मुस्कावे परंतु ए मर्यादा भक्तपें एसी कृपा भइ ए विशेषता जाननी ॥ इति श्रीगिरिधरलालजी महाराजके वचनामृत सत्ताणुंमो संपूर्ण ॥ ९७ ॥

 [वचनामृत ९८ मो.] 

अब अठाणुमो वचनामृत ॥ तामें रामकुंवारजीने प्रश्न कर्यो ॥ जो आप मुस्काये एसी कृपा करी तब अंगीकार क्यों नहीं कर्यो? श्रीद्वारिकाजी क्यों पठाइ ? तब आपने आज्ञा करी ॥ जो पुष्ट होते तो इहां अंगीकार होतो ॥ तापें फेरि विनति करी जो कृष्णदास अधिकारीने मुसलमानो भक्तनको लाये सो सदहसों अंगीकार भयो ॥ तासों तो ए मिरांबाइ आछी हती ? ॥ आपनें आज्ञा करी जो “ श्रीठाकुरजी भक्त मनोरथ पूरक हे ” ॥ तासों कृष्णदासके मनोरथ सों अंगीकार करे हे ॥ ओर दूसरी बात जो ए

पूर्व जन्ममें ए श्रीललिताजीके युथमेंकी सखी हतो, सो श्रीठाकुरजी श्रीललिताजीके इहां पधारे, सो बात काहुने श्रीस्वामिनीजीसों कहीं सो आप सुनतहि श्री ललिताजीकी कुंजमें पधारे ॥ सो ए सखी डोढीपें बेठी हती ॥ सो श्रीस्वामिनीजी आपकुं रोके सो ता समे श्राप भयो सों जामें असुर योनियें जन्म होवेकी आज्ञा भइ ॥ तब ए सखी आपके चरणारविंदमें पडी, ओर विनती करी, जो महाराज मोकुं श्रीठाकुरजीने आज्ञा करी तासों मेंन ए कृत्य कर्यो हे, परंतु आप बडे हो मेरे अपराध सामें देखो मतिं ॥ सो श्रीस्वामिनीजी तो एसे रीस करिके पाछे पधारे ओर सखीने जाय श्रीठाकुरजीसों कही सो जो श्रीठाकुरजी श्रीस्वामिनीजीकी निकूजमें पधारे हे, तब श्रीस्वामिनीजी तो बडे मान करिकें बिराजे सो श्रीठाकुरजी बहोत दंडोत करी मनाये ॥ फेरि वा सखीकी विनती करी जो याको कलु अपराध नहीं हे ॥ तब श्रीस्वामिनीजीने कही जो एकवार तो हमारो वाक्य हे सो खाली न जायगो ॥ फेरि याको अंगीकार सदेहसों आप करेगे ॥ तासों याको अंगीकार भयो हे ॥ तब रामकुंवरजीने फेरि प्रश्न कर्यो ॥ जो कृपानाथ ! मिरांबाइ एसी समजवार, ओर श्रीनाथजो सानुभाव, तथा श्रीगुर्साईजीकी कृपा, ओर ए वैष्णव न भइ ताको कारण कहा ॥ तब आपनें आज्ञा करी ॥ जो दामोदरदास हरसानी श्रीमहाप्रभुजीके दर्शन करत मात्र द्रव्यके ढेर बटकरिवेकुं करे थके छोडीके श्रीमहाप्रभुजीके संग चले आये ॥ ओर दामोदरदासके भाइ हुं श्रीमहाप्रभुजीके दर्शन करे, परंतु वे वैष्णव न भये ॥ सो क्यों ? एसे आपने रामकुंवारजी सों हसिके आज्ञा करी जो जेसे वे हु दैवी जीव न हते, तेसे ए मिरांबाइ इहांके न हते ॥ तासुं शरण न आये ॥ ओर श्रीद्वारिकानाथजी सदेहसों अंगीकार किये ताको कारण कहा ? जो इनकुं मानसी सिद्ध हती तासों ॥ जो एसे मानसी जाको सिद्ध होय ताको सदेहसों अंगीकार हे ॥ तासों मानसी एसो पदार्थ हे सो जीवकुं अवश्य करनी चाइये ॥ एक समे अमथानें विनती करी जो एक संखेडाके पास



पांच कोसवें चोरांगमा गाम हे तहांके ठाकुर हरिसिंघजी उपनाम मोटा बावा केहते, सो मानसी करते, परंतु माध्वी संप्रदायके हते, सो एक समय रात्रिके विषे मानसीमें बेठे हते, सो धाघरमें उपले मजलेमें सोयवेकी जगे हती, तहां एकांतमें बेठीके मानसी करते ॥ सो उहां आंच लगी सो खाट तथा गोदडा तथा छपरा जरवे लग्यो. परंतु वाको खबर नही सो नीचे उजीयारो देखीके ओर लोक दोडिके आये, सो सबन मिलि आंच बुझाइ, परंतु पास बेठे जाकुं खबर नहीं ॥ ए घात निश्चय देखी सुनी भइ हे ॥ सो आपनें आज्ञा करिके लिखाइ जो सुधर्म हे सो ऐसो पदार्थ हे ॥ इति श्रीगिरिधरलालजी महाराजके वचनामृत अष्टाणुमो संपूर्ण ॥९८॥

 [वचनामृत १९ मो.] 

अब नवाणुमो वचनामृत आप आज्ञा करे जो संवत १९३४ के असाठ वदि ५ रविवारके दिन, श्रीनवनितप्रियजीकों गोस्वामी श्रीगोवर्धनलालजीनें मनोरथ करिके श्रीगोकुलनाथजीके मंदिरमें पधराये ॥ सो प्रकार आप आज्ञा किये ॥ जो नित्य सों दोय घडो उत्थापन सवेरे भये ॥ ओर उत्थापन भोग अरोगिके पधारे सो चकडोलमें बिराजिके, सब स्वारि सहित, चंबर, छडीदार, आगे, ओर सब गोस्वामी बालक संग हे, ओर बहु बेटी व्याहके गीत गावते थके, पछनमें होय, गोवर्धन पूजाके चोकमें होय, धोरिपटियांपें होयके पधारे ॥ अनेक भीड दर्शन करते थके, आगे झांझ पखावज दोय जोडी, किर्त्तन होते थके, वाजे बाजते थके ॥ एसी छबि श्रीगोकुलनाथ-जीके मंदिरमें पधारे ॥ ता समय कलसबंधी मार्जन भयो, कीर्त्तन पेहेले सेहेराके भये ॥ सो राग सारंग—‘आजको दिन धन्ध धन्धरी माइ’ ए कीर्त्तन होते पधारे पधारीके भोगके दर्शन खुले, ता बिरियां फुहारे ८४ छुटे सो जलसों चोक भरि गयो ॥ ता समये ये कीर्त्तन गायो ॥ राग सारंगः— आज बने गिरिधर नवदुलहे नव चंदनको तन लेप कीये ॥ ए कीर्त्तन भोगके दर्शनमें भये ॥ फेरि संध्याभोग आये ॥ ता बिरियां किर्त्तनः—श्रीवृन्दावन-



कुंजनमें मध्य खसखानों रच्यो सितल त्रियारी झुकी धोखन बेहेत हे ॥ फेरि ॥ “ लुटत फुहारे आगे नीके बिराजे दोउ उसीर मेहेल ” इत्यादिक कीर्त्तन भये ॥ फेरि दर्शन खुले ॥ तब राग सोरठ “अंग अनंगन रंग रस्यो” आरती समे ॥ राग गोडो “ करो लडेंती जुको आरतो ” ए कीर्त्तन भये फेरि पट भये ॥ फेरि ग्वाल अरोगे, फेरि डबरा अरोगे, फेरि डबरा अरोगे, फेरि डबरा सरे ॥ पीछे हींडोलामें बिराजे ॥ हिंडोलाको तथा रथको अधिवासन भेलो भयो ॥ फेरि हिंडोला बिराजे ॥ बहु बेटीनने झुलाये ओर एक दंतन तथा दक्षिणी भाषाको कीर्त्तन बहु बेटी गाये ॥ फेरि दर्शन खुले ॥ क्रमसुं सब बालकनने झुलाये ॥ ता समे कीर्त्तन ॥ “झुलन आइ ब्रजनारि गिरिधरनलालजुके सुरंग हिंडोरना ” फेरि हिंडोलासों उतरोके सिंगार सहित शयन भोग आये ॥ फेरि सैन भोग सरे, पीछे उत्सवको भोग आयो ॥ फेरि समय भये भोग सरे फेरि रथमें पधारे ॥ दर्शन खुले बिडि अरोगे, वा समयकी झारी सब बालक भरे ॥ बिडि अरोगे ओर सब बालकन मिलिके रथ चलायो ॥ वा समय रोशनो भइ ॥ वा समय कीर्त्तन ॥ राग अडाणोः—“सुंदर बदन सुखसदन श्यामको निरखि निरखि मन थक्यो” ए कीर्त्तन भयो. जामें ‘हसत हसत रथ.हाक्यो’ ए भावसों ए पद गायो ॥ फेरि बहु बेटी रथ चलाये पीछे आरति भइ, फेरि दूसरी आरति मनोरथकी भइ ॥ फेरि न्योछावरी भइ पाछें चकडोलमें बिराजे, फेरि मंदिरमें पधारे ॥ ता समय कीर्त्तन भयो “ जुगल वर आवतहे गठजोरे ” ॥ ए कीर्त्तन भयो ॥ फेरि मंदिरमें पधारे ॥ मंदिरके द्वारे कलसबंधो, मार्जन भयो, फेरि चकडोल भीतर तीबारीमें पधारे, फेरि चुनकी आरती, श्रीगोवर्धन-लालजीए करी ॥ वा समें कीर्त्तनः—“रानी तीहारो घर सुबस बसो” फेरि राईलॉन भयो, टेरा आयो, श्रृंगार बडे भये, फेरि फुलको जोड पहेरे, फेरि नित्यक्रमसुं पोडे ॥ ता बिरियां रात्रिप्रहर १ तथा घडी ६ उपर पेहे-रके गइ हती ॥ श्रीमहाप्रभुजी तथा शालिग्रामजी भीतरके रस्ता पधारे,

वाइ रस्ता पीछे पधारे फेरि उस्ता तथा दरजीकुं पाघ उपरणा जोडी ८ दिये ओर सब श्रीगोस्वामी बालकननें परिक्रमा दिनी ॥ श्रीमदनमोहनजी, श्रीबालकृष्णजी, तो संग हि बिराजके पधारे हे ॥ ओर शृंगार भयो ताकी विगत ॥ श्रीमस्तकर्पे केसरी पाघ, ताके उपर सेहेरा, हीराके आभरण, हीराकी गादी, झालरको ओढणी केशरा, ओर एक दोय आभरण, एक पन्नाके कंठी पेहेरे ओर सवेरेसोइ उत्सवको क्रम रह्यो ॥ या मनोरथके समयमें श्रीगोस्वामी बालक हते तीनके नामः—(१) गोस्वामी श्रीगोवर्धनलालजी २ गोस्वामी श्रीगिरिधरलालजी श्रीविठ्ठलेशारायजी वारे ३ गोस्वामी श्रीगिरिधरलालजी कांकरोलीवारे, ४ गोस्वामी श्रीगोपिकालंकारजी—श्रीमट्टजीमहाराज ५ गोस्वामी श्रीकल्याणरायजी मधुराजीवारे, ६ गोस्वामी श्रीरघुनाथजा उपनाम पन्नालालजी, ७ बाबा श्रीकल्याणरायजी श्रीगिरिधरजोके, ८ गोस्वामी श्रीकल्याणरायजीके लालजी श्रीगोपाललालजी, ९ चि. श्रीबालकृष्णलालजी, १० गोस्वामी श्रीवजनाथलालजी, ११ लालजी श्रीगिरिधरलाल १२ लालजी श्रीमधुसुदनलाल, १३ गोस्वामी श्रीत्रिविक्रमजीके लालजी श्रीगोविंदलालजी, १४ तत्पुत्र श्रीलालजी श्रीगोपाललालजी, या प्रमाण चौद गोस्वामी बालक हते. अब बहु बेटीके नामः—१ श्रीभाभीजी महाराज, २ श्रीगिरिधरजीके बहुजी, ३ श्रीकल्याणरायजी श्रीमधुराजीवारेके बहुजी, ४ श्रीवजनाथजीके बहुजी, ५ लालजी श्रीगोपाललालजीके बहुजी, ६ श्रीनत्थो बेटीजी, ७ श्रीविजयकुंवर बेटीजी, ८ बेहेनाजी श्रीदेवकीबेटीजी, अब सेवकनके नामः—मुखियाजी रावल विठ्ठलदासजी, दूसरे मुखियाजी ठाकर शालिग्रामजी, ३ भीतरिया ठाकर गोवर्धनजी, ४ शुक्ल प्राणनाथ, ५ मथुरदास मारवाडी, ६ ठाकर हीरालाल, ओर ए मनोरथ हमारे बडे दादा श्रीगोकुलालंकारजीने कर्यो हतो ॥ तब श्रीनाथजी तथा श्रीनवनितप्रियजी सेवक सब जेये हते. एसे सुनेहे. कुंजमें चोकमेंकेला धरे ॥ इति श्रीगिरिधरलालजी महाराजके वचनमृत नव्वाणुंमो संपूर्ण ॥१९॥

 [वचनामृत १०० मो.] 

अब सोमो वचनामृत आपने आज्ञा करे ॥ जो हमारे दादा श्रीगो-
पीकालंकारजी बड़े प्रतापी हते ॥ तब दासनें विनती करी जो कृपानाथ !
श्रीनाथजीने चांगट मागे सो बात कृपा करिके कहिये ॥ तब आपनें आज्ञा
करे ॥ जो चांगट नहीं हीराके कडा मागे हते ॥ सो एक दिवस श्रीनाथ-
जीके राजभोग आवते हते, सो सब तो भोग पधरायवे पधारे, ओर ए
बड़े दादा पांच वर्षके हते सो उहां इ ठाड़े रहे, तब श्रीनाथजीने आज्ञा
करी जो ए तेरे कडा हे सो हमकुं दे ! तब पाछी कही जो में तो कडा
नहीं देउंगो ए तो मेरे कडा हे ॥ तब श्रीनाथजीने फेरि आज्ञा करी
जो ए तो हम लेइंगे, इतनेमें आछीमा राजभोग धरिवेकुं पधारे
तब तो श्रीनाथजी तो बोलते चुप होइ गये, ओर बड़े दादा रोइके
आछीमासों बोले जो ए मेरे कडा मागे हे ॥ सो में नहीं देउंगो, याकुं देउं
तो में पहुँरुं कहा ॥ फेरि आछीमानें वा बिरियां रोवते राखीके कही जो में
तोकुं दुसरे बनवाय देउंगी, ए इनकुं दे दे, यों कहेके कडा हाथमें सूं उ-
तारि के झारारें धोयके बड़े दादाके श्रीहस्तसुं श्रीनाथजीकुं भेट करवाये
॥ येह बात सुनिके वा समय श्रीगोस्वामी बालक ओर सब सेवक हते,
सो विस्मयकों प्राप्त भये, ओर धन्यभाग्य करवे लगे ॥ फेरि एक समय
जनोइ भये पीछे शीतकालके दिन हते सो शैया मंदिरमें श्रीमदनमोहन-
जीके सिंघासनके नीचे सोय गये, सो तालामंगल होय गये, भीतर हि
रेहे गये ॥ थोडीसी बिरियांमें निंद खुली सो वा सिंघासनके नोचेसुं बाहर
मणिकोठामें आप आये, देखे तो अंधेरो हे, ओर कोइ नहीं ॥ तब गभ-
रायके रोवे लगे, सो श्रीनाथजी पधारि हाथ पकडिके अपनी शैयाके पास
ले गये, ले जायके रोवते राखे, ओर आज्ञा करी जो रुवो मति में हुं ॥
तब इननें पाछी कही जो मोकुं जलकी प्यास लगेगी, तथा भूख लगेगी,
तो कहा खाउंगो ॥ तब आपनें कही जो मेरे पास हे सो देउंगो ॥ फेरि



कही जो मोकुं कोइ मारेगो तो नहीं नैं ? ॥ तत्र आपनैं आज्ञा करी जो नहीं मारेगो मारे ताकुं हों वरजोंगो ॥ एसे आज्ञा करी के वंटामें सुं ठोर दियो ॥ फेरि आज्ञा करे जो खाउ, तब वामें ते खायो गयो तितनो खायो, फेरि झारीमें ते जल पिवायो, ओर दादाजीसूं स्वप्नमें आज्ञा करी जो तुम्हारे लालजीकूं खेलवेके लिये इहां राखे हे, खदायो, पिवायो हे ॥ सोच प्रति करीयो ॥ तब आपनी निंद तत्काल खुली गइ ॥ सो आछीमाके पास पधारे, ओर स्वप्नकी बात सब कही तत्र आछीमा नैं बलदेवजी मुखियाजीकुं बूलाये ओर मुखियाजीसूं सब वृत्तांत कह्यो तत्र फेरि मुखियाजीनैं कह्यो जो उत्थापनके समयमें खुलेंगे फेरि सप्रय भये शंखनाद भये ताला खुले सब भीतर गये, तत्र दैयाके पास बेठे पाये ॥ फेरि वा ठोर बच्यो हतो वामें तैं कणिका श्रीगोस्वामी बालक सधननैं महाप्रसाद लियो ॥ येहे वार्त्ता एसे भइ ॥ ओर आपकुं गावेको बहोत शोख हतो सो सब समयमें कीर्त्तन नैमपूर्वक गावते, बेठकमें जब देखे तब तंबुरा खुल्यो इ पावतो ॥ ओर श्रीअंगमें जोर हु बहोत हतो एक विरियां दैया पधरावेके लिये नगरद्वारे गोस्वामी दादा भाइ श्रीब्रजनाथजीके तथा बडे दादा कुं लडाइ हो गइ सो गुथमगुथा आय गये फेरि ए बात मुखियाजीने दादाजीसूं श्रीनाथजीकी रसोइमें हते तहां आयके कही सो आप सुनत हि दोडिके आयके दोउनकुं लुडाये ॥ ओर रीस करके कही जो तुम दोउनमेंसुं कोइ सिज्याजी मति पधरावो, हम पधरावेंगे ॥ यौं कहीके आप दैया जो पधराये ॥ ओर झगडा मिटायो ॥ सो बडे दादा एसे उग्रप्रतापी हते ॥ इति श्रीगिरिधरलालजी महाराजके वचनामृत एकसोमो संपूर्ण ॥१००॥

 [वचनामृत १०१ नो.] 

अब एकसोएक वचनामृत आप आज्ञा करे ॥ जो तुलसीजी हे सो श्रीभगवत्प्रीया हे सो सहज बातसुं तोडने नही, श्रीप्रभूजीके विनियोगार्थ तो तोडने ॥ ओर वा समय प्रार्थना करनी सो श्लाक ॥ या दृष्टवा सकला-

घशं घशमनी स्पृष्ट्वा वपु पावनी ॥ रोगाणामभि वंदना नीरसनी सिकांत-
 कत्राशिनी ॥ प्रत्यासत्ति विधायनी भगवत्कृष्णस्य संरोपितान्यस्तान्चरणे
 विमुक्ति फलदातसैतुलस्यैर्नमः ॥ या आज्ञा करी तब ठाकर वैष्णव मेहे-
 तावजीनें प्रश्नकर्यो ॥ जो कृपानाथ ! श्रीतुलसीजीको कहा भाव हे ? जो
 श्रीप्रभूजीकुं समर्पे हे ? तब आपनें उपर लिख्यो श्लोकको अर्थ कर्यो, “या
 दृष्ट्वा सकलाघशंघ शमनी” जो सकल अघ नामा जो पातक; सो दर्शन
 मात्रतें दुर हो जाय एसे हे ॥ ओर ‘स्पृष्ट्वा वपु पावनी’ सो स्पर्श मात्र तें
 वपु जो देह सो पावन हो जाय ॥ ‘रोगाणामभिवंदना’ सो दंडवत् करत
 मात्र रोग नाश हो जाय, ‘निरशनी सिकतांतकत्राशिनी’ जो निरसिचवान्ना-
 रेकुं यमदूत ज्ञास न करी शके ॥ ओर ‘प्रत्या सत्यविधायिनी’ जो श्रीतुल-
 सीजीकुं रोपे ताकुं श्रीप्रभूजीके सन्निधान कराय दे ॥ ओर जो चरणारविंदमें
 श्रीप्रभूजीकुं समर्पे ताकुं सायुज्यमुक्ति करे ॥ एसे जो श्री तुलसीजी हे
 तिनकुं हम नमस्कार करे हे ॥ या प्रकार या श्लोकको पाठ करिके तुल-
 सीकुं तोडनें ॥ फेरि श्रीतुलसीजीकी कथा कार्तिक माहात्म्यमें हे ॥ जो
 जलंधरकी स्त्री नामे वृंदानाम हे, सो विवाह प्रबोधिनीके दिन होय हे, ओर
 नित्य समर्पे जाय, राजभोग समर्पे तब समर्पे जय तथा उत्सवके भोगमें
 हु समर्पे जाय, तुलसीजीकुं मर्यादा न जानने ॥ पुष्टि हे ॥ तुलसीजीकी
 सेवा तें बोडाणा भक्तके उपर श्रीद्वारिकानाथजी—श्रीरणछोडरायजी प्रसन्न
 भये हे ॥ ओर गुजरात पधारे ॥ ओर श्रीतुलसीजीकी माला वैष्णवकुं पेहे-
 रवेको योग्यता हे तथा जपहुं तुलसीजीकी मालासुं होय हे ॥ तासों श्रीतु-
 लसीजी श्रीप्रभुनकुं अत्यंत प्रिय हे ॥ ओर श्रीतुलसीजी लेने सो पेहेले
 सुगंधी लेनी, पीछे लेने ॥ मूँघे विना न लेने ॥ श्रीतुलसीजीकी आगे दी-
 वा करनो, चोक पूरनो, पूजा करनी, प्रदक्षिणा करनी, दीवाघृतसुं करनो,
 अपने घरमें तुलसीजी राखनें, तुलसीजीको ब्यारो न होय तो नांदमें गारो
 भरिकें बोलने, जल सींचनो, अपने सब मंदिरनमें तुलसी ब्यारे हे ॥ तब

रामकृंवरजीने प्रश्न कर्षो जो श्रीनाथजीके मंदिरमें तुलसी क्यारो कौनसी जगे हे ॥ तब आपने आज्ञा करी जो अन्नकुटकी रसोइ में हे ॥ तासों तुलसीजीको माहात्म्य चारों संप्रदायमें हे ॥ चारों संप्रदायवारे सब वैष्णव माने हे ॥ ओर तुलसी क्यारो करावने जाके चारों पासे चार ग्वाखे करावने, ओर श्रीठाकुरजी गोदोहन करते होय ॥ ओर श्रीस्वामिनीजी पीछे ठाडे होय, ओर आगे बडरा पकडे ग्वाल ठाडे होय, एसो चित्र तुलसी-क्यारों करावने ॥ तुलसीजी वैष्णवके घर अवश्यहि चैये ॥ तुलसीजी बिना घर स्मशानतुल्य हे ॥ वाके घरमें श्रीठाकुरजी नहीं बिराजे ॥ तुलसीजीकी अष्ट प्रकारकी पूजा हे ताको श्लोक "दृष्टा स्पृष्टा तथा ध्यानां नमिता पूजितार्चिता, आरोपिता सोकिता च पूजा अष्टविधाःस्मृताः ॥१॥ याको अर्थः—'ध्यानां' सो ध्यान करनो ॥ नमिता नाम दंडवत् करने, पूजिता सो पूजन करनो, अर्चिता सो वस्त्रादिक अलंकार, आरोपिता सो षोवने, सोकिता सो जलसिंचनो, ताके फलको माहात्म्यको श्लोक प्रथम लिख्यो हे, ओर श्रीभागवत रासपंचाध्यायीमें निरूपण कर्षो हे ॥ श्रीगोपीजनने अंतर्ध्यानके समय श्रीतूलसीजी सुं पूछ्यो हे जो बचन ॥ कच्ची तुलसी कल्याणी गोविंदचरणप्रिये [श्री भा. १०. ३०. ७] प्रिय जो वस्तु आको होय ता बिन वासुं रह्यो न जाय तासुं श्रीतूलसीजीकूं आगे करीके पूछ्यो जो तूम हो जहां श्रीठाकुरजी निश्चय होइंगे, तासों बतावों ॥ जहां श्रीतूलसीजी बिराजते होय तहां श्रीठाकुरजी निश्चय होय हि होय ॥ याहि तें श्रीमदाचार्यजीने तूलसी द्वारा जीवको अंगीकार कर्षो हे ॥ चरणकों अत्यंत प्रिय हे तासूं चरणारविंदमें समर्पे ता बिरियां गद्यको मोहोडेसुं पाठ करके समर्पने ॥ तीनपतूवाको दल चरणारविंदमें समर्पनो ॥ ओर एक पत्तोवा समस्त सामग्रीमें भोगधरे तब पंचाक्षर केहेते पधरावने ॥ ओर स्नानके जलमें स्नान यात्राके दिन पधरावने ॥ इति श्रीगिरिधरलालजी महाराजके वचनानृत एकसोएक संपूर्ण ॥ १०१ ॥

 [वचनामृत १०२] 



अब एकसौद्वितीय वचनामृत आपने आज्ञा करो ॥ जो ता समय दासानें विनतीकरी जो कृपानाथ ! सब वर्ण स्त्री शुद्रादिकजों श्रीतुलसी सम-पर्वकोअधिकार हे के नहीं ? तापें आप आज्ञा करो जो अपने मार्गमें तो स्त्री शुद्रादिक अपने घरमें सेव्य श्रीठाकुरजीकुं समपें यामें बंधक नही हे ॥ अब गोदके श्रीठाकुरजी सात स्वरूपनमें विराजत हे ताके नामः— प्रथम तो श्री-नाथजीके इहां श्रीमदनमोहनजी बिराजे हे, सो श्रीगोपीनाथजीके सेव्य श्री-ठाकुरजी हे ॥ ओर दुसरे श्रीबालकृष्णजी श्रीनाथजीके पास खडेमें बिराजे हे सो श्रीमहाप्रभूजीके पास परदेशमें बिराजते सो ये स्वरूप हे, सो श्रीनाथजीके पास बिराजे हे ॥ ओर श्री मुकुंदरायजी साचोरा मुखियाके श्रीठाकुरजी सो श्रीगुसांइजीनें श्रीनाथजीके पास पधराये सो अब काशीमें गोस्वामी श्रीगिरिधरजी महाराजके माथे बिराजत हे ॥ अथ श्रीनवनीत प्रियजीके पास स्वरूप बिराजत हे ताकी विगत ॥ १ ॥ श्रीमदनमोहनजी चांपाभाइ भंडारीके माथे बिराजते सो, श्रीबालकृष्णजी अम्माक्षत्रागिके माथे बिराजते सो ॥ अथ श्रीमथुराधीशकी गोदके श्रीनटवरजी सो प्रथम चांपाभाइ भंडारीके माथे बिराजते सो अब राजनगरमें गोस्वामी श्रीवजरायजी महाराज के माथे बिराजे हे ॥ ओर श्रीबालकृष्णजी श्रीद्वारिकाधिशकी गोदके सो श्रीसुरतमें बिराजे हे ॥ सो श्रीगुसांइजी के खेलवेके श्रीठाकुरजी हे, इनसुं श्रीगुसां-इजी आप खेलते ॥ ओर श्रीचन्द्रभाजी के इहां श्रीमदनमोहनजी तथा श्रीबालकृष्णजी दोय स्वरूप हे सो तामेंसों ए दोउ स्वरूप लघुगुपाल वैष्ण-वके माथे बिराजते ॥ अब श्रीनवनीतप्रियजीके मुखियाजी मनुजीने प्रश्न कर्यो ॥ जो तीन स्वरूपके गोदके श्रीठाकुरजी हे तो ओर स्वरूपके हे ? ओर श्रीविठ्ठलनाथजी, श्रीगोकुलनाथजी, श्रीमदनमोहनजी ए स्वरूपनके गोदमें श्रीठाकुरजी क्यों नहीं ? तब आप आज्ञा करो ॥ जो श्रीनाथजीके इहां बिराजे हे सो तो प्रत्यक्ष हि दीसे हे ॥ जो श्रीमदनमोहनजी हिंडोरा

झुले हे, ओर श्रीबालकृष्णजी पंचामृतमें पधारे हे, ओर श्रीमुकुंदरायजी तो रामदासजी भीतरियाके हे ॥ सो श्रीनाथजीके पास श्रीगुसांइजीने पधराये सो काशी पधारे ॥ ओर श्रीनटवरजी तथा श्रीमदनमोहनजी भेले बिराजते, सो बटभये पाछें श्रीनटवरजीतो श्रीमथुरेशजीकेपास पधारे ॥ ओर श्रीमदनमोहनजी भेले बिराजे ॥ श्रीनवनितप्रियजीके पास बिराजे हे, ओर श्रीबालकृष्णजी पंचामृत कशवेकुं बिराजे हे ॥ ओर श्रीमथुरेशजी श्रीद्वारिकाधिश तथा श्रीगोकुलचंद्रमाजीके आगे गोदके स्वरूप बिराजे हे सो अगाडो हिंडोला, पलना, डाल, रथ, विगेरे ए गोदके स्वरूप पधारते ॥ सो अपनी स्वइच्छातें न्यारे भये, परंतु वेदमर्यादाभोग मूर्त्तिकी रीति हे श्यामस्वरूपके आगे ॥ ओर श्रीगोकुलनाथजी, श्रीविठ्ठलनाथजी, तथा श्रीमदनमोहनजीके आगे ए तीन स्वरूप गौर हे सो इनकी गोदके श्रीठाकुरजी नही हे ॥ ओर गोदके श्रीठाकुरजी हे, सो जिनजिनकेहे सो विनकी पालखीमें संग पधारे ॥ श्रीनाथजीके श्रीमदनमोहनजी हे तिनके पास जो ठाडे स्वरूप होय सो बिराजे ॥ ओर श्रीद्वारिकाधिशकी गोदके श्रीबालकृष्णजी हे सो श्रीद्वारिकांधीशके पास श्रीगोकुलनाथजीके दक्षिण दिश बिराजे ॥ तब भीतरीआ जगन्नाथजीने प्रश्न कर्यो जो ओर स्वरूपकी गोदके श्रीठाकुरजी न्यारे बिराजे ओर श्रीद्वारिकांधीशकी गोदके श्रीबालकृष्णजी आपके पास कयों बिराजे हैं ? ताको कारण कहा ॥ तब आप आज्ञा करे जो श्रीगुसांइजी के आगे पेहेले इ पेहेले बिराजे हे ताको कारण कहा ! तब आप आज्ञा करे ॥ जो सब स्वरूप अन्नकुट अरोगवे पधारे तब श्रीद्वारिकानाथजीकी पालखीमें पधारिके श्रीबालकृष्णजी संग पधारे तब श्रीगुसांइजीने श्रीमहाराजसुं आज्ञा करी जो तुमने श्रीठाकुरजी लीये होतं तो तुम्हारी न्यारी पालखी पधारती ॥ अब तो श्रीद्वारिकानाथजीके संग तुम्हारे लिये पधराये हे ॥ श्रीबालकृष्णजीके कीर्त्तन गोस्वामी दादा श्रीभोपिकालंकारजी उपनाम श्रीमद्गुजी महाराजने करे हे सो पद ॥ राग बिलावल ॥ श्रीबालकृष्णकुं गोदले स्तानपान करावे, चुचुकारत मुख प्रफुल्लित अति आनंद बढावे ॥१॥ गोपीजन हसि केहेत मेहेरिसों ॥ हमें

देहुतो हम हि खिलावे ॥ तिहारे भाग्य दियो फल माग्यो येहे तुमतें सुख पावे ॥२॥ जब लीने प्रफुल्लित व्हे पिय कंठ लगावे, रसिकदासके प्रभु रतिनायक सब तनताप बुजावे ॥३॥ दूसरो ॥ वंदो श्रीबालकृष्ण नव बाल ॥ जसुमति यह झूलतहे पलना, रसलीलामें अधिक रसाल ॥१॥ कटुला कंठ भ्रुकुटि मिस बिंदुका, तिलक बिचित्र बिराजत भाल ॥ रसिकरायके दासकी विनती शरण राखिये करि प्रतिपाल ॥२॥ याको अर्थ ॥ जो

मातृ चरण जो श्रीयशोदाजी श्रीबालकृष्णकुं गोदमें लेके स्तनपान करावत हे, ओर आपने प्रफुल्लित मुखसों श्रीबालकृष्णजोकुं मुख चुंबन करत हे, ओर चुचुकारत जो प्यार करत हे, सो मनमें अत्यंत आनंद होत हे, ओर श्रीगोपीजन श्रीयशोदाजीके बराबरीके घरकेनकी पास बेठी हे, सो श्रीयशोदाजी केहे जो तुम्हारे भाग्यतें येहे फल पायो हे, सो फेरि प्रिय जो श्रीबालकृष्णजी हे सो तिनकुं लेके कंठ लगावे हे ॥ फेरि रसिकदास जो श्रीयशोदाजीके आज्ञा करे हे जो श्रीयशोदाजीके दासके रूपमें श्रीबालकृष्णजी आप सब गोपीजनके ताप बुझावे हे ॥ या कीर्तनके ताप बुजावे हे, या कीर्तनमें अत्यंत मुग्धताके स्वरूप-किशोरलीला लिये श्रीबालकृष्णजीको स्वरूप भयो-॥ अब दूसरे कीर्तनको अर्थ ॥ जो श्रीगोपिकालंकारजी केहेत हे जो ॥ नवबाल जो श्रीबालकृष्णजी हे तिनको हों वंदन करत हों, सो श्रीयशोदाजीके यह विषे पलना झूलत हे, सो रसलीलामें बडे रसाल हे, श्रीकंठमें कटुला बिराजे हे, ओर भ्रुकुटि विषे मिसको बिंदुका करे हे, मिस जो काजलको नाम हे, ओर बिचित्र तिलक श्रीमस्तकर्षे बिराजत हे ॥ एसे आप हो ॥ कैसे जो शरण प्रतिपाल तासों रसिकदास जो श्रीगोपिकालंकारजी विनती करत हे ॥ जो शरण राखिये करि प्रतिपाल ॥ इति वचनात् ॥ अब श्रोनटवरलालजीको कीर्तन श्रीगोपिकालंकारजीने कर्षी सो ॥ राग बिलावल ॥ वंदो नटवर नवल कन्हाइ ॥ रत्नजटित आंगनमें नाचत, कीलकी कीलकी अति हरख बढाइ ॥१॥ मांगत माखन माट मा-

तसों, बोलत बचन सुमुख तुतराइ ! जननि लाय दियो हितचित्त करी,
लीनो अति सुख पाइ ॥२॥ एक करमें नवनीत बिराजत, एक कर माट
सुहाइ, निर्तत सुल्प संचनौतन गति हस्तक भेद बताइ ॥ ३ ॥ व्रजवनि-
तानेनन सुख निरखत अंतरभाव जताइ, रसिकदासके प्रभू रसदायक रस
संकेत बताइ ॥४॥ याको अर्थः—कन्हाइ नवल नटवर हे ताको हम बंदन
करे हे, श्रीनंदरायजीको रत्न जटित चोक हे तामें आप किलकी किल-
कोके नाचत हे, सो चित्त बडो हर्षित होत हे, एसे जो श्रीनटवरलाल हे
सो श्रीयशोदाजीके पास माखन तथा माट मार्गत हे, सोइ दोउ श्रीमातृ-
चरणकुं अत्यंत प्यारे लागे, सो मागते हिलाये सो आप हितचित्तसों लि-
ये, सो एक करमें तो माट ज्यों ठोर हे, ओर एक करमें माखन लिये हे,
ओर सुल्पगति नौत्तन लेत हे, ओर हस्तक भेद बतायके, ओर व्रजवनि-
ता तो अपने प्यारेको सुख नैननसों निरखीके, अपने हृदयको भाव नेत्रके
कटाक्ष द्वारा जनावत हे ॥ अब श्रीगोपिकालंकारजी केहेत हे जो एसे
हमारे प्रभु रसदायक हे, सो अपने निजभक्तनको रससंकेतको दान करत
हे ॥ या प्रकारसों श्रीनटवरलालके स्वरूप बाललीलाको तथा किशोरली-
लाकी भावनाको हे, ओर जो गोदके स्वरूप हे तिनमें दोय तरेहकी भाव-
ना हे ॥ इति श्रीगोदकेस्वरूपकी भावना संपूर्ण ॥ इति श्रीगिरिधरलालजी
महाराजके वचनामृत एकसो द्वितीय संपूर्ण ॥

 [वचनामृत १०३ सो.] 

अब एकसो तृतीय वचनामृत आप आज्ञा किये ॥ वैष्णवकुं विवेक
धैर्य ओर आश्रय राखनो सो कहा ? तापें आप आज्ञा करे ॥ जो श्रोम-
महाप्रभुजीने न्यारोइ ग्रंथ विवेकधैर्याश्रयको कर्यो हे तामें सब विस्तार
कर्ना हे ॥ तब दासने विनति करी ॥ जो कृपानाथ कलुक तो याकी आज्ञा
करि चये ॥ तब आप आज्ञा किये जो 'विवेकस्तु हरिः सर्व निजेच्छातः
करिष्यति' ए वचन हे ॥ जो विवेकतो श्रीप्रभुजीके हाथ हे, परंतु अभि

मान तथा हठको त्याग करना, ओर दैन्यतापूर्वक रहने, ओर क्षण क्षण प्रति श्रीप्रभूनकी प्रार्थना करनी, जो में आपके आधीन हूं एसे मनमें भावना राखनी ॥ काहु बातको आग्रह राखनो नहीं ॥ ए तो विवेककी बात भइ ॥ ओर धैर्यके उपर एक प्रसंग कह्यो जो एक गोपको लुगाइने धैर्य राख्यो; एसो धैर्य राखनो ॥ तापर एक आख्यायिका कहो ॥ जो एक ब्राह्मण हतो, सो ताको लुगाइ निपट सुंदर हती सो वाको प्रथम गर्भ रह्यो सो पीयरमें ज्ञापा करिवे गइ, सो वाको बेटा भयो, सो ए ब्राह्मण वहुको लेके रस्तामें आवे हे; तब छोके तो मार्गमें जाते गाममें न ले जाय; ओर इनको तो गामके बाहर रुखनकी ओटमें बैठाय आप भिक्षावृत्तिको अकेलो जाय, वे सुंदर रूपवंती हती तारौ ॥ संग न ले जाय ॥ एसे नित्य करे सो एक समय वह भिक्षा लेवे गयो तब बनमें स्त्रीको धरी हती तहां एक राजा शिकारको खेलवेकुं निकस्योथको उहां आय निकस्यो सो ए स्त्री बेठी देखिके पूछ्यो जो तुं कोन हे ॥ तब इननें कही जो में ब्राह्मणी हूं मेरो ब्राह्मण गाममें भिक्षावृत्तिकुं गयो हे सो आवेगो इतनें रोटी करी खाइके आगे चलेंगे ॥ तब राजाने कही जो तुं तो हमारे संग चली चल तोको रानी करी लेंइगे; एसे भीखारी ब्राह्मणके संग काहेकुं दुःख भोगते हे ॥ तब वाने कही जो तुम तो राजा हो सो माबाप तुल्य हो, आपकुं एसो बोलनो उचित नहीं हे ॥ तब राजाने साम, दाम, दंड, भेद, करिके सम-जाइ परंतु न मानी तब राजाने बलात्कारसौं वाको हाथ पकडीके अपने घोडापें बेठाइ, तब वानें कहीके मेरा बेटा तो लेउं तब वानें सुनी नहीं ओर घोडा चलाय दियो सो राजा तो अपने शहरमें आयो, स्त्रीकुं लेके, सो फेरि स्त्रीकुं एक महलमें बेठाइ, फेरि वा स्त्रीने कहोजो आये गये ब्राह्मणकुं मेरी आडीको सदावत मिले ॥ ओर छे महिना पीछे में तुमसुं व्याह करोंगी ॥ तब राजानें कही जो ठीक हे ॥ फेरि कामदारसौं हुकम करि, सजाव्हो अपनी वृद्धरी ठोत्र रहेवेको महलहे तहां गयो ॥ अब बे

ब्राह्मणी नित्य सदाव्रत देवे लगी ॥ ओर वनमें वाइ रास्ता वनझारेकी बालद आइ सो एक छोरा रोवतो देख्यो सो वे पहेले तो डरे जो कल्लु भूत प्रेतादिक तो नहीं होय फेरि आठ दस जन काठी छाती करो गुये सो एक जनेनें वा छोकरो उठायो ओर जो वाके नायक हतो ताके पास लाये ॥ तब नायकने कही जो मोकुं श्रीठाकोरजीनेबेटा कैयो, ओर नायकणीकुं दुध उतर्यो सो वा छोकराकुं लेके बालदहाँकि गइ ॥ फेरि वे ब्राह्मण भिक्षा-वृत्ति करीके आयो सो देखेतो वे स्त्री तथा छोरा उहां कोउ नहीं हे ॥ तब वा ब्राह्मणनें चित्तमें विचार्यो जो अब घर जायके कहा करुं ॥ फेरि धैर्य लायके विचार्यो जो छ महिना ताई तो इनकुं हुंडोंगी फेरि जो मेरे नसिबमें होय सो होय ए विचारीके हुंडवे निकस्यो, सो हुंडत हुंडत चारेक महिनामें वा राजाके नगरमें आयो, सो लोकनें कही जो इहां नइ राणी सदाव्रत देवे हे उहां जा तेरो पेट भरिके अन्न मिलेगो ॥ सो वे तो नइ राणीके पास आयो सो वा राणीने पेहेचान्यो जो ए मेरो पति हे ॥ फेरि वाकुं बुलाय अपने हाथसुं सोधा दीयो ओर पूछी जो तुम कहां उतरोगे ॥ तब ब्राह्मणने कही जो तलावपें रसोइ करी खाइ के तुम्हारी बोलवाला मनाउंगो ॥ ओर आज थकी गयो हुं सो तलावपें सोय रहोंगो ॥ फेरि वा ब्राह्मणने वेसेइ कर्यो ॥ पीछे अब ये नइ राणीने कामदारनसों हुकम फरमायो जो द्वात, कलम ओर कागद हमकुं लाइ देउं जो हमारे कल्लु राजा-जीसुं विनति लिखनी हे ॥ फेरि राजाजीसुं मालम करिके द्वात, कलम, कामदारने दिये, सो नइ राणीजीने दोय चीछी लीखी तामें एक तो ब्राह्मणकुं लोखी; ताके समाचार ॥ जो में तुम्हारी ब्राह्मणी हुं ओर तुम इहांसो जैयो मति, ओर में तुम्हारे पास आउंगी ॥ एसे लीखीके जुगतसों दाबो दीनी ओर कही जो आछी न लखी गइ यों केहेके दुसरी राजाके उपर लिखी जो छ महिनामें करुंगी तोउ तुम पति हो, ओर आज करुंगी तो हुं तुम पति हो, तासों आज हि आवो, परंतु लोकं सुनेमें तो

कहेंगे जो छ महिनाको करार करिके चार महिनामें क्यों गये, तासों कोइ न जाने एसे एकांत अकेले आजकी रात पधारिये ॥ ओर मेरे पास इहां जो दासी हे वाको हूं आप कहेवाय देइंगे जो आजकी रात कोइ इहां रहे नहीं ॥ ओर दोय सीसा दारुके इहां पठाय दीजे कोइ पेटिमें धरिंके ॥ ओर आप पधारोगे तो पेहेरावारे जानेंगे तासों पेहेरावारेपें हुकम भयो चैये जो इहां स्त्री पुरुषमात्र कोइ रहेवे नहीं पावे ॥ एसे करवेको विचार होय तो भले इ पधारो नहीं तो मोकूं फजोति मति करियो ॥ ए बात दुसरेके कानपें पडी तो मेरो मोढो न देखोगे ॥ एसे काग दमें सब समाचार लिखि द्वात कलम कामदारकों दीनी ॥ ओर वंदोबस्त किरिके एक चीट्टी लेके दासीकुं राजाके प्वास भेजी ॥ ओर दुसरी चीट्टी एक बंटोमें धरोके दोय रुपैया धरोके बंटो दुसरी लुगाइके हाथ ब्राह्मणकों पंठाइ, ओर कह्यो जो ए दक्षिणा ब्राह्मण तलावपें उतर्यो हे सो जाको मुकाम मेंने यहिके लीये पूछयो हे, तासों उनकुं दे आउं ॥ वानें कह्यो जो हुकम ॥ यों कहीके वे लुगाई चली सो ब्राह्मणके पास आयके बंटो धरिंके कही जो ये दक्षिणा लेउ फेरि वासों ब्राह्मणने कही जो भले समयपें दक्षिणा आइ में अबी जेंइचुकयोहूं, ओर मेरे आशिर्वाद कहीजो, ओर तुम्हारे सकल मनोरथ पूर्ण हाइंगो ॥ सो सुनिके लुगाइ पाछी गइ ॥ फेरि वे डबिया ब्राह्मणने खोली; रुपैया धरिवेके लिये तामें देखे तो एक चीट्टी हे ॥ सो वांचीके ब्राह्मण बहोत प्रसन्न भयो ओर विचारी जो वे आयेगो तब तो इहां रह्यो न जायगो ॥ तासों सब अपनो वस्तु भाव कपडा विगरे गांठी बांधीके सोये जो ए स्त्री आवेगी तहां तांइ सोय रहूं ॥ सो सोवते मात्रमें सर्पने कांठ्यो सोवे तो उठोवेकी आशा न राखते भये ॥ अब इहां राजके पास लुगाइ चीट्टी लेके गइ, सो चीट्टी राजानें वांची, वांचतें प्रतिउत्तर लिख्यो जो एसेइ करुंगो ॥ ओर बडी मेहेरबानी मेरे उपर करी ॥ यों लीखी लिख्यो जो तुम्हारे लिखे प्रमाण सब करिके आ-



उंगो ॥ फेरि रात्रि पडी तब सब लुगाइ राणीसों पुछवे लगी ॥ जो दरबारको हुकम भयो हे जो आज इहाँ कोइ रहो मति, तासों हुकम होय तो हम घर जाय तब राणीने कह्यो जो जेसे हुकम होय ते सो करो ॥ फेरि वे सब गइ ॥ ओर रात्रि प्रहर एक गइ तब राजा आये, सो भेख बदलिके आये ॥ सो राणी बहोत आवकार करिके बेठाये फेरि प्यालाबाजी होवे लगी सो राजाजीकुं बहोत नीशा आइ गई ओर ब्राह्मणीने तो एक हुं प्याला नहि पीयो ॥ ब्राह्मणीकी जात बताइ लुटि गइ कह्यो जो मेरो धर्म तो में नही बिगाडुं ओर बात जो कहो सो प्रमाण हे ॥ फेरि राजाजीकुं गाफिल देखीके राजाजीको माथो राजाजीकी तलवारसों काटयो ॥ ओर बोली जो तूं तो मेरो धर्म बिगाडतो हतो परंतु मेरो धर्म प्रभुने राख्यो ॥ ओर तोकुं दंड मिल्यो ॥ यों कहीके राजाके कपडा, ढाल, तरवार, लेके बाह्यर निकसी सों तलावपें गइ सो उहाँ जाय दिखे तो ब्राह्मण मर्यो पड्यो हे ॥ सो देखिके बहोत विचारमें पडी गइ ॥ तब विचार्यो जो मेंने राजाजीसुं विश्वासघात कर्यो ताको फल मोकुं मिल्यो ॥ अब केसे करुं ! कितपें जाउं ! उहाँ जाउंगोतो राजाके मनुष मारो नाखेंगे ! तासों भागनोइ सलाह हे ॥ फेरि विचार्यो जो ए मर्यो हे ताकुं केसे करुं ! फेरि वाके वाके मोढेपें अग्नि संस्कार करी, जलको प्रवाह करी, भागी सो चली गइ ॥ ओर इहाँ सवेरो भयो तो लौंडी बाइ सब महेलमें चली आइ, देखे तो राजाको माथो काटयो पड्यो हे, ओर राणी दीसे नहीं फेरि लुगाइनने हछा कर्यो ॥ सब मनुष्य भेले भये हाहाकार मच गयो ॥ ओर यह निश्चें भइ जो नइ राणी भागी गइ ताको ए कृत्य हे, ताके लिये अस्वार दोडाये, सोवे तो न पाइ फेरि राजाको अग्निसंस्कार कर्यो ॥ फेरि दुसरो राजा कर्यो, ओर वे ब्राह्मणी गइ सो कोइ बडे शहेरमें चली गइ ॥ सो उहाँ जाय चिजबस्तु बेची बेइयाकी दुकान मांडी ओर पांच हजार रुपैया लेवे तब पुरुषको संग करे ॥ एसे एक डोकरी पास राखी इती, सो नीचे बेठी रहे,

जो सख्स आवे सो वा डोकरी सों ठेराव कबुल करे तब उपर जाय ॥ एसें करत दश बार वर्ष हो गये ॥ फेरि कहुं सो चलि चलि वे वणझाराकी बालद वाइ शहरमें आइ, सो वे छोरा वणझाराको पांच सात अपने संगके आदमी लेके वा शहरमें सेल कग्वेकुं आयो, सो देखे तो उपर ए गोखडामें एक लुगाइ बहोत सुंदर बेठी हे, सो देखीके वा वणझाराके छोकराको चिच लाग्यो सो साथीन सो केहेवे लग्यो जो ए लुगाइ केसी सुंदर हे, तब एकनें कही जो एतो कोइ देश्या लगे हे, तब एकनें कही जो कहो तो याकुं ठेरावे ॥ तब वा वणझाराके छोरानें कहीके नायकजी लडेगें तो कहा जुवाब देइंगे, तब एक छोराने कही जो यामें काहेकुं लडेंगे इनसूं तो केहे देइंगे जो सेल करवे गये हते ॥ तब इनने हामी भरी जो भले इ चले सो उहां गये, डोकरीने खुरशी बिछाय दीनी; सो वे वणझाराको बेटा खुरसीपें बेठयो, फेरि संगके छोरा हते सा बोले जो इहां केतेको मुजरा हे ? तब डोकरी बोली जो मुजरा पांच हजारकोहे, फेरि इनाम न्यारी ॥ तब आपसमें सलाह विचारवे लगे अब कैसें करे चले जाय तो बूरी लगे. इहां रहे तो इतने रुपैया कहांसों लावे ॥ तब एकने कही के तुम्हारे रुपैयाकी कहा कसर हे नायकजीके छोरा हो, गलेमें मोतीको कंठा पेहेर्यो हे सो देउ एक दो हजार जास्ती जायंगे तो तुम्हारी नामना हे ॥ तब वा डोकरी सो वानें कही जो हमारे पास रोकड रुपैया तो हे नहीं ओर हमारे नायक पिता हे जासूं छाने आये हे ॥ सो हमारे पास ये मोतीकी कंठी हे सो इनकुं पेहेराय देइंगे ॥ सो सुनिके डोकरीने कहीके में पूछी आउ ॥ फेरि डोकरीने जायके कही जो इहांके नायक हे याकुं प्रसन्न राखियो एक मोतिकी कंठी तोकुं ठेराय आइ हों पांच हजारतें तो सवाइ डेढी हे ॥ फेरि हुं राजी होइंगे तो कलु सिखाय देइंगे ॥ तब वानें कही जो भलेइ पठावो ॥ तब वा डोकरीनें कही जो उपर जाओ ॥ सो वे उपर गयो तब ए साम्हे आइ हाथ पकडीके लेगइ अपने पलंगपें जायके बेठाये ॥ ओर रसरोतिकी बातें करीवे लगे ॥ फेरि

वा बाइने याको मोढो आछी तरेह देख्यो सो अपनो बेटा छे महिनाको छेढ्यो हतो ताके अनुहार देख्यो ॥ सो रोज आइ गयो, जो मेरो बेटा एतो होतो तो में ए दुकान काहेकुं मांडती ! फेरि वे रोज देखोके वानें पुछी जो तो काँ रोज कयों आइ ? तब वानें कही जो कलु नहीं, ए तो मेरे ए-सेइ मनमें आइ गइ ॥ तब वानें कही जो ए बात केहेगी तब में बोलुंगो ॥ तब वा बाइने कही जो तुम्हारी अनुहार मेरे एक बेटा हतो, सो बनमें रही गयो हतो, सो वाकी सुधि आइ गइ ॥ तब वा वणजाराकूँ हुं अपनी सुधि आइ जो ए नायककूँ हुं में बनमेंसूँ पायो हुं तासों ए तो मेरी माता नहीं होय ? तब वानें बात कही जो में हुं छोटो बालक छ महिनाको हतो सो बनमेंतें नायककुं पायों हुं, एसे हमारे संग के लोग सब केहे हे ॥ सो तासों तुं तो मेरी माता होयगी ! सो पीछे वाकुं मातुलभाव उत्पन्न भयो ॥ ओर वाकुं पुत्रभाव उत्पन्न भयो ॥ ओर कही जो बेटा !! बडी गजब भइ ! याको कलु शास्त्र दिखाओ ! पीछे वहाँसुं वे छोरा वणझाराके पास आयो ओर बापसूँ कही जो या शहरमें मेरे नामुन करनो हे सो पंडितनकी सभा भेली करो ॥ ओर रुपैया रुपैया दक्षिणाको बाँटुंगो ? ॥ बापने कही बहोत आछो, तेरी खुशीमें आवे सो करी ॥ फेरि वानें सब पंडितनकी सभा भेली करी ॥ फेरि वे पंडित परस्पर चर्चा करिवे लगे ॥ तब वणझाराके छोरानें कही जो एक प्रश्न में बी करुं ? तब सब पंडितनने कही जो भलेइ करो ॥ तब वानें कही जो कोइ भुले चुके माके उपर स्त्रीभाव करे ताको कहा प्राय-श्चित हे ? तब सब पंडितनने कही जो आगे एसी बात भइ हे, सो वे तो फक्त माकुं देखवेइ गये हते कोउने कही के तुम्हारी मा व्यभिचार करे हे, सो छानेंसे देखवे गये सो मा बेटा भगवद् वार्त्ता करत हते, सो देखीके धिक्कारी मनमें आइ, सो नदीके तीरपे पीपलाकी खोहमें बेठीके जरी मरे ॥ ओर माके उपर खोबुद्धि करीके गयो होय तो वे मा बेटाकाँ नदीकी तीरपे पीपलाकी खोहमें बेठीके जरनो चैये ॥ फेरि वानें सब पंडितनकी पूजा

करि रूपैया दोय दोय दक्षिणाके दिये ओर ब्राह्मणनकुं विदा किये ॥ सो ब्राह्मण तो घर गये ओर वे छोरा रात्रिकुं सेलके मिष आपनी माके पास आयो ॥ ओर सब वार्त्ता कही ॥ तब मानें कही अपने एसो इ करनो ॥ ॥ सो फेरि दोउजने नदीके तीरपें गये, जायके पीपलाके भीतर पेठिके जरे; सो नदीके तीरपें पीपला हतो वामें बेटा तो जरीके मर्यो, ओर मा तो आँ च बुझि गइ तासों रही गइ ॥ सो पीपला बेहेतो बेहेतो कोइ गामडानमें निकस्यो ॥ सो उहाँ ग्वालिया गाय चराय रहे हते, सो उननें देख्यो सो देखतेइ दोबे वामें एक मझेकी लुगाइ निकसी ॥ सो एक ग्वालियानें लुगाइ करी राखी ॥ फेरि एक ग्वालकी लुगाइके संग माथे मथनी धरिके छाछ बेचवे चली, सो पांच दस लुगाइ ओर हु संग हती, सो विनके हु माथेपें छाछके घडा हते, सो रपसनी जगे आइ सो सब रपस पडो, सबनके घडा ढलि गये, सो सब सोच करिवे लगी ॥ कोइ कहे मेरी सास लडेगी ! कोइ कहे मेरो धनी लडेगो ! कोइ कहे मेरी मथनीयाँ एसो सुंदर हती सो वाको सोच करवे लगी ॥ ओर ए बाइ तो घडी घडी हसे हैं ॥ तब सयनने कही जो हम सबजनीकुं तो सोच भयो ओर तुं हसे क्यों हे ? तब वाने कहीजो में काहेको सोचकरं ? सोचकुं तो डारि दीयो हे, ओर धैर्यता सिद्ध भइ हे ॥ घनी काढी देइगो तो भगवदीच्छा ॥ पीछे अपनी वार्त्ता ठेठसुं भइ सो सब विनसुं कहे सुनाइ ॥ ताको श्लोकः—हत्वानृप पति निरक्ष भुजंग दृष्टं, देशांतरे विधिवशात् गणिकास्मि जातः ॥ पुत्र पति समधिगंचितां प्रविष्ट सोच्यां गोप गृहणी कथमद्यतक्रं ॥ या श्लोक को भाव उपर आय गयो हे ॥ तासों जीवकुं धैर्यता न छोडनी ॥ जो आय पडे सो सहन करनो ॥ ए वार्त्तापें दुसरो पुष्टिमागीय वैष्णव गदाधरदासमिश्र भये ताके प्रसंगमें वार्त्ता प्रसिद्ध हैं ॥ सो द्विचारनी ॥ ओर आधुनिक गौड संप्रदायमें वैष्णव शाहाजी कुंद नलाल ओर लीलाको नाम 'ललितकिशोरी' हे सो श्रोवृंदावन वास करि



रहे हे ॥ सो बिनको बेटा मरि गयो सो वाको कलु शोक न मान्यो, ओर वाइ दिन रास करवायो ॥ सो एसी धैर्यता रेहेनी बडी कठिन हे ॥ एसी धैर्यता राखे ताकों धैर्यवान् कहे ॥ ओर आश्रय तो प्रसिद्ध हे जो हे सो अपने श्रीगुरुदेवको दियो थको “श्रीकृष्णः शरणं मम” सोइ अश्रय दृढ करिके राखनो ॥ इनको निर्णय, निश्चयके ग्रंथ, तथा कीर्त्तन प्रसिद्ध हे तासो विशेष निरूपण नहीं कर्यो हे ॥ इति श्रीगिरिधरलालजी महाराजके वचनामृत एकसो त्रण संपूर्ण ॥ १०३ ॥

 [वचनामृत १०४ मो.] 

अब एकसो चतुर्थ वचनामृत आप आज्ञा करे ॥ ॥ जो श्रीवृन्दावनमें शाहाजीको मंदिर बाजे हे सो वे शाहाजी बडे भगवदीय गोडीया संप्रदाइ हते, जिनने बेटा मरे को कलु लौकिक विचार न राख्यो एसे वे भगवदी हते ॥ तब दासनें बिनती करी जो शाहाजी कोन जात हते, कहां रेहेते, ओर एसी दशा क्यो भइ ॥ तब आपनें आज्ञा करे ॥ जो ए लखनौके बनिया चार भाइ, बडे द्रव्य पात्र हते, वहोत द्रव्यपात्र होय ताकुं शाहाजी केहेवे हे, तासों इनको सब कोइ शाहाजी केहेत हे ॥ सो इहां दोय भाइ आय रहे तामें बडे भाइको नाम तो कुंदनलाल, ओर छोटे भाइको नाम फुंदनलाल हे, ए दोउ भाइ अकस्मात लखनौ में ते श्रीवृन्दावनमें आये ॥ सो श्रीरधारमणी गुसांइके सेवक भये ॥ ओर दोउ भाइनें कीर्त्तन किये हे तामें “ललित किशोरीकी” छाप तो कुंदनलालकी हे ॥ ओर “ललितमाधुरी”की छाप तो फुंदनलालकी हे ॥ ओर फुंदनलाल जिये तहां तांइ रास नित्य भयो, सो बहोत सुंदर होतो ॥ नित्य नइ लीला होती ॥ तालीलाके कीर्त्तन शाहाजीनें किये हे ॥ सो कीर्त्तनानुसार लीला होती सदा याइ भावमें रेहेते ॥ ओर श्रीवृन्दावनमें जोडा

पेहेरीके तथा अस्वारीमें बेंठीके कबहु निकसे नहीं ॥ ओर श्रीमहाप्रभुजीके बालकउपर बहोत भाव हे ॥ ओर जो बालक वृन्दावनमें पधारे उहाँ दर्शनकूं आवते, ओर रासके दर्शनकी विनती करते, सो दो तीन रास हमने बी देखे हैं ॥ तामें एक तो नटलीलाके, ओर एक मालीनलीलाके ॥ नटलोला में तो श्रीस्वामिनीजीके आगे श्रीठाकुरजीनें नटलीला करी सब नटके चरित्र करे ॥ ओर मालीनलीलामें श्रीठाकुरजी मालीन बने, ओर श्रीस्वामिनीजीके सब फुलके शृंगार सिद्ध करी, श्रीस्वामिनीजीके शृंगार करे ॥ ओर एक शरदकी लीला श्रीयमुनाजीकी पुलिनमें भइ सो एकसो आठ तो गोपी बनी, सबनके सुफेत शृंगार, ओर श्रीठाकुरजी श्रीस्वामिनीजीके सुफेत, सब वस्त्र, तथा आभूषण हीराके, ओर सब बिछोना सुफेद, ओर जो कोइ दर्शनी आवे, तथा कीर्तनीया, बाजेवारे, सबनको सुफेद साज, एक सार ॥ ओर डेरामें सों श्रीठाकुरजी शृंगार करिके पधारे ता बिरियां एकसो आठ सखी आगे पीछे, कोइ छडिदार, कोइ चंवर लीये कोउ मुछेल, कोउ घोटा, कोउ छांगी लीये, एसे अपने अपने साज लीये आगे पोछे चले हे, मध्यमें श्रीप्रिया प्रियतम गलबांही दिये पधारते हे ॥ सो गादी तकीयापे विराजे सब सखी अपने अपने स्थानपे साज लीये ठाडी रही, फेरि रासके कीर्तन होवे लगे ॥ पीछे श्रीठाकुरजी नृत्य करवे लगे ॥ युगल स्वरूप गलबांही धरिके सब सखीनके मध्यमें नृत्य करवे लगे जो वा समयको सुख देखेइ बने कहेवेमें नहीं आवे ॥ सो बडे कठोर छातीवारे हुं गदगद कंठ होय गये, फेरि रास करिके बाहिर डेरामें पधारे ॥ अगाडी इनके संप्रदायमें रुपसनातन, हरिवंशजी, व्यासजी, हरिदासजी, कृष्णचैतन्यजी, भये सो तो देखे नहीं हते परंतु इनकुं देखे सो मानु वि नमें के कोइ जनेमेंकों हे, एसे महानुभावी हते ॥ ओर श्रीप्रियाप्रियतम सानुभाव होइंगे, एसे देखे ॥ अब इनके छोटे भाइ हे ॥ परंतु इनकी होड नहीं करे ॥ ओर रामानुज संप्रदायमें मथुराजी वारे शोठजीगोविंददास

सरीखे हुं होने कठिन हे, तामें आश्चर्य ऐइ जो केवल जैनमार्गीनमें तो जन्मलीयो सो वे जैनको धर्म छोडोके एसे वैष्णव भये जो अद्यापताइ गुरुभक्ति एसी अनन्य हे जो केहेवमें न आवे ॥ इनके छोटे स्वामी जित नैं नाच नचावे सो सब कबुल करे हे ॥ ओर हाथ जोडिके ठाडे रहे हे ॥ ओर गोस्वामी बालक उपर तो नहीं परंतु हमारे उपर तो बहुत बडो भाव हे ॥ इति श्रीगिरिधरलालजी महाराजके वचनामृत एकसो चतुर्थ संपूर्ण ॥ १०४ ॥

 [वचनामृत १०५ मो.] 



अब एकसो पांचमो वचनामृत आप आज्ञा किये जो पुष्टिमार्गके दश प्रकारके धर्म श्रीद्वारिकेशजी महाराजने निरूपण करे हे ॥ सो कीर्त्तन ॥ राग इमन केदारोः—आशरो एक दृढ श्रीवल्लभाधशको ॥ मानसी रीतिको मुख्य सेवा व्यसन लोक वैदिक त्याग शरण गोपीशको ॥१॥ दीनताभावगुण ज्ञान उद्बोधसो घोष त्रिय भावना उभयजाने ! कृष्ण नाम स्फुरे पल न आज्ञा टरे कृत बचन विश्वास मन चित्त आनें ॥ २ ॥ भगवदी जान सत्संगकुं अनुसरे न दिखे दोष ओर सत्य भाखे ॥ पुष्टि पथ भर्म दश धर्म यह विधि कहे सदा चित्तमें श्रीद्वारिकेश राखे ॥३॥ याको अर्थ जो प्रथम धर्म श्रीमहाप्रभुजीको आश्रय दृढ राखनो, तातें सकल मनोरथ सिद्ध होय ॥ गुरु भक्ति बिन अलौकिक भक्ति पदार्थ सिद्ध न होय, तासों दृढ आश्रय राखनों ॥२॥ जो “मानसी भक्ति रीतिको मुख्य सेवा व्यसन” याको अर्थ ॥ जो वैष्णवकुं ओर व्यसन न राखनो, भगवदासक्ति छुटे तातें मानसी रीतिकी मुख्य सेवाहे ताहिको व्यसन राखनो, यातें पुष्टिमार्ग सिद्ध होत हैं ॥३॥ लोक वैदिक त्याग शरण गोपीशको” याको अर्थ ॥ जो लोक वैदिक त्याग करिके गोपीश जो प्रभुजी तिनके शरण जानो, जेसे ब्रजभक्तन वेष्णुनाद सूनतहि लोक वेद जो पति पुत्र इत्यादिकको त्याग करिके प्रभुनके शरण गये, तेसे वामें प्रभुव विषे तो शरणता हे; ओर ओरनके विषे शरणता

सिद्ध भइ ॥४॥ 'दिनभाव' याको अर्थ ॥ जो सर्वके विषे दिनताभाव राखना,
यासों श्रीठाकूरजो प्रसन्न रहे सोइ ॥५॥ 'गुणगान उद्बोध' सो याको अर्थ ॥
जो प्रभूके गुणगान करनो, जो उद्बोध जो अर्थ विचारीके करनो, उद्बोध
नाम अर्थ विचारवेकोइहे, तामें शुद्धाशुद्धको बोध राखनो, ओर रागको
हूं समयानुसार बोध राखनो, तामें गोविंदस्वामीकी आख्यायिका ॥ जो एक
समय गोविंदस्वामी एक मठमें चले गये, सो वे मठको बाबाजी मनमें
आवे तेसे विना रागको गातो हतो, सो गोविंदस्वामी वासों रोस करीके
बोले जो तुं ठाकूरजीके आगे एसे कहा गावे हे ॥ तब वानें कह्यो जो तेरे
कहा पढ्यो हे, में तो मेरे रामकुं रिझाउं हूं ? तब फेरि गोविंदस्वामी बोले
जो तेरो राम कहा मूर्ख हे जो रिझेगो ? यों कहीके निकसी चले ॥ तब
छगनभाइनें प्रश्न कयो जो महाराज श्रीनाथजीको सिंधपोलिया रूपा पटेल
हतो ते माहाडि नाइ गाया करतो हतो, तेमने एक दिवसे गोविंदस्वामी
ए नाहि करी दीधी त्यारे ते गाता बंध थइ गया, त्यारे ते श्रीनाथजीये
श्रीगुसाइजीने कष्ट जे आज मने निंद नथी आवी ॥ त्यारे आपे विनती
करोके कृष्णनाथ ! केम ? त्यारे श्रीनाथजीए आज्ञा करी जो गोविंदस्वामीनें
हमारी कहानी बंध करी दीनी ॥ तब मंगलभोग धरीने रूपा पोलियाने
बोलावीने आज्ञा दीधी जो तुं नित्य गातो तेसो गा ॥ काहुको मानियो
मति ॥ ओर गोविंदस्वामीकुं बुलायके आज्ञा दीनी के रूपापोलियाकुं तुम
काहेको बरजे, श्रीनाथजी आखि रात जागे ॥ त्यारे गोविंदस्वामीए विनती
कीधी के महाराज में यों नही जानतो जो अपने घरमें गुड खांड एक भाव
हे ? ॥ जेराज ! हमारुं तो जेवुं तेवुं आप माने छे, हमनें शुं आवडे छे,
तब आपने आज्ञा करी जो रूपापोलियाकी, कहांनी मानी हे ॥ कल्लु रागको
स्वरूप तथा अपनो यशवर्णन नहि मान्यो हे, केवल का'नीरूपी इनकी सेवा
मानी हे ॥ यामें कल्लु गोविंदस्वामीकी बराबरीतो न माने ॥ ओर रूपा पोलिया
हूं परम भगवदोष हते सो इनकुं रासादिक लीलाके दर्शन हौते, तासों

इनको सरलभाव देखीके श्रीनाथजी प्रसन्न भये, तासों आपनमें एसी सरल भावना कहाँ हे जो विनकी होड करे, तासों विनकों दृष्टांत तो सर्वथा आपनकुं दियो न बैये ॥ तासों गुणगान तो उद्बोध सो इ करनो ॥ जासों श्रीठाकुरजी प्रसन्न होय, उद्बोध विना गुणगान तो शूकवत् हे ॥ हृदयमें आनंद नही आवे, आनंद आये विना भजनानंदको आनंद नहीं होवे हे ॥६॥

घोष त्रिय भावना उभय जाने. घोष भावना सो जो नंदालयकी बाललीला हे ओर त्रिय भावना सो तो श्रीस्वामिनीजीकी निकुंजलीलाकी किशोर लीलाकी हे सो उभय नाम दोयको हे सो जाननो तासों भगवद्लीला हृदयमें प्रवेश करे ॥७॥ कृष्ण नाम स्फुरे' याको अर्थ ॥ जो गुरुदेवनें कृष्णनामकी स्फुर्ति कराइ होय ताकुं भूलनो नहीं, न भूलेमें प्रभूके विषे आसक्ति होय ॥८॥ 'पल न आज्ञाटरे' याको अर्थ ॥ जो श्रीगुरुदेवकी आज्ञा क्षणमात्र उल्लंघन न करनी, उल्लंघन करे तो पुष्टिमार्ग हृदयमें ते जातो रहे, ओर नहीं उल्लंघन करे तो श्रीठाकुरजी प्रसन्न होय, जेसे लौकिक स्त्रीपुत्रादिक अपनो कष्टो न करे ताके उपर केसी रीस आवे हे, ओर कहे प्रमाण करे ताके उपर केसो हेत आवे हे ॥ स्त्रीपुत्रादिक जेसे न मिटे तेसे शरणपणो हु न मिटे, परंतु जो पुष्टिको दान हे सो न होय ॥ तासों बात येके आज्ञा उल्लंघन न करनी ए मुख्य सिद्धांत हे ॥९॥ 'कृत वचन विश्वास चित्त आने' याको अर्थ ॥ कृत वचन जो अष्टाक्षर पंचाक्षर तिनके विषे विश्वास राखनो, तिनकुं चित्तमें लायके हृदयमें पधरावने, ता विश्वासके उपर श्रोगुसाईजी आज्ञा करे हे ॥ सो श्लोकः— यदुक्तं तातचरणैः श्रीकृष्णः शरणं मम ॥ अत एवास्ति मच्चित्तमैहिके पारलौकिके ॥१॥ याकों अर्थ ॥ जो हमारे तातचरण जो श्रीमहाप्रभुजी तिनको कष्टो जो "श्रीकृष्णः शरणं मम" सो इ या लोक परलोकमें हमारे निश्चे हे ॥ अब दुसरो श्लोकः— मम चित्तस्य विश्वासः श्रीगोपीजनवल्लभे ॥ यदा तदा कृतार्थोहं शोचनियो न कर्हिचित् ॥२॥ याको अर्थ ॥ हमकुं श्रीगोपिजनवल्लभकी विश्वास हे, तबहि हमारो कृतार्थ हे ॥

तासों कृत वचन विश्वास चित्त आने ॥ तासों कृत वचनपर विश्वास होय तब श्रीठाकुरजी हृदयमें पधारे ॥१०॥ “भगवदी जानि सत्संगकुं अनुसरे ना देखे दोष ओर सत्य भाखे” याको अर्थ ॥ जो भगवदीयको सत्संग करनो, तासों दुःसंग न लगे, दुःसंग न लगे तब श्रीप्रभु हृदयमें सदा बिराजे; ताके लिये सत्संग हे ॥ सो या प्रकार पुष्टिमार्गके दश धर्म हे सो मर्मरूपी दशोंक हे ॥ सो श्रीचंद्रमाजीवारे श्रीद्वारिकेशजी महाराज आज्ञा करेहे जो हम सदा ए धर्म चित्तमेंराखे हे तेसे हमारे मार्गके वैष्णव राखो तासों पुष्टिमार्गका फल सिद्ध होय ॥ इति श्रीगिरिधरलालजी महाराजके वचनामृत एकसोपांचमो संपूर्ण ॥ १०५ ॥

 [वचनामृत १०६ मो.] 

अब एकसो छठो वचनामृत आप आज्ञा करे ॥ जो ए कीर्तन श्रीद्वारिकेशजी महाराजने अपने लीये श्रीप्रभुनको मिलायवेके लीये सीढीरूप कर्यो हे ॥ सो ए दशधर्म, दशसीढीरूप जानने ॥ तामें प्रथम सीढी तो श्रीगुरुदेवको आश्रय ॥ दुसरी सीढी श्रीगुरुदेवके आश्रयतें, मानसी सेवा मुख्य सिद्ध होय ॥ तिसरी सीढी आश्रयतें तथा मानसी तें, शरण सिद्ध होय ॥ चतुर्थ सीढी आश्रयतें तथा मानसी सेवातें, शरण सिद्ध होयेतें दीनताभाव आवे ॥५॥ सीढी आश्रयतें, तथा मानसी सेवातें, तथा शरणतें, तथा दीनतातें, तो गुणगान उद्बोध सहित सिद्ध होय ॥ उद्बोधसों कीर्तनको अर्थ समजनो ॥६॥ सीढी जो आश्रय, तथा मानसी सेवा, तथा शरण, तथा दीनता भाव तें तथा गुणगान उद्बोधनतें, बाललीला किशोरलीला दोउनकी भावना सिद्ध होय ॥७॥ सीढी आश्रय, तथा मानसी सेवा, तथा शरण, तथा दीनता तें, गुणगान उद्बोधनतें, तथा उभयलीलाकी भावना सिद्ध भये तें, श्रीकृष्ण नामकी स्फूर्ति सिद्ध होय ॥८॥ अष्टमी सीढी जो आश्रय तें, तथा मानसी सेवा तें तथा शरण तें, तथा गुणगान उद्बोधनतें तथा उभयलीलाकी भावना सिद्ध भये तें, तथा श्रीकृष्णनामकी स्फु-

तिं साध्य भये तें, श्रीहरिगुरुदेवकी आज्ञा सिद्ध दृढ होय ॥९॥ सीढी आश्रय तें, तथा मानसी सेवा तें, तथा शरण तें तथा दीनता तें, तथा गुणगान उद्बोधनतें, तथा उभयलीलाकी भावना तें, तथा श्रीकृष्णनामकी स्फुर्ति तें, तथा श्रीहरिगुरुदेवकी आज्ञा सिद्ध दृढ भये तें, श्रीअष्टाक्षर पंचाक्षरके उपर विश्वास आवे ॥१०॥ दशमी सीढी जोआश्रय, तथा मानसी सेवा, तथा शरण, तथा दीनताभाव, तथा गुणगान उद्बोधनतें तथा उभयलीलाकी भावना तें, तथा कृष्णनामकी स्फुर्ति तें, तथा श्रीहरिगुरुदेवकी आज्ञा दृढ भये तें, तथा श्रीअष्टाक्षर पंचाक्षरके उपर विश्वास तें, भगव दीयको सत्संग प्राप्त होय ॥ ए दश सीढी चढे तब पुष्टिमार्ग प्राप्त होय तासों आपनतो एक सीढीके पास हु नहीं गये हे ! तो आगे कहा दिशा होय गी ! आपनतो निःसाधन हे, जिनके लिये श्रीनाथजी या घोर कलियुगमें पधारे हे, सो वे सीढीके पास ले जाइंगे ए भरोसो निश्चय हे ॥ इन सीढी नके नाम श्रीद्वारिकेशजी महाराजने बताये तासों खबर पडी हे ॥ तासों या कीर्तनको पाठ वैष्णवकूं सोवती बिरियां एक दो आवृत्ति जरूर करनो चैये ॥ या तें दुःस्वप्न नहिं आवे, तथा मार्गमें रुचि बढे, तथा मार्गको बोध होय ॥ एसे श्रीद्वारिकेशजी महाराजने ओर हु कोर्तन करे हे सो रसरूप हे ॥ ओर आपनें मुलपुरुष हु कर्यो हे ॥ तामें श्रीमहाप्रभुजीको सबलीला तथा श्रीगुसांइजीको प्रागटय, तथा सातों बालकनके प्रागटय, तथा बहु बेटिनके नाम, सब निरूपण करे हे ॥ सो याको पाठ करे तें निरोध प्राप्त होय ॥ तेसे श्रीमद् भागवत दशमस्कंध हे सो निरोध प्राप्त के हे ॥ तेसे ए मुलपुरुषही हे ॥ इति श्रीगिरिधरलालजी महाराजके वचनामृत एकसोछमो संपूर्ण ॥ १०६ ॥





[वचनामृत १०७ मो.]



अब एकसो सातमो वचनामृत आप आज्ञाकरि ॥ जो कीर्तन, राग कान्हारोः-ताहिको सिर नाइये जो श्रीवल्लभ सुत पदरज रति होय ॥ कीजे

कहा आनि उंचे पद वासों कहा सगाइ मोय ॥१॥ सारासार विचारी मतो करि श्रुतिपथ गोरस लियो हे निचोय ॥ ते नवनीत प्रगट पुरुषोत्तम सहज हि गोरस लियो हे विलोय ॥२॥ जाके मनमें उग्र भरम हे श्रीविठ्ठल श्रीगिरिधर दोय ॥ ताको संग विषम विषहूँते भूले चतुर करो जीन कोय ॥३॥ तेज प्रताप देखि अपने चख अस्मसार जो भिदे न तोय ॥ कृष्णदास सुर तें असुर भये असुर तें सुर भये चरणन छोय ॥४॥ याको अर्थ जो ॥ कृष्णदास अधिकारी फेरि वैष्णव देह पायके लीलामें प्राप्त भये ॥ अब कोर्तनको अर्थः—‘ताहिको सिरनाइये जो श्रीवल्लभसूत पदरज रति होय’ श्रीवल्लभसूत जो श्रीगुसांइजो परम दयाल हे तिनके चरणकमल विषे जिनकी रति होय एसे जो भक्त, तिनकुं दंडवत् करने ॥ ओर सो नही जो कोउ बडाइ दिखावे जासों वैष्णवको प्रयोजन नही ॥ “ कीजे कहा आनि उंचे पद वासों कहा सगाइ मोय” ॥ सार तथा असारताको विचार करिके हमनें येह निश्चय कर्यो हे जो ‘श्रुतिपथ गोधन लीयो हे निचोय ॥ श्रुति पथ जो बेदकी श्रुति, तिनमेंसुं सार जो वर्णन कर्यो हे, सो दुग्ध रूप पुष्टिमार्ग श्रीमहाप्रभुजी श्रीगुसांइजीनें श्रुतिमें सो निचोइ लियो ओर इहां पुष्टिमार्गमें नवनीत रूप श्रीपुरुषोत्तम हे, सो आपहि श्रीगुसांइजी सहज इ गोरस विलोय लियो हे ॥ कछू आपकुं परिश्रम नहि पड्यो हे ॥ एसे आप हे ताके भक्त एसे इ जानिके नमन करिवे योग्य हे ॥ जाके मनमें बडो भरम होय, जो श्रीनाथजी ओर श्रीविठ्ठलनाथजी न्यारे न्यारे हे, ए-सो जाके मनमें होय ताकों संग सदा चतुर वैष्णवकुं एसेनको भुलेइ संग मति करना ॥ तेज प्रताप अपनी आंखनसुं देखो, अस्मसार जो पाषाण जो हजारन वर्ष जलमें पड्यो रहे तो हूं जल भीदे नही ॥ तेसे अपने हृदयको मति राखो ॥ अब तेज प्रत्यक्ष आप दिखावत हे जो में पेहेले सुर हतो, जो श्रीमहाप्रभुजीको तो सेवक, ओर श्रीनाथजीको तो अधिकारी, परिमेंने छ महिना ताई श्रीनाथजी सों वियोग करवायो, तासों असुर होनो पड्यो



फेरि आपने कृपा करि चरण लुवाइ के सुर कर्यो, ॥ ए बचन कृष्णदास-
जीने कहे जो ॥ असुर ते सुरभयो चरणन छोइ ॥ सो श्रीगुरुनको अपराध एसे
महानुभावीकुं हुं बाधकभयो तो अपनी कहा दिशा!!” या कीर्तनमें
दोय बात सिद्ध भइ ॥ एक तो श्री श्रीठाकुरजीमें तथा श्रीगुरुदेवमें भि-
न्नभाव न करनो, ओर एक श्रीगुरुदेवको अपराध न करनो ॥ ॥ फेरि श्री
गुसांइजीने इनको श्राद्ध धुव घाटपे करवायो ॥ ओर कुवा अधुरो हतो
सो पुरा करवायो ॥ सो कुवा कृष्णदासजीकोइ वाजे हे ॥ ओर वेरुखहुं कु-
वाके उपर हे तापे बेठे रेहेते ॥ सो कृष्णदासजीकी वार्तामें प्रसिद्ध हे ॥
इति श्रीगिरिधरलालजी महाराजके वचनमृत एकसो सातमो संपूर्ण ॥

 [वचनामृत १०७ मो.] 

अब आपने एकसो आठमो वचनामृत आज्ञा करे ॥ जो श्रीद्वारिके-
शजी महाराजने अष्ट स्वरूपकी भावनाके कीर्तन करे हे ॥ तामें पेहेले
श्रीनाथजीको कीर्तन ॥ राग बिलावलः—देख्योरीमें श्याम स्वरूप ॥ वाम-
भूजा उंची करी गिरिधर दक्षिण कर कटि धरत अनूप ॥ बांधी मुष्ट अं-
गुष्ट दिखावत सन्मुख दष्टि सुहावे ॥ चरण कमल दोउ संग धरिके कुंज-
द्वार चित्त लावे ॥२॥ अति रहस्य कुंजनकी लीला हियमें सुमरण कीजे ॥
द्वारिकेश मन वचन अगोचर चरण कमल चित्त लावे ॥३॥ याको अर्थः—श्रीना-
थजीके स्वरूपकी भावना ॥ जो श्याम स्वरूप आपको हे सो ‘देख्योरी में
श्याम स्वरूप’ श्रीद्वारिकेशजी महाराज एसे कहे हे जो ॥ वामभूजा उंची
करिके श्रीगिरिराजको कंदरा हे ताकुं पकडे हे, ओर दक्षिण करकी मुठी
भीडिके अंगुष्ट दिखावे हे, ओर आपकी दृष्टि सन्मुख हे, चरणकमल दोउ
समधरे हे, सन्मुख दृष्टि ब्रजभक्तन साम्हे करे हे, ओर कुंजद्वारपे आपको
चित्त हे, तासों अति रहस्य कुंज हे ताकी लीलाको हियमें स्मरण करनो
॥ सो श्रीद्वारिकेशजी महाराज कहे हे, जो ए पदार्थ एसो हे जो जाते म
नक्रमवचन अगोचर जो इन तिनमें नहीं आवे हे ॥ तब दासने विनती

करी ॥ जो कृपानाथ ! ए तिन मन क्रम वचन सिवाय तो जीवके पास हे नहिं ? तासों पार न पावे तो कल्लु हु उपाय होयगो ? ॥ तव आपने आज्ञा करी ॥ जो चरण कमलमें चित्त दिये ते सकल मनोरथ सिद्ध होय हे एसे श्रीद्वारिकेशजी महाराजनें आज्ञा करी हे ॥ श्रीनाथजीके स्वरूपके विषे किशोरलोलकी भावना हे ओर लीला गुप्त हे तासों टोपीके श्रृंगार नहीं होय हे ॥ अब श्रीनवनितप्रीयजीके घरमें श्रीनाथजीके श्रृंगार टिपारेको जानें कियो हे, सो श्रीविठ्ठलरायजीके चतुर्थ पुत्र काका श्रीवल्लभजी भये हे तिननें हूं अष्ट स्वरूपके कीर्त्तन करे हे ॥ सो तामें प्रथम कीर्त्तनः—श्रीनाथ-जीको कर्यो हे ॥ सो पदराग बिलावलः—कुंजद्वार ठाडे सखी पिय देखी वदन चित्त चोरी लियो हे ॥ तनक विलोकि गड्यो तन हिय ॥१॥ वाम भूजा तन चित्त चोरी मोतन ॥ दक्षभुजा कटि मुठी संवारि वक्रभोंह चंचल अनियारे नेनबान ज्यों डारत मारि ॥२॥ टेढी पाग अरुझी अलकावलि बरुहा चंद्र धुजा फेहेरात ॥ देखत बने केहेत नहि आवे सुंदर नागर सांवरे गात ॥३॥ कल्लु संकोच भयो गुरुजनको अब देखे बिन कल न प रात ॥ सो उपचार करो मेरी सजनी निरखी दास वारने जात ॥४॥ याको अर्थः—‘कुंजद्वार ठाडे सखी पोय’ सो कुंजद्वार श्रीनाथजीकी पीठक हे, सो हे, तामें आप ठाडे हे, आपके श्रीमुखको दर्शन करत मात्र हमारो चित्त चोरी लियो हे, सो सुंदरता हृदयमें गडी गइ हे; वाम भुजा उंची करी ह मारो मन हरि लियो हे, ओर ‘दक्षभुजा कटि मुठि संवारी’ दक्षिण भुजा हे, सो कटिसों लगाय मुठि संवारी हे, ओर वक्र भोंह चंचल अनियारे’ ॥ वक्र भोंह नाम तिरछी भोंह हे, ओर नेत्र बहोत चंचल अनियारे हे, सो मानु कामदेवके बाण हे, सो हमारो उपर आप चलावे हे ॥ ओर श्रीमस्तकपे टेढि पाघ हे, सो अलकावलि कुटिल केश पास बिधुरी रहे हे, ओर मोर चंद्रका हे, सो मानु कामदेवकी ध्वजा हे ॥ सो शोभा वर्णन न होय शके, देखेइ बनि आवे ॥ आप कसेहे जो सुंदर नागर श्याम स्वरूप



हे ॥ फेरि कहे जो लोकलाजतें कछु संकोच गुरुजनको भयो परंतु अब तो देखे बिन कल नहीं परतहे, हे सखी ! अबतो देखवेको उपाय कछु करो ॥ एसे श्रीस्वामिनीजी ललितादि सखीनसों आज्ञा करे हे ॥ सब कीर्त्तनको भावार्थ सो दर्शन करिके कीर्त्तनके कर्त्ता जो काका श्रीवल्लभजी वारनें जाय हे ॥ या कीर्त्तन श्रीनाथजीकी किशोर लीलाको हे ॥ इति श्रीगिरिधरलालजी महाराजके वचनामृत एकसो आठमो संपूर्ण ॥१०८॥

 [वचनामृत १०९] 

अब एकसो नवमो वचनामृत आप आज्ञा किये ॥ जो श्रीनवनिता प्रियजीकी भावनाको पद ॥ पेहेले श्रीद्वारिकेशजी महाराजको कर्यो थको सो ॥ राग बिलावलः—नंद आंगन क्रीडत सुखरूप ॥ द्विभुज गौर मांखन कर लीने घुट्ठरुन चलत अनुप ॥१॥ ब्रज युवतिन प्रतिबंध नेक नहि सब देखत उरलावे ॥ द्वारिकेश प्रभुकुं ले गोपी तनके ताप समावे ॥२॥ याको अर्थः—श्रीनंदरायजीके आंगनमें सुखदरूप खेलतहे, सो केसे हे, जो सुंदर गौर स्वरूप, द्विभुज हे, श्रोहस्तमें मांखन लिये हे ॥ तासों नाम श्रीनवनिताप्रियजी हे ॥ ओर घुट्ठरुन चले हे सो उपमाकों कोउ देवे लायक नहीं तासों अनुप वर्णन करे हे, बाललीलाहे तासों सब देखतें ब्रजभक्त गोदीमें ले हे, उनकुं कोउको प्रतिबंध नहीं हे, बिनके मनोरथ सकल सिद्ध करे हे, ताहोसों श्रीद्वारिकेशजी महाराज आज्ञा करे हे, जो गोपी श्रीनवनिताप्रियजीकुं लेके तनके ताप समावत हे ॥ अब श्रीकाका वल्लभजीने वर्णन कर्यो हे सो पद ॥ राग बिलावलः—ले जु गयो चित्त मांखन प्यारो ॥ तनक कमल मुखमें द्वेदतियां इन आंखन तें होत न न्यारो ॥१॥ रिंगनलीलां भाव जनावत मर्यादा रहित ए रूप ॥ कटि किंकनी ओर पाय पेजनी फिरि चितवत हसत बजत अनुप ॥२॥ देखी सखो लपटे भुजभीडत नखछत कुच कपोलकर परसत ॥ केहेत फिरत सबसों नंदरानी देखि मैया बावरो व्हे दरसत ॥३॥ मुग्धभाव गोपिनसों सोचत यह लीला कोउ अन्य न जाने



के जाने सेवा संयोगी ॥ दास भावादिक लेश बखाने ॥४॥ याकों अर्थः—
हमारो चित्त जो नवनितको प्यारो हे सो ले गयो, कमलमुख हे तामें छोटी
छोटी द्वेदतियां हे सो ए हमारी आंखनमेंतें न्यारे नहि होय हे ॥ आप बाल-
लीला हे तहां मर्यादा नही हे, तासों मर्यादारहित ए रूप हे ओर कटिपें
किंकणी तथा चरणारविंदमें नुपुर फिरते बजत हे, ओर देखते तथा हस-
ते कटिमें किंकणी हे सो बजत हे ॥ ओर सखीकूं देखिके आप हसत हे
लपटत हे. ओर अनेक इनके लीलाके मनोरथ सो सिद्ध करत हे ॥ ओर
मातृ चरण श्रीनंदरानी जो श्रीयशोदाजीकूं देखिके बावरेसैं दर्शन देत हे
॥ ओर मुग्ध जो बाललीलाको सूचना गोपीजनकुं करावत हे, ओर कोउ
नही जानत हे यह लीला सेवासंयोगी होय साइ जानत हे ॥ के लेश नाम
थोडोसो भाव दास जो श्रीवल्लभजी बखाने ह ॥ एसे दोय कीर्त्तन सों श्री
नवनितप्रियाजीकों स्वरूपमें बालभाव तथा किशोर लीलाको भाव दोइ
प्रत्यक्ष दर्शन देत हे ॥ अब तिसरो कीर्त्तन ॥ राग बिलावलः—हों वारी
नवनिताप्रिय ॥ नित उठि देत उराहनो आवत चोरी लावत घोखत्रिया
॥१॥ तुम बलराम संग मिलिके सुत यह आंगन खेलो दोउ बारे ॥ निर-
खि निरखि नैन सचुपाउं प्राणजीवन धनसांवलीया ॥२॥ जो भावे सो लेहु
मेरे मोहन माखन मिश्रि दुध घैया ॥ चत्रभूज गिरिधर काके घर तुमहुतें
कलु अधिक श्रिया ॥३॥ याको अर्थ ॥ श्रीयशोदाजी श्रीठाकुरजीसों केहेत
हे, जो हे नवनितप्रिये ! तिहारे वारने जाउं जो दूर खेलवे मति जाउ, ए
ब्रजकी स्त्री हे जो नित्य उराहनो लावे हे, तुम्हागी चोरीको, तासों तुम
ओर बलराम इहांइ खेलो ॥ या आंगनमें खेलो सो में देखिके बहोत स
चुपाउं; जो हमारे प्राणजीवन धन सांवलिया तुम हो, ओर तुमकुं अरोग
वेकी इच्छा होय सों में माखन मिश्रि दुधकी घैया इहांइ देउं, तुम सरिखे
ओरनके कहाहे ॥ एसे मातृ चरण आज्ञा करे हे सो चतुर्भुजदास गाये
हे ॥ यामें हुं बालकिशोर दोय लीला हे ॥ ओर सूरदास गाये हे सो पद

शोभित करनवनीत लिये ॥ घुटुरुं चलत रेंन तन मंडित मुख दधि लेप किये ॥१॥ चारू कपोल लोल लोचन छबि गोरोचनके तिलक दिये; लर लटकत मानु मत्त मधुपगन मादक मधुर पिये ॥२॥ कंटुलाकंठ वज्रकेहरिनख राजत हे सखी रुचिर हिये ॥ धन्य सूर एकोपल यह सुख कहाभयो शतकल्प जिये ॥३॥ याको अर्थः—जो श्रीहस्तमें नवनित लीये शोभित हे ॥ ओर घुटुरुन चलत हे, ओर श्रीअंगमें व्रजकी रज लगी रही हैं, ओर श्रीमुख दधिसौं भयो हे, सुंदर कपोल हे, ओर चपल नेत्र हे, ओर गोरोचनको तिलक श्रीमस्तकपे दियो हे, मोतिनकीलर तथा लटकन लटकी रह्यो हे, मत्तमधुप जो भंवरकीसी गति ओर गनहे सो आपके श्रीमुख कम लकी सुगंध सोइ मादक पीवें हे, ओर धीकंठमें कटुला तथा वज्रकेहरिनख जो वधनखा हृदय स्थलके उपर बिराजत हे ॥ एसी शोभा देखीके सूरदासजी कहे हे जो ए समयकी एक पलक धन्य हे, ओर बातमें शतकल्प जीवनो सो वृथा हे ॥ यह कीर्त्तन बालभावको पेहेलेइ सूरदासजी श्रीनवनितप्रियाजीके दर्शन करत मात्रहि निरूपण कयो हे ॥ सो या कीर्त्तनको भाव परम अलौकिक हे ॥ सो सुरदासजोनें जान्यो के जाके उपर श्रीमहाप्रभुजी कृपा करे सोइ जानें ॥ एसे श्रीनवनित प्रियाजीके स्वरूपको वर्णन चार कीर्त्तन सो भयो हे ॥ इति श्रीगिरिधरलालजी महाराजके वचनामृत एकसोनवमो संपूर्ण ॥१०९॥



 [वचनामृत ११० मो.] 

अब एकसो दशमो वचनामृत आप आज्ञा करे हे जो ॥ श्रीमधुराधीशको वर्णन श्रीद्वारिकेशजी महाराजनें कयो हे सो पद राग बिलावलः—या व्रजको रसरूप स्वरूप ॥ चार्यो भूजा चार आयुद्ध हे कमल स्वामिनी रूप ॥१॥ चक्र तेज चंद्रावलिजुको शंख श्रीयमुनाजी जानो ॥ गदा कुंमारी श्यामरूप धरि द्वारकेश पेहेचानों ॥२॥ याको अर्थः—ए जो व्रज हे ताको परम रसरूप स्वरूप ए श्रीमथुरेशजी हे ॥ सो चार भूजामें चार आयुद्ध धरे

हे, ताकी भावना करे हे ॥ जो श्रीहस्तकमल हे सो मुख्य श्रीस्वामिनीजीको भाव हे—स्वरूप हे, ओर चक्रहेय सो श्रीचंद्रावलीजीको तेजहे सो इ स्वरूप हे, शंख श्रीयमुनाजीको स्वरूप हे, ओर गदा हे सो कुमारिकाको स्वरूप हे, एसे चारों यूथ छिपायके आयुद्ध रूप सों निरंतर अपने पास राखे हे ॥ सो श्रीद्वारकेशजी महाराज केहेत हे जो हमने पेहेचाने हे ॥ अब श्रीकाका बल्लभजीने श्रीमथुरेशजी तथा श्रीद्वारिकाधीशको भेलो कीर्तन कयो हे सो पद ॥ राग बिलावल ॥ ब्रजमें ठाकुर दोग चतुर्भुज ॥ श्रीमथुरेश ओर श्रीद्वारकेश जु मुख्य मर्याद पुष्टिलीलाधुज ॥१॥ इन द्वे हस्तनेनसों चांपत द्वेकर मुरली देरि देत सुर ॥ पिया बिलखि मनमांझ लजानी ए तो बंसी दूर बजत भर ॥२॥ इत लीला करि मान मनावत इत लीला करि नेत्रन मेलन ॥ इन द्वे हस्त कुसुम मारग सजि द्वे कर डारि उंची सी मेलन ॥३॥ इन मनुहार करी प्यारी सों इन हसाव खिलाय रहे लसि ॥ द्वे स्वरूप दरशन बरखत रस पियो दास इन अखियन तरसत ॥४॥ याको अर्थ ॥ जो याब्रजमें ठाकुर दोगचतुर्भुज हे, एक तो श्री मथुराधीश एक श्रीद्वारिकाधीश. एक के मुख्य मर्याद एक पुष्टि लीलाजधुन रूपहे ॥ श्रीद्वारिकाधीश द्वे श्री हस्तसों श्रीस्वामिनीजीके नेत्रकमल मुंदे हे, ओर श्रीमथुराधीश वेणुनाद कयो द्वे श्रीहस्तसों, श्रीस्वामिनीजी मनमें सकुचायके कही जो ए तो मुरली दूर बजत भर ॥ दूर बंसी बजो, तासों श्रीस्वामिनीजीने मान कयो ताको श्रीमथुराधीशने निवारण कयो ओर श्रीद्वारिकाधीशने नेत्र मुंदे हते सो लीला करिके छोडि दिवे ॥ सो पद ॥ राग पुरवी ॥ पाछें ललिता आगे श्यामाप्यारी, ता आगे पिय मारग फुल विछावत जात ॥१॥ कठिन कलि बिनी बिनी करत हे न्यारी न्यारी प्यारीके चरण कोमल जानि कलुक सकुच गडिवेहु डरात ॥१॥ बिरधी लता उंची करि निरवारत उंचे ले डारत —म पल्लव पान ॥ सूरदास मदनमोहन पीयकी आधीनताइ देखतरी मेरे नैन सिरात ॥ इति श्रीगिरिधरलालजी महाराजके वचनामृत एकसोदशमो संपूर्ण ॥११०॥

 [वचनामृत १११ मो.] 



अब एकसो एकादशमो वचनामृत आप आज्ञा करे हे ॥ जो श्रीमधुराधीशने तो पुष्टिको मार्ग सिद्ध कर्यो ओर श्रीद्वारिकाधीश विरधि लता उंची करी निरवारत हे ॥ विरधि जो बडिलता भूमिसों जूकी रही हे सो निरवारत हे ॥ श्रीद्वारिकाधीशने तो मनुहारि करी ओर श्रीमधुराधीशने मानको निवारण कर्यो ॥ हसाय खिलायके रिझाए एसे श्रीद्वारिकाधीश दोउ स्वरूप धरिके एक भावना करी हे ताते एक रूप जानने तहां गाये हे ॥ जो द्वे स्वरूप दर्शन बरषतरस ॥ सोदोउ स्वरूपके दर्शन मात्र तें रसवृष्टि भइ ॥ रस जो आनंद ताकी वृष्टि होत हे ॥ जो दास जो श्रीगोस्वामीकाका श्रीवल्लभजी महाराज कहे हे, जो “पियोदास इन अखियन तरसन” जो बहोत दिनाकी प्यासी हती सो दर्शन मात्र तें रस वृष्टि भइ सो पान करि लिये सो ए दोउ स्वरूपमें किशोरलीलाकी भावना हे ॥ किशोरलीला तो प्रगट हे, ओर बाललीला अति गूढ हे ॥ ओर श्रीमधुराधीशकी तथा श्रीद्वारिकाधीशकी रीति बहोतसी एक हि मिले हे ॥ ओर परस्पर श्रृंगार व्यवहार हे ॥ इति श्रीगिरिधरलालजी महाराजके वचनामृत एकसोएकादश संपूर्ण ॥ १११ ॥

 [वचनामृत ११२ मो.] 

अब एकसो द्वादशमो वचनामृत आप आज्ञा करे ॥ जो श्रीविठ्ठलेशरायजीके स्वरूपको वर्णन भावना निरुपण करी ॥ सो पद श्रीद्वारिकेशजी कृत ॥ राग विलावल ॥ देख्यो सुंदर रूप सखीरी सुरसुताके साथ ॥ देखि विवस्था सुंदरताकी कटि पर रहे गये दोउ हाथ ॥१॥ याते गोर श्यामल तन चित्रत उपमा केहेत न आवे गाथ ॥ द्वारिकेश प्रभू येह बिधि निरखत मेंतो करि लियो जन्म सनाथ ॥२॥ याको अर्थ ॥ जो श्रीद्वारिकेशजी महाराज आज्ञा करे हे ॥ जो सुरसुता जो श्रीयमुनाजी सो ताके संग एक सुंदर रूप देख्यो सो श्रीयमुनाजीको सुंदर रूप देखीके सुंदरता देखीके,

श्रीकटिपे दोउ श्रीहस्त रहे गये, याहितें गौर श्याम तन चित्रत हे ॥ आगे श्रोठाकुरजीको स्वरूप उज्वल हतो सो श्रोठाकुरजी श्रीस्वामिनीजीके नेत्र नकी पुतरिनको ध्यान करत करत श्याम होय गये, ताको ए श्लोक हे ॥ स-
 श्वत प्रिया सितायाग ध्यानावस्थित चेतसा ॥ प्राप्ति तं निज रूपाय गोविं-
 दाय नमोनमः ॥ याको अर्थ ॥ पेहेलेइ कहि आये हे ॥ ओर कलु उपमा
 हमारे मुख सों शरीरसों केहेत नहीं आवे हे ॥ ऐसे प्रभु या प्रकार लीला
 करे हे ॥ सो दर्शन करिके हमारो जन्म सनाथ करि लियो ॥ एसे आज्ञा
 श्रीद्वारिकेश महाराजजी करे हे ॥ अब काका श्रीवल्लभजीनें श्रीविद्वेशरा-
 यजीकी भावना निरुपण करी सो पद ॥ राग बिलावल ॥ देखिरी एक अ
 द्भूत वाम ॥ देखे बने केहेत नहि आवे नखकटि राधे कटिशिख श्याम ॥
 प्रयके प्रेम छक्यो तन भूल्यो केहे मेरी श्यामा गइ अब हो कित अपनें
 सखनसों बुझत डोलत कटि द्वे हस्त लगे आकर्षित ॥१॥ श्रम जल बिंदु
 लग्यो गंडितमें नैन बदन द्वे विलसें द्वेलखि ॥ किट चटक भंवरी संवरी-
 तन श्यामातें श्याम भये तन सन्मुख ॥३॥ फ्रिट सहित हरि दरस दिखा
 वत अतुलस्वभाव नाथ श्रीविद्वल ॥ रज आरज लागो मेरी अखियन नि
 रखि दास जात सब कलीमल ॥४॥ याको अर्थ ॥ जो देखिरी एक अद्भु
 तवाम ॥ अद्भुत वाम जो श्रीलाडिलीजीको स्वरूप श्रीविद्वेशरायजीनें
 देख्यो ॥ देखे बने केहेत नहीं आवे ॥ ताको अर्थ ॥ जो शोभा एसी जो
 देखेइ बने, केहेवेमें नहीं आवे, एसी जो शोभा ताको देखीके आप एसे
 भये जो नखकटि राधे कटि शिख श्याम जो नख तें लगाय कटि पर्यंत
 तो राधे शब्द कहे जो गौर हे, ओर कटितें लगाय शिखा पर्यंत श्याम
 भये, सो काहे तें, जो श्रीप्रियाजीके स्वरूपमें प्रेमासक्त भये तासों अपनी
 स्वरूपाकृति भुली गये, ओर श्रीप्रियाजीकी खोज करत भये सखनसों बु-
 झत हे, ओर केवल विरहयुक्त भये ॥ कटिसों श्रीहस्त धरे, शिथिलता
 दिखावत हे ॥ दुसरो तुकको भाव भयो ॥ अब तिसरो तुकको भाव जो

॥ श्रम जल बिंदु लग्यो गंडित नैन बदन वहे विलसे द्वे लेख ॥ फिडा चटक भंवरी संवरी तब श्यामार्ते श्याम भये तन सन्मुख ॥ याको अर्थ ॥ जो श्री गंडस्थलमें श्रमजलके बिंदु आय गये हे, ओर एकटक नेत्रनमुं देखो रहे हे, जो मानुं कीडाकों भोरी चटका देवे हे, सो वे कीडा भोरीके चटकासों भोरी हो जावे हे ॥ ए तो लौकिक बात हे ॥ परंतु दृष्टांत विना सिद्धांत निश्चे न होय ॥ तासों आप हुं श्रीलाडिलीजोके प्रेम सों प्रसित हि भए थके श्याम भये हे ॥ सो श्रीविठ्ठलेशारायजीको आधो श्रीअंग श्याम अंकित हे, ओर किरिट शिखा विषे धारण किये हे, एसे जो परम कृपाल, अतुल स्वभाव, परम कोमल हे जाको हृदय, एसे श्रीविठ्ठलनाथजी तिनकी रज आरज मेरी अखियनसों लगो ॥ एसे ये पदके कर्ता जो श्रीकाका वल्लभजी आज्ञा करे हे ॥ सो तासों आप आज्ञा किये जो श्रीविठ्ठलेशारायजी किशोरलीलाको स्वरूप हे ॥ इति श्रीगिरिधरलालजी महाराजके वचनामृत एकसोद्वादशमो संपूर्ण ॥११३॥

 [वचनामृत ११३ मो.] 

अब एकसो तेरमो वचनामृत आप आज्ञा करे ॥ जो श्रीद्वारिकांधीशके स्वरूपकी भावना निरूपण करत हे ॥ तहां प्रथम श्रीद्वारिकेशजीने कर्यो सो कीर्त्तन ॥ राग बिलावल ॥ आज बिहरत हरि कुंज निकेत ॥ दुरि मुरिआय युगल दृग मीचे प्यारीजु अति उपज्यो हेत ॥१॥ करकोमल तारी दे मोहन द्विभुज जोरि अधर रस लेत ॥ द्वारिकेश प्रभु येहे बीधो क्रिडत यातें भलो भयो संकेत ॥२॥ याको अर्थ ॥ जो नोपटनिकुंजको भावना हे ॥ आखमीचनकी लीलाकी भावना हे ॥ आज कुंजनमें हरि जो श्रीद्वारिकांधीशकेसो बिहार करत हे, जो दुरिमुरि आये सो, छिपिके धारे, सो श्रीप्यारीजीके दोउ श्रीहस्तसों नेत्र मुंदे पीछे सों श्रीप्रियाजीकुं अत्यंत हेत उत्पन्न भयो, सो फेरि दोउ श्रीहस्त प्रकट करि के तारी दिनी ॥ सो नीचले श्रीहस्तको भाव हे ॥ ओर जो दोउ श्रीहस्तसों नेत्र मुंदेहते सोदोउ श्री

हस्त सों श्रीप्रियाजीके भूजा पकडीके अधरामृत पान करत हे ॥ सो दोउ श्रीहस्त उपरके हे ॥ एसे श्रीद्वारिकेशजा गये हे ॥ जो “द्वारिकेश प्रभु यह विधि किडत यातें भलो भयो संकेत” एसें आज्ञा करे जो या किडातें आख-मिचामणीको लीलासों संकेत बहोत आछो भयो ॥ ओर श्रीकाका वल्लभ-जीने तो श्रीमथुरेशजीके भेलेइ भावना निरुपण करी हे सो इन दोउ कोर्त्त-नसूं किशोरलीलाकी भावना सिद्ध हांय हैं ॥ ओर बाललीलासों श्रीवसुदे-वजीकुं दर्शन दिये हे सो श्लोक ॥ श्रीभागवत दशम स्कंध तृतीयाध्यायमें सो ॥ तमद्भूतं बालकमंबुजेक्षणं ॥ चतुर्भुजं शंख गदार्युदायुधम् ॥ श्री-वत्सलक्ष्मं गलशोभिकौस्तुभं ॥ पीतांबरं सान्द्रप्रयोद सौभगम् ॥९॥ महार्ह वैदूर्य किरिटकुंडल ॥ त्रिषापग्विक्त सहस्रकुन्तलं ॥ उदामकाञ्चयद्गद कंक-णादिभी विरोचमानं वसुदेव ऐक्षत ॥१०॥ ए द्योय श्लोकको अर्थ जो एसे पुत्रको वसुदेवजी देखते भये ॥ सो पुत्र केसे ॥ अद्भुत नाम अलौकिक बालक, अंबुजेक्षण जो अंबुज नाम कमलको, ओर अक्षणनाम नेत्रको, ओर चार भुज-हे, शंख गदा ओर चक्र आयुध धारण करे हे, ॥ ओर श्रीवत्सको चिह्न हे, श्रीकंठमें कौस्तुभमणि बिराजे हे. ओर पीतांबर धारण किये हे, ओर बडे मोलके वैदूर्यमणिके किरिट, ओर कुंडल, उदाम, काञ्ची हे, सो कटिमेखला हे, ओर अंगद जो बाजु कंकण जो श्रीहस्ताभरण करिके शोभित हे, ए द्योय श्लोकको भाव हे ॥ सो श्रीद्वारिकाधीशके रूपमें मिले हे ॥ ए सब चिह्न हे सोइ आपके श्रीअंगमें हे तासों बाललीला किशोरलीला दोउ भावनाको स्वरूप आपको हे ॥ ओर लोक प्रसिद्ध नाम श्रीद्वारिकाधीश हे ओर लीलामेहुं नाम श्रीद्वारिकाधीश कहे हे, श्रीगुसांइजी आप हु श्रीद्वारिकाधीश केहेते यामें भाव ए हे, जो व्रतचर्याकी लीला हु आपनें करी हे, तासों श्रीद्वारिकाधीश केहेते ॥ ओर पेहेले जब आप श्रीगुसांइजी पांती करी तब श्रीद्वारिकाधीश श्रीगोविंदरायजीकुं बताये ओर श्रीविठ्ठलेरायजी श्रीबालकृष्णजीकुं बताये तब श्री गोविंदरायजीने विनती करी, जो मेरे तो आ

॥ राग बिलावल ॥ तुम विना व्रजपति कौन करे ॥ इत मघवाको मान-
भंग करी, उत सब गोपी वरे ॥१॥ बेन बजावत कर धरि गिरिधर वाम-
भूजा ले शंख धरे ॥ द्वारिकेश प्रभु येह बिध क्रिडत नगसैं वेद प्रशंसा
करे ॥२॥ याको अर्थ ॥ हे व्रजपति ! तुम बीन एसी बात कोन करे ॥
मघवा जो इन्द्र ताको मानभंग करी अपने जो निज भक्तनको अन्याश्राय
हतो सो मिटायो ओर गोवर्द्धन पुजा बताइ ॥ ओर सब स्वकीय कीये, सो
इ वरे ता समय दोय श्रीहस्तसों बंसी बजाइ, एक श्रीहस्त सो गिरिराज
धारण कर्यो, एक वामभुजासों शंख धारण कर्यो हे, तासों सब वृष्टको ज
ल शंखमें राख्यो, ओर व्रजकी रजमें एक बुंदहु पडयो नहीं सो सबजल
शंखद्वारा आप अरोगे ॥ तब दासनें विनती करी ॥ जो कृपानाथ ! नीचे
पडयो जल तो शंखमें राख्यो, परंतु उपर पर्वतपें पडयो सो कैसे भयो ?
तब आप आप आज्ञा कीये जो सो तो उपर सुदर्शनजीकुं पधराये हते, सो
उपर पडयो सो जल जेसे तातें तवापें बुंद पडे सा तुरत सुक जाय, ते
से ए सब वृष्टीको जल उपरसों सुदर्शनजीनें अवेर्यो ॥ तब दासनें विनती
करी ॥ जो सब ग्रंथ कोर्त्तनादि वीषे तो वाम भूजापें श्रीगिरिराज धारण
करे हे सो तो दक्षीण भूजापें, दक्षीण बाजु दर्शन देवे हे ॥ ताको प्रकार
कृपा करी कहिये ? ओर समजायो चैये ? तब आप आज्ञा करे जो ए
तो श्रीद्वारिकेशजी आप भावना करे हे सो कहा जानें कैसे
अनुभव आकुं भयो हे ॥ तासों बडेनकी बातको आपनकुं कहा खयर पडे ॥
तब फेरि विनती करी ॥ तब आप आज्ञा करे जो एकवेर हमने श्रीदादा-
जीसुं या बात पूछो हती जो गायनके लिये पांच लडुवा टोकरीमें धरी आप
श्रीहस्तमें लिये ठाडे हे, एसे आज्ञा करे जो दक्षिण श्रीहस्तमें लडुवाकी
टोकरी हे, सो गाय उंचो मोंढो करी झपट मारे तासों उंचो श्रीहस्त कर्यो
हे, ओर श्रीद्वारिकेशजी महाराज आज्ञा करे हे ॥ जो नग जो श्रीगिरिराज
तासों या प्रकार क्रिडा करी ॥ अब काका श्रीवल्लभजी आज्ञा करे हे सो

भावनाको पद ॥ राग बिलावल ॥ गिरिधार्यो श्रीगोकूलनाथ ॥ जै जै मंगल किये सनाथ ॥ गोपो गाय गोप ब्रजके सब धीरज दे तब हाथ ॥१॥ दक्षिणपान स्विकार कियो हे नग वामपाणि शंखोदक लाय ॥ द्वैकर मुरलीनाद किये हे, कमलासन ठाढे गिरिराय ॥२॥ उपरके पंछी द्रुमवेली किनहुं न लागो ताती ब्यार ॥ गोरंभन धूनि करत कुतुहल तन पुलकित अंग कलु न संभार ॥३॥ मघवा शरण भयो पद दीनो जे जे कुसुम बरसे सब देव ॥ चिरंजियो प्रभू कुंवर लाडिलो निरखी दास चरण रज सेव ॥४॥ याको अर्थ ॥ जो श्रीगोकुलनाथजीने श्रीगिरिराज धारण कयो हे सो सब गोपीग्वाल जेजेकार करे हे, जो प्रभूनने अपनकुं सनाथ किये ॥ गोपी, गाय, ग्वाल, सब ब्रजकेनकुं आप श्रीहस्तसों धीरज देहे जो गभराओ मती, ओर इनकी रक्षाके लिये गिरिराजकुं दक्षिण श्रीहस्तमें धारण सोई स्वीकार कीये हे ॥ ओर वाम पाणीमें शंख लीये सो जलके अर्थ ॥ ओर दोउ श्रीहस्तसों वेणुनाद करे हे ॥ ओर कमलकी चरणचोकी पर ठाढे हे, सो अब श्रीगिरिराजके उपरके द्रुमवेली पशुपक्षी काहुंकुं ताती ब्यार सो दृष्टी बाधा न करी, ओर गाय रंभन करी रहे हे, ओर गोपग्वाल इत्यादिक सब आनंद मग्न हे, कोउकुं कलु शोच नहीं, फेरी इन्द्र शरण होय के गोविंद नाम धरीके प्रभुनकुं भेट कीये ॥ ओर वीनती करी जो में आपको कीयो थको देदेन्द्र हों, ओर आप गोविंद गायनके इन्द्र हो एसे जो कुंवर लाडिले आप हो सदा चिरंजीव रहो ॥ एसे काका श्रीवल्लभजी केहेत हे ॥ या प्रकार श्रीगोकुलनाथजीकी प्रसिद्ध किशोरलीलाकी भावना चरणरजकी हम सेवा करे हे ॥ ओर आपके पास दोय श्रीस्वामिनोजी बिराजत हे, सो दोउके श्रीहस्तमें श्रीठाकुरजीकी आडीकेमें चंवरहे, ओर बडे श्रीहस्तमें वीन हे, ओर छोटे श्रीस्वामिनोजीके श्रीहस्तमें छडि हे ॥ एसे युगल स्वरूपसहित श्रीगोकुलनाथजी की भावना समाप्त ॥ इति श्रीगिरिधरलालजी महाराजके वचनामृत एकमोचौदमो संपूर्ण ॥११४॥

 [वचनामृत ११५ मो,] 

अब एकसो पंदरमो वचनामृत आप आज्ञा करे जो ॥ श्रीगोकुल-
चंद्रमाजीके स्वरूपकी भावना आप आज्ञा करे ॥ जो श्रीद्वारिकेशजीने श्री
गोकुलचंद्रमाजीके स्वरूपकी भावनाको कीर्त्तन कर्षो हे सो पद ॥ राग बि-
लावल ॥ आज छबि देखो लज्जित अनंगे ॥ चरण कटि धिवाकुं नमित
करि नंद सुत देत रसदान ललीत त्रिभंगे ॥१॥ तान सुर गान इकइश
मूर्छना प्रवेश आवेश गति वेणु संगे ॥ श्याम सकुमार चितवनी अवनि
ललित पर लटकत चलत तव मानभंगे ॥२॥ पुष्टिपंथ थापि मर्याद उल्लंघ
करि चिह्न प्रकटित सकल अंग अंगे ॥ परम मनोहर द्वारिकेश प्रभु ललित
अति गोकुलाधीश तरंगे ॥३॥ याको अर्थ ॥ ॥ आपकी छबिकुं देखिके अ-
नंग जो कामदेव सो लज्जित हाय रख्यो हे, सो आपकी छबिकेसी हे, जो
चरण ओर कटि ओर धिवाकुं नमित करिके, एसे त्रिभंगी स्वरूपसों रत्नको
दान करत हे ॥ ओर तान सुरसों तासों गान इकिश मूर्छना प्रवेश
आवेश गति युक्त वेणुके संग गान आप करत हे, एसे आप गानमें
परम चतुर हे ॥ ओर श्याम सकुमार हे, स्वरूप जाको, ओर नीची दृष्टि
करीके ललित जो सुंदर अवनिपें लटक सों चलत हे सो अनेक जुवति-
नको मानभंग करियत हे ॥ ओर पुष्टिपंथ थापी जो वाम चरणारविंद
स्थापित करेहे; ओर मर्याद उल्लंघ करि जो दक्षिण चरणारविंद उंचो कर्ष्यो
हे, ओर श्रीअंगके विषे चिह्न विविध सो कितनेक प्रकारके हे ॥ एसे हमा
रे प्रभु परम मनोहर हे ॥ यौ श्रीद्वारिकेशजी केहेत हे जो “ललित अति
गोकुलाधीश तरंगे” जो श्रीगोकुलचंद्रमाजी परम सुंदर गोकुलाधीश जो श्री
गोकुलके इश तिनकी ललित तरंग हे ॥ यामें श्रीगोकुलचंद्रमाजीको स्व-
रूप किशोरलीलाकी भावनाको हे ॥ अब काकाश्रीवल्लभजी श्रीचन्द्रमाजीके
स्वरूपकी भावनाको कीर्त्तन किये हे, सो पद ॥ राग बिलावलमें तथा मा-
लव रागमें हुं गवेहें ॥ गोपीजन संताप मिटावन प्रगट भये श्रीगोकुलचंद्र

॥ कोटि कोटि अनंग विमोहित नीरखी मित्यो दुःख द्वंद ॥१॥ सखीयन मिलि
 बुझत हे पियकुं प्रोक्ष भजत एक भजत परस्पर ॥ एक भजत भजवे नही जानत
 उनकभेद कहो गिरिवरधर ॥२॥ इनहितें न्यारो मोहे जानो इनहीते रहों अति
 निर्मल ॥ मनक्रम वचन हों जात विकानो वस करि लीनो प्रेम स्नेह बल ॥
 ३॥ निरत करन आरंभन कीनो जुवति एक एक प्रति वपुधरि ॥ जे जे हरखी
 रही ब्रज वनिता निरखी निरखी दास वारनों करि ॥४॥ याको अर्थ ॥ जो
 श्रीगोपिजनके संताप मिटावेकों श्रीगोकुलके चंद्रसो प्रगट भये हे, सो के
 से हे जो कोटि कोटि कामदेव लजित होय एसे, जो निरखीके सबके विरह-
 रूप दुःख सो दूर भये, सो दर्शन करिके सखीजन विनती करे हे, जो एक
 तो परोक्ष भजन हे, ओर एक परस्पर भजत हे, एक भजे ताकों
 न भजे ॥ ओर एक दोउनकूं न भजे इनको ॥ ये जुवाब आप
 दिये जो मिथ्या भजंती सो सबे भजे ओर वे न भजे सो तो
 स्वार्थ रह्यो, ओर एक भजे ताकों न भजे सो तो गुरुद्रोही, सो तो विश्वा
 सघातक, ओर एक योगेश्वरको प्रवाह नहि सो न भजे, ओर में तो तुमकुं
 परोक्ष भजत हों ॥ ओर इन धर्मनसों न्यारो हूं, ओर मनक्रम वचन सहित
 करिके में तुम्हारो होय गयो हूं, तुम्हारे प्रेमस्नेह करिके में बस हो गयो
 हूं ॥ एसे आज्ञा करिके रासको आरंभन कोनो, सोकेसे जो एक एक युवति
 प्रति अपना वपु धारण किये, सो एसो आनंद देखीके हरखयुक्त जै जै
 शब्द करत भइ ॥ सो काका बल्लभजी कहे हे जो एसी छवि देखीके में
 वारनों करो हों, ओर श्रीगोकुलचन्द्रमाजीको नाम श्रीमधुरेशजु हे जो मूल
 पुरुष में निरूपण करे हे ॥ जो श्रीगोवर्द्धनधर श्रीगोकुलचन्द्रमा मधुरेशजु
 ॥ इति श्रीगिरिधरलालजी महाराजके वचनामृत एकसोपंदरमो संपूर्ण ॥





[वचनामृत ११६ मो.]



अब एकसो षोडशमो वचनामृत आप आज्ञा करे जो अब श्रीमद-
 नमोहनजीके स्वरूपकी भावनाको श्रीद्वारिकेशजीने कीर्त्तन कयो सो पद ॥

राग बिलावल ॥ देख्योरि में सुंदर बदन ॥ बेन बजाय बुलाइ लइहे पूछ-
 तरी क्यो छांडयो सदन ॥१॥ धर्म छांडि निजधर्म कियो हे यातें गौर भये
 नंदनंदन ॥ द्वारिकेश प्रभु यह विधि देखी न्याय केहेत मन्मथनिकंदन ॥
 २॥ याको अर्थ ॥ जो हमने सुंदर बदन देख्यो सो हमकुं वेणुनाद करिके
 बुलाये हे, ओर पूछत हे जो क्यो छांडयो सदन ॥ ओर सब धर्म छुडाय आ
 पको जो निज धर्म सो हमकूं किये ताहि ते अपको हूं श्याम स्वरूप हते, सो
 गौर भये हो ॥ एसे श्रीद्वारिकेशजी केहेत हे ॥ जो हमारे प्रभु एसे हे ताको
 गोपीजन केहेत हे जो हमसब जानत हे, जो आप साचेइ मन्मथ निकंदन हो
 ॥ जो कामदेवकुं जीते हो ॥ यामें किशोर लीलाको भावनासिद्ध भइ ॥ एसेइ काका
 वल्लभजीने किये सो पद ॥ राग मालव ॥ मदनमोहन मुरली धुनीकीनी ब्रज
 वनिता आकर्षित लीनी ॥ मात पिता सुत बंधु विसारे कमलनेन चरणेरति
 दीनी ॥१॥ वृन्दावन मुखचंद विलोक्यो, फुली रझो सब गात ॥ मोहन वासों
 कुशल ब्रजत हे तम निशिराका परम सुहात ॥२॥ अब घरबगदावो गोपीजन
 धर्मनही पति जार हो ॥ कृष्णकलामें सब अंग अरुजो तन न रही संभा-
 रहो ॥३॥ अधरडसैं नैनन आंसु ढरे गति भुलि ब्रजनारि हो, यातें बुरे
 मदनमोहन पीय निरखी दास बलिहार हो ॥४॥ याको अर्थ ॥ जो श्रीमदन-
 मोहनजोने वेणुनाद कियो, फेरि ब्रजभक्तनको मन आकर्षण करि लीनो,
 सो सब ब्रजभक्त मात, पिता, सुत, पति, बंधु इत्यादिकनकुं छोडिके श्रीप्रभू-
 जीके चरणारविंद विषें रति लगाय दीनो, ओर श्रीवृन्दावन मुखचंद विलो-
 क्यो गात जो सब अंग अंग फुलि गयो जो मोहन जो सबनको चित्त हरे
 हे एसे प्रभू हे सो सबनको कुशल ब्रजत हे, जो एसे अर्ध रात्रिके समयके
 आये जो ए चांदनी रात्रि परम सुहाय हे, गोपीजन हो ! अब घर जाओ !
 जो पति पुत्रादिक छोडिके रात्रिको निकसी वो कुलवधुको धर्म नहि हे !
 जारके पास आयवेको ॥ सो सब ब्रजभक्तन एसे श्रीमुखके बचन सुनतहि
 लीन रहे गये ॥ सो देहदशाकी शुद्धिहु ना रही; केसे जो कोइकुं अपानक

पीडा उत्पन्न होय ॥ ओर अधर जो दांतसुं ओष्ठ डसके पीडाकुं क्षमावे हे ॥ ओर केहेत हे यातें दुर मदनमोहन पिय जो श्रीमदनमोहनजी दुर जो अंतर्भाग भये ॥ दास जो श्रीषष्ठभजी बलीजाते हे सो ए कीर्तन श्रीमदनमोहनलाल चोरीमें पधारे पीछे कियो हे ॥ सो यातें दुर मदनमोहन पिय यों कहे हे ॥ ओर आपके दोय श्रीस्वामिनीजी बिराजे हे सो निपट छोटे हे ॥ तासुं श्री अंगके चिह्न मालूम पडे नही हे ॥ या प्रकार किशोरलीलाको स्वरूप श्रीमदनमोहनजीको सो दोय कीर्तनसुं निरूपण करे हे ॥ इति श्रीगिरिधरलालजी महाराजके वचनमृत एकसो सोलमो संपूर्ण ॥११६॥

 [वचनमृत ११७ मो.] 

अब आप एकसो सत्तरमो वचनमृत आज्ञा करे जो ॥ ता बिरियां भंडारी मनसुखदासने विनती करी जो मदनमोहनलाल चोरीमें केसे पधारे ? और पीछे कोन भांतिसो पाछे पधारे ? ओर कोन चोर ले गयो ? ओर बिषय इतने दिन कहां बिराजे तब आप आज्ञा करे ॥ जो श्रीनाथजीके इहां सब भाइयनको एसो मनोरथ भयो जो अपने सेव्य स्वरूपनकुं श्रीनाथजीके पास पधाराधके भेले अन्नकुट अरोगावनो ॥ सो सब भाइयनको संमत लेके श्रीगिरिधरजीने श्रीगुसांइजीसों विनती करी जो हम सब भाइयनको मनोरथ एसे हे जो श्री नाथजीके संग सातो स्वरूप अन्नकुट अरोगे ॥ फेरि श्री गुसांइजी सुनिके चुपके व्हे गबे, कलु आज्ञा न करे ॥ तब थोडी स्ने बिरियां रेहेके फेरि विनती करी जो आप इच्छापूर्वक आज्ञा करिबे ॥ तब श्रीगुसांइजी आप आज्ञा करे जो तुम्हारे मनोरथ तो बहोत आछो हे, ओर श्रीनाथजीकोहुं अनुमत हे, परंतु यामें लौकिक बढेगो, ओर हम सो नाहि न करे, भलेइ करो, एसी बातमें कोन नाहि करेंगे ॥ ओर मेरो मनोरथ तो एसे हतो जो हमारे देखते न्यारे न होय सो अब न्यारे देखने घडेंगे ॥ फेरि सब बालकननें अपने अपने घरसुं न्यारी न्यारी सुखपसु सिद्ध करव ॥ फेरि श्री नोकुलसो श्रीगुसांइजीकी आज्ञा लेके श्रीअभुरजी पधारे,

सो गिरिराजजीमें श्रीमथुरेशजीके मंदिरमें भेले बिराजे ॥ फेरि दिवारीके दिन श्रीगुसांइजोको आज्ञासों हटडि भेली भइ, ओर श्रीनाथजीके इहां भेले पोठे ॥ फेरि मंगलभोग सब स्वरूप अपने मंदिरमें अरोगे, सो राज-भोग आरति भये पीछे, प्रथम श्रीमथुरेशजी श्रीनाथजीके पास पधारे, श्रीगुसांइजी श्रीनाथजीकी कीर्तनिया गलीके द्वारपे साम्हे पधरायवेकूं पधारे ॥ फेरि अति आनंदसों श्रीमथुरेशजीकी पालखी श्रीनाथजीके मणिकोठामें पधराइ ॥ फेरि ताला खोली, श्रीहस्त खासा करिके श्रीमथुरेशजीकुं श्रीनाथजीकी पीठकसों लगाय गादीपं पधराये ॥ फेरि श्रीगोविंदरायजो श्रीविट्ठलेशरायजीकुं पधराय लाये सो यथाक्रमसों श्रीमथुरेशजीकी चरणचोकीसों लगाय, श्रीगुसांइजी आपने पधराये ॥ फेरि श्रीबालकृष्णजी श्रीद्वारिकाधीशकुं पधराय लाये सो यथाक्रमसुं श्रीगुसांइजीनें श्रीनाथजीके पास दक्षिणांग पीठकसों लगायके पधराये ॥ फेरि श्रीगोकुलनाथजी श्रीगोकुलनाथजीकुं पधराय लाये सो यथाक्रमसुं श्रीगुसांइजीने श्रीद्वारिकाधीशकी चरणचोकीसुं लगायके पधराये ॥ फेरि श्रीरघुनाथजी श्रीचंद्रमाजीकुं पधराय ल्रये, सो यथाक्रमसुं श्रीगुसांइजीने श्रीमथुरेशजीके संग उत्तरांग पधराये ॥ अब श्रीचनइषामजी श्रीमदनमोहनलालकुं पधरायके आये सो यथाक्रमसुं श्रीगुसांइजीने श्रीद्वारिकाधीशके संग यथाक्रमसों दक्षिणांगसुं लगाय पधराये, फेरि श्रीनाथजीके इहांसों श्रीगुसांइजीने श्रीनवनितप्रियजीको सब बालकन सहित गोवर्धनपूजाकुं पधराये, फेरि पूजनी शिलाके पास एक लंबी शिला हे तहां श्रीगुसांइजो आपने पधराये, ओर श्रीगोवर्धनपूजा करे. श्रीगोवर्धन पूजा करिके, फेरि श्रीनवनितप्रियजीकुं श्रीनाथजीकी चरणचोकीके पास गादी उपर मध्यमें पधराये, फेरि शीतल भोग धर्यो द्वाराय शीतल भोग सराय, अन्नकुटको भोग धर्यो फेरि समय भये भोग सराय, दर्शन खुलाये, सब ठेकापेकी आरती करी, फेरि सब स्वरूप अर्ध नीचे पधारे, सो श्रीगुसांइजीने आज्ञा करे तुम्हारे जो मनोरथसों बह आमंदके दर्शन हमकुं भये। सो असो अन्नंद सदा इ



करवा करो ॥ तब सबननें विनती करी जो जो आज्ञा ॥ सो वाइ दिनसूं सब स्वरूप आज पर्यंत वाइ रीतिसों चले हे, पधारे हे, फेरि श्रीगुसांइजी कंदरामें पधारे पीछे कोइ कालसूं श्रीगोकुलनाथजाके बडे पुत्र श्रीगोपालजीनें श्रीघनश्यामजीसूं केहेवाइके काकाजीसूं कहियो जो श्रीमदनमोहनजीकी सुखपालको दुंडा बहोत बडो हे सो हमारी भीतकुं लगे हे सो हमारी भीत पड जायगी तासूं थोडोसो कटवाय डारे तो बहोत आछो ॥ श्रीठाकुरजी सुखसुं पधारे, ओर हमारी भीतकुं लगे हूं नहि ॥ सो खवासने जायके श्रीघनश्यामजीसूं विनती करी जो महाराज श्रीगोपाललालनें एसे केहेवाइ हे तब श्रीघनश्यामजीने आज्ञा करे जो श्रीगोपाललालसूं कहियो श्रीमदनमोहनलालको सुखपालके दुंडा कवहूं कटेगो नहो, एतो एसेइ चले जाइंगे, ओर तुम्हारे दुःखसों में दादासों न्यारो भयो हूं, नहि तो न्यारो काहेकुं हो तो सो दूर बेटे हो रगडा करोहो, सो एसी तुमकुं न चैये ॥ फेरि खवासनें आयके कही जो या प्रमाण काकाजीनें आज्ञा करी हे ॥ फेरि श्रीगोपालजी बोले जो या बातको फल काका जीकूं थोडे इ दिनमें मिलि जायगो ॥ यों केहेके चुप होय गये ॥ सो वा वर्षमें तो अन्नकुट आछी रीतिसों अरोगे ॥ फेर अन्नकुट भये पीछे उष्णकाल आयो सो लाग तो घणे दिनसूं देखते हते ॥ सो उष्णकालमें चोकमें पोढायके श्रीघनश्यामजी नेत्रमुंदिके पंखा करते, सो श्रीगोपालजी छजाकी आडिसों खवासपें जेवडा पकडायके आप जेवडा पकडिके उतरिके चोकमें आये ॥ सो काकाजी नेत्रमुंदिके पंखा करत हे सो देखीके भय तो लग्यो जो मती नेत्र खोलिके देखे ! परंतु आप तो श्रीघनश्यामजी केवल मानभावी हुते सो खडभडाट सुन्यो परंतु नेत्र न खोल्यो ॥ एसे भावना विचारी जो प्रभुनकी अनंत लीला हे ॥ एसे विचारीके नेत्र न खोले ॥ ओर इन श्रीगोपालजीनें उतावलमें शैयाजो खोली, चादर उंची करी, श्रीमदनमोहनलाल तथा, एक श्रीस्वामिनीजी हाथ लगे, सो लेके झटपट चडि गये ॥ ओर घर जायके खवाससों कहो जो अपने कार्य तो

क्यों परंतु ए कार्य छानो न रहेगो ॥ तासों इनको कलु उपाय करो पीछे एक सिंधकी ब्राह्मणी वैष्णव कृपापात्र हती सो वे मनोरथ नित्य करती जो महाराज मोकुं श्रीगोकुलनाथजीके चरणस्पर्श करावो ॥ सो वा बिरियां वे सुधि आय गइ सो खवासपे बुलवाइ सो वे तुरत आइ ॥ वाको कृपा करिके समजाइ के तुं नित्य श्रीगोकुलनाथजीके चरणस्पर्शकी विनती करती सो ए श्रीमदनमोहनलाल श्रीगोकुलनाथजीके बराबर हे सो तोकुं पधराय देउहुं सो तुं पधराइके अपने देशकुं चली जा काहुसों कहियो मति ॥ सो वे तो अपने अहोभाग्य मानीके पधराय अपने देशकुं चलि गइ ॥ अब इहां प्रातःकाल जगावती बिरियां देखे तो शैयामें श्रीमदनमोहनलाल तथा श्रीस्वामिनीजी ए दोउ स्वरूप नहि हे सो देखिके आपकुं बडो क्लेश भयो, सो श्रीमदनमोहनजीके मंदिरमें भोंयरा हें सो तामें आप पधारे काहु सों कलु कह्यो नहि ॥ ओर श्रीगोकुलनाथजी आप छीवे होयके पधारे ओर खवासने समाचार कहे जो श्रीमदनमोहनलाल खोरीमें पधारे, ओरं भाइ परम कष्ट करिके भोंयरामें पधारे, सो सुनतेइ आप एकमेक वहे गये, ओर कमर धोयके, श्रीमदनमोहनलालके मंदिरमें पधारे; सो जहां श्रीघनश्यामजी बिराजे हते भोंयरामें, तहां पधारे सो बहोत समजाये सो न तो काहु सों बोले ओर नेत्रसुं जलको प्रवाह चलि रह्यो हे, ओर श्रीगोकुलनाथजी बाह्यर पधारिके मुखीयाजीसों आज्ञा करे जो जेसे श्रीमदनमोहनजीकी सेवा होती ताहि रीति सों श्रीस्वामिनीजी बिराजे हे तिनकी मंगला सों लगाय सेनपर्यंत सेवा करोगे ओर दर्शन न करावेंगे ओर श्रीस्वामिनीजी बिराजे हे सो कबी ने कबी श्रोठाकुरजी पधारेंगे तासुं आनंदपूर्वक सेवा करोगे ॥ ओर मुक्तेइ वैष्णवकी भीड तथा बालकहुं बिराजते हते तिनसबनके आगे ओर हुं भीड भरी रही हती सो सबनके आगे आज्ञा करी जो “मेरे घनुंकुं दुःख दियो होयगो ताको निर्वश जैयो” सों वा बिरियां खवास पास ठाडो हतो सो वानें विनति करी जो कृपानाथ ! एसे तो आज्ञा मति करो, कदा

बित्त अपनेइ मैका कोइ होय तो ? तब फेरि आज्ञा करी जो हमारे घरमें होयगो तो हमारोइ निर्वश जायगो॥ फेरि राजभोग पर्यंत सेवासों पोहोंचके पाछे आप तथा ओर बालक तथा वैष्णव सब बिना प्रसाद लिये श्रीघनश्यामजीके पास पधारे, ओर दुंडिवेको प्रयत्न बोहोत कर्यो ओर बालकनकों तथा वैष्णवसों कहीके या समय कोइके घरमें श्रीमदनमोहनजी होय तो पाछे पधराय दे तो वार्को यश कबो न भूलेंगे ॥ सो कोइके पास होय तो कोइ हामी भरे ! आप तो सिंधके मार्ग पधारते भए, सो तीन दीनां तांड बालकननें कितनेकननें भोजन न कर्यो, ओर श्रीघनश्यामजी तो बिराजे तहां तांड फलाहार हि कर्यो, ओर वाइ दिनसों श्रीठाकुरजीको चोकमें पोढवो बंध भयो ॥ फेरि श्रीघनश्यामजी तो विरहमेंइ लीलामें पधारे ॥ फेरि लालजीके हाथ तो श्रीठाकुरजी नहि आये, फेरि श्रीनाथजी श्रीगिरिराजजीसूं उठे सो सिंहाड पधारे, ओर हूंस्वरूप जगे जगे पधारे, फेरि वे वाइ वैष्णव श्रीमदनमोहनजीकुं पधराय गइ हती सो वृद्ध भइ, सो चित्तमें आइ जो अब तो श्रीजीद्वारमें रहोंगी, ओर श्रीनाथजीके दर्शन सेवा कलुक दिन करोंगी, सो एसे विचारीके कलुक दिन श्रीजीद्वारमें आय रही श्रीमदनमोहनलालकूं संग पधरायके ॥ सो कितनेक दिन रही, सो शाकगरकी सेवामें नित्य आवती ॥ सो एक दिन सेवा करती हती, ओर श्रीनाथजीके उत्थापन समय शंखनाद भये, सो सेवा अधूरी छोडी उठि ठाढी भइ, सुनिके घरजाबे लगी ॥ सो तब शाकगरियाजीने कही जो सेवा अधुरी छोडिके मति जा, पूरी करीके जैयो ॥ तब वानें कही जो मेरे श्रीठाकुरजीकुं जगावने हे तब शाकगरियाजीने कही जो एसे कहा तेरे सातस्वरूपकी निधि जगावनी हे, जो श्रीनाथजीकी सेवा छोडिके दोडे हे ॥ तब वानें कही जो सात स्वरूपकी निधि होय तो कोनकुं खबर हे ॥ यों कहीके डोकरी तो अपने घर गइ, ओर शाकगरियाजीने भीतर जाय बैठकमें श्रीदाउजी महाराजसों खबर करी जो महाराज यह बात भइ, तासों श्रीमदनमोहनजीको पत्तो लगे



हे ॥ सो सुनत हि आप अपरसमें होयके शाकगरियाकों लेके वा डोकरिके घर पधारे ॥ सो उहां उत्थापन भोग आये हते, सो वा डोकरीकुं शाकगरिया जीनें हेला पाळ्यो सो वा डोकरी बाहर आइ के देखे तो श्रीदाउजी महाराज ठाडे हे, सो देखीके डोकरीनें दंडवत करे, तब श्रीदाउजी महाराज आज्ञा करे जो हम तेरे श्रीठाकुरजीके दर्शन करवेकुं आये हे, तब डोकरीने कह्यो जो आछो, में भोग सरायके खबर करोंहों ॥ तब आपनें कही जो हम हि अपरसमें आये हे, समय होय तब कहियो जो हम हि भोग सरावे, ओर डोकरीकुं पास ठाडी राखी. फेरि भीतर जावे न दोनी इतनें समय भये, सो श्रीदाउजी महाराजनें भोग सराये ओर दर्शन करे ओर जेसे सुने हते तेसे देखे ॥ फेरि डोकरीसों कही जो ए श्रीठाकुरजी तो हमारे हे तुं कहांसूं लाइ, ओर तोकों कोनने पधराय दीयेहे ॥ तब वानें कहि जो आपमेंसो कोइने दीने होइंगे, नाम तो में न लेउंगी, ओर आपकी निधि होय तो पधराय लीजे, ओर नहीं होय तो मोकों सेवा करिवे देउ ॥ सो फेरि खीमनोरसों श्रीहरिरायजीकुं स्वार पठायके पधराये सो श्रीहरिरायजी ने कही जो हां हमने अगाडी दर्शन करे हे जो येइ श्रीमदनमोहनलालजी हे ॥ तब वा डोकरीके घर सों श्रीमदनमोहनलालकूं बडी प्रसन्नतासूं पधराये ॥ सो श्रीनवनीतप्रियजीके मंदिरमें पधराये, ओर पंचामृत स्नान करायो, ओर श्रीघनश्यामजीके नाती कामवनमें बिराजते हते सो उहां वधाइ पठाइ, ओर शाकगरियाजीकुं सोनाके कडा ओर सिरपाव दीनो ॥ ओर उहांसो बधैयाके संग श्रीघनश्यामजीके छोटे नाती श्रीउपेन्द्रजी पधारे, सो इहां सिंहाडमें आये, सो श्रीदाउजी महाराजनें श्रीमदनमोहनलालजी श्रीनवनीतप्रियजीके मंदिरमेंते पधराय दिये ॥ इनके आवते तांइ भेले श्रीनवनीतप्रियजीके पास बिराजे ॥ सो संवत् १७४६ के श्रावण सुदि ५ को कामवनमेंदाखल भए ॥ सो ता दिनको पाटउत्सव मने हैं ॥ फेरि बडे भाइ श्रीकांतजी परदेशमें बिराजतहते सों उहां वधाइ सुनिके वेहु घर पधारे, सो विनकी आडीसों मगशर सुदि ३ को पाट उत्सव मने हे ॥ सो श्रीम-

दनमोहनजीके इहां दोग पाट उत्सव मने हे ॥ सो श्रीमदनमोहनलाल आशरे वर्ष ६० साठके आसरेसुं कृपा करिके घर पधारे श्रीस्वामिनीजीकुं मिले ओर जगतमें जेजेकार भयो ॥ श्रीगुसांइजीको सातमो घर जगतमें सो अस्त भयो हतो सो फेरि उदय भयो ॥ सो बडो आनंद भयो ॥ इति श्रीगिरिधरलालजी महाराजके वच नामृत एकसो सत्तर संपूर्ण ॥११७॥

 [वचनामृत ११८ मो.] 

अब एकसो अष्टादशमो वचनामृत आप आज्ञा करे ॥ जो अब स्नानयात्राके उत्सवकी दासने विनती करी जो ताकी आपने आज्ञा करी ॥ जो स्नानयात्रा हे, सो वेदोक्त उत्सव हे ॥ तब दासने विनती करी जो कृपा नाथ ! वेदाक्त उत्सव कोन रीतिसो सो कृपा करिके कहिये ? तब आपने आज्ञा करो जो वेदमें श्रीठाकुरजीकूं शंखोदक स्नान करायवेकी कहि हे, सो मर्यादाभार्गमें तो नित्य शंखसूं स्नान करावे हे ॥ सो शंखमें तो शीतल जल भर्यो जाय तातो जल ता भर्यो न जाय तासों मर्यादामार्गि तों बारे महिना श्रीठाकुरजीकूं शीतल जलसो स्नान करावे हे, ओर अपने पुष्टिमार्गमें तो ऋतु अनुसार सेवा हे ॥ सो शीतकालमें तातें जल बिना स्नान न होय ॥ तासों ज्येष्ठ सुदि १५ को ज्येष्ठानक्षत्र आवे हैं सो वा दिन उष्णकालको तो भर हे, सो श्रीठाकुरजीकूं शीतल जल सुहाय, ओर ज्येष्ठा नक्षत्र हे सो अभिषेकके विषे मुख्य हे, तासों ज्येष्ठानक्षत्र मुख्य राख्यो हे ॥ सो ता दिन वेद मंत्रसों शंखोदकसों अमृताभिषेक पुरो होते तांइ स्नान होय हे ॥ तासों तारा उदय दिखतें सोइ स्नान करावनो सो अमृताभिषेक पुरो होते बंध होय, फेरि शृंगार धोति उपरणा केसरको कां-गराके पेहेरे ओर श्रीमस्तकपे कुल्हे ओर उत्सवको भोग, गोपीवृद्धभमें अरोगे, और श्रीपादुकाजी बिराजते होय तो जलकूं छानिके स्नान करावनो ॥ ताको अभिप्राय जो जलमें श्रीतुलसीजी होय तासुं, श्रीपादुकाजी कूं श्रीतुलसीजी न आवे ॥ तासों छाननो ॥ श्रीपादुकाजीकूं तुलसीजी

समर्पे न जाय ॥ अब पेहेले दिन जलभरे, शयन भोग करीके वामें इतनी वस्तु मिलावे ॥ एक तो अरगजा, तथा रायवेलकी कली, तुलसी, कदमके फूल, खसकी गटी, गुलाबजल, श्रीयमुनाजल, इतनो जलमें मिलावनो ॥ स्नानके जलमें; तथा अरोगवेके जलमें, तथा अचवनके जलमें, श्रीयमुनाजीकी भावना राखनी ॥ जलसों अधिवासन करनों ॥ श्रीगिरिधरलालजी महाराजके वचनामृत एकसो अठार संपूर्ण ॥११८॥



 [वचनामृत ११९] 

अब एकसो उन्नीसमो वचनामृत आप आज्ञा करे ॥ जो अब रथयात्राको उत्सव पुष्योक्त हे, सो पुष्यनक्षत्र, अशाढ शुदि २ वा पडवा, वा तीजकूं, जा दिन पुष्य होय ता दिन रथयात्राको उत्सव मने ॥ श्रीठाकुरजीकूं अभ्यंग होय, श्रृंगार भारी होय, श्रीमस्तकर्पे कूल्हे धरे, ओर बागा जरदोजी, कारचोवको धरे, ओर पेहेले दिन रथकूं सिद्ध करनो, सो साज सब दुरस्ती सो तैयार करनो, घोडाको श्रृंगार करनो, सब तैयारी करीके रथकूं डोलतोबारीमें पधरावनो ॥ फेरि उत्सव दुसरे दिन होय, सो राजभोग धरि के रथको अधिवासन करनो फेरि राजभोग अरोगीके, आरती होय पाछे श्रीठाकुरजी रथमें बिराजे ॥ तब दासनें विनती करी जो कृपानाथ ! श्री नाथजीके इहां तो रथयात्राको उत्सव नहि मने हे, ओर सातो घरनमें रथोत्सव मने हे ॥ सो तामें कोउ तो घोडा विना रथमें बिराजे हे, कोउ राजभोग उपरांत रथमें बिराजे हे, ताको प्रकार कृपा करिके कह्यो चैये ॥ फेरि रथसो उत्तरिके श्रृंगार वडो होय हे, सो केसे ॥ सब आज्ञा होय ॥ तब आपने आज्ञा करे ॥ जो रथयात्राको उत्सव तो श्रीजगन्नाथरायजीके

इहांसे रच्यो ह ॥ सो श्रीठाकारजां जनकेपुरे पधोर ह, सो जेनकेपुर ह श्रीजगदीशको प्रागटय स्थल हे ॥ तातें जनकपुर कहे हे सो लोककी ज्ञानता हें ए तो जन्मस्थल हे, सो तो हमहुं काशीमें छपन्न भोगमें प तब संवत १९२९ की रथयात्राके दर्शन करे, सो बहुतही खुब होय

कल्लु वर्णन कर्यो नही जाय सो श्रीजगदीशको रथ सोलेपैयाकोहे, श्रीबल-
 देवजीको रथ बारे पैयाकोहें ॥ ओर श्रीसुभद्राजीको रथ आठपैयाकोहे ॥
 ओर बडो शिखरहे ॥ मानु बडो मंदिर होय प्रसो दिखेहे ॥ ओर श्रीनाथ-
 जीके घर तो रथयात्राको उत्सव नहीं मानेहे ताको अभिप्राय येइ हे, जो
 रथको उत्सव चलहे, तासों आपकी स्थिरभावना हे, तासों श्रीगुसांइजीने
 नहीं मान्यो हे ॥ ओर वा दिन श्रीमहाप्रभूजीको आराधन हे या कारण
 सो मुख्य स्थानपें नहि मान्यो हे ॥ ओर जा घरमें घोडा नहीं जुते हे,
 सो तो बालककों रथ जानिके डरपवेकी भावना सों घोडा नहीं जुते ॥ ओर
 सखा रथकुं खेंचे हे, ओर श्रीप्रातृचरण श्रीयशोदाजी पीछे पधारे हे ॥ ओर
 अगाडि छोटे छोटे सखा, ध्वजा, पताका, छत्र, चंबर, लिये चले हे ॥ ओर
 रथ चले तब श्रीठाकुरजी डरपे हे, तब श्री यशोदाजी पकडे हे, तासों बिना
 घोडाके रथके बाललीलाकी भावना हे ॥ ओर जहां घोडा जुते हे, तहां
 किशोरलीलाकी भावना हे, श्रीस्वामिनीजी सहित रथमें विराजे हे, ओर
 सखी जन सब आसपास अनेक हे, ओर दोय सखा अश्व रूप होयके रथकुं
 साजत हे ॥ या प्रमाण किशोरलीलाके रथकी भावना हे ॥ ओर कोइ ठिकाणे
 गोपीवल्लभ अरोगीके, कोइ ठिकाणे राजभोग अरोगीके पधारे हे ॥ बालकनकी
 सावकासको भाव ठेठसों चल्यो हे ॥ सो वाइ प्रमाण चले हे ॥ ओर शृंगार
 विजय होवेको कारण येइ हे, जो एक तो उष्णकाल हे, तासों शृंगार
 विजय होय हे ॥ ओर श्वेत पेहेरे हे ताको कारण, जो वा दिन श्रीमहा-
 प्रभूजीकों आराधन हे, ओर येसे श्रीनाथजीके इहां हुं श्वेत वख सुनेरी
 कीनारीके धोरानको वागा पेहेरे हे तथा शृंगार कुल्हे के, तथा उत्सवको
 भोग, गोपीवल्लभमें अरोगे हे ॥ ओर राजभोग समय छोटो रथ हुं धर्यो
 जाय हे ॥ प्रसिद्ध दर्शन नहि होय, तासों सब एसे जाने हे ॥ ओर रथको
 मुख तो श्रीडाकोरजीमें बहोत आछो आवे हे ॥ दोय साल हमने तो कर्यो
 सो आखी गोमती सागरकी परिक्रमा देवे हे ॥ ओर खूब भोग अरोगे हे ॥

ओर खूब आनंद होयहे ॥ तरेह तरेहकी अस्वारीमें बिराजे हे ॥ ओर रथ-यात्राको आनंद जो अपने इहां श्रीद्वारिकांधीशके होय हे सो तो त्रिलोकमें नाहीं ॥ निज तिबारी में दक्षिण मुख बिराजेहे, ओर पेहेले भोगके दर्शनमें निजमंदिरकी तिबारी मध्यकीमें बिराजे हूं, फेरि भोग आवे हे ॥ ओर दुसरे भोगके दर्शनमें निजमंदिरकी तिबारीमें पूर्वमुख तिबारीके तीसरे द्वारपें दर्शन दे हे ॥ फेरि दुसरो भोग उहां इ आवे हे ॥ फेरि तीसरे दर्शनमें खुरा उपरसों उतरिके चोकमें पधारे हे, उपरसों पुष्पवृष्टि होय हे, तहां चोकमें होयके डोलतीबारीमें तीसरो भोगबडो आवे हे, फेरि समय भये भोग दराय, दर्शन होत हैं छिडी अरोगे हे ॥ ओर मल्हारके कीर्त्तन होयहें ॥ फेरि आरती होय पाछें डोलतीबारोके मध्य द्वार खुरापें होयके प्रथममुख, निजमंदिरके सामें बिराजे, फेरि परिक्रमा करी, दंडवत् करि, श्रृंगार विजय भये, फेरि दुसरे श्रृंगार होय ॥ अनोसर करे, फेरि सांजके समय सैनमें तांगाके रथमें बिराजे ॥ तीन भोग, चारों दर्शन, चारो युथाधिपतिके भावसों हे ॥ एसेइ डोलमें, एसेइ प्रबोधिनीके जागरनमें, ए सब एकहि भावनाहे ॥ इति श्रीगिरिधरलालजी महाराजके वचनामृत एकसोउन्नीसमो संपूर्ण ॥११९॥

३१.  [वचनामृत १२० मो.] 


अब एकवीसमो वचनामृत आप आज्ञा करे ॥ जो एक बिरियां रथयात्राके उत्सवपे मिति अशाड शुदि २ गुरुवार. संवत् १९३४ के दिन श्री-मथुराजीवारे गोस्वामी श्रीकल्याणरायजी, तथा श्रीवजनाथजी, तथा लाल जी छोटे बडे ४ मिलिके छ स्वरूप रथयात्राके दर्शनकुं पधारे ॥ सो रात्रि कुं एक गादीपे बिराजे, ओर भीतर श्रीमाजीमहाराज हूं बिराजे, सो प रस्पर बतरावते आनंद सों वार्त्ता प्रसंग चलि रह्यो हे ॥ ता समय आपनें श्रीवजनाथलालसो कही जो हमने सुनी हे जो तुम वार्त्ता प्रसंग आछो करो हो तो इहां हूं कल्लु प्रसंग चलावो ॥ तब आपकी आज्ञा तें श्रीवजनाथ-लाल कहे जो कोइ प्रश्न करे तब प्रसंग चले ॥ तब आपने दासकुं बुला

यो, ओर आज्ञा करे जो आज श्रीवजनाथलालसों प्रश्ववात्ता चले सो तुम प्रश्व करि ॥ तब दासनें विनती करि जो श्रीगुरुदेव जीवकुं शरण लेवे हे, सो एक कालदान एकहि मंत्रको करे हे, सो तामें तें कोउ तो अत्यंत कृपापात्र होय हे, ओर कोउ भलोभल रहे हे, ओर कोउकुं कलु लगे नहीं है ॥ ताको कहा अभिप्राय होयगो ? तब श्रीवजनाथलालनें आज्ञा कीये जो तीन प्रकारके जीव हे ॥ एक तो अध्यात्मक ॥ आधि दैविक ॥ आधि भौतिक ॥ सो तामें जेसो अधिकार होय तेसो अनुभव होय तब दासनें विनती करी जो अधिकार परत्वे तो ओर देवता हुं फल देतें हे, तो आप पुष्टि पुरुषोत्तमकी आधिक्यता कहा ? तब श्रीवजनाथलाल आज्ञा करे जो श्रीप्रभुजी तो उदारहि हे परंतु जीव तो मायाके आवरणमें लपटयो थको शरण आयो हे सो कलु श्रीप्रभुजीके अभिप्रायकुं जानें नहीं हे, परंतु प्रभु जी तो छौडेंगे नहीं, परंतु इन जीवके पांच शत्रु हे ताकुं जीतेगो ॥ तब श्रीप्रभुजीके अंगिकार होयगो ॥ सो पांच शत्रु जीवको बडे दुःखदायक हे सो धीरे धीरे दुर होइंगे ॥ तब जरूर अंगीकृत होयगो ॥ तब दासनें विनती करी जो कोन कोनसे पांच शत्रु हे सो कहिये ॥ तब आप आज्ञा किये जो ॥ एक तो १ निद्रा, २ आलस, ३ लाज, ४ कुलकान, ५ दंभ, ६ पांच शत्रु हे, तामें लीन भयो थको रह्यो सो तो योइ रह्यो, ओर पांच शत्रु जीते ताको श्रीप्रभुजी सानुकुल भये जाननें ॥ तापें एक आख्यायिका कहोसो वार्ता ॥ जो कनोजवारे शेठ दामोदरदासजी संभरवाले वैष्णव भये ओर हुं घरके मनुष्य तथा स्त्री, इत्यादिक तामें शेठजीकुं तो साक्षात् अनुभव भयो, जो पांचो शत्रु जीती लियो ॥ जो श्रीमहाप्रभुजीने श्रीद्वारि काधीशकी सेवा माथे पधराय दीनी. सो प्रभुनकी सेवा करते करते केवल अनन्यता आइ गइ सो सेवा संबंधी कार्य सब अपने हाथसूं करवे लगे, ओर बडे ग्रहस्थ द्रव्यादिकसों संपन्न हते ॥ ओर घरमें सो लौंडी सुसरारतें आइ हती ॥ ओर राजद्वारको काम करतें, सो एसे वैभवमेंतें चित्त

काढिके केवल श्रीप्रभुनकी सेवामें चित्तलगायदियो ॥ तब श्रीद्वारिकाधीश सानुभाव जनावते, सो एक समय दामोदरदास सब सेवा घरमें तो करते परंतु जलपानकी सेवा खुल्ली पडी गइ ॥ सो गागरि लेके जल भरिबे जाते ॥ सो सुसरकी दुकान आगे होयके आवे जावेको मार्ग हतो, सो जल भरवे जाते सुसरनें देखे, सो देखीके कही जो तुम मेरे जामात्र होयके यह कार्य करो हो सो हमकुं बडी नीची दिखे हे ॥ तासों घरमें इतने मनुष्य हे सो कहा नकरे ? वाहिपें करावो ? ॥ आप मति करो ॥ एसे सुसरनें कही, सो सुनिकें चले, ओर कह्यो जो अब न करंगे ॥ परंतु लौकिक प्रतिष्ठा छोडायवेके निमित्त कुलकानादि अभिमान छोडिबे निमित्त, दुसरे दिन एक घडा दामोदरदासजी अपनी स्त्रीकुं दियो, ओर एक घडा आप लियो, ओर दोउजने संग जलपान लेवे गये ॥ सो गागरि पधरायके आवती बेर सुसरनें देखे सो देखीके दामोदरदासजीके पीछे पीछे घर गये, सो जायके पावन पडे, ओर कही जो तुमने बडो जुलम कियो, जो मैंने सो लौंडी बेटीके संग दीनी ओर मेरी बेटी बजारके बिचमें होयके जल भरे। तासों मेरी लाज जाय हे ॥ तुमतो तुम्हारी राजी आवे सो भले इ. करो परंतु मेरी बेटीकुं जल भरिबे मति ले जाउ ॥ इतनी बात भये तें स्त्रीजनके चित्तमें हु लौकिक विचार आयो सो जलपानकी सेवा छोडी दीनी ॥ ओर दामोदरदास तो केवल निर्भय भये थके सो वह सेवा न छोडी ॥ एसे करत श्रीमहाप्रभुजी फेरि इनके घर पधारे ॥ सो दामोदरदासके स्नेहते तथा सेवा तें आप अत्यंत प्रसन्न भए, सो प्रसन्नतामें आज्ञा करी जो दामोदरदास तुम्हारे कलु मनोरथ होय सो मागो ? तब दामोदरदासनें विनति करी जो कृपानाथ ! मेरे राजके चरणकमल प्राप्त भए अब मेरे कहा न्यूनता हे ? सो मायुं ॥ मेरे तो राजके प्रतापसों काहु बातकी कामना नहि हे ॥ एसे कृपारसभोने दामोदरदासजी हते परंतु आपनकुं कारण दिखावनो हे, सो आग्रह करिके फेरि आज्ञा करी, जो स्त्रीजन सों पूछ दिखो, तब स्त्रीसों पूछयो जो तुम्हारे कलु मनोरथ होय सो मागो ॥ तब

स्त्रीने पुत्र माग्यो जो एक पुत्र होय तो आछो, तब आपने आज्ञा करी जो हां पुत्र होयगो ॥ सो फेरि समय पाय स्त्रीकूं गर्भ रह्यो, सो प्रसवके नजी कके दिनमें दामोदरदासके मेहेछामें एक डाकोतीआ आयो, सो डाकोती-आकुं लौंडी द्वारा पूछयो जो कहा होयगो ? तब वानें कछो जो बेटा होय गो, सो ए आसुरावेश भयो ॥ सो फेरि श्रीमहाप्रभुजी पधारे सो दामोदरदासको आज्ञा करी जो तुसुकुं तो अन्याश्रय भयो हे ॥ सो तजविज करेतें बातमें आइ जो एक दिन लौंडीने डाकोतीआसों पूछयो हतो, तब आज्ञा भइ जो बेटा तो होयगो परंतु स्लेच्छ होयगो ॥ तब तो जानी जो ए बात इतनी सेज बातमें इतनी भइ, सोतो बिना समजे भइ, फेरि वे दामोदरदासकी स्त्री सावधान भए, जो एसो तो दामोदरदासजीको सत्संग तोहु ए दिशा प्राप्त भइ ॥ फेरि वानें न तो वा पुत्र सों स्नेह राख्यो, न तो कुलकानि राखी, वे बेटा होत मात्र वाकी माकों देदियो ॥ सो फेरि वाको मोढोहु न देख्यो ॥ फेरि दामोदरदासजीकी देह छुटि, सो चार दिना तांड छानी राखी, ओर वैष्णवके संग द्रव्यादिक तथा वस्तुभाव श्रीप्रभुनसहित श्री गुरुदेवके इहां नाव चलतो करी ॥ सो छालीस कोल नाव पोहोंची, तब खबर करी ओर घरमें कलु न राख्यो फक्त एक माटीको करवा जलको भयो पन्नालापेधरि राख्यो हतो ॥ सो खबर सुनिके बेटा आयो सो देखिके एक नाव लेके पीछे गयो सोवे नाव तो अडेलमें दाखल होइ गइ ॥ फेरि मुंडपीटी के पाछो आयो ॥ एसे दामोदरदासकी स्त्री सावधान भइ ॥ सो एसे आश्रित होय तो श्रीप्रभुजी कृपा करे ॥ वे दामोदरदासकी स्त्रीकी हुं देह थोडे दिनमें छुटी श्रीप्रभुनकी लीलामें प्राप्त भये, तासों आश्रय दृढ एकाग्रसों राखे ताको तो श्रीप्रभुजी जरूर अंगीकार करे ॥ तासों शरणागत जीवकुं एक आश्रय दृढ राखनो ॥ जो याको मुल सत्संग होय तो पांच शत्रु बाधा न करे ॥ तासों मुख्य शरणागत जीवकुं आठो प्रहर सत्संगमें इ रहनो ॥ सत्संग हे सो जेसे अग्नि हे सो वापे व्यवधान करिके बढावे, ओर योइ धरि राखे तो बहोत बेरमें प्रजले, परंतु अग्नि-सुंकाष्ट भेलो भयो वैचे ॥ सो

ए तो लौकिक अग्नि हे, सो तो कबहु बुझि जाय, ओर ए अलौकिक अग्नि हे सो तो अक्षय्य हे, सो कबहु बुझे नहि ॥ सो ताको तो सत्संग रूपी वयार लाग्यो चइये के प्रज्वलित होय, अलौकिकमें प्राप्त होय ॥ ओर प्रथम कहिके ओर देवताहुं फल देवे हे, सो ओर देवताको फल दियो तो अक्षय्य नहि हे ॥ नाशवान हे ॥ तापें वार्त्ता ॥ जो हरिण्यकशिपुने ब्रह्माजीको तप कर्यो, ओर अपनी मती अनुसार विचारीके वरदान माग्यो, सो दियो ॥ जोमें कबहुं काहु प्रकारसो मरुं नही एसे वर माग्यो, सो ब्रह्माजीनें वर दिये सो हु नाशवान भयो ॥ ओर हरिण्यकशिपुकुं श्रीठाकुरजीने मार्यो ॥ ओर बाणासुरने श्रीमहादेवजीकी तपस्या करिके एकहजार हाथ मागे, सो उषाचरित्रके प्रसंगमें वेइ श्रीमहादेवजीकेदिये हजार हाथ कट गये, ओर देहसंग चार हाथ हते सो रहे ॥ एसे देवता बहोत हे तामें ए द्योय देवता बडे हे ॥ तिनके दिये थके वरदान या रीति सों नाशवान भये हे ॥ तो ओर देवताकी कहा चली हे ॥ तहां कीर्त्तनमें गाये हे ॥ जो “ओर देवता आराधीये सो हरिके भिखारी ॥ अन्यदेव कित सेइये बिगरे आपकारी ॥ एसें बडे भगवदी परमानंददासजीने गाये हे ॥ तासुं ओर देवताको जो फल हे, सो तो निश्चय नाशवान सोइ वृथा हे ॥ ओर श्रीठाकुरजीने वरदान जाकुं दियो सो तो अक्षय्य हे, कबहुं चलयमान न होय ॥ तामें संक्षेप वार्त्ता ॥ जो ध्रुवजीकुं कृपा करी तब ध्रुवपद दियो, सो अद्यापि तांइ अचल हे, सो कोइ काल चले नहीं ॥ ओर राजा बलिकुं दियो सो अद्यापि पातालमें आप जायके उहां चार महिना तांइ रेहेते हे ॥ एसो प्रभूनको दियो तो फल हे ॥ सो अचल हे ॥ एसे अनेक भक्तनके कार्य करे हे ॥ सो श्रीमद्भागवतादि ग्रंथमें निरूपण करे हे ॥ सो कहां तांइ लिखे ॥ तासों जो जीव अपनी सावधानीसुं पांच शत्रुकुं जितिके श्रीप्रभूनके शरण होयगो, ताको काहु बातको भय क्लेश नहीं हे, केवल आनंदकोहि दान करेगे निश्च. यामें संदेह नहीं ॥ इति श्रीगिरिधरलालजी महाराजके वचनामृत संपूर्ण ॥१२०॥



શ્રી મહાપ્રભુજીની ચોર્યાશી એઠકની નમનાત્મક ચાહી

પ્રથમ એઠક શ્રી ગોકુલની શ્રી મહાપ્રભુજી છે. અમારા પૂર્ણ પ્રેમે ત્યાં પ્રભુને દંડવત પહોંચે,
બીજી એઠક ગોકુલમાંથી-મઠી એઠક કહેવાય છે. -અ. ત્રીજી એઠક શ્રીગોકુલમાં શ્યામચંદ્રિની કહેવાય છે-અ.
ચોથી એઠક વૃંદાવનમાં શ્રી મહાપ્રભુજીની છે. -અ. પાંચમી એઠક શ્રીમથુરામાં વિશ્વંત ધરે છે. -અ.
છઠી એઠક શ્રીમધુવનમાં શ્રી મહાપ્રભુજીની છે. -અ. સાતમી એઠક કમોદવનની શ્રી મહાપ્રભુજીની છે. -અ.
આઠમી એઠક બહુલાવનમાં શ્રી મહાપ્રભુજીની છે. -અ. નવમી એઠક શ્રીરાધાકૃષ્ણ કુંડ ઉપર ખીરાને છે. -અ.
દશમી એઠક શ્રી માનસી મંથાપર ખીરાને છે. -અ. અમારમી શ્રી પરાસોલી ચંદસરોવર ખીરાને છે. -અ.
બારમી બાચોરની એઠક સદુ પાંડે ને ધેર છે. -અ. તેરમી ગોવિંદકુંડ ઉપર-એઠક શ્રીમહાપ્રભુજીની છે. -અ.
ચૌદમી સુંદર શીલા એઠક-કર્પી અનકૂટ ઉત્તર -અ. પંદરમી ગિરિરાજ ઉપર પ્રભુ મંદીરની દક્ષિણે છે. -અ.
અમારા પૂર્ણ પ્રેમે ત્યાં પ્રભુને દંડવત પહોંચે-અ. એઠક સત્તર મહાવર વનમાં-શ્રી મહાપ્રભુજીની છે. -અ.
અમારા પૂર્ણ પ્રેમે ત્યાં પ્રભુને દંડવત પહોંચે-અ. એઠક અઠાર સંકેતવન સમીપે કૃષ્ણ કુંડ ઉપર-અ.
આગળથીમી નંદામઠી પાનસરોવર પર છે-અ. એઠક વીસમી કોશીલા વનમાં કૃષ્ણ કુંડ ઉપર છે-અ.
એઠક એકવીસમી શ્રી ભાંડીર વન માંહે છે-અ. એઠક ત્રાવીસમી માન સરોવર-શ્રી મહાપ્રભુજીની છે-અ.
એઠક ત્રેવીસમી સોરમજ મંથા તીરે ખીરાને-અ. એઠક ચોવીસમી ચિત્રકુટે કાન્તાનાથ પર્વત પાસે છે-અ.
એઠક પચીસમી અયોધ્યામાં ખીરાને છે-અ. એઠક છવીસમી ને મૈસિયારજી તીરાને છે-અ.
એઠક સત્તાવીસમી ને કાશીમાં ખીરાને છે-અ. એઠક અઠાવીસમી ને કાશીમાં હતુચાન ધારે-અ.
એઠક આગળથીસમી ને હરીહર ક્ષેત્ર માંથી છે-અ. એઠક ત્રીસમી જનકપુરમાં સાલેક તળાવ પર છે-અ.
એઠક એકત્રીસમી મંગા સાગર કાશીઆશ્રમ માંહે છે-અ. એઠક બત્રીસમી શ્રીયંચારણ બાં નિલ ખોરાને છે-અ.
એઠક તેત્રીસમી બીજી ચંપારણમાં છે-અ. એઠક ચોત્રીસમી પુરી જગન્નાથની બાં છે-અ.
એઠક પંચત્રીસમી ને પંદરપુરની કહેવાય છે-અ. એઠક છત્રીસમી ને નાશીકામાં તૌવન માંહે-અ.
એઠક આઠત્રીસમી ને પના તરિક્ષા ધારે છે-અ. એઠક આત્રીસમી દક્ષિણમાં લક્ષ્મણ વાલાશ્યા છે-અ.
એઠક આગળથીસમી ને શ્રીરંગ માંથી છે-અ. એઠક ચાલીસમી ને વિષ્ણુ કાંચી મહિ છે-અ.
એઠક એકત્રાલીસમી ને સેતુબંધ રામેશ્વર-અ. એઠક એતાળીસમી ને શ્રી મલયાચલ પર્વત પર-અ.
એઠક ત્રેતાલીસમી ને શ્રી કોકશ્યામાં લોહમઠમાં છે-અ. એઠક ચુમળીસમી ને તાપ્રપર્ણી નદી તીરે-અ.
એઠક પીસ્તાળીસમી ને શ્રી કૃષ્ણા નદી તીરે છે-અ. એઠક એતાળીસમી ને પંપા સરોવર પર છે-અ.
એઠક સુકતાળીસમી ને તે પશ્ચ નામ મહી છે-અ. એઠક ઉત્તાળીસમી શ્રી જનાર્દનમાં છે-અ.
એઠક આગળથીસમી ને વિશ્વનાથરમાં છે-અ. એઠક પચાસમી ને ત્રીલોક બાગ્યમાં-અ.
એઠક એકાવનમી ને શ્રી તેતાદી પર્વત પર છે-અ. એઠક બાવનમી ને શ્રી દ્રવસેનજીમાં છે-અ.
એઠક ત્રેપનમી સુરતમાં શ્રીતાપી નદી તીરે છે-અ. એઠક ચૌપનમી ભરૂચમાં શ્રી નર્મલ તીરે છે-અ.
એઠક પચાવન સોરખીમાં અમુરપ્વચ્ચ બામ ચાંદી છે-અ. એઠક છપન નવાનગર નદી નામમત્તે તીરે-અ.
એઠક સત્તાવનમી ને ખંભાળીયા માં છે-અ. એઠક અઠાવન પીઠતરક દારકામાં ખીરાને છે-અ.
એઠક આગળથીસમી ને મુળ ગોમતી તીરે-અ. એઠક આઠમી ને દારકામાં ખીરાને છે-અ.
એઠક એકસઠમી ને ગોપી તળાવ ઉપર છે. -અ. એઠક બેસઠમી શ્રી કમ્બોદાર કમ્બ તળાવ કીનારે-અ.
એઠક ત્રેસઠમી છે નારાયણ સરોવર પર-અ. એઠક ચોસઠમી જુનામઠ-ગીરનાર રેવતી કુંડ પર-અ.
એઠક પાંચઠમી ને પ્રલાલ ક્ષેત્ર છે-અ. એઠક છાસઠમી ને માધવપુર માંહે છે-અ.
એઠક સાસઠમી મુસ પ્રયાગ ને રેલવાડા પાસે છે-અ. એઠક અઠસઠમી તમકોમાં-પંદુજી ગામ પાસે છે-અ.
એઠક બનજોતેરમી ને નેરાડાવી કહેવાય છે-અ. એઠક સીરેમી ને ગોધરા રાખા બાસ ધરે-અ.
એઠક ઠીકોતેરમી ખેરણમાં ગુલરાંતે છે-અ. એઠક ચોતેરમી ને સિલપુર ક્ષેત્રની માંહે છે-અ.
એઠક તેતેરમી ને અવતિકા ઉલ્લેનમાં છે-અ. એઠક ચુવોતેરમી પુષ્કરજીમાં ખીરાને છે-અ.
એઠક પંચોતેરમી ને કુરુક્ષેત્રે બોસને છે-અ. એઠક ઝોતેરમી ને હરિહારે ખીરાને છે-અ.
એઠક સોતોતેરમીથી બદિકાશ્રમ ધામ છે-અ. એઠક છકોતેરમી ને-શ્રી કોઠારનાથમાં છે-અ.
એઠક આગળથીસમીથી બાસઆશ્રમ ખીરાને છે-અ. એઠક એશીમી ને દ્વિમાલ્ય પર્વત પર છે-અ.
એઠક એકપાસીમી ને મંગા સાગરને તીરે છે-અ. એઠક દેવાસીમી ને મુદાચલ પર્વત પર છે-અ.
એઠક તારસીમી ને અડેશમાં ત્રોલ્લીપર છે-અ. એઠક ચોપસીમી ને ચરણાટ ગામે છે, -અ.
ચોપસી એઠક તથા લેને પ્રભાતે નામ, વાય કૃપા મહાપ્રભુજી તથા બંતે પ્રભુનું નામ